

SEBASTIANI

FOXII MORSILII

HISPALENSIS,

DE

NATVRÆ PHILOSOPHIA,

SEV

De Platonis & Aristotelis
consensione.

LIBRI V.

Editio nova, prioribus multò correctior.

Additus est ejusdem Libellus ad finem de
studij Philosophici ratione.



Lugduni Batavorum,

Ex Officinâ IACOBI MARCI.

CIO IO CXXII.

SEBASTIANI

POXI MORILLI

HISPANENSIS

DE

NATURAE PHILOSOPHIA

SEU

DE PLACITO ET AFFECTIONE

CONSENSUS

LIBRI I

PLACITO ET AFFECTIONE CONSENSUS

AD HANC EPIGRAMMAM LIBELLIS AD HANC DE

LIBELLIS AD HANC DE



LIBRARY

UNIVERSITY

OF

Candido Lectori S.

E N tibi Candide Lector, Sebastianum Foxium, Platonica secta, hac tempestate facile principem. virum magnam, nec minus Peripatetica Philosophia intelligentem. Hic novo quodam modo, & hactenus apud Academicos inaudito, Platonem interpretari ausus est. Alij enim commentariis suis summam illum viram, aut involvant, aut obscurant: adeo quidem, ut de singularum periodorum sensu tibi sit divinandum. Cujus rei locuples tibi testis erit Marsilius Ficinus, homo in Platonis lectione versatissimus. Qui ea tamen saepe dicit, quae ne à doctissimis quidem intelligi possunt. At hic noster aliter rem gerit. Res enim Physicas per se satis obscuras ita interpretatur, ut à quovis mediocriter docto intelligi facile possint. Et quanquam in Platonis dialogis, non sit in ordo observatus, qui in sci-

2
entiis addiscendis amat fieri. tamen mi-
rum est quam accurate & methodicè, re-
rum natura constantium scientia in hisce
libris instituat. Omitto styli nitorem
& elegantiam, quibus res difficillime qua-
si ornata, illabuntur magis Lectorum ani-
mis. Hunc ego authorem amice Lector in
tuos usus multò curatius excudi: ut com-
parare ipse possis Peripateticos cum Plato-
nicis. Indignum enim mihi videbatur
Aristotelem solum in scholis circumfer-
ri, quasi ejus praeceptor Plato nihil quic-
quam lectione dignum in Timæo majore
scripsisset. aut ita legendum Platonem
ut non alius adhiberetur interpres, quam
Aristoteles, hoc est acerrimus ejus hostis.
tu ergo utrunque compone, meamq; ope-
ram in Foxio recensendo aequi bonique
facito. Vale.

SEBASTIA

SEBASTIANI FOXII
MORZILLI HISPALENSIS
de naturæ Philosophia, seu de
Platonis & Aristotelis
consensione,

LIBER PRIMVS.

DE PHILOSOPHIA,

Caput I.

PHILOSOPHIAM multi varijs
modis definire, non quòd ipsius
vim posse complecti se brevi ali-
qua descriptione putaverint, cùm eius usus
tam latè pateat : sed ut aliqua ex parte sub-
iectum illius & effectum ostenderent. Plato
eam in Phædone mortis meditationem de-
finivit, ut à rerum corporearum studio ad
incorporearum contemplationem animos
philosophantium avocaret, negligendam-
que corporis curam ostenderet. Idem in
Amatoribus, Euthydemo, ac libris de repub.
ipsam variè describit, nihil tamen certò vi-
detur statuere præter id, quod ab omnibus
de illa traditum est, eandem esse nimirum
scientiam rerum humanarum ac divinarum,

A

qua

quæ ad propriam hominis notitiam referenda videatur. Definitionem hanc alij ferè omnes secuti sunt, non tam Academici, quàm Peripaterici, & Stoici. Eius subiectum est omne id, quod in hominis scientiam potest cadere, sive à corporis mole seiunctum sit, & sola intelligentia percipiendum, sive corporeæ naturæ adhærescat. Finis demum est ipsa notitia, è cuius studio *Φιλοσοφία* id est, sciendi cupiditas à Pythagora primum nominata est. Huius ergo scientiæ præstantiam, dignitatem, & ad omnes bonas artes rectè noscendas, & perfectè intelligendas usum amplissimum hoc loco explicare minimè oportet, cum in eandem alij iustis etiam voluminibus accuratè scripserint, nosque hîc tantum de naturali eius parte, non de morali, differamus. Quocirca illius originè, incrementis, auctoribus, diductioneque in varias sectas ommissa (quæ omnia à Diogene Laërtio diffusè, & à Cicerone frequenter tractantur) ad eius partitionem veniamus. Duplicem Plato fecit Philosophiæ rationem, unam, quæ in humanæ vitæ actionibus versatur, quàm *ἠθικὴν*, id est, Moralem nominat, de qua nos in alio libro disseruimus: alteram, quæ in contemplatione rerum naturalium: cuius tres partes constituit: Primam, quæ de rerum in intelligentiam

tiam cadentium natura differit, quam primam Philosophiam, seu Theologiam appellant: Alteram, quæ circa rerum magnitudines versatur, quam *μαθηματικήν*: Tertiam quæ circa corporis naturalis effectionem ac vires, quam *φυσικήν* propriè nuncupamus. Has ille partes ubique completitur, ut in lib. de repub. Epinomide, ac de legibus: Item Aristoteles in undecimo de prima Philosophia libro, qui eandem ferè divisionem, enumerationemque partium fecit. Hinc liquet, à nobis hîc propriè Physices nomen capi pro tertia illa parte Philosophiæ, quæ in corporearum rerum cognitione consistit, non pro illarum genere universo. Vnde miror profectò, quid Iohannem Velcurionem in commentarijs in Aristotelis Physica moverit, ut Physicen genus earum trium partium, quæ contemplatrici Philosophiæ subijciuntur, Theologiæ, inquam, Mathematicæ, & Physices, esse dixerit, cum Aristoteles illam non genus, sed speciem contemplatricis facultatis in undecimo Metaphysices lib. apertè faciat. Nisi fortè idem esse naturalem facultatem & contemplatricem existimavit, id quod est valde à ratione alienum. Sed ut redeamus ad institutum, de hac quidem, quæ rerum corporearum causas investigat, facultate

breviter, & accuratè eo animo differendum mihi esse in his libris putavi, ut nullius Philosophi vel gravissimi auctoritati addictus veritatem doctrinæ, quoad possim, tueri, nullum autem planè negligere statuerim. Eam enim semper rationem inire in studijs meis, vel scriptis decrevi, ut nullius in verba auctoris jurare velim: sed quæ mihi magis probabilia videantur, ea maximè complectar sive ab Aristotele, sive à Platone, sive à quovis alio dicantur: quæ verò minùs probabilia, reiiciam. Hoc sanè Philosophandi genus quàmvis multis, qui ut varias sectas adamarunt, ita pugnacissimè tuentur, displicere, adeoque in varias reprehensiones incurrere me posse non dubito: tamen quia doctis, & sanioris judicij viris satisfacere, quàm vulgaribus, vel pertinacibus etiam malumus, anteponendum est studium veritatis, opinioni de alterius auctoritate temere sumptæ. Nos tantum divinis & Ecclesiæ Catholicæ testimonijs fidem adhibemus, eaque tanquam certa, ac stabilia oracula amplectimur, & tuemur: Philosophorum autem sententias eatenus sequendas esse arbitramur, quatenus eorum doctrinæ sunt consentaneæ. Verùm hac nos disceptatione, quæ vel plurimos olim antiquorum torserit, omissa, institutam tractationem ingrediamur.

mur. Cuius exordium à Physices descriptione, subiecto, ac fine petendum est, ut his explicatis, ratio doctrinæ huius intelligatur.

DE PHYSICA, EIVSQUE

FINE, ET SVBIECTO.

Caput II.

ESt igitur Physice scientia, quæ rerum corporearum causas, principia, effectiones, viresque monstrat. Nam cum cæteræ artes omnes diversa habeant instituta, ut Eloquentia, bene dicendi: Dialectica, probabiliter differendi: Ethice, hominum mores instituendi: Physice quidem causas cuiusque corporeæ concretionis inquirat, idque proprium ipsius munus est; eo tamen quod scientia est, illi convenit cum reliquis artibus. Nec verò hîc opus esse arbitrør in dubium vocare, num vera, certaque scientia ea sit, id quod in Platonis Phædone à Socrate video disputatum, cum satis sit illud obiter admonuisse, Mathematicas solum disciplinas, aut primam etiam Philosophiam veræ certaque scientiæ nomen sibi jure vendicare, Physicen verò, ac cæteras artes non item. In quibus ut multa certò explorata sunt, ita dubia incertaque pleraque, quæ aut

hominum ignoratione, aut difficultate ipsarum minimè noscuntur. Ex hac ergo Physices descriptione subiectum, finisque eiusdem intelligi (ut arbitror) potest, quandoquidem institutum eius est, propositi cuiusque corporis causas, ac principia quærere, earumque reddere posse rationem, nisi fortè rei nondum peruestigatæ, uti dixi, ignorantia impediat. Subiectum denique est corpus naturale, quemadmodum Aristoteles inquit, non ens mobile, ut quidam falso arbitrantur, qui cur entia mobilia huic scientiæ subijciant non video, cum eadem quoque ratione genij atque adèò intelligentiæ omnes, quæ natura sua mobiles sunt, eidem essent subijciendæ, id quod ab ea longè abhorret. Quocirca melius Aristoteles sententiam Platonis sequutus in undecimo de prima Philosophia libro in accidentium substantiæ corporeæ, sive in rerum materiæ insitarum inquisitione Physicen ponit. Porro huius disciplinæ ordo, ut auctor idem est Aristoteles, cæterarum artium, quæ ratione ac via tractantur, ordini persimilis est, id est, à communibus rerum initijs ad proximas cuiusque causas progrediens. Cum enim corporis alicuius concretio, naturæ quæritur, non satis est, annexam ei causam reddidisse, nisi ad remotissima etiam principia tanquam

tanquam ad fontes recurratur. Ponatur exempli causa hæc quæstio, cur dulcia maius præbeant alimentum, quam reliqua. Primò quidem natura rei dulcis quærenda est, distributo in partes, ex quibus constet, toto ipso, tum singulæ partes ad prima, communiaque principia sunt referendæ. Itaque quoniam dulces res calido, & humido constant, atque hæc rursus qualitates alendi propter effectricem ignis, atque aquæ vim habent, necessario etiam consequitur, dulcia multò magis alere quàm ea, quæ sunt diversi saporis. Eodem ferè modo reliquas quæstiones licebit semper examinare, ut cum propinquam rei propositæ causam invenimus, eam ad prima compositionis principia referamus. Huius nos rei admonens Aristoteles initio Physicorum, tum demum nos rem quamque scire inquit, cum causas illius & principia ad ultima usque elementa cognoscimus. Eo fit, ut omnes, qui de Philosophia naturæ volunt differere, eundem ordinem à nobis propositum sequantur, eundemque Plato in Timæo atque eius exemplo Aristoteles in libro de Physico auditu, ac reliquis omnibus ad naturam pertinentibus sequutus est. Uterque enim prima quædam rerum initia communia constituit, horumque accidentibus, & viribus obiter ex-

plicatis, tum eadem ad compositionem corporis universi, quòd idem reliqua corpora singularia contineat, applicat, postremo admixtiones singulorum corporum: atque eousque potissima Physices ratio, & institutum progreditur. Quæ verò deinceps tractari solent, ad animalium omnium genera, stirpium, metallorum, cæterorumque corporum historias explicandas, vel ad Medicinæ artis tractationem referuntur. Nos igitur cum non omnia in hos libros conijcienda putemus, pleraque breviter explicabimus, potius ut artis huius rationem, quam ut omnium rerum causas, id quod fieri non potest, afferamus. Sumamus ergo tractationis exordium à primis rerum initijs, quæ quia capita reliquarum causarum sunt, principio debent constitui. Commodius autem res fiet, si ordinem Geometrarum sequuti, communia quædam imprimis axiomata, hypotheses, & definitiones ponamus, quibus in reliqua tractatione tum ad usum probationum utamur, tum studiosis utenda proponamus, præsertim cum eum ordinem, ut sequeretur, Aristotelem instituisse, nec perpetuo illo studio contradicendi aliis servasse, videamus. Sint igitur hæc à nobis axiomata, definitiones, & hypotheses in hoc primo libro constitutæ.

Axio-

Axiomata.

1. Ex nihilo nihil fit.
2. Quicquid fit, in tempore fit.
3. Quodcunque corpus locum obrinet.
4. Quicquid mutatur, in temporis decursu mutatur.
5. Quicquid fit, ab aliqua causa fit.
6. Quicquid movetur, ab alio movetur.
7. Nihil sine motu fit.
8. Duo corpora, in eodem subiecto aut loco esse nequeunt.
9. Nihil seipsum efficit.
10. Duo contraria non sunt in uno subiecto.
11. Duo similia in se mutuo nihil agunt.
12. Quæ generi quadrant, formis quoque quadrant.
13. Nullum corpus in instanti movetur.

Definitiones.

1. Principium est id, ex quo aliquid primò fit, ipsum verò non ex alio.
2. Causa est id, quod aliud efficit.
3. Continuum est, quod partes suas habet coniunctas,
4. Deiunctum est quod partes suas habet deiunctas.
5. Infinitum est, quod sensu comprehendi non potest.
6. Finitum est, quod comprehendi sensu potest.

Hypotheses.

1. Quod in se iam habet aliquid, non expetit.
2. Principia semper manent eadem.
3. Singularia nota sunt sensu, universalia verò mente.
4. Composita magis exposita sunt sensibus, quàm simplicia.
5. Nihil est in natura redundans.
6. Principia sunt contraria.
7. Natura nihil frustra efficit.
8. Omne continuum dividitur in semper divisibilia.
9. Omnes res mundi finitæ sunt.
10. Finitum infinita non continet.
11. Nihil compositum est infinitum.

10 DE NATVRÆ
DE ORDINE HORVM LIBRO
RVM, DEQVE NATVRA, ET
RE NATVRALI.

Caput III.

DVplex est artium tradendarum ordo ab Aristotele in Physicis , & à Platone in Alcibiade institutus. Vnus à rebus in sensum cadentibus ductus , qui naturæ nostræ affinis est , quæ nihil nisi corporeum & singulare sensibus capit : Alter à rebus mente perceptis , qui per se notior , quatenus universa singulis priora sunt, esse videtur. Illum Plato , & Aristoteles nobis notio-rem , hunc naturæ vocant : quod nostra omnis cognitio à rerum singularum sensu pariatur : naturæ verò notio , id est , res ipsæ communes per se illis tanquam prima genera præsent. Superioris generis exemplum est , ut si quis à rerum corporearum , ut animalium , stirpium , metallorum , aliorumque corporum concretorum , & simplicium tractatione exorsus ad inquisitionem primorum initiorum , ex quibus illa constant, progrediatur. Posterioris autem , ut si primis quibusdam initijs , quæ non sensu , sed animo comprehendantur , constitutis , ab ijs veluti fontibus reliquam

quam tractationem deducat. Hunc ordinem Plato in Timæo, & Aristoteles in libris de rerum natura sequutus est, nosque exemplo eorundem in his libris sequemur. Primo enim communia rerum initia statuemus, quibus causarum, quæ secunda initia sunt, explicationem addemus: deinde ad mundi totius, ac partium eius simplicium concretionem accommodabimus: tum de corporum mixtorum generibus, partibus, viribus, & accidentibus differemus, postremò de animo. Hinc igitur disputationis exordium de rerum naturalium initijs sumatur. Quid sit initium & Aristoteles in primo Physicorum libro explicuit, & supra in definitionibus dictum à nobis est. Id verò proprium est ipsius, quod ad eius naturam attinet, quod nec ab alio quoquam efficitur, cum ex eo potius cuncta fiant, nec mutuo etiam principia, si quæ sint æqualia, fieri ex se possunt. Porro initium duplex est, unum primum & principale, à quo cuncta ita fiunt, ut ab eo longè semota sint, nec ipsum se factis rebus admisceat, quod Aristoteli prima natura sive motor primus, Platoni Deus opifex mundi dicitur. Alterum secundum ac minus commune, quod rebus, quas facit annexum est, ut materia, forma: atque primum illud à nullo alio aut fieri, aut cum quocunque confundi potest:

potest : hoc verò secundum ab eo proficiscitur . Antequam ergo de secundo hoc verba faciamus , de natura seu primo illo initio extra res posito & simplici disputemus . Natura quæ *Φύσις* à Græcis appellatur , efficiendi vim naturalium rerum significat . Hanc Plato animam mundi esse putavit , quæ cum singulis rebus sit indita , vim quandam agendi ijs tribuit : Plotinus eundem sequutus , naturam nihil esse aliud existimat , quàm id quod à mundi anima constituatur . Vnde & Cicero & ante illum Aristoteles usum rationis eidem adscribunt , quòd illa dum omnia providenter efficiat , sine ratione efficere illud non posse videatur . Sed discernenda est imprimis eius facultas , ne verbi ambiguitate decepti , quid verè natura sit , ignoremus . Naturam Aristoteles duplicem fecit , alteram primam , quam motorem primum appellat : alteram secundam , quam rebus ab illa compositis adiungit tanquam internum quoddam initium motionis earundem . Atque hanc certè initium motus , & quietis in eo subiecto , cui inhæreat primo , ac per se , & non accidentario definit , hoc est naturam esse inquit vim illam intimam rerum singularum , qua ipsæ sponte aut moventur ad generationem , interitum , alterationem , ceteraque motionis genera , de quibus postea
suo

suo loco: aut planè quiescunt & consistunt in essentia iam adepta. In secunda hac significatione Plato, atque Academici cum Aristotele consentire omnino videntur, dum mundi animam nominant naturam. Idem enim est, ut Proclus existimat, naturam rerum singularum initium mutationis & constantiae earundem nominare, atque à mundi anima vim hanc rebus insitam participatione quadam ortam existimare. Sed hac de re fusius in sequentibus. Nunc id explicemus, quemadmodum natura illa prima, & secunda rerum initia dicantur. Vnum esse rerum omnium principium incorporeum, æternum, quod Plato Deum opificem mundi, sicut nos, Aristoteles primam naturam, motoremque primum vocat, retulimus, nuncque iterum asseveramus. Hoc ipsum unicum esse, & ante omnem non modo rerum aliarum, sed etiam mundi ortum extitisse, divinis oraculis & testimonijs, ac rationibus comprobare possumus. Nam & Moses ab illo in principio cælum, ac terram cæteraque omnia condita esse apertè testatur. Id ipsum David confirmans, Verbo, inquit, Domini firmati sunt cæli, & spiritu oris eius. Idemque aliàs. Dominus autem noster quæcunque voluit, fecit. Sed quid pluribus opus est? plenæ sunt sacræ literæ huiusmodi testi-

testimonijs de unico hoc rerum omnium principio. Quod autem idem illud sit unum, præter id quod Philosophi plerique aperte fatentur, ratione etiam confirmari potest. Imprimis quia si mundus cietur aliquo motuum genere, ab alio cieri debet per axioma 6. cum nihil nisi animatum seipsum movere possit: at cum eundem moveri perspicuum sit, necessario etiam consequitur, motorem esse aliquem primum, à quo ille impellatur. Præterea cum in moventibus, rebusque motis continuatus sit quidam ordo causarum se mutuò impellentium, in aliquo primo illum consistere necesse est, (nullus enim infinitus progressus cogitari, aut esse omnino potest.) Relinquitur igitur primum esse aliquod omnium initium, cuius vi cuncta fiant, & moveantur: ipsum autem ab alio minimè pendeat. His accedunt naturales hominum notiones de Deo sive illo rerum omnium principio, quod asserimus, quæ cunctis nationibus sine magistro à natura insculptæ, & ingeneratæ sunt. Huc pertinent etiam illa quatuor causarum genera, quæ Cleanthes apud Ciceronem peracutè collegit, ut Deos esse confirmaret: Primum ex futurarum rerum præsentione desumptum: Secundum ex magnitudine commodorum, quæ à mundo percipimus: Tertium ex portentis,

tentis, & miraculis, quibus hominum ani-
 mi terrentur, aut in admirationem sæpe du-
 cuntur: Vltimum ex ordine rerum natura-
 lium constantissimo. Quibus ex rebus effi-
 citur, non modo Deum esse aliquem in re-
 rum natura, sed eundem etiam auctorem
 universi esse. Sed quoniam de huius opificio
 latius in disputatione de mundo dicendum
 est, hæc tantum in præsentia satis sit docu-
 isse, unum esse omnium initium, quod & hu-
 mana ratio confirmer, & Philosophorum
 omnium de natura rectè sentientium pari-
 ter consensus approbet. Hoc idem initio
 tractationis de Philosophia naturæ præpo-
 nendum est, ut ab eo reliqua principia de-
 ducantur. Quod ne quis temere hoc loco,
 aut sine exemplo cuiusquam præposuisse
 me existimet, consideret oportet, eundem
 ordinem à Platone prius in Timæo, deinde-
 que ab Aristotele observatum in ijs libris,
 quæ ad naturam rerum spectant, fuisse. Quos
 etiam nos in his libris sequuti, de Deo pri-
 mum tanquam omnium principio pauca re-
 tulimus, non ut eius explicaremus naturam
 (quod Theologorum est munus) sed ut de
 illo ageremus, quatenus Physices tractatio
 postulat. Quocirca statutum hîc sit initium
 unicum rerum, immobile, æternum, infini-
 tum, incorporeum, liberum, vi sua cuncta
 efficiens,

efficiens, omnipotens, id est, Deus quem Plato, uti dixi, aperte mundi opificem, Aristoteles primum motorem, ac primam naturam appellat, nos denique idem esse, quod naturam, contendimus, ac non modò nos, sed & Seneca lib. 4. de beneficijs, & Plinius libro historiae naturalis secundo. Est & aliud secundum initium, ab eo primo profectum, quod naturam cum eodem Aristotele secundam appellare, cum Platone, mundi animam possumus. Eadem enim rerum initium dicitur, quòd corporibus omnibus velut interna quaedam causa insit, quae non modò pars eorundem sit, verum etiam ut virtus, & spiritus quidam, vim illis conservandi essentiam suam exhibens. Ab huiusmodi initio cuncta corpora communi nomine res naturales dicuntur, quoniam illud in se positum habeant, nullumque corpus carere eo possit. Ex quo quantum inter naturalia & artificiosa discriminis sit, perspicitur, cum haec extra se positum artificij sui habeant principium, id est, in artifice. Illa verò intra se ipsa. Nam culter, sella, scamnum, mensa, atque id genus alia opera eam formam, quam à fabro accepere, semper non retinent, sed massa eorundem corrupta, illa simul pereunt, nec usquam amplius remanent. Contra verò naturalis cuiusque rei impetus seu natura à
natura

natura prima inditus ita rebus inhaeret, ut ab illis seungi non possit. Imò verò quaecunque illum habeant, vere naturalia sunt, cetera vel artificiosa dicuntur, ut ea, quæ ab artifice quopiam formam acceperint, vel naturæ repugnantia, ut ea quæ non sua sponte, sed vi aguntur, vel denique præter naturam, ut illa, quæ neque repugnant naturæ cuiusquam, neque eidem consentanea sunt. Quæ cum ita sint, relinquitur naturam esse internum initium rerum corporearum, idemque primum, excepto Deo, quatenus ex eo illæ primæ constant. Quod cum in formæ materiæque mutua connexionem cernatur, de his rursus initijs deinceps differendum est, quæ communi etiam nomine naturæ ab Aristotele nominantur, quod substantiam corpoream, uti partes eius, primò componant, illique dent initium motionis & stabilitatis. Hac in sententia Platoni cum Aristotele hoc convenit, quod ille materiam initium duntaxat simul cum Deo & Idea posuit, mundi-que animam, quam pro natura capi ab eo diximus, non initium effectio- nis, sed motionis esse putavit: Hic verò materiam & formam tanquam initia prima ponit, quæ universitatem componere ratione quadam ut partes dicantur, non tamen quod verè eam aliquando composuerint: Deum verò seu

primum motorem, ac naturam initium motus huius mundani, non effectiois universæ esse, retulit. Vterque autem à nobis differt, id est, à Christianis, quod quamvis Deum esse primum initium dixerit, nullam ei aliam actionem in mundi ortu, quem æternum asserit, attribuit præter motionis & dispositionis. Sed hac de re uberius suo loco. Nunc postquam primum initium constitutum est, naturamque illi secundam subieciimus, eamque in corporibus materia & forma concretis posuimus, de ijs veluti initijs rursus disseramus.

DE RERVM INITIIS.

Capitulum IV.

VARIE sunt Philosophorum de primis rerum initijs sententiæ, earumque maxime inter se discrepantes, adeo ut si quis eas studiosè narrare, aut refutare voluerit, magnum subeat laborem, necesse sit. Qua in re alij non parum operæ posuerunt, adducti eo studio, ut Philosophis ijsdem contradicerent, quorum è numero primus Plato fuit, qui diversis in locis sub Socratis persona Anaxagoram aliosque taxare, suppresso sæpe eorum nomine, solet. Post quem Aristoteles omnium studiosissimè huic rei operam dedit, tum alij multi,

multi, quos longum esset commemorare. Sed nos hic, omnibus omissis, Platonis præcipue atque Aristotelis sententias sequemur, quæ ut à pluribus sunt receptæ, ita debent diligentius explicari, non solum ad veram Physicæ rationem noscendam, sed etiam ad ostendendam illorū Philosophorum utriusque consensionem, aut dissensionem. Initia itaque rerum tria esse, & Plato & Aristoteles dicunt: ille quidem in Timæo, hic in libris de Physico auditu, in ijs tamen recensendis differre uterque inter se videtur. Nam Plato materiam, Ideam, ac Deum ponit: Aristoteles materiam, formam, & privationem. Itaque ambo, si numerum principiorum spectes, idem planè sentiunt: si singula per se consideres, differunt. Nos autem imprimis sequamur nostrum institutum, quàm de iisdem quicquam asseramus. Esse tria principia, manifestum est, si efficiendarum rerum naturam consideremus. Nam cum ad rei cuiusque effectiōem, subiectum, efficiens, & forma, quæ inducenda sit illi post actionem, requiratur, tria etiam principia videntur necessario constituenda. Duo enim coherere minimè possunt, quum tertio aliquo subiecto, in quod agant, careant, nihilq; fieri absque subiecta materia possit, ut ex primo axiōmate à nobis posito constat. Nec verò

quatuor, aut plura ijs paria eandem ob causam statuenda sunt, cum duæ causæ efficientes inter se mutuo, sublata materia, nihil efficiant per 11. axioma, tum quia contrariæ sunt, tum quia inter se contraria nihil efficiunt, quod ex hypothese constituta liquet. Quapropter si rationi, auctoritatiq; Platonis, & Aristotelis assentimur, tria solum rerum corporearum initia, nec plura ijs, pauciorave ponenda erunt, cum ita sint res omnes à natura comparatæ, ut unum agat, alterum actioni subiiciatur: postremo tertium aliud ab ijs tanquam effectus, ab efficiente causa in materiam subiectam inducatur. Quemadmodum in statuaria arte opifex efficiendi vim habet, æs, lignumve cœu materia subiicitur, effigies verò hominis, aut animalis cuiusque inducta, tanquam effectio quædam producit. Hoc modo tria in rebus naturalibus initia considerantur, & à plerisque Philosophis asseruntur. Sed nos nostram i. Christianæ religioni congruam de rerum initijs sententiam proferamus, ut quid sit in hac re certò tenendum, iudicetur. Vnum est duntaxat rerum omnium principium, à quo cuncta vel sine aliqua subiecta materia effecta sunt, id est, Deus: nihil enim obstat, quod minus putemus, ex nihilo aliquid fieri posse, ac Deum ex nihilo cuncta fecisse, cum axioma

ma illud in viribus humanis verum sit, non in divinis. Is igitur Deus hanc mundi universitatem ante omnia tempora ex nihilo procreavit, effecit, informavit, quemadmodum Moyses initio Geneseos testatur, ac nos supra retulimus, & in sequenti tractatione docebitur. Nec opus ei aliqua subiecta materia fuit, ut statuarijs, aut fabris, aut reliquis demum corporeis rebus in aliud agentibus, sed sola voluntate cuncta creavit tam materiam, quam formam & alia. Qua ex re intelligitur, falso Philosophos omnes aut tria illa, aut alia rerum initia, præter unum Deum, statuisse, si primam mundi constitutionem spectemus, (quanquam ad rerum singularum effectiōem commodè adhiberi illa possint) tum etiam eos, qui in exordio mundi condidisse materiam Deum imprimis asserunt, id est, confusum quoddam ac rude chaos omnium elementorum ab illo editum esse, idemque postea in hanc mundi faciem pulcherrimam quasi distinctum. Qui sanè quantum à vera sententiā de mundi ori abhorreant, dici satis non potest, cum eo modo, ut præclare Basilii ostendit, & Athanasius, ad suam sententiā ineptè Moseos verba detorqueant, non verum eius sensum declarant, præsertim cum Ecclesiastes creasse Deum omnia simul dicat, atque omnes pij, & docti

patres uno ore illud affirmant, materiam quidem initio una cum hac mundi forma editam fuisse, nec aliquam inter alterius productionem, inductionemque alterius vel exigui temporis moram intercessisse, quamquam ad mundi generationem magis explicandam ea fuerit distinctione usus Moyses. Verum hac de re longius tractare huius loci non est, tantum illud e Christiana religionis sententia maneat statutum, quod ad primum mundi & singularum rerum initium spectat, fuisse unum duntaxat omnium principium Deum, qui ex nihilo cuncta effecerit: quod ad rerum jam effectarum frequentes effectiones attinet, illa eadem a Philosophis commemorata principia posse confirmari, tamen non desunt, qui ne in his quidem materiam subijci aliquam efficienti Deo arbitrentur, sed omnia cum ex nihilo adhuc edere. Cuius sententiae est Martyr Iustinus in ips, quas scripsit contra Aristotelem, reprehensionibus. Sed retineamus saltem nos eadem principia, adhibita illa, quam antea attulimus, distinctione,

EXPLI

EXPLICATIO PRINCIPIORUM, & primò de materia,

Capitulum VII.

His ita generatim propositis, explicemus jam singula rerum initia, sumpto à materia exordio. Materia, ut Platoni in Timæo, & Aristoteli in primò de Physico auditu placeat, est receptaculum quoddam incorporeum, potestatem in se diversas recipiendi formas suapte natura habens. Eadem esse cognoscitur ex rerum, quæ quotidie fiunt & intereunt, perpetuâ vicissitudine. Nam cum ex eadem corporis massa nunc arborem, nunc cineres, nunc terram, nunc corpus aliud effici videamus, nihil quæ fieri ex nihilo posse constitutum è primo axioma sit, relinquitur manifestè materiam aliquam subijci effecti huic corporis variæ, in quam formæ diversæ inducantur. Nec verò illud, quod recens gignitur, corpus ex eodè, quod prius interiit, effectum esse, aut in eodem quasi consitum fuisse prius, dicendum est, cum ex hypothesi r. nihil quod in se jam habet, expetat, nec duæ etiam corporum formæ in eodem coniungantur per 8. axioma. Hinc igitur liquet, in omni rerum naturalium effectione materiam aliquam subijci debere,

debere, eamque, ut ait Plato & Aristoteles; analogia quadam corporum diversorum, quæ fiat in eodem subiecto, intelligi. Atque in huius certè descriptione, ac notitia ambo Philosophi consentiunt, amboque exactè vim illius explicuere, ut ex Timæo Platonis, ac primo & secundo libro Aristotelis de Physico auditu perspicuum est. Quoniam autem materiam ita definimus, ut illam rerum corporearum receptaculum esse ad formas universas diverso tempore suscipiendas accommodatum, dicamus, proprietates eiusdem, usumque in rerum effectione consideremus. Imprimis id proprium est materiæ, quòd corpus non est, ne si esset, suscipere formam alterius corporis nequireret ex 8. axiomate. Nec etiam aliquo genere accidentis constat, ut qualitate, quantitate, actione, motu, aliòve reliquorum, hoc excepto, quòd per se ipsi semper subiecta est, sic tamen, ut eam non habeat sibi adiunctam tanquam accidens: ita enim ex 7. Hypothesi corpus jam esset, id quod à me prius negatum est. Quin etiam ea infinitam habet potestatem recipiendi formas omnes, atque ideo infinita est duratione, ingenerata, incorruptibilis, subiectum rerum omnium, quæ aut fiunt, aut intereunt, coniuncta semper alicui formæ corporeæ, à qua propter infinitam sibi potestatem,

testatem, facile ad aliam formam quasi deficit. Illud itaque primum subiectum, in quo cuncta fieri animo cogitamus, & in quod omnia tandem dissolvuntur, quodque semper unum & idem manet, à nobis materia esse dicitur. Quæ quamvis exprimi sensu non queat, adulterina, ut Plato inquit, ratione intelligitur, id est, quatenus à corpore magnitudinem, qualitatem, ceteraque omnia accidentia tollimus, ac ultimum quoddam, & rude subiectum, in quo illa omnia inhæserant, imaginamur. Quod sanè propterea à nobis ponitur, ne si eam caruisse subiecto dicamus, ex nihilo esse quicquam effectum concludatur, id quod primo axiomati repugnat. Iam verò eadem materia aut prima esse, aut secunda Aristoteli dicitur, non quod subiectum illud primum dividi in partes inter se diversas possit, sed quod per varias rerum essentias quasi latè diffusum sit. Prima quidem materia totum illud rerum omnium receptaculum commune, quod in se tam mundum, quam eius partes complectitur, appellatur, eademque infinita duratione prædita, æterna, immutabilis quod ad eius potestatem attinet, ingenerata, incorruptibilis Platoni, Aristoteli que dicitur. Secunda verò est subiectum cuiusque corporis peculiare, quod quamvis ab illo priori non diffe-

rat essentia, aut proprietate, tamen quatenus
 est in partes divisum, id est, singulis corpori-
 bus adiunctum, secunda nominatur mate-
 ria. Hæc igitur satis sint ad materię naturam
 explicandam ex Platonis & Aristotelis sen-
 tentia, qui hac in re mutuo sibi consentiunt.
 Plura si quis desideret Platonis Timæum,
 aut Plotini librum de materia, de quę actu &
 potestate legat, aut nostros etiam in Timæum
 commentarios. His explicatis, videamus, an
 sententia hæc de materia à nobis adducta
 religioni nostrę consentiat. Pij quidem ali-
 qui viri, pariterque doctissimi materiam om-
 nino sustulero, ut Iustinus Martyr in libro
 contra Aristotelem, Lactantius Firmianus in
 secundo de origine erroris, Theodoretus in
 epitome divinarum decretorum, itemque
 alij, qui sine subiecto Deum fecisse cuncta,
 denuoque facere contendunt. Alij rursus
 eam adeo pertinaciter tuentur, ut vel invito
 Deo, si fas est dicere, illam subijciant, nihil-
 que ferè putent ab eo absque subiecto effici
 potuisse, tantum ut hac in sententia Philoso-
 phis non repugnent. Vnde ex verbis Moyses
 in Genesi materiam à Deo creatam impri-
 mis, hancque deinceps informatam fingunt:
 cujus sententia est Chalcidius, Philo, alijsque
 sacrarum literarum sensum perperam intel-
 ligentes. Nos verò, qui neutris adhaerendum
 puta-

putamus, creatam materiam una cum hac mundi universitate contra Platonem & Aristotelem aperte fatemur, nec eam esse ingeneratam, incorruptibilem, infinitave duratione praeditam admittimus, cum & mundi universitas, cui annexa illa est, genita, ac temporis mutationi subiecta sit, ut fuso suo loco docebimus; id verò solum dabimus, immutabilem esse ipsam, quod ad eius attinet naturam, id est, habere semper illam potestatem in se diversas formas recipiendi, eandemque semper simul cum mundo manere tanquam commune rerum omnium subiectum. Hac sententia quod tolerabilior, & à plerisque recepta est, à nobis in hoc loco teneatur, ne vel philosophis planè repugnemus, vel à Dei etiam providentia detrahi quicquam patiamur.

DE SECUNDO RERUM

initio.

Capitulum VI.

SECUNDUM rerum principium à Platone Idea esse dicitur, ab Aristotele verò forma. Et quanquam ea duo unum apud Graecos nomen *είδος* sive *idea* significet, diversa tamen ratione illud ab eorum alterutro capitur.

capitur. Plato enim formam illam, sive Ideam, quam affert, à rerum corporearum concrectione seiungit, & in Dei mente veluti exemplar cuiusque effectationis collocat: Aristoteles eam rebus coniungit tanquam alteram corporeæ substantiæ partem. Itaque Plato in Timæo, Parmenide, Phædone, locisque alijs Ideam hanc veluti principium à rebus, quæ fiunt, semotum, in Dei mente collocavit, quoniam agens omne rationem aliquam efficiendi, atque institutum necessario sequatur. Ideoque mentis divinæ illum conceptum, & quasi destinatum in efficiendo cogitationem veluti exemplar, quod Deus auctor omnium sequatur, statuit, causamque rerum effectatum exemplarem appellat. Quemadmodum si cum statuarius in effigendo Mercurio, imaginem eius aliquam animo prius conceptam sequatur, illam exemplar eius effectationis esse dicamus. Sed hoc tamen discrimen inter eiusmodi Ideam menti divinæ insitam, & cogitationem nostram ponit Plato, quod illa divina, æterna, efficiendi vi prædita, corporeæque omnis contagionis sit expers, atque adeo ipsamet Dei mens: hæc autem nostra corporea, nihilque per se efficere valens. Hanc porro Ideam ille unam esse, infinitam, æternam, ac singularem rerum Ideas unitate quadam in se
com-

comprehendentem in Parmenide inquit,
itemque Plotinus in libro de Ideis, & ea-
rum multitudine. Ab hac una Plato singu-
larum rerum formas tanquam è sigillo ex-
primi ait, ita ut Deus ad essentiam vel ho-
minis, vel equi, vel elephantis, vel cuiusque
rei demum efficiendam, conceptum mente
sua exemplar sequutus, ad eius imaginem
formam rei, uti effectum, sive, ut ipse vocat
in Timæo, partum proferat. Quocirca, ut in
pauca rem conferam, Ideam à rebus corpo-
reis separatam, Deoque insitam Plato posuit
ut efficiendi principium: formam verò rebus
inductam effectum generationis illius, &
partum, quam causam effectricem appellare
maluit. At verò Aristoteles, qui propinquis
cuiusque rei causis contentus, reliqua ferè
neglexit, formam rebus insitam principium
constitutionis esse vult. Itaque materia &
forma, dum illa huic annexa subiacet: for-
maque rursus, dum materiam informat, &
ex vaga illa priori natura in aliquod certum
essentiae genus constringit, prima constitu-
tionis initia ab illo appellantur, & ex ipso-
rum mutua connexione cuncta fieri dicun-
tur. Ideam autem illam Platoniceam is pas-
sim labefactat, minimè sejungi à rebus cor-
poreis formas permittens, idque diversis in
locis vehementer urget. Nihilominus tamen
ipse

ipse in secundo Physicorum libro divinam
quandam formam statuit, à qua cetera for-
mæ omnes oriantur, quas eadem ipsa com-
plectatur. Quæ in re, ut Themistio, Simpli-
cio, ac mihi quidem videtur, non multum il-
le à Platone dissentit, quamvis in eo differt,
quod formam illam primam in singulas for-
mas, quasi genus in species diffusam, fecisse
videtur, quandoquidem ubinam ipsam po-
fuerit non satis liquet. Quæ in re mihi ille
aut cum Platone idem sentire, aut in pu-
gnantem sententiam penè in seipsum prolabi
videtur. Si enim formam aliquam primam,
ac divinam esse putat, ad quam veluti ad fi-
nem alia referantur omnes, cuiusque fieri
similes cupiant, aut eam rebus annexam,
animi tamen cogitatione tanquam univer-
sale quiddam separatam, aut re ipsa seiun-
ctam faciat, necesse est. Si illam rebus anne-
ctit, tametsi animi cogitatione seiungat, ni-
hilo tamen minus ipsa ipsidem inerit. Ex quo
fiet, ut eadem formæ singulares experant
huic communi earum, quæ veluti genus est,
similes fieri, aut ab ea contineantur, id quod
est valde ridiculum, cum nihil quod in se
jam habet expectat per hypothesin, cumque
divinas esse formas omnes singulares æquæ,
atque communem, necessario sequeretur, si
hæc, ut Aristoteli dicitur, divina est: quando-
quidem

quidem omnia, quæ generi congruunt per
 12. axioma, formis etiam eiusdem congrue-
 re semper debent. Quòd si autem ipsam for-
 mam à rebus singulis separet, sive naturam
 esse illam contendat, id quod verisimilius
 est, quando rationem in efficiendo huic tri-
 buit, sive in cœlorum virtute ponat, sive in
 primi motoris facultate, sive in alia denique
 parte, certè cum Platone consentiet, quate-
 nus separatam aliquam formam facit, tamen si
 in Dei mente eam non ponat. Ex his igitur
 omnibus & Philosophi utriusque sententia,
 & discrimen manifestè intelligitur, cum Pla-
 to Ideam separatam exemplarem esse cau-
 sam rerum effectarum putavisse à nobis di-
 catur, coniunctas verò rebus singulas for-
 mas ab illa productas effectus appellasse: A-
 ristoteles contra has ipsas singulares formas
 principia earundem rerum esse confirmat.
 Uterque tamen in eo consentit, quod for-
 mam materiæ coniunctam efficere rei sub-
 stantiam fatetur, ita ut in subiectam mate-
 riam subiens illa privatam aliquam essentiam
 sive esse rei inducat. Quemadmodum cum
 ex massa auri fit vel statua vel candelabrum,
 vel nummus aliquis, massa quidem ipsa tan-
 quam materia rudis est, adhibita verò statua
 candelabrive forma nomen ab ea sibi com-
 parat, & quodammodo informatur. Eo fit,
 ut

ut materia & forma simul connexæ essentiam rei constituent, causæq; adiuuantes sive *ovvauvias* Platoni, Aristotelique dicantur, quoniam altera formæ sese subijciat informandam, altera essentiam aliquam inducat, ut si equi, leonis, cameli, stirpis, cuiuscunque rei demum forma inducatur in materiam, hæc protinus vagam illam cupiditatem quasi explet, adiuncta forma, esseque aliquod tum accipit. Cum autem formam adhiberi materię dicimus, ne putes eam cum alia forma confundi, sic enim duæ essentiæ in uno essent subiecto, quod axiomati repugnat, nec materiam etiam nudam esse, quoad formam susceperit, sed hanc semper aliqua forma constare, quam, altera suscepta, demum amittit, illam materię expertem esse antequam ei, quæ subiacet, adhærescat. Itaque quamvis nec per se materia, nec forma seiunctæ à corpore re ipsa inveniantur, considerantur tamen seorsum deiunctæ, quatenus materia informanda priori aliqua forma constar, quam alia adveniente, statim amittit. Nec ideo illius naturæ quicquam detrahitur, nec potestatem recipiendi formas alias planè amittit, sic enim & essentiâ suam amitteret, quæ facultati cuidam perpetuæ annexa est, sed eam semper habet diversas alias formas appetendi aviditatem, ur

ut rerum generationes & interitus continuentur. Quin materia & forma per se de-
iunctæ cogitatione, uti diximus, eandem non
habent substantiam, quam efficiunt coniun-
ctæ, nec enim corporea sunt, nec partes cor-
poris; ne si coniunctæ aliquid corporeæ con-
nexioni adiungant, duo in subiecto uno cor-
pora cohereant, quod est axiomati contra-
rium. Sed ut calorem in igne ab essentia
mente separantes nec illud accidens per se,
nec substantiam verè seiungimus, sic mate-
riam, formamque à se invicem deiungentes,
non partes corporeæ substantiæ duas faci-
mus, ita ut corporeæ concretionis aliquid
per se singulæ contineant, sed relatione es-
sentia, quam coniunctæ habent, substantiæ
partes facultate quadā esse dicimus. Quam-
obrem teneamus quidem, ut paucis rem to-
tam complectar, formam in efficiendo cau-
sam esse substantiæ præcipuam, quam ipsa
adventu suo circumscribat, materiam illius
subiectum, quod adhibitum corpus efficiat,
non tamen ut accidens subijciatur: sic enim
forma in alio subiecto esse deberet, cum
nullum accidens à subiecto separatum exi-
stat. Ideo in effectione cuiusque rei, alia ac-
cidentia materiam, alia formam sequuntur,
ut illam magnitudo & corporitas ut ita di-
cam, hanc ceteræ qualitates corporeæ tam

C

primæ,

primæ, quàm secundæ. Sed hac de re latius
suo loco. Descripsimus secundi rerum initij
naturam, quam potuimus brevissimè, idque
ex Platonis & Aristotelis sententia. Nunc ut
cœpimus, & faciendum deinceps statuimus,
nostram, id est, Christianæ pietati congruen-
tem proferamus. Formam illam, quæ rebus
adiuncta est, principium constitutionis illa-
rum appellare absurdum esse videtur, cum
nec seipsam illa inducat per axioma 9. nec
si ab alio inducatur, principium esse possit,
cum ex definitione prima principium ab alio
minimè fiat. Quo fit, ut veriùs eadem
cum Platone effectus in generatione rei cu-
iusque ab informatrice causa productus ap-
pellari debeat. Veluti cum statuz forma in
lignum marmörve inducitur, ea quidem non
dicitur causa sive principium informationis
huius, sed artifex, qui eam induxit. Itaque
quamvis adjuvans causa forma dicatur, qua-
tenus materiæ adiuncta essentiam efficit,
principium tamen non erit, sed Deus, quem
primam causam cunctorum esse suprà retu-
limus. Is enim solo verbo res omnes effecit,
ut David cecinit: Verbo Domini firmati sunt
cœli, & spiritu oris eius: & ut Moses in Ge-
nesi: Dixitque Deus, fiat lux, & facta est lux.
Ex quibus omnibus constat, veram causam
formalem esse Deum, qui singularum rerum
essen-

essentias materiæ huius mundanæ partibus adhibeat, ipsæque non esse solum, sed sui etiam conservationem, vitamque quodammodo attribuat, cum nihil per se aut existere, aut conservari sine Deo possit, id quod in Evangelio Christus ait: Pater meus semper operatur usque adhuc. Sed de hoc principio satis.

DE TERTIO RERUM INI-

T I O.

Caput VII.

DE tertio rerum initio minimè convenit Aristoteli cum Platone: Ille enim privationem tertium esse principium putavit: hic, Deum. Sed nos utriusque sententia rectè perspecta, quid in hac re sit statuendum, videamus. Plato Deum rerum initium commune in Timæo esse inquit, quoniam ab eo cuncta fiant tanquam à prima causa architectrice. Eum autem efficiendi modum illi tribuit, ut cum ipse per se sit causa vi sua efficiens, materiam subiectam habere semper debeat, in quam exemplar æternum, sive ideam menti suæ insitam imitatus, formam inducat ut imaginem. Itaque Deum efficientem causam appellat, materiam subiectum, ideam exemplar corporearum formarum.

60011

C 2

Aristo-

Aristoteles contrā in libris de Physico auditu, cū necessario initia omnia rerum contraria debere esse videret, privationem tanquam principium altera ex parte repugnans formæ adducit. Nec id certè ille abs re fecisse videtur, si rerum, quæ sunt, ortum spectemus. Quemadmodum enim lignum in cineres converti non potest, nisi ignis concretionem illam corporis solidam, consumptō humore, dissipet, lignique forma planè intereat, ut cinericia in eius locum succedat, sic oriri nihil posse videtur, nisi principiorum repugnantia aliqua sit, ex quorum mutua actione in subiectum res informetur. Formam autem cui rectius contrariam facere, quàm ipsius privationi poterimus, cū ea rei essentiam materiæ inducat, hæc tollat: ergo si principia per Hypothesin semper contraria sunt, formaque materiæ contraria non est, sed ei potius adiungitur, ne si esset, coniungi non posset per axioma 12. relinquitur, privationem & formæ contrariam esse, & principium rerum debere. Sed quomodo, inquires, principium esse possit, si formam delet privatio, nihilque planè ab ea in materiam affertur? Dubitationi huic respondens Aristoteles, principium esse per se privationem negat, hoc est talem non putat esse eam, ut efficiat quicquam, sed ut eius effectum

modò

modò una forma tollatur, modò altera de-
novo inducatur. Quo fit, ut privatio acciden-
tarium initium existat, eademque sic possit
commode definiri. Privatio est formæ ca-
rentiæ seu accidentarium principium, cuius
occasione in eadem materia diversæ formæ
mutantur, alijs nimirum in locum aliarum
diverso tempore succedentibus. Id exempli
gratia facilius in homine intelligetur. Dum
is animo constat, formam hominis habet ob
adiunctam suo corpori animam, quæ ipsam
informat: exhalata autem illa, id est, sublata
forma, privatio eiusdem sequitur, ut forma
cadaveris denuo succedat. At privationem
quidem ne existimes ita inhaerere materiæ
uti formam, cum ipsa nihil sit, ac sola mente
concipiatur, sed relatione formæ adventuræ,
qua privata est materia, qua adveniente, hæc
aufertur, & forma introducitur. Quamobrem
quando repugnantia est aliqua inter priva-
tionem formæ inducendæ, quæ in materia
quodammodo ponitur, & formam ipsam,
hæc duo principia esse videntur, eaque con-
traria, alterum constituendi rem aliquam, id
est, forma, alterum interimendi, id est, priva-
tio. Hæc est igitur summa de privatione si-
ve tertio initio Aristotelis sententia. Ab hac
in eo Plato dissentit, quod inter principia
privationem non retulit. Quanquam enim

naturam illius in Parmenide attigisse videatur, dum materiam non ens appellat, idque Aristoteles & Paraphrastes eius Themistius ei attribuant, privationem tamen carentiam formæ in materia, non insitam illi esse intellexit. Quocirca primus omnino Aristoteles privationem esse principium asseruit, non illud quidem per se, cum nihil quod sit, efficiat, sed accidentarium, quatenus eius occasione fit aliquid. De principio autem illo, quod Plato tertio loco constituit, id est, Deo, latius supradictum est. Nunc possit ne privatio principium rectè dici videamus. Illud ex definitione prima inter omnes jam constat, principium id solum dici, quod quicquam efficiat relatione rei initiata, cum initio posito, & res etiam initiata, ut sic dicam, sequatur, & è diverso. Hoc ita statuto, privatio esse principium minimè potest. Nam id saltè Aristoteli nobiscum jam convenit, eam esse initium accidentarium, non proprium. Hoc autem nos ne fieri quidem posse contendimus. Etenim si accidens sit, alicui subiecto debet inhaerere. Materiae verò non inest, quoniam si inesset, formam illa expetere non posset, cum nihil ex hypothesi contrarium suum expetatur, igitur esse initium vel accidentarium privatio nequit. Præterea si quatenus formæ inducendæ occasionem præbet,

præbet, principium appellari debet, cur non etiam motum, ac tempus principia esse dicimus, quando sine illorum utroque forma in subiectum induci nequit? Sine motu enim generatio non fit, neque interitus, absque aliquo verò temporis intervallo multò minùs, cùm hoc motum ipsum semper consequatur. Postremo si ex hypothese s. nihil in natura redundat, formaque satis cum materia est ad rerum effectiõnem, supervacanea certè privatio esse videtur, cum sine ipsa rerum ortus proferantur. Nec obstat huic sententiæ, quod principia rerum contraria esse debere dicantur, cùm in qualitatibus elementorum id ita fit, non in alijs rerum initiis, atque hæc sit ignota plerisque hominibus præter Physicos hypothesis. Nam si omnia initia contraria esse deberent, vel causæ etiam quæ initia sunt, sibi mutuo repugnarent, ut efficiens materiæ, aut forma fini, id quod fieri ediverfo cernimus, cùm eadem potius mutuò se adiuvent. Itemque si ars naturam imitatur, eaque in efficiendo contrarijs initijs non utitur, multò etiam minùs ipsa natura. Atqui nec opifex in exsculpenda imagine quicquam contrarium habet, nec Grammaticus in docendo quenquam Grammaticam, ergo principiũ privatio non est. Restat igitur quod rationi maximè con-

sentaneum est, quodque Plato etiam censet, privationem occasionem esse duntaxat rerum generationis, quatenus eius causa forma adhibetur, non initium. Atque hanc sane sententiam religioni nostrae convenientem esse probare possumus, cum si privatio principium sit, Manichæorum duo rerum initia ponentium, unum mali, alterum boni, dogma sic asseri necessario sequatur: quandoquidem illa demolitionis initium ab Aristotele statuitur, formæque contraria. Et dum Manichæi unum tenebrarum sive mali, alterum lucis sive boni initium posuere, huiusmodi privationem innuisse videntur: neque enim per se tenebras, aut malum esse unquam asseruissent. Ex quo quidem manifestè concluditur, privationem principium non esse, sed occasionem duntaxat rerum ortus. Et quanquam eo modo tria principia, sublata privatione, poni non possint, quæ antè asseruimus, id quidem in elementorum qualitibus, quæ quasi adversæ causæ in subiectum agentes, diversas rerum proferunt formas, verum est, non in primis constituendarum rerum initijs.

PROPO-

PROPOSITORVM PRINCI-
piorum examinatio.*Caput VIII.*

HActenus proposuimus prima rerum initia ex Aristotelis, & Platonis sententia: nunc post eorum usum explicatum, quænam sint vera principia, id est, nostræ religioni similia, rursus inquiramus. Id quamquam à me digressionibus frequenter interpositis fiat, non abs re videor facturum, cum eo modo & institutum ab alijs Philosophis ordinem sequar, & quid verè sit de quaque re sentiendum, pariter suis locis ostendam. Principia igitur hæc à nobis suprâ relata rebus corporeis quodammodo inhaerent, quatenus verò ipsas constituunt quasi partes, principia earum esse dicuntur: ut materia & forma initia sunt non modò constituendi res ipsas, sed partes etiam illis coniunctæ. Porro privatio, ut antè diximus, quanquam ut pars materiæ aut formæ nequaquam adjungatur, occasio quædam potiùs seu accidentarium initium est. At verò Plato qui ad altiora quædam animum longè ab his infimis semota extulit, non tam intima rerum initia, quàm seiuncta ab eis etiam adduxit.

duxit. Nam materiam, quæ principium est, ac pars concreti corporis, statuit: Deum autem & ideam tanquam remota principia & extra corpora posita illi præfecit. Itaque diversam uterque illorum tradendi principia rationem sequutus est: sed ambo tum rectè, tum malè. Rectè nimirum, si rerum naturam per se consideres: malè, si primam efficientem causam. Et quidem si annexa solum rebus naturalibus initia tradenda forent, ac non ijs alia priora, commodè materia, forma, & privatio adducta essent, cum hæc satis sint ad rerum effectiorem noscendam. At quoniam Physico prima initia, & elementa, si scire quicquam velit, vel auctore Aristotele, afferre opus sit, arcessenda sunt alia materia & forma priora, quæ non modò in res compositas non cadant, sed etiam præcedant compositionem omnem, ac planè simplicia, & per se sint. Huiusmodi autem quodnam principium statuere possimus? num formam, quæ corporeæ naturæ pars est? num etiam materiam? at nullum verius initium esse potest, quàm Deus: qui nec in res compositas influit, ut materia & forma, & concretionem omnem præcedit. Statuatur igitur ipse primum esse omnium initium, non ut Plato putavit, qui ei materiam adiunxit, quasi sine illa ipse nihil posset efficere, nec ut Aristoteles,

les, qui primam quandam naturam seu primum motorem, à quo singulæ formæ in materiam inducerentur, finxit, nihil verò aliud aut ageret, aut agere posset, id quod lib. Physicorum secundo, & tertio innuit, sed liberum infinitæ virtutis, & per se sine aliquo subiecto cuncta vi sua efficientem. Quamobrem si rerum partes, ex quibus componi ipsæ videntur, spectes, initia quodammodo illarum sunt materia & forma, si verò initia incorporea & summa corporum, ut fieri Plato iubet, quærenda sint, unus est omnium auctor Deus, qui per Ideam non modò Platone, sed Augustino etiam, atque alijs Theologis id attestantibus, ea fecit, & adhuc facit. Nec verò huic Deos juniores, sive angelos ad efficiendum addere oportet, quemadmodum arbitratus est Plato, cum ipse solo nutu universa tam incorporea, quàm corporea fecerit, neque cuiusquam ministerio usus fuerit. Hoc igitur in universum posito, ad intima illa rerum initia, de quibus agere cœpimus, nostra reducatur oratio.

DE

DE CAUSIS.

Caput IX.

Initia omnia vel intra subiectum corpus, quod fit, posita sunt, vel extra ipsum; quæ extra subiectum, ea sunt, quæ cum efficiendi vim habeant ob naturæ sinceritatem, in illud non subeunt, ut Deus, seu prima natura. Quæ verò intra subiectum, ideo initia dicuntur, quod illud constituent velut totum ipsæ partes, cuiusmodi sunt materia, & forma. Atque hæc rursus xel primo considerantur, prout res primo componunt, tuncque initia prima dicuntur inferiorum ratione, ut materia & forma, vel secundò, quatenus particularem efficiendi rationem habent: cuius generis sunt causæ, de quibus est hoc loco differendum. Initium autem, & causa, si communem usum loquendi spectemus, à Latinis pro eodem ferè capiuntur, hoc est, pro eo, à quo primum aliquid fit; hoc tamen inter illa esse discriminis putatur, quod initium communis quædam & prima origo cuiusque rei est, causa verò ratio particularis, & propria rei jam effectæ. Veluti Deus initium est rerum efficiendarum, materia verò, ac forma causæ earundem, quatenus minùs communia principia

sunt. Ex quo sequitur, causas initiis ita subesse, ut quicquid sit causa, continuo sit initium, non tamen è diverso. Est & aliud utriusque discrimen ab Aristotele in libris de prima Philosophia assignatum, quod initium propriè dicitur illud, quod primo per se res efficiendas mover, neque tamen illis sese admiscet: causa id, quod secundo mover, & in re quasi hæret; cuiuscunque id modi sit, sive primum, sive secundum discrimen asseramus, solus Deus verum est rerum initium, materia verò & forma causæ duntaxat. Hinc igitur constat, id causam propriè esse, à quo quicquam secundo fiat. Huius duo genera à Platone in Timæo atque Aristotele in secundo libro Physicorum asseruntur, unum causarum propriarum, alterum accidentalium. Ad hæc eadem rediguntur non modo omnes causarum omnium formæ, quæ infinitis penè modis variantur, sed superiora etiã initia, modò id, quod à nobis statutum est teneatur, excepto uno Deo, secunda esse illa, non prima. Propriæ quidem causæ hæ dicuntur, quarum vi rem fieri necesse est: Accidentariæ illæ, quas necessarius effectus non sequitur. Vtrumque genus causarum in quatuor quædam capita secari potest, in efficientem, materiam, finem, formam: quorum unumquodque diversas sub se habet

bet species, easque penè innumerabiles, quas omnes initio sumpto ab efficiente explicemus. Efficiens causa est ea, à qua fit aliquid: cuius variaz sunt species à Platone, Aristotele, Galeno, Philosophisq̃ue multis collectaz. Quaz omnes in huiusmodi divisionem commodè incident: ut efficientium altera prima sit, ac infinita, & necessariò cuncta producens, qualis est Deus. Altera finita, & secunda, ut natura, quaz post illum secundo loco ponatur. Hæc rursus dividitur vel in causas adiuvantes, vel instrumentarias, vel sua vi efficientes. Adiuvantes sunt eaz, quaz cùm per se nihil efficiant, tamen alijs adiunctaz aliquid faciunt, ut materia, forma, quaz necessariò coniungi ad essentiaz effectiõnem debent, sc̃q̃ue mutuò adiuuare. Instrumentariaz illaz, quaz vi efficientis impulsaz agunt, ut malleus à fabro ferrario commotus, æs cudit. Vi sua efficientes eaz sunt, quaz sine alterius adiumento planè agunt, quas necessariò sequitur effectus, ut ignem urere, aquam refrigerare. Cuiusmodi causarum forma ad naturam referri potest, vel ad Deum, qui solus vi sua efficit. Huc etiam redigantur aliaz innumerabiles formæ, ut princeps in efficiendo causa, quale est in unaquaque re id, quod primò agit: minùs principalis, qualis adiuvans: quæ rebus annexa est, quale se-

men virile fœmineo copulatum: quæ à rebus seiungitur, cuiusmodi est malleus ferrum emolliens: quæ rebus est insita, qualis calor in igne: quæ semota est ab illis, ut calor in aqua decocta, & ut uno verbo concludam, quæcunque causæ vim efficiendi vel propriam, vel accidentariam habeant, ea tamen distinctione adhibita, ut quæ per se efficiunt, verè causæ censeantur: quæ per aliud, accidentariæ: Quare causarum omnium efficientium formæ in hæc septem genera redigi possunt, fatum, providentiam, fortunam, naturam, artem, voluntatem. Quorum singula si explicentur, tota causarum vis abundè erit explicata. Fatum esse aliquod, dubium est inter Philosophos. Stoici illud ad eò pertinaciter defendunt, ut cuncta fato fieri censeant, quod idcirco definiunt seriem causarum necessariò connexarum, cui vel Deum etiam subijcere non dubitant. Contra sentiunt Academici, & Peripatetici, qui solam naturæ efficiendi vim, fatum esse volunt. Unde Plato in Timæo stabilem Dei in efficiendo rationem, præscriptumque ab eo rebus ordinem, fatum appellat, ipsumque causam esse communem ait, non privatam rei cuiusque: quandoquidem fatum leges naturæ universæ præscribit, non singularum rerum, quæ institutum suum sequuntur. Quo fit, ut illud
nec

nec Dei providentię cuncta administrantis,
nec voluntati hominis obsistat, quemadmo-
dum Stoici volebant, sed ipsa potius Dei
providentia sit. Hanc Platonis sententiam
Iamblichus, Plotinus, Proclus, Apuleius, Plu-
tarchus, denique Academici omnes sequun-
tur, atque etiam Aristoteles, qui necessariam
illam materię consecutionem formam reci-
pientis, in qua si forma sit, necessariò mate-
ria subijci debeat, atque adeò naturę om-
nem vim efficiendi necessariam fatum ap-
pellat. Hac in re nobiscum iidem Philoso-
phi consentiunt, ut præclare D. Gregorius
Nyssenus docet, quòd in Dei voluntate vim
illam necessariam quasi fatum constituunt,
ita tamen ut nostra voluntas ab eo minimè
cogatur. Atque hæc satis de fato: plura enim
in nostris in Timæum commentarijs complexi
sumus, pluraque Plotinus in libris de Fato, &
Alexander Aphrodisæus in eodem disserunt.
Fato adiuncta est providentia, de qua nobi-
les Philosophi non parum dissentiunt. Plato
in Timæo providentiam esse apertè fatetur,
& eam Deo opifici tribuit tanquam vim a-
gendi necessariam: Quam ipsam triplicem fa-
cit, unam rerum communium, quam Dei
propriam esse dicit: alteram minùs commu-
nium, quam deorum iuniorum sive cœle-
stium intelligentiarum virtutem suam terris
effun-

effundentium, tertiam dæmonum, qui partem hanc mundi inferiorem administrant. Sententiam hanc Plutarchus Platoni eidem in lib. de fato, de quæ decretis Philosophorum assignat, sequuntur quæ Iamblichus, Proclus, ac ceteri Platonici omnes. Stoici, Epicurei qui fati omnia subjecere, de medio tollunt, Contra quos Seneca, quamvis Stoicus in lib. de providentia, & M. Tullius in libris de natura Deorum, ac postremò Plorinus, & Alexander Aphrodiscus acerrimè tuentur. Aristoteles nusquam mentionem fecit providentiæ præterquam in libro duodecimo de prima Philosophia, in quo illam ad lunæ globum duntaxat ait attingere, à cæteris verò rebus inferioribus excludit. Quam quidem sententiam ne temerè nos ei tribuere putes, Alexander Aphrodiscus lib. 2. quæst. natural. interpretatur, ac ratione tuetur. Sed harum sententiarum nulla planè vera est, quamvis Platonica nostræ maximè congruat. Nam esse quidem Dei providentiam Christiana docet religio, in quo nobiscum Platoni convenit: eam autem vel ad juniores Deos, vel dæmones pertinere, vel ad Lunæ globum contingere duntaxat negamus, cum Deus vel minima quæque provideat, & ex æquo cunctis vi sua adsit, & consulat. Id quod de Dei loquens potentia, David apertè cecinit. Omnia

à te expectant, ut des illis escam in tempore: dante te illis colligent, aperiente te manum tuam, omnia implebuntur bonitatis, avertente autem te faciem, turbabuntur. Sed illo apertius apud Matthæum Christus, nonne duo passeret, inquit, asse vaneunt, & unus ex illis non cadit super terram sine patre vestro? vestri autem capilli capitis omnes numerati sunt. Quibus ex rebus perspicitur, non modò esse in rebus omnibus quantumvis exiguis providentiam, sed illam etiam esse infinitam quandam divinæ mentis potentiam, qua cuncta fiant, conserventur, & administrantur. Sequitur tertium causæ genus à superioribus diversum, nimirum fortuna. Hanc Plato & Aristoteles eodem modo definiunt, & esse dicunt causam accidentariam eorum, quæ præter institutum à nobis finem eveniant. Ut si quis ædes ædificaturus in jaciendis fundamentis thesaurum inveniatur, fortunæ is eventus dicitur, quoniam cum alium ille animo finem destinaret, aliud præter opinionem evenit. Eam ob causam Aristoteles fortunam in rebus, quæ ratione utantur, ponit, & ab inanimatis prorsus excludit. A qua etiam casum distinguit, quòd hic communior cuiq; eventuum generi sit, ille minùs communis. Nam quicquid fortuna sit, casu etiam fieri existimat, non tamen ediverfo. Quocirca
for-

fortunam sic ille definit, ut causa sit accidentaria in ijs, quæ ex animi consilio proficiantur: casum verò, ut eventus fortuitus præter consilium omne eveniens. Hac in re uterque Philosophus planè consentit, nisi quòd Plato casum à fortuna minimè videtur sejunxisse, velut Aristoteles. Nos autem, qui religione Christiana instituti à Deo cuncta vel minima curari asserimus, ne fortunæ quidem nomen admittimus, ne dum casum ipsum. Nec enim quòd rei causa ignoretur, à fortuna quicquam evenisse dicemus, cum Dei providentia cuncta fiant. Atque huic sanè sententiæ Plutarchus in lib. de fortuna, & Lactantius efficacissimis favent rationibus, quas hoc loco commemorare necesse non est. Quarto loco natura inter efficientes causas statuitur, quoniam quicquid per se naturali vi, & proprio instinctu fit, à natura fieri dicitur. Ab huiusmodi principio cuncta & incorporea & corporea nascuntur, ut copiose supra dictum est. Naturæ similis est ars, quæ efficiendi principium in rebus humano ingenio excogitatis definiri potest, ut statuaria sculpendarum statuarum, pictura tabularum pingendarum. Ipsarum autem artium permagnum est discrimen, quædam enim liberales dicuntur, quòd ingenio magis, quam corporis viribus perficiantur, quædam illiberales, quæ corporis mi-

ministerio potissimum utuntur. Utrumque sanè genus sub uno causarum genere, id est, arte continetur. Postrema efficientis forma est hominis voluntas, quæ libera cum sit, varijs modis immutatur: quocunque tamen modo id fiat, semper efficiendi causa libera nominatur, sive per se agat, ut scribere: sive adjuvet, ut prolem suscipere: sive denique liberè quidquam efficiat. Ad genus hoc causæ actiones omnes hominum referuntur, nisi quid fortè illi ab alio coacti faciant. Ac de genere efficientiū causarum hæc satis, nunc ad cætera pergamus. Efficienti materia subijcitur, quoniam per primum axioma cuncta in subiectum aliquod agere necessariò debent. Quid autem sit materia, supra exposuimus: nunc illam tantùm esse causam subijcientem sese effectrici, docere volumus, ne sine subiecto fieri quicquam admittamus: ideoque causa hæc definitur ea, ex qua quicquam ab efficiente fit, ut ex ligno statua, ex auro numus. Hujusmodi causæ, una est forma duntaxat, hoc est, quicquid efficienti alicui subijcitur, quocunque modo subijciatur, sequitur forma, quæ causa est ad quam aliquid fit, ut ad animalis formam corpus illius animatur: ad formam statuæ lignū dolatur, & exsculpirur. Unde hæc, in materiam cum ab efficiente inducatur, qualitatem illi quandam addit, à qua

qua nomen ipsa sortitur: à forma enim hominis homo appellatur: & ab equi, equus. Hujus verò causæ diversæ sunt species (siquidem formæ sunt variæ) ut aliæ substantiales, quòd rebus à natura insint, ut hominis, equi, cæterarumque rerum formæ, aliæ accidentariæ, quæ alteratione quadam subiecti eduntur, ut calefactio in aqua, ardor in ferro: omnes tamen sub unum formalis, ut ita dicam, causæ genus cadunt. Extremum causæ genus est finis. Is autem est propter quem aliquid fit, ut procreandi causa sceminae mas commiscetur: ædificandi, fundamenta jaciuntur: animi excolendi gratia, addiscuntur artes, id denique omne, cujus causa actio aliqua instituitur, finis appellatur. Finium autem ipsorum alij extremi sunt actionum institutarum, alij medij. Extremi quidem dicuntur, qui in actione postremi sunt, ut habitandi causa, domus ædificatur: sanandi gratia, medicina adhibetur. Medij verò illi, qui ad ultimum alium referuntur: ut ad extruendam domum, & ligna & lapides congeruntur: ad medicinam adhibendam, pharmaca parantur. Hæc omnia causarum genera, quæ hætenus commemoravimus, ita sunt inter se affecta, ut efficiens finem imprimis animo concipiat: tum vim suam in materiam exercens, formam ei inducat: postremò finem eum, qui cogitatio-

ne effectiōnem præcesserat, re ipsa consequatur. Ordo hic efficiendi, quoniam rationi consentaneus, non modò Deo tribuendus videtur, sed naturæ etiam, ut ei tribuit Aristoteles, quod nihil eadem temere per 7. Hypothesin aut frustra faciat. Superioribus his causarum formis, totidem eventuum genera respondent. Quatenus enim illæ causæ sunt, effectum ex se procreant. Ita fit, ut ab efficiēti causa eventus effectivi, ut sic loquar, oriantur: materiales, à materia: à forma, formales: à fine, finales. Iidem tamen omnes sub causarum suarum genus cadunt.

DE INITIORUM ACCIDENTIBUS, ac primò de motu.

Caput X.

DIXIMVS hætenus de initio rerum omnium primo, deque secundo initijs & causis. At quoniam in efficiendo quædam naturæ accidunt velut causarum accidentia: cuiusmodi sunt motus, tempus, locus, de his jam in præsentia differendum est, siquidem omne, quod fit per axioma 1. in tempore fit. Et cum corpora omnia aliquo in loco collocari per axioma 3. necesse sit, eademque dum fiunt, & durant, tempore aliquo transigantur.

cur per axioma 5. de his quoque ipsis dicendum est. Sumamus igitur primò exordium à tractatione de motu. Esse aliquem in rebus motum non modo loci, qui perspicuus est, sed mutationis ab una forma in aliam, generationes, interitus, mutationesque rerum aliarum indicant. Quoniam enim omne, quod fit, aut interit per axioma 5. motu aliquo cietur, necesse est etiam in rerum natura motum constitui, quo à generatione ad interitum, vel ab hoc in illam ipsam tendant, quòve dum essentiam suam retinent, varijs modis alterantur. Cui rei & illud accedit, quòd ex rerum divisione motus apertè intelligitur. Quoniam enim alia initia sunt motus, ut Deus & anima, alia motus ipsi, de quibus deinceps dicemus, alia res motæ ut corpora, quæ moventur; necesse est, esse aliquem motum, id est, actum à movente, reque mota diversum. Id ipsum ex rerum natura constat, quæ cum vel actu, vel potestate sint, frustra que sit potentia, nisi ad actum tendat, necesse quidem est eius potentiae actum esse aliquem: id quod motum Physici appellant. Ideo motus ab Aristotele actus rei potestate mobilis, quatenus eam habet potestatem, definitur. Nam corpora omnia, quatenus composita sunt eam habent facultatem, ut dimoveri ab ea constantia quam habent, suapte natura possint. Cum autem ea causa

alia movente impelluntur, facultas in actum deducitur : Atque ita rei mobilis facultate actus esse dicitur motus, qui, quòd relatione quadam ad motam rem sit affectus, ita nominatur. Nam si motus est, & motam esse rem sequitur, ac ediverſo. Idem præterea imperfecta quædam actio est, & minimè conſiſtens: ſi quidem nec qualitas eſt ſubjecto inhærens, nec eſſentia, nec per ſe aliquid re ipſa exiſtens, ſed agitatio quædam inconstans, qua ſubſtantia rei cujuſque impellitur ad quietem, id eſt, conſtantiam, firmitatemque ſuam. Unde motus quieti contrarius eſt, quoniam ille ex ſubjecti mutatione paritur, hæc ex conſtantia. Et quamdiu res in eſſentia ſua perſiſtunt, quieſcere dicuntur, quando verò immutantur, quocunque id modo fiat motu aliquo cientur. Quin etiam motus ipſe non tam eſt moventis, quam rei motæ, ab utroque enim pariter proficiſcitur, à movente dum editur, à mota re dum recipitur. Itaque quamvis in eodem ſubjecto & res movens, & mota in eſſe videatur, tamen quia utriuſque diverſi ſunt effectus, alterius nimirum actio, alterius perſeſſio, diverſa quoque eſt ratio. Quemadmodum ferrum candens, dum igne conſumitur, patitur quidem ab illo tanquam ab agente, ille verò in hoc agit: utriuſque demum agitatio motus appellatur. Quocirca in motu
omni

omnibus terminos ratione quadam cogitamus, unum, à quo fieri motus incipit, alterum, in quod terminatur, tertium, quò fieri debet. Atqui totam istam subiecti quasi agitationem, quam animo solum comprehendimus, in rebus sensibilibus fieri censendum est. Intelligibilia enim nullo huiusmodi motuum commutationis genere impelluntur, quanquam è loco in locum moveantur, ut angeli. Hæc breviter de toto genere motus dicta sint, nunc eius formas persequamur. Quoniam moveri omnia eo modo, quo diximus, perspicuum est, variae motuum formæ ex diversis rerum immutationibus eduntur. Nam aut res ad ortum progrediuntur, aut ad interitum, aut ad incrementum propriæ magnitudinis, aut decrementum, aut ad qualitatæ commutationem aliquam aut à loco in locum. Si ad ortum progrediantur, motus ille ortus appellatur seu generatio, si ad interitum, interitus, si ad incrementum, augmentum: si ad decrementum, diminutio. si ad qualitatæ commutationem, alteratio: si à loco in locum, localis mutatio. Hinc motus sex genera constituta iam sint, ortus, interitus, incrementum, decrementum, alteratio, loci mutatio. Quæ omnia ad quatuor capita referuntur, substantiam, qualitatem, quantitatem, & motum. Ad substantiam quidem, ortus & interitus: ad

D 51 quan-

quantitatem, incrementum, & decrementum: ad qualitatem, alteratio: ad motum, loci mutatio. Hæc eadem motus genera, quæ, uti diximus, diversa ratione in eodem sæpe subiecto cernuntur, successione quadam temporis edi necesse est. Quoniam enim omnia quæ moventur, aut successivè, aut in instanti, ut ita dicam, moveri debent: & in instanti, corporeum nihil movetur per 12. axioma, cum per corporis partes moveatur, relinquitur motum omnem in temporis successione fieri debere. Huc etiam illa motus divisio à plerisque adducta pertinet, ut alius per se fiat, qualis est generatio cujusque rei: alius accidentario, cuiusmodi alteratio alicuius subiecti vel in calorem vel frigiditatem. Verùm omnium sanè genera motuum in hanc quadripartitam divisionem commodius redigi posse videntur, ut alius naturalis sit, alius violentus, alius animalis, alius voluntarius. Naturalis est is, qui in subiecto sit natura impellente, ut ortus, interitus, alteratio, incrementum, decrementum. Violentus ille, qui ab alio vi quadam externa editur in aliud, ut corporis alicujus agitatio. Animalis is, qui ab interno movendi principio oritur, ut animalium motus. Voluntarius denique ille, qui ab homine sponte fit. Ex omnibus his motuum formis

æ Physico præpositæ duntaxat sunt, quæ vel à natura, vel ab anima proficiſcantur: reliquæ non item. Hinc etiam perſpicitur in motu omni hæc quinque ſpectanda eſſe, quæ neceſſariò illum conſequuntur, movens: res ſubiecta motui: terminus, unde motus incipiat edi: terminus, in quem tendat: tempus, quo peragatur. His ita ſtaturis, aptè, vt ego arbitror, quomodo fiat motus intelligetur, & quot ejus genera ſint: quæ autem his adduntur de motuum proportionē, tarditate, & velocitate, continuitate, cæteriſque alijs, quæ inutiliter, obſcureque Ariſtoteles perſequitur, hoc loco præmittenda cenſemus: cùm ad naturam motus explicandam ſatis hæc ſint. Ex ipſo verò motu motorem aliquem primum inductione inveſtigare, id quod Ariſtoteles fecit, multò etiam inutilius eſt, cùm de hoc ſuperiùs multa dixerimus. & axiomate 6. jam conſtet, quicquid movetur, ab alio moveri oportere. Motui contraria eſt quies, quam rei motæ constantiam in adepta iam forma definire poſſumus. Cum enim motus ceſſarit, & ad extremũ finem pervenerit, quies illum continuò ſequitur. Unde vt motus genera ſex ſunt, ſic totidem quietis, ſi illis finem motionis addas extremum. Veluti generationis quies eſt adepta iam forma: interitus, privatio:

privatio: decrementi, decessio rei: incrementi, accessio: alterationis, aliqua qualitas: mutationis localis, consistentia in loco. Atque hæc de motu dixisse ex Aristotelis sententia de libris Physicorum satis sit. Plato verò diversis in locis ejus naturam eodem fere modo, atque ille, complexus est. Nam libro 10. de Rep. cum de animi motu disserat, easdem, quas Aristoteles sex formas posuit, ijsque tres illos terminos à nobis antè præscriptos tribuit. Idem in lib. de leg. octo corporum motus, atque animi duos statuere videtur. Ac corporis quidem vnum, quem localem vocat Chalcidius, cujus duas facit species, translationem, & circulationem: alterum qualitatis, cui concretio, secretioque subijcitur: tertium quantitatis, in quem cadunt incrementum, & decrementum: quartum essentialis, cuius partes sunt ortus & interitus. Animi autem duos facit motus, vnum alia moventem, nec ab alio impulsam, ut mentis, alterum ab alio incitatum, & alia ipsum incitantem, ut sensum. Verum hæc genera motuum sub divisionem primam commodius cadere videntur. Quod autem ad motus naturam spectat, cum ille definit materis differentiam, & alterationem, ipsamque in remota constituit. Vim porro ipsam motricem à rebus in sensum cadentibus sejungit, & in
Deo

Deo cunctorum motore ponit, quemadmodum & rerum causas formales. Quapropter hoc differt ab Aristotele Plato, quod hic motum à Dei mente; in qua Ideæ sunt, in materiam pervenire dicit, eumque non accidens, sed ens quoddam intelligibile, à sensilibus rebus diversum, & æternitate commensurabile, quoniam in Deo sit, appellavit. Ille contra in sensilibus rebus ipsum duntaxat, quasi non ens, quod cogitatione comprehendatur, constituit. Denique vim ipsam movendi, motæque rei perpeffionem in uno eodemque subiecto ratione quidem non ipsa re distinctam ponit. Ut quemadmodum eadem est ab Athenis ad Thebas via, & à Thebis ad Arhenas (quæ tamen diversa ratione duplex cogitur) ita in motu subiecto, quatenus à natura insita motus editur, sit causa movens, quatenus verò idem patitur, sit perpetuens. Discrimen hoc inter eos duos Philosophos & Simplicius, & Georgius Gemistus, & alij multi Platonici statuunt. Sed hac in re mihi, ut sententiam nostrorum adducam, neutri eorum esse assentiendum existimo in eo, quod affert de motus principio. Nec enim res ipsæ intra se movendi sese vim habent, nisi animatæ sint, nec motus etiam in Deo quasi essentia debet collocari, sed ab eo quidem initium movendi se omnibus provenit, is tamen motus in ipsis editus

editus causa motionis earum non est, sed effectus. Motum etiam in illius mente collocare planè ridiculum est, cum omni mutationis specie idem vacet, & motum essentiam appellare sit valde absurdum, cum si motus Idea esset aliqua, ejusdem quoque formam in subiecto expressam apparere necesse esset: quod contra sit, cum in subiecto motum cogitatione intelligamus, non re ipsa.

DE INFINITO, ET

VACUO.

Caput XI.

DIXIMVS suprà de motu quam brevissimè fieri potuit: nunc quoniam ad hunc locum pertinet disputationis de infinito explicatio, hac etiam de re est deinceps discurrendum: Id autem eo magis fieri debet, quo finitudo motionis est quædam circumstantia, quam vt ab infinitate, (quam quidam falso in rebus sensilibus ponunt) distinguamus, vtriusque intelligentia diligenter facienda est. Quid sit finitum, apertum est omnibus, qui mente, vel sensu res quasque comprehendunt, cum ex definitione finitum id sit, quod sensu possit percipi: cuiusmodi sunt corpora omnia, ac demum res omnes mundanae, quæ si forte ignorantur, non propter

pter sui infinitatem, sed ob eorum notitiam
 obscuram ignorantur. Ac infinitum quid sit
 apertè ex definitione intelligitur. Esse verò
 illud ex his rationibus Aristoteles colligit:
 primò ex magnitudinis coniunctæ divisione,
 quæ infinities posse fieri videtur, cum ex
 Hypothesi omne continuum dividi in par-
 tes semper divisibiles possit: Secundò ex
 temporis continua successione, quæ cum par-
 tes suas habeat coniunctas, easque perpetuo
 quasi decursu labentes, esse tempus infinitum
 videtur: Tertiò ex perpetua rerum genera-
 tione, quæ, ne omnia tandem aliquando in-
 tereant, perpetuò continuari videtur: Quar-
 tò à finiti contraria natura, quoniam si om-
 nia, quæ in mundo sunt, finita sunt, in ali-
 quod infinitum, à quo cuncta contineantur,
 necessariò perveniendum est. Nec enim à fini-
 to alio contineri possent, per 10. hypothesin.
 Postremò ex humanæ mentis intelligentia,
 quæ cum incessabili progrediendi per omnia
 cogitatione sit prædita, semperque alijs alià
 adiungat, finitate terminari non posse, quin
 ad infinitatem tandem perveniat, vide-
 tur. Esse igitur infinitum, his quinque ra-
 tionibus confirmat Aristoteles, ideoque
 illud definit id, cuius magnitudinem si ca-
 piamus, semper aliquid restet capiendum,
 quando una & eadem apprehensione
 percipi

percipi nequeat. Quocirca in magnitudine illud ipse duntaxat ponit, non in essentia, idemque in rebus sensibilibus, non actu, sed potestate esse dicit, quatenus vni eidemque rei semper aliquid additur. Ideo in duobus magnitudinis formis intelligi posse ipsum inquit: aut in continua, quæ semper in divisibilia dividi potest: aut in disiuncta, cui si perpetua fiat accessio, in infinitum tandem excrescet. Denique nec ad accidens, nec ad essentiam reipsa existentem, sed ad quantitatem referri infinitum inquit, ne si illud essentia esset, multæ essentiæ forent infinitæ, néve si actu in subiecto existeret, infinitum esset aliquod corpus, quod per hypothesin 9. non est. Ergo ex sententia Aristotelis nihil in rebus sub sensum cadentibus infinitum est, quamquam esse possit eo modo, quo diximus. Cōtrà Plato in Philebo quamvis obscure, tamen universam infiniti naturam complexus est. Is enim sub Socratis persona loquens, magnum & parvum infinita esse dixit, quatenus in ijs definitum sit nihil: infinities enim in multis magnis & parvis progredi possumus, nec certum aliquem excessum magnitudinis invenimus, præsertim cum continuum semper in divisibilia dividi possit. Itaque cum excessus & defectus pars numeri sit, in numero quoque pari sub enigmate quodam ille infinitum esse

esse retulit, quia dualitas infinita sit, additione perpetua facta, vel subtractione. Quo fit, ut Platoni nihil aliud sit infinitum dici magnum, vel parvum, aut dualitatem, quam si continui divisione in partes æquales facta, inveniri posse indefinitum dicat. Qua in re illi planè cum Aristotele convenit. Huiusmodi genus infiniti Plato in rebus sensibilibus potestate quadam ponit, & ab eo illud alterum sejungit, quod actu esse in ente illo immobili sive Idea in Parmenide dixit: illudque Deum esse vult, qui verè infinitus actu existat, id quod etiam Aristoteles sentit, cum primum illum motorem æternum, ac divinum inducit. Hac in sententia & Plato & Aristoteles planè consentiunt: quemadmodum vel Simplicius in Aristotelis libros scribens testatur. A nobis autem uterque in eo differt, quòd nos Deum infinitum esse dicimus non magnitudine, ut ij existimare videntur, sed essentia, intelligentia, æternitate, atque adeò nihil esse aliud, quàm ipsam infinitatem essentia. Contrà in rebus sensibilibus, aut in intelligentiam etiam cadentibus, ne potestate quidem infinitum ponimus. Si enim esset, sensibile jam non foret, nec intelligibile, cum nihil concretum infinitum esse possit ex hypothese, nosque duntaxat res concretas concipiamus. Atque de infinito hæc satis. Tran-

seamus nunc ad tractationem de loco. Esse locum aliquem sensibilibium rerum, & intelligibilem (Deum autem excipio, qui loco non constituitur) ex 3. axioma liquet, atque res ipsa declarat. Quid autem ille sit, explicandum jam est, quandoquidem de corporis vniversi inijs, causis & primis accidentibus differimus. Locum definit Aristoteles extremam superficiem termini, rem quamque ambientis. Nam cum omnia corpora in loco aliquo sita esse ex præcedenti axioma necesse sit, locusque à re locata sit diversus, certè is erit extremum illud, quod corpora locata complectitur, & tanquam in sinum suum recipit. Nec verò locus iste aliud complectens est corpus, ne duo corpora in eodem collocentur contra 8. axioma, sed capacitas quædam duntaxat aëris rem quamque ambientis, quæ ad figuram, magnitudinemque rei sese accommodat. Quemadmodum si rotundum, quadratumve corpus sit, aër illud ambiens ejusmodi quoque erit. Et quamvis hoc ita fiat, natura sua tamen locus nunquam movetur simul cum re locata, nec eiusdem motionis causa est. Igitur ad loci vim satis noscendâ hæc imprimis quasi de illo præcepta tenenda sunt: primò locum ea continere quæ in se sunt, nec ab ijs ipsum: Secundò nihil esse locū illorum, quæ contineat: Tertiò

rei

rei locatæ æqualem esse illum semper: Quartò locum à re locata ita seungi, ut nunquam vacuus relinquatur, cum sublato vno corpore, alter substituatur: Quintò loci esse has differentias, sursum, ac deorsum, quatenus relatione quadam hæc consideramus. Postremò corpora omnia ad naturalem suum locum spontè ferri, ut in sequentibus etiam dicetur. Quæ cum ita sint, duplicem esse locum animadvertendum est, vnum communem omnium, cuius modi est aer hic terris offusus: alterum rei cuiusque privatum, qui illam sine medio complectitur. Superioris generis exemplo est domus, quæ ab vniverſo aëre continetur, inferioris verò vinum amphoræ inclusum. Quo quidem de genere intelligendum est id, quod supra retulimus, locum locatæ rei sese semper accommodare, quatenus concava illius superficies contentum corpus intra se recipit. Ex hac ipsa divisione duplex esse loci discrimen agnoscitur, vnum naturale, quo singula spontè continentur, ut in terris gravia, & in aere levia: alterum violentum, quo res illatæ tenentur, ut lapis in aerem projectus. Hæc igitur de loco satis. Hûc pertinet disputatio illa sæpe à multis controversa de inani sive vacuo, quod Epicurei, Democriticique acriter tuebantur, de quo est in præsentia dicendum, ne dubitare

fortè aliquis possit. Locusne sit aliquis vacuum ad Platonis ætatem jam inde à Thaletis Milesij temporibus omnes ignoravisse Plutarchus auctor est. Postmodum verò Philosophi quidam minuti confirmare illud ausi sunt, ut Leucippus, Democritus, & Epicurus. Quorum sequutus sententiã Lucretius poëta melior, quàm Philosophus dixit: Namque est in rebus inane: contra Plato, & Aristoteles inane prorsus sustulere. Ipsumque nos minime esse multis experimentis passim edocemur, cum aquam sursum ascendere è fontibus, ne vacuum relinquatur, videamus, atque aërem reflecti, aliaque multa generis eiusdem. Ratione verò, quemadmodum probat id Aristoteles, multo magis perspicuum hoc est: imprimis quia si locus inanis esset, motus tolleretur, cum in vacuo loco nulla intervalla inveniantur, dum in nihilo discrimen sit nullum, cumque motus habere intervallum aliquod, à quo terminetur, necessario debeat. Præterea si est inane, subito fieri motum necesse esset, cum nullum sit medium: at contra successione motum omnem fieri videmus, ergo ne inane quidem est. Adduci possent & aliæ innumerabiles rationes, quæ vacuum omnino tollant, sed satis hæc sint ad propositam tractationis brevitate. Diximus ex Aristotelis sententia, quid locus, & qualis esset: tum nullum esse

esse in rebus inane. Nunc Platonis sententiam afferamus. Locum in Timæo Plato materiam esse dixit, quoniam ut materia per se nihil existens, dum formæ sese subijcit, ad ejus essentiam conformatur, ita locus, qui capacitas est rudis duntaxat, locatæ se rei accommodans, illius formæ fit. Sententiâ hanc Aristoteles reprehendit rationibus diversis materiam esse locum negans: quam tamen Simplicius ita interpretatur, ut duplicem Plato loci significationem fecisse dicatur: unam pro materia ipsa, quæ quatenus in se formas capit, similitudine quadam locus appellatur: alteram, pro loco ipso corporum capaci, qui similitudine materiæ ita nominatur. Itaque idem sensisse Platonem & Aristotelem Simplicius putat, huicque Plutarchus in libro de Philosophorum decretis assentitur, qui locum Platoni dici metaphora quadam materiam inquit. Utcunque tamen id sit, siue mutuò sibi consentiat uterque Philosophus, quod magis equidem arbitror, siue dissentiat, exactius certè Aristoteles de loci natura, proprietateque disseruit, cum Plato per pauca, aut ferè nulla præter id, quod retulimus, dixerit. Porro quod ad quæstionem de vacuo spectat, uterque sibi mutuò consentit: amboque, uti dixi, pariter vacuum tollunt, ut ex Timæo videre licet, qui in mundo conti-

neri omnia inquit, ne inane quicquam relinquatur, & cum de elementorum in loca varia commigratione loquitur, eamque in locum non vacuum, sed ab alio prius desertum, subintrante paulatim altero, fieri docet, & cum postremo edi respirationem perpetua quadam spiritus vicissitudine, ne vacuum fiat, ostendit. Quibus ita in vniversum statutis, Christianæ religionis dogma nihil in super addit, aut detrahit ab ijs, quæ ratione & experimento perspicua sunt: id solum addidisse satis sit, Deum omnia penetrare vi sua, ipsumque ubique esse, & permeare, quemadmodum de illo refert Propheta: Cælum & terram ego impleo. Idemque aliàs: Cælum sedes mea, terra verò scabellum pedum meorum. Veruntamen hæc ne superioribus quidem repugnant, cum Aratus Jovis esse omnia plena, dicere non dubitarit.

DE TEMPORE ET ÆTERNITATE.

Caput XII.

Postremum initiorum accidens, est tempus, sine quo cum fieri nihil in rerum natura possit per axioma, 2. consequens est, vt de illo etiam differamus. Magnæ sunt difficilesque Philosophorum de tempore disputationes

tationes, quas oratione longa decurrere molestum esset. Quocirca uti cepimus, Aristotelis Platonisque sententias de illo exponamus, non quasi narratores, sed tanquam earundem auctores. Tempus Aristoteli dicitur mensura motus per prius & posterius distincta. Cujus definitionis ut vim exponamus, imprimis tempus & motum maximè inter se cohærere animadvertendum est, quoniam sine motu tempus, aut motus sine tempore esse non posse videtur: ambo enim æquè continua sunt per definitionē 3. cū partes suas æquè habeant coniunctas, amboque sub magnitudinis rationem cadant, denique per motum tempus, ac per tempus motus distinguatur. Quo fit, ut cum tanta similitudo, utriusque sit, alterum definiri per alterū omnino debeat: nullo enim pacto sine motu tempus describi potest, cū neque tempus sine decursu aliquo motus sit. Nec verò idem esse motum, quod tempus existimes, tametsi hæc duo maximè cohæreant, (siquidem aliud est motus duratio, aliud motus ipse) sed simul cum illo esse duntaxat, quatenus illa temporis duratio per motum quasi distinctionem explicatur, quæ sine cæli motu constare potest, ut deinceps dicetur. Jam verò tempus mensura sive numerus dicitur, non qualis est is, qui menti nostræ insitus alia numerat, ut

ternarius, quaternarius animo conceptus, per quem veluti notionem quandam alios enumeramus, sed cujusmodi est ipse numerus rebus numeratis inhærens, & à nobis numeratus. Ut ternarius & quaternarius in ovibus, equis, hominibus. Itaque quoniam ille numerans numerus semper idem est, quippe per quem numeramus, numeratus verò ab illo semper variatur, tempus esse numerus hujusmodi dicitur, quatenus ejus decursus idem semper non manet, sed per intervalla diversa progreditur. Hinc patet, in definitione quid sit prius, quidve posterius: sunt enim quasi partes tempus distinguentes, non quod idem ipsum (quod continuum suapte natura est) dividatur, sed quòd ratione quadam per intervalla temporis partes distinguantur. Per prius enim elapsam partem temporis intelligimus, per posterius illam, quæ sequitur. Hanc etiam ob causam quendam veluti terminum, quem *τὸ νῦν*, id est, nunc seu instans appellant, cogitamus: quod ut punctum in linea, ita pars temporis non est, sed terminus, cujus relatione quid prius sit, quidve posterius dignoscitur. Quid autem proprium sit temporis è rerum mutabilium natura perspicere potest, cum enim immutabilia omnia & incorporea nullam temporis commutationem admittant, contra corporea eodem illo transigant.

figantur, sic motus temporì adhæret, ut esse alterū sine altero nequeat. Hinc fit, ut quamvis res quiescentes, id est, constanter in essentia sua sint permanentes, nullatenus moveantur: quia tamen non sine illa duratione temporis quiescant, ejusdem esse quoque participes accidentariò dicantur. Ex quo sequitur, nihil aliud esse in tempore fieri quàm ab eo contineri, ut corpus à loco. Est porrò temporis proprium re ipsa partes suas simul habere successione quadam perpetua coniunctas, ratione tamen præcedentis, sequentisque intervalli ipsas distingui. Partes verò temporis pro motus cœlestis conversionibus distinguuntur, solaris enim conversionis spacium annus dicitur: Lunarìs verò mensis: totius denique cœli dies. Per hæc tria temporis intervalla reliqua omnia numerantur, tum quia notiora sunt, tum quia numeratu faciliora. Quandoquidem reliquorum syderum cursus per annos ac menses, diesque numeramus, ipsosque dies per horas & momenta: quæ uti puncta linearum, ita temporis sunt termini, qui tum ad priora, tum ad inferiora referuntur: ut olim præscriptum tempus significat relatione hujus instantis nunc: iam instans, futuri temporis pars est: Breviter temporis omnia intervalla dignosci tribus his differentiis solent, præterito, futuro, præsentì: quæ quamvis in-

ter se connexæ sint, ratione tamen discernuntur. Ideo cum tempora numerare volumus, per breviora semper numeramus longiora, ut per horas diem, per dies mensem, per menses annum. His ita statutis de tempore ex Aristotelis sententia, rem totam paucis complectar. Tempus alligatum est cæli conversionibus, itemque æterna est ejus, uti cæli constitutio: tum continuum est & facultate infinitum, quatenus successione quadam perpetua ipsius duratio continuatur: tum longum breveque dici ratione durationis solet, non velox aut lentum, quoniam hæc propria motus accidentia sunt. Hæc igitur sunt de tempore ab Aristotele dicta. Porro æternitatem ille nihil aliud, quam tempus, ac æternum tempus esse existimavit, hoc tamen esse inter illa discriminis, quod æternitas in rebus mutationi minimè obnoxia sit, quæque suam durationem semper habeant coniunctam, tempus verò rebus fluentibus & successione quadam durantibus inesse. Unde illud semper & nunc in tempore si coniunctum vna sit, æternitas ab eo appellatur, si verò in partes sese mutuo consequentes distinctum, tempus. At Plato in Timæo de mundi atque animæ ortu differens, tempus esse æternitatis imaginem inquit mundanæ motioni inhaerentem. Nam æternitatem ipse Deo, & in-

& intelligentijs tribuit dumtaxat, quatenus durationem suam perpetuò & instantem obtinent, tempus verò rebus corporeis & mutabilibus: Ideo quæ ipsum cum mundo simul esse genitum inquit, id quæ ab æterno, quoniam is mundum æternum, ut postea docebimus, esse vult, quatenus duratio illa æternitatis indistincta in Deo manens in mundi effectiōe quasi distincta, & ordinata est. Itaque quoniam intelligibiles res durationem suam simul conjunctam, immobilem quæ habent, æternitatem ijs Plato attribuit. Cujus esse proprium inquit, nullo temporis intervallo distingui, sed illud ipsum quod est, instans, ac præsens habere: quoniam autem corpora essentiam mutabilem habent, ijs tempus varijs intervallis distinctum assignat. Quocirca in alio libro ipse, sive Speusippus eius auctor est, æternitatem definit durationem, quæ per omne tempus extiterit, nulli demolitioni obnoxia, sed semper illud nunc instans habens: Tempus autem cælestis motus ac syderum conversionis mensuram. Quæ propter uti Ideæ mundi corporei intelligibilem æternam quæ in Deo, ut fusiùs deinceps dicemus, Plato posuit (ad cujus imaginem hic conditus fuerit) ita illi æternitatem tanquam exemplar, huic tempus veluti illius imaginem, quod attinet ad durationem, accommodavit. Hac in re
mihi

mihi & Plato & Aristoteles omnino consentire videntur, quemadmodum apertè Simplicius testatur, si quidem vterque mundum æternum esse putavit, vterque rebus sensilibus tempus ob durationis commutationem: intelligibilibus verò ob constantem, immobilemque naturam æternitatem assignavit. Differunt autem, quòd Plato æternitatis vim magis in Timæo explicuit, illamque tanquam exemplar esse temporis retulit, ac tempus unà cum mundo factum, quamvis ab æterno, asseruit, quatenus ab illa profluit: at Aristoteles (qui mundum omnino æternum esse dixit) eatenus ab æternitate tempus seiunxit, quatenus illa rerum incorporearum & constantium est, hoc corporearum, ac mutabilium, illaque suam durationem habet simul connexam, hoc in successione continua. Cæteroqui autem tempus unà cum mundo factum esse negat, ipsumque ab æternitate ratione quadam videtur distinguere, non re ipsa. Atque de tempore & æternitate hoc loco satis: plura enim in nostris in Timæum commentarijs complexi sumus, ac deinceps libro secundo obiter attingemus. Videamus nunc, in quo quo nostræ religionis dogma ab eorum Philosophorum sententia differat. Æternum esse tempus, ut putat Aristoteles, Justinus Martyr, Augustinus, Gregorius Nazianzenus, cæterique

que patres, atque ipsa Christiana religio vehementer negat, cum Deus mundum cum tempore simul condiderit, nec alterum alter præcesserit: cum enim mundus non erat, nec tempus erat, sed æternitas: facto verò mundo, simul & tempus initium sui ortus habuit, Item ratione quadam tempus æternum dicere, quatenus æternus est mundus, rationeque alia factum, quatenus ab æternitate tanquam exemplari promanat, (quod Plato censet) multominus esse verum potest, cum mundus aliquando esse inceperit, non ab æterno fuerit. Quando quidem illud Moyses: In principio creavit Deus cælum & terram, ad essentia, ac temporis initium referendum est, ut docet Basilii, Ambrosii, Augustini, ac cæteri omnes, non ad originis exordium duntaxat, cum & divinus vates id canat. Fecit lunam in tempore, sol cognovit occasum suum: Idemque passim aperte sacræ literæ doceant, ac prædicent. Porro æternitatem durationem quandam esse perpetuam, & instantem, convenientemque Deo, (uti Plato putavit) nos etiam fatemur, imò eius descriptione tanquam verissima utimur, patresque omnes antiqui vsi sunt. Ut Gregorius Nazianzenus, Basilii, Augustinus, alijque multi. At illam intelligentijs, sive angelis minimè tribuendam censemus, cum ortum habuerint, sed ævum;

avum, quodd rerum perpetua constantia durantium, ortum tamen habentium, proprium est. Præterea tempus ab æternitate solo mutationis discrimine, (quatenus altera stabilis est, alterum verò decursu perpetuo fluat) omnino etiam est falsum, cum verum vtriusque discrimen originis huius, & illius infinitæ durationis ratio demonstrat. Quocirca Augustinus, quid verè sit tempus, ignorare se fateretur, cum neque motus cœlestis duratione ipsum duratæ numerari dicat, quod ille perpetuus esse nequeat. Atqui de tempore, æternitateque hæc satis, ut locus hic postulabat.

DE VSV PRINCIPIORVM.

Caput XIII.

HACTENVS rerum initia, causas, accidentiaque ipsarum, quæ diversa ratione in omnium effectione spectantur, exposuimus: nunc ne illa temere, & inutiliter adducta esse videantur, aperiāmus exemplo aliquo earundem vsum, ac rationem, ut quæ causa fuerit eorum constituendorum intelligatur. Ad id autem commodius ostendendum cum ordinem in rerum causis servare opus est, qui Physici fini, & instituto maximè congruat. Itaque quoniam illius est, causas cuiusque corporis efficientes, prin-

principiaque tam adiuncta quam remota inquirere, & eadem ad ultimum quoddam omnium reducere, hæc omnia in eodem diligenter consideranda erunt. Siquidem hic verus est Physices usus, ut cuicunque quæstioni de rerum natura aptè proprièque possimus respondere, adductis illarum causis, non frustra in disputationibus de materia privatione, forma, motu, loco, tempore, inani, cæterisque rebus operam inutilem ponere: Statuamus igitur *περὶ βλήμια* aliquod, id est, quæstionem, vel ex Aristotelis vel aliorum Philosophorum libris, vel ex communi etiam rerum usu depromptam, huiusque causas, & initia quæramus ad eorum usum noscendum. Cur aquatilia animantia terrestribus grandiora sint, Plutarchus in lib. huiusmodi titulo inscripto inquit, eiusque magnitudinis causam esse humidam eorum naturam testatur: nos autem illud per causas, principiaque illorum effectiōis accuratiùs demonstremus. Humor in rerum ortu quasi materia subijcitur calori, ille enim perpetiendi, hic agendi vim insitam habet, ut experimento etiam compertum est, ac nos vberius in sequentibus explicabimus. Quo autem plus materiæ corpora habent, eo maiora sunt, quia materiam quantitas sequitur, hæcque pro illius portione aut augetur, aut minui-

minuitur. Id ex singulorum corporum natura perspicitur, cum graviora, majoraque corpora sint, terrestria quàm aërea, hæcque quàm ignea, (de concretis enim loquor.) Ergo cum pisces plus humoris propter cibum aquatilem, vitamque in aquis semper actam habeant, humorque maior materia vim maiorem indicet, eos esse terrestribus animantibus (quorum humor caloris vi maiori, & siccitate magis constringitur,) grandiores manifestum est. His ita propositis, causas eorundem generationis investigemus. Primum quidem aquatiliū initium est opifex Deus universitatis, qui, ut Moses commemorat, solo verbo pisces creavit: producant inquit, aquæ reptile animæ viventis. Et paulò post: creavitque Deus cetera grandia, & omnem animam viventem, atque motabilem, quam produxerant aquæ in species suas. Jam verò natura, quam secundum principium in rebus constituimus, naturalis illa vis erit, qua humore caloreque conglutinato corpus piscium est concretum, & compactum. Ut in eorum etiam ovis cernimus, quæ cum initio inanima sint, paulatim vi naturali crescente animantur, & in perfectam corporis magnitudinem adolescunt. Itaque interna illa eorum vis à Deo illis tributa secunda natura vocetur: quam Moses etiam in eo loco videtur
signifi-

significare, cùm ait: Producant aquæ reptile animæ viventis, quasi diceret, habeant à me vim eam aquæ, vt pisces producant. Porro moles illa, & subiectum formæ piscis & forma ipsa illius principia constituentia corpus erunt, ita tamen, vt in ovo privatio formæ ejus, quam jam habet, præcesserit, hacque subsequente, illa cessarit. Exemplar verò hujus formæ (vt Ideam cum Platone statuamus) Dei consilium, sapientiaque in procreandis piscibus sit: cuius vi nati omnes ij sunt. Atque hoc sanè modo principia omnia prima in piscium effectione considerantur. Age vero causas ejusdem rei nunc consideremus. Efficiens causa prima est Deus: Secunda autem vis illa naturalis ovo piscis insita, quæ veluti animam ejus elicit, & promovet. Materia semen illud, à matre piscis in ventriculo collectum, humoris copia, quàm caloris maiori abundans. Forma verò fuit prius ovi, sed postea piscis, à qua nomen naturamque habet. Finis demum, quem in Deo præcipuè statuimus, ultimus fuit, vt mare animalibus impleretur, vt terra stirpibus, aër volucris, cælum syderibus: medius verò, (qui naturæ piscis, quod ad scopum generationis ipsius attinet, tribuendus videtur) piscem producere. Quemadmodum Architectus, vt domum extruat, laborat: paterfamilias, vt eam instruat, curam

F

ejus

eius rei huic mandat. Consideremus nunc & reliqua initiorum accidentia, quandoquidem causas peruestigavimus. Motus quidem in piscis effectione fuit apertissimus ab ovi forma in piscis formam iam adeptam : neque enim sine aliqua vi mutatio ea fieri potuit. Idem autem motus generatio appellatur, quoniam ex ovo illo cuius forma plane interiit, piscis est natus. Fuit etiam incrementum, quoniam illud minimum ovum in magnum piscem excrevit. Fuit quoque alteratio quatenus concreto corpori vires alia naturales accessere : quales sunt, sapor, gustus, aspectus, ac cætera id genus alia. Postremo motus corporis ab animæ vi natus est : quo natando per aquas incedere, & quasi repere pinnulis possit. Accessit præterea tempus, non quidem subitum, aut repentinum, sed quod generationi incrementoque satis fuit, & generationi ovi ex semine & informationi eiusdem in pisce, cum nihil sine tempore fieri, aut occidere possit per 4. axioma. Quin etiam in loco semen initio, ac ovum postea, postremoque piscis constitui necessario debuit, quoniam corpus erat, & omne corpus in loco situm esse per 3. axioma necesse est, cum nihil natura inane agnoscat. Duplex demum in eo locus consideratur, unus privatus, quo piscis cuiusque magnitudo præscripta continetur, ut nidulus in profundo

fundo factus, vel inter rupes: alter communis
 omnibus piscibus, id est, mare, seu flumina.
 En igitur quo pacto in eodem exemplo ini-
 tia, causasque omnes, accidentiaque possis in-
 stituto ordine investigare, idemque in aliis
 quæstionibus propositis facere. Sed hæc
 ad initiorum, causarumque
 usum explicandum
 satis.

F 2 S E B A.



SEBASTIANI FOXII
MORZILLI HISPALENSIS,
de naturæ Philosophia, seu de
Platonis & Aristotelis
consensione,

LIBER SECVNDVS.

Axiomata.

1. Omne corpus materia una, & forma una constat.
2. Corpus omne trina constat dimensione, longitudine, latitudine, crassitie.
3. Quidquid corrumpitur à contrario id patitur.
4. Similia à similibus conservantur, & aluntur.
5. Omnia sui expetunt conservationem.
6. Contrarium non mutatur in suum contrarium.
7. Quod à meliori fit, melius est eo, quod à minus bono.
8. Si effectus est, & causa præcessit.
9. Omne efficiens sui simile efficit.
10. Totum prius est suis partibus.
11. Eadem est ratio totius, ac partium.
12. Simplicia corpora uno sunt motu contenta.
13. Nullum accidens est sine subiecto.
14. Simplicia compositis priora sunt.
15. Omnia levia sursum, gravia deorsum tendunt.
16. Agens omne validius est patiente.
17. Mutatis partibus totum ipsum mutatur.
18. Concreta omnia fiunt è simplicibus.
19. Quicquid primò movet, stare debet.
20. Virtus unita se ipsa dissipata robustior est.
21. Quidvis non fit è quolibet.
22. Quicquid est, aut est accidens, aut substantia.
23. Capaciora continent minus capacia.
24. Quidquid habet initium, habet & finem.
25. Nihil violentum perpetuum.

Defi-

Definitiones.

1. Elementum est id, in quod singula tandem dissolvuntur.
2. Qualitas est naturalis alicuius rei facultas, & affectio.
3. Quantitas est magnitudo rei per partes extensa.
4. Actio est rei efficientis in subiectum motio.
5. Passio, affectio rei motus ab agente.

Hypotheses.

1. Ea, in quibus est actio, & passio, genere convenire debent.
2. Inter agentem, & patientem rem aliqua inest proportio.
3. Agentis & patientis est aliqua applicatio.
4. Finis agentis est, sibi simile reddere patiens in aliqua qualitate.
5. Qualitates, aut agendi, aut patiendi vim habent.
6. Agens in agendo repetitur.
7. Agens & patiens relatione inter se dicuntur.

DE MUNDO.

Caput I.

Sic sunt à natura res omnes, quæ aliqua constant materiæ admixtione, constitutæ, ut communia, simpliciaque omnem concretionem præcessisse, atque hujus adendæ principia extitisse dicantur. Ita omnes Philosophi corpora cum cernerent concreta esse, semperque simplicia per 14. axioma concretis

priora sint, materiam, & formam, ac cætera principia, quæ nos in superiori libro retulimus, peruestigarunt, eaque non modo singulis rebus, sed vniuerso etiam accommodarunt. Atque ita nonnulli, qui vel æternum esse mundum putaverunt, ratione quadam initia illa huic applicant, ne quid compositum è partibus simplicibus non constare putetur. Alij, qui mundi exordium induxere, illa ipsa tanquam eiusdem propria subiiciunt, omnes denique eadem non tam mundi partibus, quàm toti ipsi accommodant. Horum etiam sequuti nos institutum, ita hæc initia mundo adhibemus, vt ille siue factus, siue æternus dicatur, necessariò iisdem constare debeat: cum corpus sit, corpusque omne per axioma 1. materia & forma constare necesse sit. Nam & illa corpoream omnem mixtionem antecedunt, & simplicia compositis semper ex axioma 14. priora sunt. Hæc ita in vniuersa disputatione de Philosophia naturæ statuta sint, tanquam communia principia, ad quæ reliquorum corporum concretorum mixtiones reducamus, veluti totum ipsum in partes, ex quibus primò componitur, distribuitur. Cum ergo de mundo, & eius partibus differendum deinceps sit, horum erit natura probè perspecta, si prima quædam omnium rerum initia,

quæ

quæ illum quasi construxerint, præponantur, ut ex ijs tota illius concretionis ratio intelligatur. Itaque quoniam simplicia principia corporum concretiones sequuntur, proximum est, ut ijsdem jam statutis in superiori libro, de corporum omnium natura nunc differamus. Et quidem cum partibus suis totum semper sit prius per 10. axioma, mundusque omnis singulas sui partes antecedit, de illo imprimis sermonem habere æquum est, tum ad reliqua ipsius quasi membra enumeranda veniemus. Quæramus igitur primò, id quod ab omnibus quæri solet, num mundus æternus sit, an ab aliquo temporis principatu ortus: hoc enim explicato, naturam ejus demonstrabimus. Plato in Timæo de mundi natura differens, eam habet de illo sententiã, ut eum à Deo factũ ab æterno dicat: Quemadmodum enim cum sole simul est lux semper, aut umbra cum corpore, sic mundum à Deo multis retro seculis conditum ratione quadam inquit: Quandoquidem corporatus sit idem, atque omne corporeũ ab alio compositum sit: denique illum esse factum concludit, quatenus à Deo pendeat: eundemque æternum, quatenus ad illius exemplar æternũ factus sit æternus. Veram esse Platonis hanc sententiã ex eius verbis perspicuum est: idque Plotinus, Proclus, Alcinous, Apuleius, Simplicius,

plicius, Platonicique alij testantur: tamen non defunt, qui omnino factum ab eo mundum aliquando dici arbitrentur, futurum tamen æternum. Sed eorum nos sententias abundè in nostris commentarijs in Timæum examinauimus. Eiusdem est ferè cum Platone sententiæ in hac parte Aristoteles, nisi quod planè mundum æternum esse affirmat, nulla Dei opificis, aut illius ab hoc dependentiæ, vt sic dicam, habita ratione. Id autem ipse rationibus multis docere, tuerique conatur. Primò, quia tempus cum cœli motu perpetuò fuerit, itaque vt illud esse nunquam defierit, si ne hoc quidem non fuisse concludit. His addit maiorum suorum de Cœli constantia antiquissimam opinionem, quod ij nullam vnquam illius mutationem obseruarint. Ex quo argumentatur, nihil alterationibus, mutationibusque obnoxium demolitionem perpeti posse, cœlum autem ejusmodi esse, ideoque nulli corruptioni subijci. Addit præterea, primam causam nunquam otiosam esse debere, quod si autem ortus aliquando mundus dicatur, oriatam fuisse illam aliquando sequi, id quod ejus repugnet perfectioni. Ad hæc motus orbicularis perpetuitatem affert, quod in orbibus nullum punctum inchoans motum inueniatur: ex quo motum esse æternum contendit, & cœlum quoque, sine quo ille

ille non est. Hæc, atque huiusmodi alia argumenta colligit Aristoteles, quibus mundi æternitatem confirmet. Quibus ex rebus fieri vult, ne quam in mundo mutationis occasionem admittat, cælum esse quandam essentiã quintam, & ab his rebus inferioribus planè diversam, neque gravem, neque levem, nunquam genitam, nunquam interituram, nulli commutationi subiectam, breviter sempiterna præditam duratione. Qua in re, uti dixi, solum in eo differt à Platone, quòd æternum omninò mundum ipse facit, Plato verò quodammodo factum, quatenus is ab alio initio præstantiori proficiscitur, æternum tamen futurum. Quòd autem de cælo vterque Philosophus affirmat, de vniuerso etiam cogitandum est, cuius cùm pars cælum sit, eaque æterna, ipsum quoque totum æternum est. Quamvis inferior hæc mundi pars, quæ Lunæ globo subijcitur, mutabilis, & inconstans ab ijs esse dicatur: sed ne id quidem illius æternitati obesse censent, cum partium inconstantia totius infirmitatem minimè labefactet. Retulimus Aristotelis, & Platonis sententias de mundi æternitate, ac discrimen, & consensionem vtriusque, reliquum est, vt an ijs rectè sentiant, doceamus. Æternum esse mundum apertè Christiana negat religio, cùm in originibus Moses in principio cælum,

ac terram, vniversaque à Deo condita fuisse dicat. Et David: Verbo Domini firmati sunt cœli, & spiritu oris eius. Idemq; aliàs: Dominus autem noster quæcunque voluit, fecit. Et Joannes, Omnia per ipsum facta sunt & sine ipso factum est nihil. Sed quid plura testimonia requirimus? ratio etiam id apertè confirmat. Nam si eadem ratio est partium, quæ totius per 11. axioma, quando mundi partes quotidie interire videmus, & ipsum corruptioni esse obnoxium necesse est. Quinetiam si mundus corporeus est, materiaque & forma constat, compositum esse illum necessariò fatendum est. Atqui à se ipso is condi minimè potuit per axioma 9. libri primi, ergò ab alio conditus est. Quandoquidè si effectus aliquis est, & eius causam præcessisse sequitur, ut mundus, cum effectio quædã corporea (ut apparet) sit, causam ante se aliquã, à qua fuerit factus, habere necessariò debuit. Quod autem Plato inquit, factum quidem esse illum, sed tamen ab æterno, absurdum sanè videtur, quoniam id omne, quod fit, per axioma 5. prioris libri, in aliqua temporis transmutatione fieri debet: alioqui si inter efficientem causam, & effectum nihil interfuerit, factum non est: ergo aliquando effectus est mundus, tum nimirum, cum antea non erat. Unde sequitur, tempus cum mundo existere cœpisse, ipsumq; rerum sensi-

sensilium propriè esse, non intelligibilem, quemadmodum supra docuimus. Porro quod his quidam Philosophi obijciunt, ut apud Ciceronem Velleius Epicureus, alijque multi, cur mundum Deus repente condiderit, multis verò retro seculis nihil egerit, nullius est planè momenti, cum sicut loco ille non eget, nec temporis decursu utitur, ita dum in se ipse tunc manebat, nec mundi conspectum, nec temporis durationem magnopere desiderabat. Sed hac de re alij plura. Esto igitur hinc constitutum, non minus cum mundi natura aternitatem pugnare, quam si idem spiritalis essentiae esse dicatur: quorum illi neutrum convenit.

DE MUNDI ESSENTIA.

Caput II.

SUPEREST, ut mundi essentia ostendatur, quando de illius ortu satis disseruimus. Aristoteles, qui perennitatem mundi tueretur, ne quid mutationi obnoxium in eo admittat, coelum ab hac parte, inferiori lunæ subiecta diversum esse inquit, id est, quintam quandam essentiam, simplicem tamen, & materiae inferioris expertem. Quapropter nec levem, nec gravem, nec asperam, nec duram, nec vlla denique qualitate inferiorum simili constantem eam facit. Cuius sententiae probatio ex constituta ab eo mundi aternitate pendet: quia

quia enim æternus ille ab eo esse dicitur, nequaquã corruptionis vel minimæ causam videatur relinquere, diversæ quoque naturæ ab his rebus inferioribus ipsum esse inquit. Sed quoniam hæc mundi pars, quæ Lunæ globoque subiacet, perpetuæ mutationi, ut cernimus, obnoxia est, cælum itidem natura æterna, & stabili constare ait, elementa verò mutabili, & caduca secundum sui partes. Hanc quoque sententiam Plato in Timæo ferè habet, cum cælum quintum mundum ab inferiori hoc diversum appellat: cui etsi elementorum qualitates attribuit, eas tamen esse summa perfectione inquit concretas. Eiusdem etiam materiæ cum his rebus inferioribus esse illud ait, sed forma præstantissima præditum, ita ut hæc vagam illius naturam arctè contineat, & intra sese coërceat, ne quid ab interna imbecillitate, aut externa vi patiatur. Eandem tueretur sententiam Plotinus in libro de cælo, ac Plutarchus: atque ipsam Simplicius, & Proclus cum Aristotelis sententia congruere omnino putant. Sed meo quidem iudicio, id convenit cum Aristotele Platoni, quod cælum essentiam quintam, sive mundum quintum ab hoc inferiori diversum appellavit, ipsumque forma præstantissima, & æterna constare dixit: contra vero differunt ambo, quod Aristoteles nec eiusdem materiæ, nec quali-

qualitatum, quibus constant reliqua, particeps esse cœlum putavit. At Plato eandem materiam, qualitatesque easdem, quas rebus alijs; sed majori perfectione compactas, & stabilitas illi tribuit. Atque hæc est utriusque Philosophi de cœli, adeoque naturæ vniuersi sententia paucis comprehensa. Nos autem ut nostram interponamus, ex verbis Moscos eandem esse vniuersi naturam, & concretionem docere facile possumus. Nam si natura corruptibili mundus vniuersus constat, utpote qui & initium habuerit, & finem sit habiturus, eandem esse illius partium omnium essentiam necesse est. Præterea cum in principio cœlum ac terram à Deo creatam esse inquit, nullam elementorum aliorum mentionem fieri videmus: quin potius permixta fuisse hæc omnia tunc temporis ediscimus, deinde in pulcherrimum hunc ordinem, secretis in singulas partes elementis, adducta. Quod ipsum Basilii, Augustini, patresque reliqui sic sentiunt, ac interpretantur. Qua in re mirum est, quàm nobiscum Plato consentiat, qui eiusmodi ferè vniuersi partium omnium confusionem, secretionemque à Deo factam inducit, naturam eandem omnibus tribuit, eandem narrationis & seriem, & dispositionem observat. Cuius (ne longior, sim) verba in hoc loco afferre nolo, cum eadem aliàs ex insti-

instituto simus interpretari. His ita de mundi natura explicatis, reliqua, quæ ad eiusdem essentiam accedunt, persequamur. Unum esse mundum & Plato, & Aristoteles rationibus varijs affirmant. Ille quidem quod ejus exemplar sit vnum, quodque ipse ex materia vniversa sit factus, & quod vniversum propterea dicatur, quod extra se nihil habeat. Hic autem easdem ob causas: quibus illam addit, quod si multi mundi essent, confusio maxima rerum foret, dum elementa, quæ spontè in locum suum deferuntur, ad reliquorum sui similium deferri loca niterentur: si quidem omnia ejusdem esse impetus deberent. Hæc eadem ipsorum sententia confirmari à nobis potest sacrorum scriptorum testimonijs, quæ vnus mundi effectiorem duntaxat commemorant, non multorum. Jam verò finitum esse mundum vterque Philosophus testatur, quod corporeus sit, ac nihil corporeum infinitum sit ex 9. hypothesi libri prioris: & quod certa aliqua figura sit præditus, id quod infiniti repugnat naturæ, quæ non modo figuram, sed ne certam quidem corporis magnitudinem habere potest, cum nullo modo comprehendatur. Sed huius sanè rei probatio ex superioris libri de infinito disputatione apertior fiet. Porro quod ad mundi figuram attinet, ea à Platone & Aristotele pariter

pariter rotunda esse dicitur, nisi quod ille ad intelligibilem causam eiusdem rotunditatis effectiorem, hic ad rationes in sensum magis cadentes refert. Plato quidem idcirco rotundum esse mundum ait, quod is motus sit mentis motui simillimus: quoniam enim à se mens movetur, & in seipsam redit, ac mundus ad eius Ideam est factus, motus quoque illi consentaneus (hoc est, qui à seipso inchoatus in se rursus redeat) est attributus, id est, rotundus. His addit rotundæ figuræ pulchritudinem, quòd ea cæteris decore sit præstantior: tum capacitatem, quòd figuras omnes *ἰσόμετρας* ut vocant. i. æqualis magnitudinis contineat, ac magnitudine superet. At Aristoteles ut illud ipsum confirmet, imprimis id usurpat, simplicis naturæ cælum esse ideoq; motum simplicem, id est, rotundum, illi tribuendū, quando reliqua genera recti motus inter oppositas partes fiant, proindeque sint ipsi multiplices: rotundus vero motus à se ipso inchoatus ad se redeat. Sed quid opus est aut Platonis, aut Aristotelis rationes omnes proferre? ipsamet cæli declivitas rotunditatem indicat, navigationes confirmant, stellarum motus ostendunt, horarum varietates, Solis ortus, & occasus, ac lunæ deficientis rotunda umbra demonstrat. Cum enim similis figuræ corpora omnia,

cuius

cuius sunt, vmbra emittant, certè quia luna (quæ per terræ interpositionem deliquium patitur) rotunda quadam vmbra offunditur, id quod oculis intuemur, rotundæ figuræ terram esse relinquitur. Unde fit, vt mundus etiam eiusdem figuræ sit, si partes illius sint tales. Hac in parte rationi, & experimento credere oportet, cum nullo eiusdem rei sacrorum scriptorum aperto testimonio admoneamur. Constituta ergo jam mundi figura, proximum est, vt de ipsius animatione, ac motu disseramus, quando hæc corporis constitutionem sequuntur. Animatum esse mundum Democritus, & Epicurus negavere, contra Plato & Aristoteles affirmant. Nam in Timæo ille multis rationibus docere id nititur, quod seipsum mundus interno motu impellat, quodque ad exemplar animalium sit conditus, & quod cum melius sit animo constare, quam ipso carere, eundem (vt pote qui optimus sit effectus) animatum esse sequatur. Id ipsum ab eius vi ea, quam nos antè naturam appellavimus, comprobatur, quoniam res à mundo produci, & quasi animari semper videamus, eaque illud principium intra se habeant. Quo nomine non solum animatum eum esse contendit, sed animal etiam, quoniam & anima constet, & corpore. Ac ne quis similem esse illius animam reliquorum anima-

animalium existimet, eandem esse putat internam vim motionis universi, qua sponte cuncta ciuntur, oriuntur, intereunt, alterantur, motu denique omni impelluntur. Qui cum in rebus inanimatis nequeat consistere, necessario debet ab aliquo animo proficisci. Quapropter nec quinque illos sensus visum, auditum, tactum, gustum, & oderatum, nec memoriam, nec incessum mundo tribuit, sed internam duntaxat motus vim, & intelligentiam, quatenus ratione, & consilio cuncta producit. Atque satis de animæ formâ, naturâque multa in Timæo, & in nostris in eum commentarijs dicta à me sunt. Aristoteles de anima mundi tam apertè, quàm Plato nusquam disseruit, tamen in duodecimo de prima Philosophia libro, cum de cæli motu loquatur, eas illi partes attribuit, quæ animalium propriæ sunt: sursum, deorsum, sinistrum, dextrum: ex quo esse animatum illum concludit. Idem lib. secundo de cælo, dum causam inquit, cur motibus paucioribus orbes à luna magis distantes convertantur, actionem hanc animo ipsorum ratione certâ motum scienti adscribit. Id ipsum paulo post confirmat, cum de locorum intervallis in cælo, supero, inquam, atque infero loquitur: idemque de illo Proclus, Simplicius, Plutarcho auctore. Ex quo liquet, Platonem, &

Aristotelem idem sentire, nisi quod Plato animam mundo universo esse circumfusam vult, ab eaque cuncta, & moveri, & foveri putat: contra Aristoteles in cœlis eam videtur duntaxat collocasse, quod hi spontè incitentur, & vi suâ infima hæc administrent, non tamen ipsa æquè, atque illi, sint animata. Hujus esse illum sententiæ & Plutarchus est auctor, & alijs multis argumentis doceri potest. His sic declaratis, superest, ut nostram his addamus sententiam. Cœlum, atque adeò mundum universum animâ carere Christiana nos docet religio. Si enim vel minima quæque Dei providentiâ reguntur, nihilque sine illo aut moveri, aut conservari potest, profectò in mundo animum ponere, qui hæc agat, est supervacaneum præsertim cum natura nihil redundans, per, s. hypothesim libri prioris, admittat. Quocirca nulla inest mundo anima præter vim eam, quâ Deus, atque ejus administri angeli utuntur tum in motu, tum in alijs omnibus, quæ animâ ipsa, si extraret, efficere posset. Atque hujus sanè sententiæ est Basilii, & cæteri omnes antiqui patres, quos hîc nolo commemorare. Sequitur, ut de mundi motu etiam dicamus, quandoquidem ille nasci ab animo videtur & ejus nunc proprietates enumerare cœpi-
mus. Moveri quidem cælum, & cum eo cun-

Et elementa (terrâ exceptâ, quæ fixa est) multis rationibus potest confirmari. Quamvis minuti quidam Philosophi, ut apud Archimedem Samius Aristarchus, & apud Ciceronem Nycetas, ac Philolaus contrâ sentientes cœlum stare, terram autem moveri contenderint. Quorum hæc, utpote falsâ, & absurdâ sententiâ jam pridem explorâ, cœlum orbiculari motu, quoniam rotundus est, incitari asserimus ex Platonis, & Aristotelis sententiâ. Ac primò nos id stellarum cœlo inhærentium conversiones docent, quæ, si cœlum staret, in eodem semper loco forent: tum situs terrarum perpetui, qui ad Aquilonem, Austrumve semper vergunt, nec inde aliquando dimoventur. Præterea cum spontè omnia naturalem petant locum, nec inde, nisi vi trahantur, terram stare necesse est: ne si moveretur, è suo loco migraret. Sed ne plures proferam rationes, quæ sese nobis hoc loco multæ offerunt, id apertè sanctarum literarum testimonijs confirmatur: Cum Ecclesiastes dicat: Terra autem stat, oritur sol, & occidit, & ad locum suum revertitur, ibique nascens gyrat per meridiem, & flectitur ad Aquilonem. Et David. In sole posuit tabernaculû suum, & ipse tanquâ sponsus procedens de thalamo suo, exultat ut gigas ad currendû suâ viam. Hæc ergo

dicta in universum sint, de mundi essentia, & unitate, deque finitudine, anima, & motu, reliquum est, ut de partibus eiusdem disseramus.

DE ORBIS DIVISIONE. AC DE CÆLO GENERATIM.

Cap. III.

DUÆ sunt mundi partes, quas Plato, & Aristoteles, omnesque Philosophi commentorant, una cœlestis, quæ suprâ est, altera elementaris, quæ infrâ. Cœlum, ut ab hoc capiam dicendi initium, (nam de inferiori parte postea dicemus) ab Aristotele, & Platone, ut suprâ retulimus, quintæ esse naturæ dicitur, hoc est, æternum, mobile, qualitatibus his inferioribus carens, nec leve, nec grave. Hoc Plato igneæ naturæ esse existimat, quod lucidum sit, nihilque lucidum ignis esse possit expers. Ab illo autem Aristoteles differre videtur, quod igneæ naturæ cœlum esse negat, ne quam illi rerum inferiorum qualitatem adderet, id quod ipse aliàs voluit. Plutarchus tamen in libro de Philosophorum decretis ex igne factum ab illo cœlum dici refert. Quod nos si ad Platonis sententiam examinemus, profectò quatenus lucidum

dum est cœlum, ab illo commodè naturæ esse igneæ diceretur, sicque Philosophus uterque idem sentiet. Quatenus verò ambo æternum esse illud voluere, nullâ ipsum elementorum qualitate concrevissent volunt. Quocirca, ut rem paucis complectar, cœlum esse corporeæ substantiæ, simplicis, lucidæ, solidæ, æternæ, perfectæ, & in orbem mobilis Platoni, Aristoteliq̃ue dicitur. Huius quoque illi orbes octo statuunt, ita inter se connexos, ut alij intra se alios complectantur, ut majores, minoresve fuerint. Nam superiores intra se ambitu suo continent minores, hiq̃ue alios rursus ad lunæ usque globum. Causa verò cur orbes tã multos constituent, ex syderum motibus varijs petitur. Cum enim corpora simplicia per 12. axioma unico sint motu contenta, cœlumque uti diximus, simplex ab ijs corpus dicatur, diversos illos motus, quos sydera eodẽ tempore efficiant, in uno fieri orbe non posse, sed in diversis, concludunt. Ita fit, ut lunæ, globum omnium infimum faciant, quo in eo luna inhaerens mense convertatur. Huic desuper solem & Plato, & Aristoteles adiungunt, ut in nostris in Timæum commentarijs docuimus: quanquam communis Mathematicorum sententia quarto à luna loco Solem ponentium his repugnet. Sed verumne ne id sit,

nécne, inquirere non est huius loci, ne Physicorum fines egrediamur, qui cœli motus in uniuersum tradunt, non sigillatim; Solis orbem superiorem Mercurij globus contingit, atque hunc Veneris: ita tamen, ut ijdem tres, Sol inquam, Mercurius & Venus pari temporis spatio convertantur, hoc est, anno, quemadmodum Ptolemæus in libris de magna compositione demonstrat. Post Veneris circulum, quem quarto à luna loco posuimus, Martem Plato, & Aristoteles quinto loco ponunt: Sexto, Iovem; Septimo, Saturnum, Octavo firmamentum, siue *ἀπλανής* id est, cœlum inerrans, siue primum mobile. Hanc ergo illorum orbium seriem uterque Philosophus, ac cæteri omnes, pariter statuunt, eo excepto, quo alij quarto loco solem ponunt, Plato verò, & Aristoteles secundo à lunæ globo. Eorundem præterea orbium diversos ijmotus, ac temporis intervalla diversa esse docent. Nam lunam uno mense: Solem, Mercurium, & Venerem anno: Martem duobus: Iovem 12. Saturnum triginta converti dicunt: quoniam videlicet stellas illas observatione longâ converti eiusmodi spacijs deprehensum sit. Quo nomine septem inferiores orbes, lunam dico, solem, Mercurium, Venerem, Martem, Iovem, Saturnum, *πλανήτες* id est, erronei appellant, non

non quo incerto ij motu ferantur, sed quia
disparēs inter se cursus conficiant, alij nimi-
rum ex iisdem tardiùs, alij celeriùs, prout
cursum naturalem habuerint. Ac primum
illi mobile, five cœlum octavum vocant
ἀπλανής id est, minimè errans, quòd eandem
semper cursus sui teneat rationem, nec alio
tempore tardiùs, alio citiùs, ut reliqui erro-
nes, convertatur, qui propter Epicyclorum,
ut Mathematici cogitant motus inæquales,
disparia quoque temporum intervalla effi-
ciunt. Quapropter duos cœlis omnibus mo-
tus naturales tribuunt, unum diurnum, qui
horis viginti quatuor à primo illo immobili
cœlo singulis diebus conficitur ab ortu ad
occasum, quem ab illius anima ædi uterque
Philosophus ait: alterum raptum, ut vocant,
qui ex adverso illius primi fit à singulis or-
bibus ab occasu in ortum, cursu retrogrado,
statutis cuique temporibus. Ad hæc Mathe-
matici à Ptolemæi præsertim ætate, apertius
saltem, quàm antea, duos insuper alios cœli
orbes octavo illo superiores investigasse se
dicunt, nonam spheram, ut vocant, & pri-
mum mobile. Eos autem se orbes invenisse
aiunt, quòd duplicem ædi motum ab octa-
vo illo cœlo præter hunc diurnum longâ
observatione collegerint: cumque per hy-
pothesim ab illis positam cœlum corpus sit

simplex, & unico motu contentum, hos quoque motus denuo exploratos ab aliis duobus orbibus confici existimarunt. Ita fit, ut octavo illi cœlo, quod proximum nos Saturno adiunximus supra addiderint nonum, quod suum habeat quoque cursum, quem triginta novem annorum millibus conficiat: quem ipsum in Timæo Plato magnum annum nominat: Decimum verò constituerint primum mobile, quod vi sua reliquos omnes impellat. Huic adiecerunt Theologi cœlum, quod empyreum vocant: quod animorum felicius est sedes, quodque decimum orbem sive primum mobile ambitu suo circumplectitur, nonamque spheram, quam iidem aqueum seu crystallinum globum appellant. Ergo si horum sententiam cum veterum. 1. Aristotelis & Platonis sententia conferamus, tres esse cœli orbes adiectos inveniemus. Illi enim, uti antea docuimus, cœli undecim globos efficiunt: hi verò octo tantummodò. Supra quos Aristoteles, ac Plato, nec locum, nec inane, nec tempus, sed æternitatem, divinitatemque inesse putavere. Verum hæc satis de cœlo generatim ex Philosophorum sententia: nunc Christianorum eadem de re obiter decretum interponamus. Cœlum esse diversæ naturæ à terra, cæterisque elementis sacræ literæ

literæ negant, quæ eandem utriq̃ue essen-
tiam, affectionemq̃ue tribuunt. Nam in
mundi ortu ex aquis à terra secretis cœlum
conflatum esse Moses prædicat: cujus hæc
verba sunt: Dixit Deus, fiat firmamentum
in medio aquarum, & dividat aquas ab a-
quis. In quibus cœlum, quod hîc vocat fir-
mamentum, quasi ex aquis coagulatum, &
concretum esse inquit. Atque ita Gennadius,
& Theodoretus, Græciq̃ue alij Theologi
eum locum interpretantur. Quinetiam
Esaias, ut cœlum esse corruptioni æquè, ac
terram, obnoxium ostendat, sic loquitur.
Levate in cœlos oculos vestros, & videte
sub terra deorsum, quia cœli sicut fumus li-
quescent, & terra sicut vestimentum attere-
tur. Ex aliis quoque locis unam universi esse
naturam perspicuum est, non diversam, ut
Philosophi somniarunt: qui ut mundi æter-
nitatem tuerentur, quintæ esse illum cuius-
dam essentia retulêre. Nec verò cœlum
idem constare simplici naturâ porest, cum
ex aquarum, & ignis vi in modum crysalli
concretum esse constet, quemadmodum vel
Aristoteles, teste Plutarcho, existimavit: qui
ex caloris rigorisq̃ue mixtione concretum il-
lud esse dixit. Esse autem ipsum æternum
multò minus est admittendum, cum supra
id pluribus argumentis ostenderit, idq̃ue

apertis verbis Eſaias ſignificet: cœli, inquiens, ſicut fumus liqueſcent. Ex his ergo perſpicuum eſt, cœlum ſubſtantiâ eſſe corpoream, ex elementorum quatuor natura concretam, præſtantiore tamen forma, quàm cætera omnia præditam, lucidam, mobilem, ac demolitioni, ut univerſa, ſubiectam. Cuiusmodi verò corpus illius ſit, ſolidum ne, an tenue, & Philoſophorum multi in dubium vocaverunt, & adhuc eſt à multis dubitarum. Plato quidem, & Ariſtoteles ſolidum eſſe cœli corpus dixerunt, alij verò, quemadmodum in commentar. in Timæum docuimus, tenuis ſolum naturæ: ſed ne ij quidem temerè. Nam cœli corpus, ſi non tenue, ſaltem nec ſolidum eſſe ſacræ literæ docent, veluti apud Eccleſiaſtem: luſtrans in circuitu pergit ſpiritus, & in circulos ſuos revertitur. In quo non ſolidum, uti hæc corpora inferiora, corporatum tamen eſſe illud oſtenditur. Undè cùm cœlum in originibus firmamentum appellatur. Hebræis ea vox deſuſionem, extensionemque potiùs, quàm ſoliditatem ſignificat. Cui quidem interpretationi Baſilius aſſentitur, ſententiam Eſaiæ ſequutus, qui cœlum, inquit, ut fumum firmavi. Ex quo ille fieri vult, tenuis naturæ ipſum exiſtere non ſolidæ. Hoc ipſum ratione etiam aliquâ confirmari poſſe videtur, cùm
ſic cœ-

si cœlestes globi solidi sint, perpetui motus collisione, aut incenderentur, aut medium aliquem locum aëre oppletum inter duorum orbium extremam planiciem statuere necessario oporteret, nisi medium illud spacium inane esse diceretur: quorum nihil est rationi consentaneum. Postremo quod de orbium cœlestium divisione, ac partibus supra è Philosophorum sententia retulimus, nusquam aperte sacris literis probari potest. Nam esse quidem cœlos multos, & David, & alij Prophetæ passim prædicant, ut in Psalm. 135. Qui fecit cœlos in intellectu. Et alias. Laudate Dominum de cœlis. Et Ps. 19: Cœlum cœli Domino, terram autem dedit filiis hominum. Quot autem ij sint, num octo, ut Aristoteles, & Plato arbitrantur, an undecim, ut recentiores, dubium est, neque id aliquo potest testimonio doceri. Trium sanè cœlorum duntaxat in illis fieri mentionem videmus, idque ex Pauli Apostoli ecstasi licet intelligere. Quo verò sint illi ordine dispositi, & colligati multo est cognitu difficilius, quemadmodum Dei oraculo apud Iobum proditum est. Nunquid nosti ordinem cœli, & pones rationes eius in terra? Quæ res efficit, ut non modo nullam de cœlorum orbibus reddere rationem queamus, sed etiam permulta, quæ à pleris-

plerisque tradi solent, infirmis, ac falsis sæpe probationibus innitantur. Sublato enim eo in cœli natura, quod ij semper usurpant, corpus videlicet omne simplex uno esse motu contentum, omnes quoque motus illius excogitati pariter tollentur. Sed hac de re satis, ne temerè Astrologiam à multis pulchrè fundatam labefactare videar. Postremo quod ad cœli motum attinet. Philosophis quidem nobiscum rectè convenit. Nam Ecclesiastes de solis motu differens, flecti ad aquilonem & austrum ipsum fatetur, tum in circulos suos reverti. Idem alijs exemplis è sacris literis sumpris confirmatur, ut de Josua, quo pugnante, solem, ac lunam constitisse, ut longior fieret dies, memoriæ mandatum est, & de Ezechia, cuius arbitrio, volente sic Deo, Sol è cursu suo retrocessit. Verùm his de rebus hæc satis.

DE COELI CIRCULIS,

AC STELLIS.

Cap. IV.

DIximus in universum de cœli natura, divisione, ac motu; nunc ut de stellis, & eius globis differamus consequens est. Duplicem in cœlo motum supra statuimus ex Aristotelis, Platonis, Philosophorumque omnium

omnium sententia, unum omnium cœlorum simul à primo mobili singulis diebus raptorum, qui raptus dicitur, alterum proprium orbis cuiusque qui statutis cuique temporibus conficitur. Horum ergo, (quia magna est in motu varietas, multaque sunt cognitu digna) ratio quædam brevis subiicienda est, non ut in fines Astrologorum velle ingredi videamur, sed ut quæ loco huic erunt consentanea, explicentur. In primo itaque illo, octavo cœlo, sive in ijs etiam duobus, qui ei additi postea à recentioribus sunt, circulos quosdam Astrologi cogitant, in quibus confici omnes motus existimant. Itaque ut Geometrz in alijs corporibus planiciem, lineasque in ea quasdam, & puncta imaginantur, sic in ejus cœli extremitate circulos quosdam, & puncta posuere. Quorum circulorum alios majores, alios minores esse dicunt. Majores quidem ut æquinoctialem, Zodiacum, & duos Colures, Meridianum, & Finitorem, quem *οὐρανίου* Græci nominant, minores autem, ut duos tropicos, unum Cancræ, & alterum Capricorni, circulum, arcticum, & antarcticum. Atque æquinoctialem, circulum esse quendam dicunt, qui cœlum duas in partes æquales fecer, qui quod sol motu suo eum attingens dies efficit noctibus æquales, nominatus est à Græcis

Græcis *ἰσημερινός*, à Latinis æquinoctialis. Zodiacus, circulus est latitudinem partium 12. habens: in qua signa etiam duodecim, quæ ab animalium quorundam figura *ζώδια* nominantur, hærent: quorum singula in partes 30. divisa. 360. gradus, ut vocant, efficiunt: quos sol singulis annis percurrente totidem dies, aut paulò plures efficit. Totus autem hic circulus à septentrione in austrum declivis æquinoctialem in duas partes dividit, & in ejusmodi sectionibus (quarum altera est ad ortum, altera ad occasum) puncta duo constituit, quò dum sol attingit, bina facit æquinoctia. Eum igitur circulum sol semper motu proprio (quo in orbe suo cietur) attingens singulis diebus unum ferè gradum percurrit. Quò fit, ut toto circulo lustrato, annum compleat. Iamverò duo coluri, circuli quidam sunt à septentrione in Austrum porrecti, ac sese invicem secantes: qui Zodiacum quatuor in partes secant, in quarum sectionibus sive punctis & duo æquinoctia sunt, & duo Solstitia: æquinoctia nimirum in ijs punctis, quæ ab ortu, & occasu sita æquinoctialem, ac Zodiacum dividunt bifariam: Solstitia verò in illis, quæ à Septentrione, & Austro Zodiacum distinguunt in partes duas, quarum illa, quæ ad septentriones est, Solstitium æstivum efficit, quæ ad Austrum,

Austrum, hyemale. Quinetiam circulus meridianus, qui est à Septentrione in Austrum porrectus, cœlum in duas partes dividit, perque verticem omnium sese porrigit. Quò cum sol pervenit, medium diem noctemque efficit: meridiem quidem, cum nostrum illustrat hemispherium: noctem, cum alterum nobis adversum. Finitor denique, est circulus habitationi cuique accommodatus, què in toto illo cœli ambitu nostram regionem undequaque circumscribente cogitamus. Porro circuli minores in eadem quoque cœli extimi superficie ponuntur ad terræ regiones distinguenda. Nam arcticus, qui Borealem plagam ambit, à Polo Zodiaci describi fingitur, ut eius distantia ab ipso polo 23. partibus, ac semis designetur. Eandem ob causam antarcticus illi adversus australem polum ambire, tanquam centrum dicitur. Ab eorum utroque intervallis paribus duo tropici distant, qui solis in Zodiaco conversiones contineant, tropicus cancri videlicet, cum sol in æstivo solstitio est: tropicus verò capricorni, cum idem est in Solstitio hyemali. Media inter utramque est æquinoctialis, ab alterutro æquis spaciis diffixa. Tota autem cœli moles, seu potius universi fixa quodam transmissio per medium axe, cuius extrema poli dicuntur, fingitur: quorum

rum alter Austrinus dicitur, qui nobis semper occultatur: alter septentrionalis, qui in vertice apparet. Atque hi omnes circuli, quos retulimus, in una cœli extimi planicie, quasi lineæ quædam cogitantur, ad solis, & aliorum syderum motus dignoscendos. tum ad temporum vicissitudines distinguendas. Veniamus nunc ad orbium inferiorum, qui erronei dicuntur, motus brevi oratione notandos, non ut eius tractationis longam narrationem texamus. Errones sive *πλανήται*, ut Græci vocant, diverso motu ab illo prioris cœli convertuntur, ab occasu nimirum in ortum, ordine converso. Idemque, quoniam variis modis cieri videntur, modò austrum versùs: modò septentrionem, modò etiam cæleriùs, modò tardiùs, in epicyclis inhærere dicuntur, id est, in parvulis circulis in globo universo cuiusque planetæ positis, qui per se etiam moventur, perinde ac globus ipse. Itaque hanc omnem motus varietatem à syderibus æditam, ab epicyclorum dispari cursu fieri Mathematici docent. Quorum motuum rationes, & causas inquirere, quæ longiori egent explicatione, nunc non oportet, quando id à Physici munere alienum est. Restat ergo, ut de omnium stellarum natura, figura, motu, situque disseramus. *Stellas corpora quædam esse eiusdem naturæ,*

naturæ, atque cœlum, quæ suum habeant splendorem in sese collectum, & Plato, & Aristoteles inquirunt. Nam Aristoteles in secundo libro de cœlo, densiorem esse, ac lucidiorem cœli partem stellas ait, easque quintæ etiam essentiæ, sicuti cœlum universum. Et quemadmodum in tabula nodum, qui ex eadem materia est, sæpe cernimus, ita quasi nodos quosdam in cœlo stellas esse vult. Quapropter simplicis, atque adeo quintæ essentiæ illas facit, nullâ elementorum qualitate constantes, æternas, summa caloris vi præditas, quem ob splendorem suum emittant, non ob ipsi insitam caliditatem, animatas, splendidas, ita tamen, ut à sole magis illustrentur. Eandem Plato sententiam habuisse prius videtur, nisi quòd igneæ naturæ maxima ex parte, ac reliquorum quoque elementorum participes esse stellas vult, cæteróqui cum Aristotele planè consentit. Easdem præterea in Timæo non solum esse animatas inquit, sed etiam Deos, ut ipse vocat, juniores: quorum virtute & afflatu inferiorum corporum ortus, & mutationes fiant, & administrantur. In quo etiam Aristoteles cum illo consentit, quòd libro 12. primæ Philosophiæ corpora omnia, præsertim inanima solis vi, ac stellarum Zodiaci, cæterorumque syderum produci, &

H

foveri

foveri arbitratur : id quod in alio loco ipse indicans, solem, & hominem omnia generare ait. Figuram porro stellarum globosam esse iisdem confirmant, assentiunturque ijs Mathematici, quanquam nonnulli Philosophi turbinales, & instar clavorum crystallo infixorum eas esse contendunt : quorum è numero fuere Cleantes, & Anapimenes. Huiusce autem figuræ rationem à motu formaque cœli universi petunt: quoniam enim stellarum quædam in suis epicyclis converti, & eiusdem esse cum cœlo natura finguntur: figuram quoque ijs convenientem, hoc est, globosam assignant. Earundem præterea stellarum quædam fixæ esse dicuntur in extimo illo cœli globo, aliæ converti in orbibus inferioribus. Quam etiam ob causam illæ fixæ communiter appellantur, hæ mobiles, sive errantes. Nam Sol, Luna, Mercurius, Venus, Mars, Iuppiter, Saturnus (hæ enim sunt solùm errantes) in suis quique orbibus convertuntur, ut Astrologi docent, in quibus soli singuli sunt, non aliarum stellarum, aliquis numerus accedit: ideòque ab iisdem singuli globi nomen accipiunt, ut à sole globus solaris, à luna lunaris, atque eodem modo à reliquis quinque. Quo autem modo eadem hæc sydera moveantur, diffuse Prolo-mæus, atque alij docent: nos, quoniam à

Phyfico

Phyfico id alienum est, omittendum censemus: tantum id ostendisse sit satis, moveri quidem eorum syderum orbes ab intelligentiis quibusdam, cuique illorum præsidentibus, ut Aristotelis lib. 12. primæ Philosophiæ testatur: Platoque sensisse prius videtur, cum diis iunioribus, sive stellis, quas animatas putat movendi vim tribuit, id quod à nobis in commentariis in Timæum declaratum est. Jam verò fixæ stellæ in octavo cælo esse dicuntur; eæque prorsus innumerabiles, ex quibus tamen Astrologi mille, ac viginti præcipuas tum magnitudine, tum etiam virtute numerant. Horum itaque naturam, formam, ac vim à cæteris errantibus stellis non distinguunt, tametsi in earum viribus, & in afflatu varia tradantur, quæ longum esset commemorare, dum aliis caloris, aliis frigoris, aliis siccitatis vim tribuunt. Plato tamen, & Aristoteles in eo differunt hac de re, quod ille qualitates eas, quarum ipsæ vim habere dicuntur, tribuit stellis, hic verò non item. In eo autem consentiunt, quod vim diversarum qualitarum in hæc inferiora dicuntur habere, eamque semper exercere. Hactenus ex Aristotelis, & Platonis sententia universam circulorum, ac syderum cæli rationem, formam, motum, ac varietatem descripsimus, non ut earum rerum longam tractatio-

nem institueremus, quæ Astrologorum propria est, sed ut capita solum, & summam attingerem reliquum est, ut quid sit è religione Christiana tenendum indicemus. Principiò circuli illi (quos in extimo cœlo cogitamus) quoniam ad usum veræ Astrologiæ, ad temporumque rationem commodi sunt, admittendi videntur, præsertim cum Zodiacum oculis, sicut lacteam etiam viam, intueamur. Quæ verò de epicyclis, & eorum motu traduntur, quanquam præclare demonstrata Astrologis videantur, incerta tamen, ne dicam, magnâ ex parte falsa sunt. Quamvis enim tot orbes, quot ii statuunt, admitteremus, id quod nec firma ratione nititur, nec religioni nostræ consentaneum est, tamen illos epicyclos natura non patitur, cum ex eo axiomate, quo ipsi frequenter utuntur: videlicet omnia simplicia corpora uno esse motu contenta: tot motus in eodem orbe nequeant existere: nisi ipsum in varias sectiones partiamur, id quod non est minùs absurdum, quando simplicis corporis partes eodem quo totum motu cieri necessario debeant, per axioma II. quod eandem esse totius, ac partium rationem docet. Quid? quod sententiæ huic quoque Aristoteles ad stipulatur, tota que schola Peripateticorum, à quibus quoniam hic locus subtiliter, & accurate

curatè tractatur, quæstioni huic nunc supersedendum existimo: possem enim multa vel ex theorijs planetarum cum natura, ac ratione omnino repugnantia proferre, quæ brevitatis causâ prætereo. Quæ verò de stellis, & earum figura, numero, & motu dicuntur, incerta, ac falsa magnâ ex parte sunt. Nam esse illas à cœli natura diversas, & color, & virtus, & reliqua omnia accidentia ostendunt. Cujus autem essentia earum sit, nec verè Philosophi docere possunt, nec nos è sacris literis, nisi malè detortis agnoscere. Numerum etiam, figuram, & motum ipsarum multò magis ignoramus. Cum & numerum earum infinitum esse sacrae literæ affirmant. Ut Abrahamo generis innumerabilem propagationem prædicens Deus, inquit: *numera stellas, si potes, sic erit semen tuum.* Et apud Ieremiam: *sicuti numerari non possunt stellæ cœli, & metiri arenæ maris.* De figura verò illarum nihil certi statuere possumus, nisi quòd probilitate ducti, propterea quòd cœlum sit rotundum, eius illas formæ esse dicamus: quæ quidem ratio parùm habet ponderis, ac momenti. Motus autem, quem illis Astrologi attribuant proprius ipsarum non est, sed angelorum, mirabili concentu cœlos mouentium, ut Augustinus, multiq̃ue alij Theologi testantur. Id ipsum Aristoteles

H 3 quod-

quodammodò sentire videtur, dum intelligentias quasdam æternas singulis cœli globis præsidere inquit, quæ ordine quodam, & gradibus naturæ suæ distantes à se inuicem motus hos cœlorum efficiant. Sed in eo ille peccauit, quòd ipsas immobiles esse, ac diuersis essentiae gradibus inter se differre, & huic tantùm rei intentas, vim aliquam in inferiora hæc corpora habere dixit. Quo autem pactò cœlorum motus angeli impellant, nec aliqua ratione docere, aut nosse possumus, nisi divinare de rebus ignotis velimus: quod imprimis est Physico vitandum. Nec verò tantam vim habere stellas, quantam præsertim iis tribuunt Astrologi, putandum est, cum omnia Dei consilio, & providentia gerantur, non stellarum: quæ si aërem, & cætera corpora quodammodò afficere possint, magna quidem illarum virtutis, quasi prærogativa erit. Ita fit, vt sententia divinorum, qui ex stellarum virtute ortus, ingenia, mores, eventus, & facta solent prædicere, sit omnino repudianda, vt falsa, & impia. Quæ præter id, quod sacræ literæ, atque omnes antiqui partes explodunt, & damnant, vel multi etiam Ethnicorum Philosophorum evertendam putavêre, vt Plotinus, in libro an stelle aliquid agant, Aulus Gellius, & Cicero in libris de divinatione.

DE ELEMENTARI RE-

G I O N E.

Cap. V.

VENIAMVS nunc ad hanc mundi partem, quæ cælo subiecta est, quam elementarem vulgus appellat. Hæc autem à nobis dicitur communi nomine illa, quæ in medio universi, tanquam in ovo vitellum, sita est. Nam cæli quidem ambitus omnem, ut cernimus, elementarem regionem intra sese complectitur: ipsa verò hæc regio in medio universi est posita. Hanc communi aliqua descriptione circumscribere, quoniam diversis ex naturis constat, non possumus, nisi singulas eius partes definiamus. Eadem à Platone, & Aristotele subiecta esse demolitioni, & alterationi secundum partes, non omnino, dicitur, quòd ab illa rerum, quæ eius constat naturis, perpetua generatio addatur. Quocirca & in hanc sydera, ac cæli motus agere, tanquam in materiam diversisque modis eam afficere dicunt, ut in concretis corporibus cernitur apertè. Sed nos jam eiusdem partes ordine singulas enumeremus. Tota hæc sublunaris, ut vocant, mundi compages, quatuor è simplicibus corporibus, quæ vulgo elementa nominantur, con-

stat, igne, aëre, aqua, terra. Quorum naturas, qualitates, regionesque, ac formas priusquam demonstrare incipiam, de ijs est generatim differendum. Elementum, ut à nobis in definitione. i. & à Galeno definitur, est minima cuiusque rei portio, quæ illam ipsam constituit, & in quam eadem dissolvitur. Idemque ratione, non re ipsa in concretis rebus percipitur. Differt à principio, & causa, quemadmodum vult Aristoteles, quod principium est id à quo res primo fit: causa verò, ratio particularis effectiōis cuiusque; elementum denique pars quædam rei factæ, ita tamen, vt illi inhæreat. Elementa vero quatuor esse & Plato, & Aristoteles docent, ignem, aërem, aquam, terrā. Hipocrates autē præclaris eorum numerum rationibus confirmavit, ex eo, quod composita omnia, si uno tantum elemento constarent, nullam unquam mutationem paterentur: quod cum ediverso fieri videamus, plura esse uno elementa concludit. Id magis in hac mundi universitate perspicuum est, in qua manifestè & terram, & aquam, & aërem diversæ naturæ, virtutisque inter sese esse cernimus. Quo fit, ut ampliùs dubitari non possit, quin esse quatuor elementa fateamur. Est præterea elementorum id proprium, quòd corpora simplicia sunt, quandoquidem ijs cætera omnia

omnia constant, id quod fieri non posset, si eadem composita essent, cum duo corpora in uno subiecto consistere per axioma, 8. libri primi nequeant. Nec tamen sic putes, elementa esse simplicia corpora, ut nullâ concrezione constare planè dicantur; habent enim, Platone, & Aristotele authoribus, materiam, & formam, uti cætera corpora: id quod ex ipsorum frequenti mutatione iudicare licet, quia cùm illa semper inter se mutuo commeent, ut ignis in aërem, aër in aquam, & hæc rursus in illa, ea quidem commutatio absque aliqua subiecta materia fieri non posset, quando per 1. axioma libri primi nihil ex nihilo fit. Ex quo patet, errare vehementer eos, qui aliqua elementa rerum initia esse putaverint, ut Anaximenem, qui aërem induxit, Thaletem, qui aquam, ac cæteros, qui alia eiusmodi quos ipse quoque Plato in Timæo, & Aristoteles graviter reprehendunt. Teneamus ergo quod certius è Philosophorum illorum, quos citavimus, sententia est, elementa ex forma, & materia primò esse concreta, quemadmodum & universum. Vnde ut in rebus concretis materiam, ac formam coniungi, quò corpora constituentur cogitamus, ita etiam in elementis eadem duo initia statuamus: quæ inter se connexa qualitates quasdam assequan-

tur, quæ sequi formam soleant, hisque adeptis, fiant elementa. Nam cum omnia, quæcunque fiunt, vel essentia sint, vel accidentia per 22. axioma, solaque forma materiae annexa essentiam, uti antea docuimus, faciat, reliquum est, cætera omnia, quæ huic adhæreant, esse accidentia: quæ cum subiectum quodammodò afficiant, & immutent, à Græcis *μιώματα*, à Latinis qualitates nominantur, eò quòd qualem, id est, quodammodò affectam essentiam exhibeant. Hæ verò qualitates, ut in Dialecticis etiam ostenditur, aut naturales sunt, id est, simul cum essentia ingenitæ, ut calor in igne, frigus in aqua: aut extraneæ, ut sic dicam, id est, quæ extrinsecus adhærent subiecto, ut calefactio in aëre, & in aqua. Superiorum quidem genus qualitatum ita sequi subiectam essentiam solet, ut quædam comitari materiam dicantur, quædam verò formam. Materiam sequitur magnitudo, gravitas, densitas, mollesque corporea: formam calor, frigus, cæteræque id genus alia. Porro naturales qualitates aut primæ esse, aut secundæ dicuntur. Primæ duntaxat numero sunt quatuor: calor, frigus, siccitas, humiditas. Ex his, uti postea docebimus, tum elementa primò constituuntur, tum reliqua omnia corpora mixta. Secundæ, illas in corporis concretionem
jam

jam compactas, quasi umbræ sequuntur, ut mollicies, asperitas, duricies, pondus, levitas, aliæque ejusmodi, quas postea suo loco enumerabimus. Ergo ad primam elementorum constitutionem redeamus, de qua dicere paulò antè cœpimus. Cùm elementorum corpora simplicia sint, & ex forma, materiæque imprimis compacta, eas demum qualitates, quas habent, assequi post sui concretionem cogitamus; quandoquidem nullum subjectum est sine accidente, per 13. axioma, nec sine subiecto accidens. Cùm autem elementorum mixtionem è forma, & materia factam qualitates comitari dicimus, minimè quidem intelligas per id Aristotelem, ac Platonem putavisse aliquando ea non esse concreta, cùm æterna potius illis dicantur: sed quatenus omne concretum in partes sui simplices dissolvitur, ut eius natura melius spectetur: & ut omnia simplicia compositis, per axioma 14. priora dicuntur, eatenus elementa forma, & materia primum, tum qualitatibus adiunctis, composita esse putantur: quemadmodum & universum cogitatione animi sic esse factum ex iisdem initiis uterque Philosophus existimavit. Ita fit, ut ex quatuor primæ qualitates, quas paulò antè retulimus, inter se varijs modis commixtæ quatuor etiam elementa constituent, in quæ univer-

universam hanc infimi orbis partem dividi principio diximus. Nam calor siccitati adjunctus ignem efficit, frigiditas siccitati terram, humor calori aërem, frigiditas humiditati aquam. In hac porto mixtione illud animadvertendum est, duas ex ijs qualitates agendi vim suaptè naturâ habere, formamque propriè sequi, ut calorem, & frigiditatem: alteras vim patiendi, materiamque comitari, ut siccitatem, & humiditatem. Hæ quatuor inter se contrarię sunt, si extremæ cum extremis comparentur, consentientes, si mediæ cum medijs. Extremæ sunt calor, & frigus inter se collata: itemque siccitas, & humiditas: quæ omnino sibi repugnant. Mediæ veræ, humor ad calorem, vel frigiditatem relatus, vel siccitas ad eorundem alterutrum. Ex his ergo quę mediæ dicuntur, ad rerum generationem pariendam sunt commodæ, quoniam suâ spontè alias colligant, & subiecta constituunt: quæ autem extremæ, ad mutationes, interitus, morusque omnes sunt aptæ: quia dum sibi mutuo repugnant, prout illarum altera vehementior fuerit, subiectum etiam mutari sæpe, necesse est. Quin etiam ipsarum qualitarum secundarum aliæ alias sequuntur, ut humorem mollicies, lenitas: calorem levitas, acumen: frigiditatem gravitas, hebetudo: atque aliæ secundæ, de quibus

quibus suo loco dicemus. His ita statutis, elementa quatuor ex illis qualitatibus sicesse conflata, perspicuum est, ut ipsorum unumquodque duabus qualitatibus constet, una media, altera extrema: quarum media quidem, ut unum elementum cum altero consentiat, efficit, extrema, ut illi repugnet. Vcluri ignis calore, & siccitate præditus, ab aëre differt siccitate, calore tamen cum illo consentit. Calor cum aqua consentit humore, differt tamen in calore. Aqua cum terra frigiditate convenit, dissentit humore. Hæc eadem comparatio contrario fieri ordine potest, & alternato, modò qualitatum inter se complexus, & quasi colligantias spectes Exposui universam Aristotelis de communi elementorum natura sententiam. Proximum est, ut Platoniam huic quoque addam. Idem omninò Plato, quod Aristoteles de elementorum effectione sentit in Timæo, eandemque materiæ, ac formæ, qualitatumque concretionem esse putat, nisi quòd in qualitatuum numero, ac modo pythagoræ sententiam sequutus, igni subtilitatem, acumen, mobilitatemque tribuit; aquæ crassiciem, obtusitatem, mobilitatem: terræ crassiciem, obtusitatem, immobilitatem. Harum ille qualitatuum consensiones, ac dissensiones, colligantiasque mutuas eodem ferè modo consti-

constituit, atque Aristoteles. Idem in generatione elementorum communi in materia ab idea eorundem informata confusa prius fuisse ipsa inquit, postea tamen distincta & separata: quemadmodum in cribro dum paleæ à frumento separantur. Id autem eodem modo ipse excogitavit, quo mundum ab æterno esse factum asseruit. Aristoteles contra, & cum eo medici omnes qualitates illas à Platone inductas non primas, sed secundas esse putant: idemque, cum mundum omnino æternum faciat, nullam eiusmodi elementorum in materia confusionem existitisse prius admittit. Hæc cum ita sint, nostram, ut in alijs, sententiam interponamus. Quatuor esse elementa, tametsi apertis sacrorum scriptorum testimoniis probari non possit, rerum ipsa natura demonstrat, cum qua illa minimè in hoc pugnat: idque Augustinus, Basilii, Ambrosius, patresque alij omnino confirmant. Esse itidem ipsa quatuor illis qualitatibus primis, de quibus ante cum Aristotele diximus, composita non ijs tantum secundis, ut Plato existimavit, rationibus & argumentis quam plurimis confirmari potest. Nam & in animatis corporibus, quæ ex primis elementorum qualitatibus constant, quatuor humores, calori, humori, siccitati, humiditati que respondere videmus, non

non levitati, acumini, aut reliquis eiusmodi. Præterea si eadem qualitates primæ essent, alias antecedentes minimè sequerentur, at videmus calorem, & siccitatem, ignis acumen, tenuitatem, & levitatem consequi. Illum autem non hæc ipsa ergo nequaquam primæ sunt. Sed quid pluribus opus est? id mutatio rerum perpetua indicat, & corporum diversorum commutatæ qualitates, quas minimè hoc loco referre necesse est. Iam quod de confuso illo elementorum in materia ordine Plato inquit, multo est verius, quam quod Aristoteles existimavit, qui ipsa elementa ab æterno seiuncta, & distincta fuisse putat. Quanquam uterque peccavit suo modo, ille quod ordinem cum confusum ab æterno fuisse, imo ratione quâdam distinctum esse ait, hic quod omnino nullam elementorum aut effectiorem, aut distinctionem admittit. Verius igitur nos unâ cum tempore mundum cœpisse, atque elementa, quæ prius confusa cum universa rerum essentia fuerant, seiuncta, & ordinata fuisse dicamus, ut ex Mosâica generatione patet, in qua cœlum à terra seiungitur, tum aquæ ab aquis, & ab utroque ignis, atque ær.

DE IGNE, AERE

AQUA, TERRA.

Cap. VI.

HACTENUS communem elementorum naturam exposuimus: nunc ordo, forma, ac vis singulorum explicari debet. Ignem, ut ab hoc primùm exordiar, quoniam levissimus est aliorum elementorum, supremam regionem petere, quæ lunæ proxima est, & Aristoteles, & alij ferè omnes testantur idque ratione levitatis confirmant, ut axiomate etiam 15. probatur. Nam si gravia omnia deorsum, levia sursum spontè deferuntur, ignem utpotè levissimum supremam petere regionem necesse esse. Itaque ut ante lunæ globum alios orbes existere supra docuimus, sic post eundem ignis universi elementum quasi globus quidam esse dicitur. Cùm autem ignem in eo loco poni audis, ne putes eum esse huic nostro, quo utimur, similem; sic enim ob splendorem cerneretur, & ob edacitatem materiâ aliquâ, uti pastu indigeret: Sed purissimum quendam spiritum aëre longè tenuiorem, feruentissimum, & ut vocat Aristoteles, sicci, & calidi corporis quasi ebullitionem: quæ nec cerni, nec alimento indigere possit, cum simplex admodum sit,
 potius-

potiusque alijs rebus sit alimento, quàm ipse
 eo indigeat. Unde ignis iste inferior rebus
 omnibus fusus illius imaginem duntaxat
 præfert, quatenus calorem, siccitatemque
 plurimam habet: est tamen aëri, ac terræ, cæ-
 terisque qualitatibus concretionibus crassio-
 ribus admixtus propter usum humanum:
 quemadmodum, vel ex eius motione incon-
 stante, splendore rubeo, fumositate, edacita-
 te, huiusmodique alijs accidentibus intelli-
 gimus: quæ Theophrasto auctore, non illi
 essent; nisi aliorum elementorum adiun-
 ctum esset aliquid. Cum ergo tantum utrius-
 que ignis discrimen sit, dubium non est, quin
 is locum supremum obtinuerit, qui maximè
 naturâ sit levis, & siccus. Non desunt, qui
 nullum sub lunæ globo ignem esse velint:
 quorum è numero est Laurentius Vallen-
 sis: sed ii quidem infirmis rationibus utuntur;
 quæ, factâ illâ ignis distinctione, quam feci-
 mus, facile diluuntur. Ex hisce rebus perspi-
 citur, ignem illum elementarem, de quo lo-
 quimur, corpus esse tenuissimum, levissimum
 aridissimum, summâ vi generandi, & agendi
 constans, nulli colori admixtum, cum ma-
 ximè sit simplex, nec nisi in rebus concretis
 color inveniatur: breviter lunæ globo sub-
 jectum, & motu cælorum magis inflamma-
 tum, & majori agilitate præditum. Atque

hunc sanè *αἰθήρ* Græci vocant, quòd neque in aspectum cadat, nec à cœli natura diversus sit, sed quòd perpetuò motu convertatur. Porro eius figura rotunda est, uti totius universitatis, quatenus motu cœli correptus circumagitur lunæ globo, nihilominus, si partes ignis spectes in pyramidis figuram effertur. Id fit, ut Averroes acutè docet, quòd ignis, atque aëris motus ex recto, & orbiculari constant: rectò, quatenus spontè sursum deferuntur: orbiculari, quatenus in cœlum incidentes eiusdem in cursu quasi rotundantur in globum. Hæc est summa de igne Aristotelis, ac Peripateticorum sententia. Plato ab eadem hoc solum dissentit, quòd, uti docui in præcedentibus, alias illi qualitates præter calorem, & siccitatem attribuit, & quòd Pyramidis eum figuram habere inquit, quòd ad ipsius naturam, ac motum rectum attinet: cœli tamen sese figuræ, id est, rotundæ accommodare illum non inficiatur, sed id cœli motui, non ejus naturæ tribuit. Qua etiam in re nullum, ut mihi videtur, est utriusque discrimen, quemadmodum & Averroës sentire videtur, nisi quòd Plato ignis motum naturalem spectavit: hoc igne, quem cernimus, Aristoteles situm illius supremi: Qui rotundus cum sit, nec eum quidquam extet, rotundū esse ignem.

quoque vult, id quod vel Plato concedit, & cum eo cuncti Academici recentiores, ut Plotinus, Proclus, & alij. Quòd si verò ad nostræ sententiæ, quasi normam utriusque opinionem examinare velimus, si non sacrarum literarum aperto testimonio, saltem patrum omnium vocibus confirmari, quæ supra diximus, possunt: cum ignem & esse, & cælo subiici multi fateantur, eumque nihilominus terris, cæterisque rebus admisceri, ut in lapidum collisione, maris æstu, terræ locis fervidis, aëre calefacto, alijsque locis cernimus. Sed hæc de igne satis. Proximus loco, naturaque illi est aër, calidus & humidus, levis, ac tenuis, mobilis, & spontè sursum sese efferens: differt tamen ab illo, quod humidior est, quàm calidus, imò parùm habet caloris, præter eum, qui ad humorem inflatus dissolvendum satis est. Unde à Galeno temperatæ esse naturæ aër dicitur, quoniam nec calidus ut ignis sit, nec humidus, ut aqua, sed medius inter utrumque. Plutarchus in libello ea de re, quærens num frigiditas aëris, an terræ, vel aquæ proprior sit, frigiditatem aëri quasi congenitam addere videtur. Sed errat; meâ quidē sententiâ, cum eò maximè, quod aër frigidus non est, ab aqua differt, ex qua sæpe calefacta gignitur. Hunc igni adiunctum Plato & Aristoteles collocant, levita-

reque illi proximum, & lenitate faciunt. Differt tamen, quod Plato octaedrae figura illum esse inquit in Timæo, ejusdem videlicet motum in sublime sponte tendentis considerans. Aristoteles verò rotundæ, locum ad cuius se formam ille in globum torfit, perspicuens. Verum hoc discrimen & leve est, & suprâ, cum de igne egimus, indicatum. Itaque aer ex Aristotelis Platonisque sententia corpus quoddam est, calidum moderatè & humidum, leve, rarum, tenue, rotundum; quatenus locum rotundum obtinet, cum tamen ipse rectâ sursum moveatur. Idem quia terris propior est, quàm ignis, frequentius alteratur, quem ille, modò enim calidus est, ut in æstate, modò frigidus, ut in hyeme, modò nimium humectus, ut dum pluit. Quapropter illius tres facit regiones Aristoteles, unam, quæ igni vicina est, calidam, propter calorem ei vicinum, à quo illa, ut credi par est, inflammatur: alteram infimam, quæ terras ambit, quæ modò calida est ob solis accessum, modò frigida, ob eius abcessum, modò humecta frequentium exhalationum evaporatione: Tertiam mediam, utriusque omninò frigidam, quæ cum longè ab utraque extrema distet, frigida sit semper contrariarum qualitatuum oppositione. Hanc aeris partitionem in Timæo Plato fecisse

cisse prius videtur, cum de aëreorum mixtorum generibus, & aqueorum differit, uti nos aliàs fufius indicavimus: Has quoque utriusque Philofophi fententias è noftra religione eſſe probare poſſumus: Cum in mundi origine Moſes aërem effectum, & ab aquis quaſi ſegregatum, illiſque offuſum dicat his verbis: Et Spiritus Domini ferebatur ſuper aquas. Quem quidem locum omnes Hæbrei, atque etiam Baſilius de aëris effectione intelligendum volunt, ac non tam de Spiritu ſancto, id quod Davidis teſtimonio confirmant: Flabit Spiritus Domini, & fluent aquæ. Quin alijs in locis ſacrorum Bibliorum fieri venti mentionem paſſim videmus: tum eius levitatis & mutationis: cum modò caleſcere, modò frigefcere, modò nubibus obduci, modò ſerenari, modò aliter commutari dicitur. Sed hæc omnia percurrere longum eſt. Veniamus ad aquæ naturam, ac vim. Aquam omnes aëri ſubiectam ſtatuunt, eamque humidæ, ac frigidæ naturæ, tenuis, ac defluentis. Quæ eadem tenuior quidem terra eſt, ſed craſſior aëre, illa item hic levior, ſed eo utraque etiam humidior, frigidiorque terra. Hanc Plato Icoſaedræ figuræ facit propter formam defluentem, & quaſi rotationi accommodatam: Ariſtoteles verò rotundam, uti cætera elementa. Quò fit, ut ille

corporis aquæ naturam considerarit, hic eius situm, & locum: cæteró qui tamen & Plato rotunditatem illi tribuit, quatenus corpora omnia mundi ambitu comprehensa rotunda sunt, & Aristoteles fluorem illum, quoniam per terras aqua quasi rotetur, non sursum efferatur. Eadem aqua quo pacto terris annexa sit, cum rotundæ figuræ existat, nec sese in terras effundat, cum fluida, & mobilis sit, dubium est inter Philosophos. Nam Aristoteles eius rei causam investigans, (de qua Plato in Timæo ne ullum quidem verbum facit) naturalem corporum omnium conservandi sese in loco suo, & figura appetitum affert, idque singulis ex aquæ guttulis probat, quæ effusæ quasi coherent, & consistunt. Inde fieri putat, quod terris connexæ aquæ rotundum unum corpus efficiant, sic tamen, ut ambo diversa sint elementa: quæ ita sunt naturâ sejuncta, ut animalium vita conservetur. Aquæ autem rotunditatem ille ab elementorum communi figura, & navigationibus, in quibus è portu solventes naves, quasi terram in uno loco relinquere videntur, probat: idque rationi etiam congruit, ac mihi valdè probatur. Quod autem is de aquarum consistentia opinatur, nec ratione firmâ nititur, nec nostræ est religioni consentaneum. Nam si terris est aqua long
maior

maior, & amplior, uti omnes uno ore fatentur, nihil obstat, quominus hæc sese effundens illas obruat, ac tegat, nec suam proinde aut figuram, aut positionem amittat, cum omnia loco sibi convenienti, quàm incongruo contineri malint. Verior igitur nostra de aquarum situ sententia, quæ Dei opificis iussui, ac voluntati illud attribuit: qui, ut omnia ex nihilo facere, ut docuimus, potuit, ita aquas loco certo terminare, & continere solo imperio potuit, idque maximè naturale erit, ac non violentum. Satis est enim, illum dixisse: congregentur aquæ, quæ sub cælo sunt, in locum unum, & appareat arida, ut naturâ consistere in suo loco aqua dicatur. Quod verò Dei imperio aquæ subsistant in ea, quam habent, mole, Salomon sapientissimus docet: Quando circumdabat, inquit, mari terminum suum, & legem ponebar aquis, ne transirent fines suos. Itemque David: Congregans sicut in utre aquas maris, ponens in thesauris abyssos. Quæ omnia & aquarum naturalem locum ostendunt, & eiusdem collocationis causam. Postrema atque infima elementorum omnium est terra, quæ gravitate, ac densitate à cæteris omnino diversa est: siccitate verò ac frigiditate cum igne, atque aqua consentiens. Et quanquam si naturæ suæ perfectionem obtine-

nere ipsa debuisset, nectam densa, nec tam dura foret, tamen ad animalinam vitam tuendam humoris habet permultum admixtum, quo solidatur: caloris, quo fovetur: aëris, quo perflatur. Quocirca corpus solidum, grave, densum, ac frigida, sicque naturæ esse illam apparet. Hanc in medio universi sitam & Plato, & Aristoteles volunt, tum quia sit universi quasi centrum, quod in circulo naturâ suâ stare debet, tum quod gravis cum sit, deorsum tendere spontè debeat. Itaque quamvis eandem aquis esse annexam dixerimus, inferiorem tamen esse ijs cuncti affirmant, & quia gravior, & quia illius quasi receptaculum est. Eandem ipsam rotundæ figuræ Aristoteles, & cum eo Mathematici omnes esse dicunt; Plato verò quadratæ. Sed ille, ut dixi, loci naturam perspexit, qui rotundus esse debet, hic soliditatem, firmitatemque terræ, quæ cum stabilis, ac firma sit, similitudine quâdam quadratæ figuræ esse dicitur: cæteroque & Plato rotundam esse terram putavit, & Aristoteles solidam, atque gravem. Iam verò tertiam ipsam stare in medio universi Plato, & Aristoteles putavere, quamvis moveri eam, quod à Platone dictum sit, Aristoteles videatur reprehendere. Cujus nos objectionis causam, & rationem in nostris in Timæum commentarijs reddimus.

dimus. Quod autem stet terra, gravitatem in causa esse dicit Aristoteles, quoniam si gravis cum sit, deorsum semper defertur, eoque perveniens conquiescit, moveri inde non potest, ne loco suo egredi, si alio moveretur, contra naturam suam videatur. Vera tamen hujus stabilitatis ac situs causa est eadem, quæ aquarum, si verum fateri volumus, nihil enim obstar, quò minus in se ipsa moveretur quasi ratione quâdam, aut tremore, nec proinde naturali loco excederet. Rectius ergo Solomon terra, inquit, in æternum stat: & David, qui fundasti terram super stabilitatem suam, non inclinabitur in sæculum sæculi. Verùm hæc de terra cæterisque elementis hætenus.

DE ELEMENTORUM NATURA.

Cap. VII.

REDEAMUS nunc ad eorum communem naturam, commutationem, viresque explicandas. Quoniam elementa, uti diximus, communes inter se quasdam habent qualitates, quibus colligantur, aliasque repugnantes, quibus à se invicem distinguuntur, proprium est imprimis eorum, ut perpetua in mutatione versentur, quòd ipso-

rum qualitas aliqua excelluerit. Nam cum agens omne per axioma 16. robustius sit eo, in quod agit. Si vel in igne, vel aëre, vel alio denique elemento calor, siccitas qualitasve huiusmodi alia excelluerit in aliud ipsum mutatur: siquidem illa robustior cum sit, alteram sibi adiunctam evincit. Itaque fit, ut aquam in aërem converti videamus, quod in illam calor invaluerit, quæ humiditatem dissolverit in flatum. Hoc autem modo perpetua rerum generatio, & interitus fit, ne quando rerum natura manca, & vi suâ destituta agere intermittat. Nec vero elementa omnino mutari inter se putes, ut aquam totam in aërem, hunc in ignem universum, sic enim partibus commutatis per axioma, 17. totum ipsum mutaretur, ac mundi universitas periret, quod fieri posse negant Plato, & Aristoteles, sed ex parte in concretis corporibus mutari. Hanc porro mutationem communem esse omnibus elementis, Aristoteles, & cum eo Medici omnes censent: quandoquidem quatuor illæ qualitates iisdem quæ sunt diffusæ, quamvis aliis in natura sua magis excellent, ut in igne calor, in aqua humor, in terra frigiditas. At Plato, quia Geometricas quasdam figuras retulit ad elementa, ignem quidem, aërem, & aquam, quæ eodem primo triangulo, nempe scaleno constant, inter se
com-

commutari inquit, cum ijs verò terram nequaquam, quoniam isoscete constet triangulo: qui diversus omninò est ab illo. Itaque similitudine quâdam triangulorum eorum qualitates primas designavit: quas & nos supra retulimus. Has autem in tribus superioribus propter naturæ tenuitatem mutari inter se invicem censet, cum terra verò non item, quoniam hæc densissimæ, gravissimæque naturæ sit. Nihilominus tamen Proclus, ut in nostris quoque commentarijs docuimus, nihil esse discriminis inter Platonem, & Aristotelem putat; quòd ille terræ soliditatem, ac gravitatem respiciens eam cum cæteris elementis permutari negarit, hic solum communibus omnium ipsorum qualitatibus perspectis, communem etiam admiserit commutationem, quam ne Plato quidem sustulisse visus sit. Sed hac de re nos satis in eo loco. Accedit hoc ad communem elementorum commutationem, quòd illa, mutatis qualitatibus, in locum aliorum succedunt: nam si aqua in aërem degeneret, in locum aëris migrat, si aër in ignem in locum ignis. Id autem perspicuum est ex adepta ab ijs natura, quæ ut gravior, densiorque sit, ita locum vel superiorem, vel inferiorem petit. Iam elementa omnia, de quibus nos in hoc loco differimus, non esse talia, qualia hæc

hæc sunt, quæ videmus, cogites, sed pura, & naturæ suæ sinceritatem retinentia. Aqua enim pura si esset, nec gustari, nec cerni, nec odore, percipi posset: nec aër in aspectum aut caderet, aut tam esset corporatus, ac densus: nec ignis adeò ruberet, nec luce tantâ splend. ret. Quò fit, ut omnia permixta inter se quodammodò sint ad salutem animantium tuendam: quæ, quia concretis rebus aluntur, elementa etiam concretione quadam aliorum mixta esse debuerunt. Nec tamen ita putes, eadem cum alijs esse permixta, ut sunt in concretis corporibus, sic enim simplicia non essent, sed composita: sed quatenus aliquid quasi contagionis ab alijs habent. Veluti terra humore multo perfusa solidatur, & aëre perflatur per occultos quosdam meatus: aqua calore quodam concepto, liquidior est, & alendis aquatilibus accommodatior: aër humore multo vaporum, caloreque syderum perfunditur, quo densior & flatuosior est: ignis etiam terrenæ concretionis & aëreæ habere multum videtur, præsertim hic ipse, quo utimur, cum & rubeat, & famidus sit, & densus. Quæ omnia habere ille minimè posset, si purus esset. Quæ res efficit, ut ad communem omnium salutem divino consilio elementa non pura, sed admixta sint, quò faciliùs

cilius universa foveantur. Sic enim terra fluminibus irrigua herbis vestiri, arboribus ornari, semina diversa proferre, animantia sustentare propter admixtam humoris, caloris, atque aëris vim potest. Aqua pisces & alit, & producit easdem ob causas: Aër volucres omnes sustentat, & cuncta recreat commodissime, vel humiditate, vel calore concepto, cum opus est. Age verò quandoquidem elementa suis locis ordine quodam naturæ sita esse diximus (ut terram in medio universi quasi centrum: aquam deinde huic admixtam, sed eminentiorem mole, ac tumore suo: tum aërem his offusum: postremò ignem, qui lunæ globum attingat) hæc quidem ipsa sic inter se distingui putandum est, ut certa se superent magnitudinis proportionē. Nam si quæ capaciora sunt, & majora, minora continent, certè quoniam aër ab igne, ab aëre aqua, & ab hac terra ambitu suo continetur, ignem quoque aëre majorem, aërem aqua, aquamque terra esse necesse est. Quæ autem sit isthæc magnitudinis elementorum proportio, Mathematici Geometrica ratione metiri conati sunt, in aqua docent, omnia se decupla ratione superare: ut terra sit aqua decuplò major: aër aqua: ignis aëre. Sed ratio hæc difficilis est, & huic loco minimè congruens. Est præterea ad elementorum

torum naturam considerandam id maximè
necessarium, quòd omnia ex illis corpora
constitui, tanquam è partibus simplicibus
necesse est. Videmus enim animalia, stirpes,
metalla, lapides, atque adeò mixta omnia,
quatuor elementorum qualitatibus esse con-
creta. Ex quo intelligimus, elementa ipsa esse
quasi semina quædam ipsorum, quibus inter
se naturæ quadam proportionem connexis,
corpora constituuntur, dissipatis dissolvun-
tur in ea ipsa. Quo verò pacto in concretis
eadem elementa subsistant, nunquid re ipsa,
& actu, an potestate, ac virtute à Philosophis
multis controversum est. Plato quidem, &
Aristoteles, itemque Galenus virtute inesse in
concretis corporibus inquirunt elementa,
contra alij, quos minimè hoc loco recense-
re opus est, non virtute, sed re ipsa esse cen-
sent. Itaque non qualitates elementorum
tantum in mixtis corporibus ponunt, sed
essentiam etiam ipsorum, id est, materiam,
& formam. Nam qualitates quidem illæ,
quas imaginamur, incorporeæ sunt, seu po-
tius accidentia corporum quædam. Et cum
nullum corpus è solis accidentibus, seu qua-
litatibus constitui possit, ita etiam ex ele-
mentorum tota substantia constari corpora
mixta contendunt. Sed harum quidem sen-
tentiarum prima verior, ac firmitior est, quo-
niam

niam cum singula elementa, quatenus corpora sunt, suam debeant materiam, ac formam habere per I. axioma: certè si ex tota ipsorum essentia corpus fieri aliquod deberet, quadruplicem materiam, & formam habere illa necesse esset, id quod eidem axiomati adversatur, ac ratio non patitur. Sic enim duo corpora in uno subiecto essent constituenda, quod per axioma 8. libri primi absurdum omninò est. Quòd si autem dicant unam, & eandem esse omnium eorum elementorum, & efficiendi corporis materiam, multò minus est admittendum, cum singula habeant suam materiam, nec omnia unam, ne si simul connexæ essent qualitates eædem, non simplex, sed concretum foret corpus, sicque ex concreto concretum aliud esset efficiendum, quod axiomati 18. repugnat. Relinquitur ergo elementa esse corporum concretorum initia, quæ in ijs virtute, ac non re ipsa consistant. Hic suboritur dubitatio quædam, num eadem elementa, quæ corpora constituunt, in se vim illam constituendi habeant, an in ea aliud quippiam agat, tanquam initium animatum. Aristoteles quidem cælorum virtuti, ac naturæ universæ vim illam jungendi elementa in concretum corpus, aut dissipandi hoc in illa tribuit: Plato Dijs junioribus, sive stellis,
quas

quas sic in Timæo nominat, Sed alios ijs ordines quosdam dæmonum igneorum, aéreorum, atque aqueorum, & terrestrium addit, quorum illi ministerio vim suam in inferiora exerceant. Sed uterque, mea quidem sententia, peccat, dum iis nullam aliam præstantiorem causam assignat, cum cæli virtus ad rerum propensiones, alterationes, mutationesque pertinere possit, non ad ortus aut interitus proferendos, qui ab uno Deo proferuntur, & à natura ab illo creata adjuvantur. Dæmones, autem, tametsi nos in aëre versari, atque in reliquis mundi partibus sacrorum scriptorum testimonio cognoscimus, nihil planè facere, aut immutare possunt, cum & ipsi conditi sint, & nihil, nisi adumbratum, ac fictum efficiant. Tenendum est ergo imprimis veram omnium elementorum, & aliarum rerum architectricem causam esse Deum. Huius autem nutu ipsa elementa propter propriam illam naturam Dei administram (quam ut causam secundam in rebus posuimus) conflare corpora, & miscere diversis qualitatibus prædita, eademque rursus dissolvere. Quapropter & elementa diversas agendi vires habent in concretis corporibus: Ut ignis frigiditatem corporum moderandi, & vitalem eorum quasi spiritum fovendi, concretionemque retinendi: aëris

rarita-

raritatem, levitatem, subtilitatem, ac spiritum exhibendi: aquæ vim emolliendi, conglutinandi, duriciem, ac firmitatem corporibus addendi. Has autem illa vires diversâ ratione in subiectis exerunt corporibus, quemadmodum deinceps dicemus.

DE COMMUNI RERUM MIXTIONE.

Cap. VIII.

ABSOLUTA universa de elementorum natura tractatione, consequens est, ut communi de illorum mixtione differamus, ut antequam de corporum concretorum effectione, generibus, & formis dicatur, communes mixtionum omnium causas, rationemque investigemus. Id enim ab Aristotele in libris de ortu, & interitu, post tractationem de mundo, & à Platone in Timæo factum, & summa cum ratione observatum video. Est igitur mixtio (naturalis inquam, nam de communi alia, quæ secùs fit, minimè hîc loquor) concretio quædam è quatuor elementorum qualitatibus commodè paratis conflata, sive, ut definit Aristoteles, miscibilium alteratorum copulatio. Quæ definitio cum illa eadem est, quando elementa miscibilia sunt, & eadem commodè præparata

K

esse

esse ad mixtionem debent, cujus contraria est dissipatio eorundem, cum dissoluto subiecto, singulae elementorum particulae in suam redeunt naturam. Mixtio autem omnis sine motu non fit, imò ipsa motus est quidam subiecti ad generationem: quamvis motus nomen communius, quàm mixtionis est, multaeque sint aliae mixtionis formae, de quibus obiter differemus. Quocirca de rerum omnium mixtione dicturi, auspicemur quidem ab illis sex motus generibus, quae in superiori libro breviter complexi sumus: ab ortu inquam, interitu, incremento, decremento, alteratione. Horum enim naturam, quae communior est, explicatam, ratio etiam mixtionis abundè intelligetur. Ortus seu generatio Platoni in libello de definitionibus, (nisi Speusippus auctor eius est) dicitur motus ad essentiam: Aristoteli verò, qui huius rei tractationem longiorem fecit, mutatio totius in totum, nullo sensili manente in subiecto: sive apertiùs ut dicam, generatio essentialis est, motus, qui ab aliquà priori essentia in aliam denuò acceptam progreditur, nullo prioris essentiae vestigio, in subiecta materia, in quâ fit generatio, permanente. Huius duae sunt species: una, quae simplex, altera, quae accidentaria dicitur. Simplex quidem est, quae propriè generatio appellatur

pellatur, cum ex una essentia prorsus mutata fit in eius locum alia: cui verè definitio illa proposita ex Aristotele congruit. Accidentaria verò, cum essentia, quæ fit, accidentia ingenerantur aliqua, ut cum in homine candor, aut nigror fit, aut in equo pili, & ungues. Quæ, quia sunt essentia jam effectæ accidentia, eorum effectio accidentaria generatio dicitur. Generationis proprium autem id est, quod motus est quidam imperfectus, præsertim cum fit, nondum enim essentiam assequitur, quoniam ea jam adepta, generatio cessat, & quies succedit. Præterea unius rei ortus ex alterius interitu fiat necesse est, quoniam quæ in subiecto aliquo fit generatio, ædi nullo pacto posset, si priorem essentiam, sive formam illud retineret, cum nihil quod in se jam habet expetat per hypothesim, cumque duæ in eodem subiecto formæ nequeant existere, per axioma. Itaque quoties fit aliquid, præter id, quod in aliquo subiecto ipsum fieri necesse est per axioma I. libri primi, tum ea forma, quæ prius in eo fuerat, perit, ut alia denuò possit induci. Hinc fit, ut ortus sit via quædam ab eo, quod non est, in illud quod est, quemadmodum ait Aristoteles. Generationi contraria est demolitio, quam essentia prioris in uno subiecto amissionem possumus definire. Cum enim

forma materiae inharens amittitur, & in nihilum reducitur, id interitus, sive corruptio nominatur. Quae etiam, veluti generatio, duplex esse potest, una essentiae, cum forma planè perit, altera accidentium, quando simul cum forma accidentia perire cogitamus. Ac ne in aliquo subiecto interitum ita fieri putes, ut illud planè forma nuderetur, ac sola materia remaneat, proprium esse corruptionis est animadvertendum, ut ex corruptione fiat generatio, quemadmodum & hæc ex illa. Nam si quæ forma pereat, aliam denuò in materiam illius subinde induci necesse est, ne quod sine forma subiectum inveniatur. Quocirca ut generatio ex eo, quod non est, sive ex privatione ad esse aliquod progreditur, ita ediverso corruptio ex eo, quod est, sive à forma ad privationem eiusdem tendit: adeptio tamen alterius continuò fit per generationem: quæ nunquam cessat, ut nec illa. Ergo se semper generatio, & interitus mutuò consequuntur, ut contraria in unam materiam efficientia, & quidquid alteri non convenit, quod attinet ad essentiam, alteri, quod ad essentiae amissionem, congruit. Veluti homine mortuo, forma, id est, animus excessit, formæque humanæ interitus sequutus est: ex eo tamen interitu alia demum forma inducitur, quæ dicitur

tur cadaveris. Hinc etiam, quo pacto in materia forma, & privatio tanquam contraria considerentur, videre licet: corruptio enim est motus ad privationem, ortus verò motus ad informationem. Atque hæc sanè duæ motus formæ ad integram vel subiecti mixtionem, vel dissipationem referuntur: Sunt & aliæ formæ motuum, quæ ad accidentium subiecti jam mixti, non ad essentiæ mutationem spectant, ut incrementum, & decrementum, quæ in magnitudinis mutatione cernuntur, & alteratio, quæ in mutatione qualitatis. Est autem incrementum motus à minori magnitudine ad maiorem, ut cum quis è puero ad virilem ætatem adolescit, & ex furculo fit arbor, & è catulo canis: atque ex minori demum aliquo corpore majus aliud & perfectius. Incrementum denique proprie ad magnitudinem spectat, ut ad essentiam generatio. Idemque, ut fieri in essentia possit, secundùm illius singulas partes fieri necessario debet, nisi cui fortè particulæ congruum non suppetat alimentum. Veluti ut homo adolescat, necesse est, caput, pectus, brachia, manus, membraque reliqua paulatim crescere, ut magnitudine partium adauctâ, totum ipsum augeat. Et quamvis vel altera manus, vel cruris, vel membrum aliud vitiosum & inæqualis magnitudinis

remaneat, id naturæ imbecillitati, vel alimenti necessarii inopiæ tribuendum est. Ergo proprium est incrementi, quod singulæ partes cuiusque corporis, ad perfectam & constitutam illi à natura magnitudinem crescunt; id quod in animalium, & corporum aliorum, præsertim inanimatorum, ac vi suâ crescentium incremento cernere licebit. Eò fit, ut generationem incrementum necessarium sequatur, quemadmodum & essentia magnitudinem. Si enim quid generetur, congrua illud magnitudine præditum esse oportet, ac vice versa, si quid magnitudinem est congruam adeptum, generatum quoque fuisse sequitur. Quia etiam incrementum motus est ad magnitudinem, imperfectus itidem est, quando illam nondum est adeptus: ea siquidem adepta, quiescit in magnitudinis suæ perfectione. Et quoniam augeri nihil potest, nisi corporea fiat aliqua accessio singularum totius partium, materiam quidem ut alimentum illius accessionis subijci necesse est. Eadem autem ex quatuor elementorum qualitatibus sumitur: quæ cum mixta corpora construunt, idque beneficio generationis, nullo modo id efficere, nisi fiat etiam generatæ rei incrementum, possunt. Sed hæc de re uberiùs in sequentibus: nunc motus formas propositas persequamur. Incremento
contra-

contrarium est decrementum, id est, partium magnitudine necessaria præditarum abcessio. Idem enim fit, cum è propria corporis mole aliquid abcedit, & imminuitur: ut si è magnitudine bipedali, decessione partium subiecti eiusdem facta, magnitudo unius pedis fiat. Necesse est autem, ut idem subiectum maneat in decremento, nec ut quicquam præter magnitudinem mutetur, alioqui interitus existeret, potius quàm decrementum. Unde tribus de causis potissimum fieri decrementum potest: vel subtractatione magnitudinis ex aliqua parte subiecti, ut in alicujus membri atrophiam: quod per defluxum alimenti congruentis imminuitur: vel partium constrictione, ut in sensibus, quibus siccitate caro constringitur, & induratur: vel abscissione: ut in arbore, cui ramus abcinditur. Quapropter quæcunque incremento conveniunt, eadem contraria ratione decremento: & ut illud motus est ad magnitudinem perfectam assequendam, ita hoc motus ad imminutionem eiusdem magnitudinis. Atque ut illud generationem sequitur, ita hoc interitum. Neque enim decrementum fieri partis alicuius potest, sine aliqua eius vel minima demolitione. Postrema est alteratio, quam motum à qualitate una in sensum cadente in eiusmodi qualitatem aliam,

codem manente subiecto, possumus definire. Ut cum, ex candore, nigroreth: ex frigore, calefactionem: ex morbo, valetudinem: corpus assequitur. Eadem à cæteris motus formis hoc differt, quòd ortus, & interitus ad rei essentiam referantur: incrementum, ac decrementum ad magnitudinem: ipsa verò duntaxat ad qualitatem aliquam sensilem. Diximus ex Aristotelis, ac Platonis (qui eadem, sed breviter attigit) sententia quid mixtio esset, ac genera motus ad corporum vel mixtionem, vel dissolutionem pertinentia complexi sumus: restat, ut quomodò res misceantur, eaquæ ipsa in illis genera motus cernantur, doceamus: Si quidem eum ordinem hac in re sequi necesse est, ut initio altius repetito, elementorum, atque adeò qualitatum omnium genera, naturas, ac formas complectamur, non ut priorem de illorum natura tractationem inculcemus. Quibus sic explicatis, causas efficientes, ac formales mixtionis subiungemus, easque traditæ materiæ accommodabimus. Postremò mixtionis effectus, ac naturas jã productas describemus. Ordo hic & Aristoteli in libris de ortu & interitu propositus, & Platoni in Timæo fuisse videtur, à nobisq; hic, tâquã rationi congruentissimus & mundanæ effectiõni à Mose traditæ maximè consensuens observabitur.

DE QUALITATIBUS OMNI-
BUS ELEMENTORVM, AC EA-
RYM VI, ET COPVLA.

Cap. IX.

QUATVOR primas qualitates, quæ ele-
menta, resque omnes alias constituent
in superioribus retulimus, nimirum calo-
rem, frigiditatem, humiditatem, siccitatem.
Has incorporeas esse, imò nihil aliud, quàm
accidentia quædam naturalia perspicuum
est, quoniam binæ singulis elementis insunt,
quæ si corporeæ forent inesse nullo pacto iis
possent, per axioma. 3. libri primi. Earundem
ipsarum diversæ vires sunt, ut caloris fovere,
& calefacere, res eiusdem formæ connecte-
re, diversæ verò segregare, extenuare, rare-
facere, coquere, dissolvere, aperire, attrahe-
re, laxare, fundere, urere, siccare: Frigoris
constringere, congelare, refrigerare, obstrue-
re, condensare, stuporem addere, gravare,
inurere, & siccare, sed accidentariò: Humi-
ditatis, ægrè retineri in suo termino, diffllue-
re, alere, conglutinare, rarefacere, emollire:
Siccitatis, constringere, indurare, desiccare,
retinere. Proprietates hæ omnes, atque aliæ
huiusmodi singulis insunt qualitatibus, quæ
mixtorum naturas efficiunt diversas. Has

ipsas secundæ aliæ comitantur, ut gravitas, levitas, duricies, mollicies, raritas, densitas, asperitas, ariditas, subtilitas, crassities. Grave Plato definivit, quod ægrè à suo loco dimoveretur, sive quod cum pluribus partibus eiusdem generis constet, difficile distrahitur, ut terra, quæ crassa cum sit, sponte quiescit. Contra verò leve id, quod paucis partibus constat, ideoque minimo negotio movetur, ut aër, qui tenuis existens facile agitatur. Nec enim ille putat è loci intervallis, gravitatis ac densitatis definitiones petendas, cum cœlum sit rotundum, ac nihil in eo nisi relatione quadam verè superum, aut inferum dicatur. Quapropter eiusmodi relationem locorum ad constituendas gravitatis, ac levitatis definitiones satis esse negat. Ab huiusmodi sententia Aristoteles omnino dissentiens leve id esse inquit, quod sursum feratur: grave, quod deorsum. Sed si veram eorum sententiam spectemus, uterque nihil sursum, ac deorsum in cœlo, nisi relatione quadam esse putavit, in eo tamen discrepat, quod alter à loci mutatione petendam gravitatis, ac levitatis definitionem existimavit, alter ab essentia rei levis, aut gravis. Quæ mihi sententia multò magis probatur, cum nihil sursum ferri possit, ni paucis è materiæ partibus constet, nihilque deorsum, nisi è multis nimium
que

que concretis. Quocirca si motus essentiam semper sequitur, neque hæc illum, ex subiecti quidem concretionē vel magna, vel parva ejus gravitas, aut levitas dignoscenda est, non ex motu, qui eam potius consequitur. Verum hac de re nos in commentariis nostris uberius. Porro Durum id est, ut Plato, & Aristoteles definit, cui tactus cedit: Molle, quod cedit tactui: harum enim qualitarum iudex est tactus, ac per illum defini eæ debent. Rarum est, quod partes suas habet diffusas, contextas tamen inter se, ut aqua. Densum, quod constrictas, ut lapis. Asperum est, quod tactum, dum contingitur, offendit, ut pumex. Aridum, quod minimo humore constat, ut arena. Subtile, quod tenuis est naturæ, ut in aëre spiritus seu flatus. Crassum quod naturæ est hebetioris, ut terræ soliditas. Arqui secundæ hæc qualitates, uti supra dixi, ita primas consequuntur, ut ab ijs nascantur, ut à calore levitas, subtilitas, raritas: ab humore mollicies, raritas, crassities: à siccitate asperitas, durities, ariditas: à frigiditate densitudo, gravitas, crassities. Verum hæc quoque pro subiecti constitutione, naturæque variâ connectuntur: sæpe enim alijs de causis aliæ nascuntur ut in singulis ferè rebus videre est. Accedit his aliud qualitarum quoddam genus, quod nec in motu, nec tactu

tactu positum, sed in virtute, ac facultate est, ut in pipere vis calefaciendi, in dulcibus facultas alendi, in magnete vis attrahendi. Breviser propriæ cujusque rei facultates à natura ei insitæ qualitates etiam dicuntur. Quorum, quoniam hîc certam rationem reddere non licet, à medicis cognitio petenda est. Omnes præterea qualitates, quas retulimus, inter se quandam proportionem habent, eandem nimirum quam elementa. Quædam enim habent vim agendi, sed planè inter se contrariam, ut calor, & frigus: quorum effectus contrarij sunt: aliæ vim patiendi, ut humor & siccitas: quæ contraria item sunt. Ex his aliæ inter se rectè cohærent, ut calor, & humor, aut frigus, & humor, siccitas, & calor, frigus & siccitas; aliæ prorsus sibi adversantur, ut calor & frigus, humor & siccitas. Quapropter quæ inter se cohærent, tanquam proportionem quâdam simul connecti possunt, ut calor, & siccitas in igne, frigus & humor in aqua: calor & humor in aëre, frigus ac siccitas in terra. Quæ verò sibi mutuò adversantur non modò connecti nequeunt, sed etiam repugnantia mutua ac mutationis causæ sunt, ut calor & frigus, humor & siccitas. Eò fit, ut unumquodque elementum, cum duabus constet qualitatibus, inter se cohærentibus, alteram in extremo

tremo habeat, alteram mediocriter, ut ignis summè calidus est, terra sicca, aër humidus, aqua frigida. His ita in universum statutis, ad mixtionis tractationem veniamus. Quoniam omnia corpora, aut simplicia sunt, ut elementa, aut concreta, ut reliqua, nihil ex elementis non esse concretum necesse est: sunt enim illa quasi semina horum omnium. Ipsa verò elementa, ut aliquid efficiant, medio inter se aliquo debent connecti, quod Plato in Timæo proportionem, nos hîc qualitarum aptam conuenientiam cum Aristotele (quod ferè idem est) appellamus. Eadem autem proportio seu conuenientia qualitarum inter se, ita debet esse ad mixtionem adaptata, ut quasi materia jam præparata, facilè elementa misceantur, & coalescant. Cujusmodi autem illa proportio sit, seu quibus, aut quot ex partibus constet, ratione humanâ explicari non potest. Neque enim quis dicet, quot partes caloris, humoris, siccitatis, ac frigiditatis, ad efficiendum hominis corpus coaluerint, nec qua illæ inter se ratione sint connexæ. Illud tantum asserere possumus, omnium qualitarum congruentem proportionem necessariam esse, ut commodè possit aliquid fieri, id est, ut agentes vi suâ qualitates concordî unioni patientes complectantur, hæque se illis aptâ ratione adiun-

adiungant. Necesse enim est, ea, quæ sunt miscenda, æquabili temperatione inter se contineri, ne si quid excellat, universam copulam dissipet: ex quo interitus, mutationesque rerum fiant. Ut si calor in corpore humorem, aut frigus exsuperet, illum sibi ipsi similem reddere conatus compagem omnem dissolveret. Nec verò eam existimes qualitatum æquabilitatem postulari, quæ partes earum æquales faciat, sic enim omnia eiusdem essent naturæ, cum eadem constarent temperie: sed quæ proportionis æquabilitatem in illis servet, nihilominus tamen vel calor, vel humor, vel alia quædam qualitas excellere, sed moderatè, poterit, quæ diversam temperationem in subiecto efficiat. Veluti in homine etiamsi aut calor, aut frigus excellat, indeque calidior, frigidiorve illius natura existat, ille tamen excessus communem aliarum qualitatum æquabilitatem labefactare nequit. Cum igitur apta, & æquabilis rei efficiendæ qualitatum subest proportio, tum demum perfectè mixtio fieri potest. Hanc autem, uti dixi, æquabilitatem solus rerum artifex Deus novit, nec eam nos certa ratione possumus præscribere. Idem ergo, ut Galenus præclare docet, cum solus mixturem perfectam possit efficere, materiam quasi subiectum assumit, (ad res inquam efficiendas,

ciendas, post primum mundi ortum) huic-
 que dum formam addit, qualitarum quoque
 debitam addit proportionem: siquidem qua-
 litates rei formam necessario consequuntur.
 Itaque Deus, tanquam prima causa, & mate-
 riam præparat, & qualitarum aptam conve-
 nientiam formæ rei adhibet, sicque rerum
 omnium essentias producit. Quam autem
 nos hîc mixtionis, quæ obscura est, ac diffici-
 lis cognitu, rationem reddimus, veritati ea
 maximè congruit: cùm enim per hypothe-
 sim. i. inter ea, quæ agunt, & patiuntur, gene-
 ris convenientiâ intercedere debeat, quali-
 tarum quoque cohærentium, ac repugnan-
 tium colligantia ponenda est aliqua. Neque
 enim ex aëre, & ligno quicquam naturale
 ædetur, neque ex statua, & ferro, sed ex qua-
 litatibus inter se aptè cohærentibus: quæ
 quia genere inter se congruere dicuntur: qua-
 tenus qualitates sunt omnes, inter ea, quæ a-
 gunt, & patiuntur generis convenientiam,
 poni necesse est, quando in humorem & sic-
 citatem calor, & frigus convenienter agere
 debent. Præterea quoniam inter agentem,
 ac patientem proportio debet subesse, per
 hypothesin 2. congruentem quoque quali-
 tarum proportionem postulamus. Imò sino
 hac nihil commodè fieri posse censemus.
 Itemq; quando qualitates per hypothesin 5.
 aut

aut agendi, aut patiendi vim habent, earundem, alias vi suâ agere dicimus, ut calorem, & frigus, alias pati, ut humorem, ac siccitatem. Quæ cum ita sint, commodè à nobis materia, tanquam commune subiectum, statuitur: tum qualitarum elementorum congruens æquabilitas, quasi formæ essentialis comes additur: forma verò ipsa, ut causa finalis mixtionis adijcitur. Huius demum mixtionis efficientem causam esse Deum, ac naturam asserimus: illum, ut primam, hanc ut secundam & ab illo commotam. Sed nos, ut exactiùs rerum mixtio intelligatur, rationem ejusdem accuratiùs reddamus, omisâ illâ primâ causâ, quæ omnia imprimis efficit, & administrat, doceamùsque potius, quo pacto in rerum singularum effectione, eadem ratio cernatur.

DE MIXTIONIS RATIONE, ATQVE VSV.

Cap. X.

PRINCIPID in rerum omnium effectione agens aliquid esse dubium non est, cum nihil à seipso fieri possit per axioma 9. libri primi. Quod si verò est quicquam efficiens, & esse quod ab illo patiatur necesse est, cum hoc illius relatione dicatur per hypothesin 7.

thesin 7. Hoc statuto, cum nunquam natura sit oriosa, quin semper aliquid agat, aut immutet, perpetuaque sit rerum generatio, & interitus, eandem quidem generationem non fieri sine certa quadam ratione putamus. Idcirco vim primam agendi, à Deo tamen acceptam, naturæ tribuimus, hujusque impulsu cum elementis, seu qualitatibus primis communicatam aliam, quæ in singulis agat subiectis. Ideò fit, ut ad omnem rerum mixturem, dissipationemve ipsas qualitates, tanquam formæ comites, & in primam materiam quodammodò agentes statuamus. Vis autem illarum in subiecto ædita actio nominatur, quæ nihil aliud est, quam assimilatio quædam qualitatibus patiendi, à qualitate, vi sua, agente in subiecto ædita. Ut cum calor humorem inflamat, aut frigus eundem condensat. Cum enim per 4. hypothesis agentis finis sit, simile sibi reddere id, quod patitur, si calor aut frigus in alterutram qualitatem patientum agat, similem naturæ suæ effectum proferre conatur. Itaque ut calor incendit, ac urit, ita humor ab eo inflammatus, idem in se habet. Ut frigus constringit, & densat, ita humor ab eo densatus, constringensque vim eam in sese recipit. Ipsa verò hæc actio diversas formas ædit pro fine efficientis. Nam si essentia aliqua producat,

L

gene-

generatio dicitur: si intereat, corruptio: si
 augeatur, incrementum: si minuat, decre-
 mentum: si quodammodo afficiatur, altera-
 tio. Quamobrem hæc quinque motus ge-
 nera, a nobis supra relata, actionis illius, ab
 agente excitatæ, motus sunt, quos ciet illa,
 dum agit. Iam vero passionem, quæ in se
 actionem recipit, vocamus illud ipsum, quod
 ab agente movetur, ac sibi assumulatur, cu-
 iusmodi est res subiecta, quæ aut oritur, aut
 interit, aut augetur, aut minuitur, aut altera-
 tur. Ipsam autem actionem ab hac in se re-
 cepta passione ita nominamus, quod accipiat
 ab agente vim factam. Quo nomine actio-
 nem ad agentem causam referri necesse est,
 quasi ad proprium illius effectum passionem
 ad materiam veluti eiusdem propriam: illa
 demum quinque motuum genera tanquam
 media utriusque ponenda sunt, quibus ad
 formam rei, vel ad privationem perveniat.
 Quinetiam cum nihil fieri possit, quin agen-
 tis, & patientis commoda fiat applicatio per
 3. hypothefin, agentem causam sic volumus
 patienti coniungi, ut vi suâ illa hanc moveat,
 & ad sui formam convertat. Si enim ab hu-
 more calorem, aut frigiditatem separemus
 nequaquam hæc agere poterunt, cum utriu-
 que, agentis nimirum, & patientis applicatio
 non fiat. Atque hoc in rerum corporearum

effectum ita intellige: nam in corporis ex-
 pertibus necessarium id non est, cum Deus
 nullo eiusmodi contactu indigeat, prater-
 quam natu, & vi sua omnipotenti. Ergo, ut
 rem paucis complectar, cum prima materia
 subleitur, formaque ab agente inducenda
 congruenti qualitatibus ad quabilitatem adijun-
 eta est, ipsaque efficiens causa se commodè
 materiam adiungit, ita ut eam aptè quasi con-
 tingere possit, cum demum unius actio pas-
 sioque alterius commodè sit, & ab utraque
 motuum illorum quinque aliquo modo,
 tanquam medio, vel forma rei efficitur, ac
 tum mixtio dicitur, vel privatio, ac tum dis-
 sipatio nominatur. Hunc modum facilius
 propositio exemplo in ligno, quod uritur, sic
 explicabimus. Statuatur imprimis ignis, tan-
 quam efficiens causa, vi sua: tum subiiciatur
 commodè materia subiecta, id est, lignum,
 ita ut contactus utriusque fieri possit. Ipse
 quidem ignis, ob agendi vim naturalem, id
 quasi expectere videtur, ut lignum sibi assi-
 miles, id est, ut in hoc vim illam suam expec-
 teat. Ad hoc autem efficiendum motu ali-
 quo eorum, quos proposuimus, quasi medio
 utitur, id est, penetrat, & commovet solidas
 quasque ligni partes, exhausto eo humore,
 qui illas antea constingebat: tum eas pla-
 ne inflammatur, & in prunas convertit: demum
 efficitur

humore omni consumpto, priorem illam formam ligni in cineris formam commutat: in qua caloris, & siccitatis vim, tanquam propriæ virtutis effectum relinquit. Atque in fieri rerum omnium dissipationem existimamus. Porro mixtio hoc modo fit. Exempli gratia, sit arbor è semine generanda, semen quidem ipsum est, tanquam illius materia, agens verò causa eidem insita est natura: finis, quem hæc expetit, arborem huius, vel illius speciei producere. Ut autem efficiens id commodè possit agere, materiam, sive semen sibi applicat, dum illi inhaeret, & quasi incumbit, tum motuum serè omnium formis, veluti medio instrumento utitur, id est, primò alterat semen illud, tum deleta illius forma priori, arbusculi exigui, ac teneri forma assumitur: atque ita fit ortus ex alterius interitu. Deinde arbusculum, sumpto è terra alimento, paulatim augetur, dum singulæ illius partes conveniens capiunt alimentum. Ipsum verò alimentum è quatuor constat qualitatibus primis, quas interna natura arbusculi sibi applicans, in suam convertit substantiam, quousque ad perfectam arboris magnitudinem, ac formam pervenerit. In vicissitudine quadam contraria consensescere, alterari, & imminui incipit, ac demum interitum decidit. Hanc, uti sæpe dixi mi-

tionem

tionis formam in rebus naturalibus fieri ratione quadam cogitamus, & ad eam has motus species, ortum, incrementum, & alterationem referimus: contrariam autem illius dissolutionem, seu dissipationem, eadem quoque ratione, sed contrariis ex causis fieri iudicamus: ideoque ad ipsam hos motus, interitum, ac decrementum redigimus. Communem verò utrique motum accommodamus alterationem, quæ tam ad mixtionem, quam ad dissolutionem subiecti cuiusquam necessaria est. Hæc igitur hætenus de universæ mixtionis, ac dissolutionis rerum omnium ratione dicta sint: nunc, quoniam à quibusdam obijci hoc loco multa solent, ea breviter diluenda sunt. Primum enim quo pacto in mixtis corporibus elementa insint, inquirunt; num essentia, an virtute potius? Tum an aliquid possit omnino aut oriri, aut interire, sine aliquo subiecto? Item num iste rerum ortus perpetuus sit, an finitus? Deinde, num quatuor primæ qualitates in mixto coherere possint, cum contrariæ inter se sint? Postremò, an quacunque ex re gigni quicquam possit. Primæ quidem obiectioni quid hoc loco respondeamus, laborare minimè oportet, cum antè elementa virtute in subiecto, non actu inesse docuerimus. Secundò, ex subiecto fieri omnia necessario con-

sendimus, per axioma primum, libri primi, excerpta Dei providentia, quæ cuncta ex nihilo efficere potest. Tertiò hunc rerum ordinem & intentum perpetuum esse negamus, tametsi Plato, & Aristoteles, ut mundi æternitatem tueantur, contra sentiant. Nam si mundus demolitioni, uti antè docuimus, obnoxius est, relinquitur necessariò hanc vim ortus & interitus aliquando finem habiturum. Quarto qualitates, quæ sunt inter se se contrariæ, ita posse in subiecto coherere docimus, ut binæ inter se maximè contrariæ à binis mediis colligentur, & æquabilitas omnium servetur, quemadmodum suprà explicavimus. Demum ex quavis re quicquam fieri negamus, cum omnia ex similibus procreentur per 4. axioma, & à contrarijs dissipentur. Quæ autem his addi solent, unde nam rerum tanta diversitas proveniat, & an idem semel dissolutum restitui possit iterum, atque unde inter se tam facile quædam commutentur, ac nunquid necessariò interitum unus generatio alterius sequatur, difficilia explicatu non sunt, imò à nobis maxima ex parte, in superioribus declarata. Tantam etenim formarum diversarum varietatem, quantam cæli virtuti Aristoteles tribuit, qui verius, quam Deo, in quo rerum omnium ideæ sunt, cum Platone attribuimus, qui cum

in mundi exortu singulis rebus formam speciei suae indiderit, eam ipsa à natura hac adiutæ retinent, actuentur, ut quamvis multorum individuorum formæ pereant, tota tamen species conservetur. Præterea easdem res, quæ perierint, restitui posse natura minime patitur, cum ex eo, quod esse jam desijt, nihil planè fiat per I. axioma libri primi: tamen si nihil Dei providentiæ denegatum esse tenendum est semper. Iam aliqua inter se tam facile commutari mirum non est, si naturalium rerum quarundam similitudinem consideremus. Nam si aer in ignem, aut in aerem aqua convertitur, id similitudo qualitarum, quibus ea constant, efficit. Necesse nam verò esse hanc ortus & interitus consecutionem, nemo est, qui neget, ne si unquam intermittatur, ad interitum omnia ruerent, nève contra perpetuam essentiae suae stabilitatem, habere cuncta dicamus, id quod fieri secus videmus. Et quanquam mundus exitum aliquando sit habiturus, interim tamen continua hæc rerum generatio, & interitus, nunquam intermittitur, ut nunc etiam videlicet. Exposuimus hæcenus breviter universam orbis naturam, figuram, durationem, partes, motus, ac formas singulares, tum elementorum, ac qualitarum omnium naturas, & concretiones, deinde universam rerum

L 4

mixtio-

tendimus, per axioma primum, libri primi, excerpta Dei providentia, quæ cuncta ex nihilo efficere potest. Tertiò hunc rerum ortum & interitum perpetuum esse negamus, tametsi Plato, & Aristoteles, ut mundi æternitatem tueantur, contra sentiant. Nam si mundus demolitioni, uti antè docuimus, obnoxius est, relinquitur necessario hanc vim ortus & interitus aliquando finem habiturum. Quarto qualitates, quæ sunt inter se contrariæ, ita posse in subiecto coherere dicimus, ut binæ inter se maximè contrariæ à binis mediis colligentur, & æquabilitas omnium servetur, quemadmodum supra explicavimus. Demum ex quavis re quicquam fieri negamus, cum omnia ex similibus procreentur per 4. axioma, & à contrarijs dispendantur. Quæ autem his addi solent, unde nam rerum tanta diversitas proveniat, & an idem semel dissolutum restitui possit iterum, atque unde inter se tam facile quædam commutentur, ac nunquid necessario interitum unus generatio alterius sequatur, difficulta explicatu non sunt, imò à nobis maxima ex parte, in superioribus declarata. Tantum etenim formarum diversarum varietatem, quantam cæli virtuti Aristoteles tribuit, qui verius, quam Deo, in quo rerum omniū idææ sunt, cum Platone attribuemus? qui cum

in mundi exortu singulis rebus formam speciei suae indiderit, eam ipsae à natura hac adiutae retinent, ac tumentur, ut quamvis multorum individuorum formae pereant, tota tamen species conservetur. Præterea easdem res, quae perierint, restitui posse natura minime patitur, cum ex eo, quod esse jam desijt, nihil planè fiat per 1. axioma libri primi: tamen si nihil Dei providentiae denegatum esse tenendum est semper. Iam aliqua inter se tam facile commutari mirum non est, si naturalium rerum quarundam similitudinem consideremus. Nam si aer in ignem, aut in aerem aqua convertitur, id similitudo qualitarum, quibus ea constant, efficit. Necessariam verò esse hanc ortus & interitus consecutionem, nemo est, qui neget, ne si unquam intermittatur, ad interitum omnia ruerent, nève contra perpetuam essentiae suae stabilitatem, habere cuncta dicamus, id quod fieri secus videmus. Et quanquam mundus exitium aliquando sit habiturus, interim tamen continua hæc rerum generatio, & interitus, nunquam intermittitur, ut nunc etiam videre licet. Exposuimus hæcenus breviter universam orbis naturam, figuram, durationem, partes, motus, ac formas singulares, tum elementorum, ac qualitarum omnium naturas, & concretiones, deinde universam rerum

L 4 mixtio-

mixturem, quemadmodum omnia fiant,
aut intereant: nunc antequam has causas
communes rebus singularibus accommode-
mus, breviter è Christiana religione quid
sit tenendum in hac parte de mixture, dis-
solutioneque rerum, ac elementis videamus:
tum usum, methodumque expositæ ratio-
nis, ut supra fecimus, explicabimus. Quatuor
esse elementa iis in locis, in quibus sunt, ijs-
que viribus prædita, quibus constant, è reli-
gionis nostræ sententiâ, supra confirmavi-
mus: nunc eorum mixturem ad primæ cau-
sæ, siue ad Dei providentiam referre oportet,
cùm is cuncta non solum nutu suo guber-
net, sed gignat etiam, ac foveat, quamvis per
se eadem ipsa vigere videantur. Sed ita pro-
fectò se res habet, ut illa etiam per se sponte
vigeant, & alantur à natura ipsa, id est, à vi
illa sibi à Deo tributa, quam nos naturam,
cum Philosophis, commodè nominare pos-
sumus. Hanc iis verbis Moseos de mundi
origine loquentis licet confirmare. Dixit-
que Deus, producant aquæ reptile animæ
viventis. Quod quidem imperium, Dei que
præceptum non in aquis modò, sed in alijs
quoque, quibus est simile quiddam præce-
ptum, naturam esse illam intimam, ac vim
ipsorum censendum est. Quæ concepta, om-
nia pulchrè fiunt, ac vigent, impartiente ta-
men

men adhuc illis vim suam Deo , sine quo cuncta perirent. Nam si in eo vivimus , & movemur omnes , ergo summotâ illius vi, cuncta corruerent , ac prolaberentur. Hoc igitur primùm statuto, qualitates primas cujusquam mixtionis corporeæ, morticeas causas appellare non decet , cùm eæ potius à natura moveantur ; Sed instrumenta, & adjuvantia causarum , quæ rei formam consequantur. Mixtionis verò modum, ac dissipationis , quem in rebus cogitamus , rectè etiam cum superioribus cohærere posse dicimus, communi rerum experimento credentes : ita tamen , ut idem potissimùm Dei vi fiat, & cælorum mortice facultate adiuvetur, ac promoveatur , ipsaque illa generatio , & corruptio æterna non sit , cùm nec mundus sit æternus , sed eiusdem cum illo durationis. His tanquam certò statutis, reliqua mixtionis ratio ex Aristotelis (nam Plato ferè ne verbum quidem ea de re fecit) sententia percommode tenenda esse videtur , præsertim cùm experimento explorata, comprobataque sit. Addamus his quoque brevem universæ tractationis de cælo , & elementis, communique rerum mixtione methodum quasi perorationem , in qua , & superiora omnia decreta paucis colligantur, & eorum usus in aliqua quæstione , uti in libro primo

mixturem, quemadmodum omnia fiunt,
aut intrent: nunc antequam has causas
communes rebus singularibus accommode-
mus, breviter è Christiana religione quid
sit tenendum in hac parte de mixture, dis-
solutioneque rerum, ac elementis videamus:
tum usum, methodumque expositæ ratio-
nis, ut suprâ fecimus, explicabimus. Quatuor
esse elementa iis in locis, in quibus sunt, ijs-
que viribus prædita, quibus constant, è reli-
gionis nostræ sententia, suprâ confirmavi-
mus: nunc eorum mixturem ad primæ cau-
sæ, sive ad Dei providentiam referre oportet,
cùm is cuncta non solum nutu suo guber-
net, sed gignat etiam, ac foveat, quamvis per
se eadem ipsa vigere videantur. Sed ita pro-
fectò se res habet, ut illa etiam per se sponte
vigeant, & alantur à natura ipsa, id est, à vi
illa sibi à Deo tributa, quam nos naturam,
cum Philosophis, commodè nominare pos-
sumus. Hanc iis verbis Moyses de mundi
origine loquentis licet confirmare. Dixit-
que Deus, producant aquæ reptile animæ
viventis. Quod quidem imperium, Dei que
præceptum non in aquis modò, sed in alijs
quoque, quibus est simile quiddam præce-
ptum, naturam esse illam intimam, ac vim
ipsorum censendum est. Qua concepta, om-
nia pulchrè fiunt, ac vigent, impartiente ta-
men

men adhuc illis vim suam Deo , sine quo cuncta perirent. Nam si in eo vivimus , & movemur omnes , ergo summotâ illius vi, cuncta corruerent , ac prolaberentur. Hoc igitur primùm statuto, qualitates primas cujusquam mixtionis corporeæ, morrices causas appellare non decet , cùm eæ potius à natura moveantur ; Sed instrumenta, & adjuvantia causarum , quæ rei formam consequantur. Mixtionis verò modum, ac dissipationis , quem in rebus cogitamus , rectè etiam cum superioribus coherere posse dicimus, communi rerum experimento credentes : ita tamen , ut idem potissimùm Dei vi fiat, & cælorum morrice facultate adiuvetur, ac promoveatur , ipsaque illa generatio , & corruptio æterna non sit , cùm nec mundus sit æternus , sed eiusdem cum illo durationis. His tanquam certò statutis, reliqua mixtionis ratio ex Aristotelis (nam Plato ferè ne verbum quidem ea de re fecit) sententia percommodè tenenda esse videtur , præsertim cùm experimento explorata, comprobataque sit. Addamus his quoque brevem universæ tractationis de cælo , & elementis, communique rerum mixtione methodum quasi perorationem , in qua , & superiora omnia decreta paucis colligantur, & eorum usus in aliqua quæstione , uti in libro primo

fecimus, explicetur. Dixi mundum universum unum esse, finitum, corporeum, ab aliquo temporis principatu exortum, & interitarum, ac rotundum. Huius duas partes fecimus, unam cœlestem, alteram illi subiectā quam elementarē vulgō appellant. Illam in octo cœlos distribuimus, sese mutuo complectentes: Lunam, Solem, Mercurium, Venerem, Martem, Iovem, Saturnum, & primum mobile. Quibus omnibus duplicem motum tribuimus, unum communem, ac raptum, qui singulis fiat diebus, alterum proprium singulorum: Hanc porro in partes quatuor divisimus, ignem, aërem, aquam, & terram, quæ communi voce elementa nominantur. Horum, atque omnium corporum, quatuor primas qualitates posuimus, calorem, frigiditatem, humorem, & siccitatem. Ex quibus consentientibus corpora omnia coalescant in materia prima, & misceantur, dissentientibus, dissipentur. Quæ omnia cum sparsim à nobis suprà dicta sint, propositā quæstione aliquā, iterum in memoriam revocentur. Exempli gratia ponatur hæc quæstio: cur aqua marinā stirpes ali non possint, ejusdemque solutio sit ab efficiēti causa petita, quod siccitas nimirum nec ali, nec foveri stirpem permittat. Id quo pacto ita fiat, consideremus. In primis stirpes esse qua-

quatuor qualitatibus præditas, sicuti corpora omnia, manifestum est: tum ipsæ ex axioma 4. simili qualitarum concretionem ali debent, cum à contrariis nihil alatur. Præterea stirpium naturam humidam esse maxima ex parte constat, ut postea suo loco docebimus. Itaque cum aqua marina summo pere sit salsa, & salugo nimium exsiccet, ac constringat, fit, ut humida stirpis natura, quæ humectum alimentum postulat, dum sicco sustentatur, exsiccet, & arescat, cum à contrariis omnia intereant per 3. axioma. Quod autem eiusmodi natura sint stirpes, cognita earum effectione, intelligitur. Omnia corpora mixta tamen quatuor constant qualitatibus, una tamen aliqua excellunt potissimum, ut quadrupedia calore, humiditate stirpes, frigiditate pisces, siccitate lapides. Stirpes autem ita sunt à natura comparatæ, ut humore, tanquam materia maxime alantur, calore nimirum illum fovente, & animante, siccitateque moderata consolidentur, ac indurentur, roborentur demum frigiditate, ut partes humoris accedentis quasi coagulentur, & in corporis molem per partes adhærescant. Huiusmodi verò qualitarum accessio moderata, & naturæ stirpis congruens esse debet (alióqui ipsa periret) tum in materiam eiusdem fit, & ab interna natu-

natura, siue anima à Deo illi tributa, quasi accersitur, & attrahitur, ob eum videlicet finem, ut ad perfectam naturalis suæ formæ magnitudinem stirps perveniat. Hæc autem accessio mixtione quadam, partium illi adhzrentium, fieri debet, uti decessio etiam dissipatione earundem fit. Eadem per motum aliquem, tanquam medium efficitur: primò nimirum alteratione, dum singulæ partes stirpis mutantur, dumque accedens alimentum capiunt: tum generatione quadam partium earundem, quæ augentur: tum incremento, dum illæ paulatim augentur materiæ consentaneæ accessione. Atque hoc modo stirpes, postquam crescere cœperint, adolescunt, vel cum insito semine gignuntur: contrà vero senescunt, & intereunt, dum abcessione partium singularum alterantur, minuuntur, ac postremò arescunt. Quòd si autem hanc formam mixtionis, ac dissolutionis in eiusmodi exemplo propositam ad prima principia, & causas libri prioris redigere velis, quid eidem generationi subijciatur considera: tum quæ sit eius causa efficiens, quis finis, quæ forma, quæ motus generæ, incidant, quæ sit essentia, per formam adepta, quæ illius accidentia, quæ partes: atque ita demum ad prima usque principia rem totam reduces. Sed ne nos eadem iterum,

rum, quæ hætenus sunt diffuse pro instituta
brevitate explicata, inculcemus, de his satis
dixisse hæc sit. Nunc ad mistorum causas
reddendas, & effectiorem ostendendam ve-
niamus, quando simplicium initiorum tra-
ctationem, concretio rerum, ex iis facta, pro-
ximè sequitur: atque ex concretis ipsis, quæ
vulgò meteora, nominantur propter
inchoatam concretionis suæ ef-
fectionem, deinceps sint
explicanda.

SEBA.

SEBASTIANI FOXII

MORZILLI HISPALENSIS,

de naturæ Philosophia, seu de

Platonis & Aristotelis

consensione,

LIBER TERTIUS.

Axiomata.

Axiomata.

1. Corpora omnia è quatuor sunt elementis.
2. Nullum corpus est simplex præter elementa.
3. Concreta corpora simplicibus, è quibus fiunt, similia sunt.
4. Quicquid est in mundo aut corpus est, aut incorporeum.
5. Omnia dum intereunt, vires suas magis intendunt, ne pereant.
6. Omne igneum lucidum est.
7. Omne igneum alimento indiget.
8. Omne igneum aspectum ad se attrahit.

Definitiones.

1. Corpus, est quod constat trinâ dimensione, longitudine, latitudine, crassicie.
2. Simplex corpus est, quod materiâ, formâque, ac binis qualitatibus constat.
3. Corpus concretum est, quod materiâ, formâ, & pluribus qualitatibus, quàm duabus constat.
4. Perfectum corpus est, quod naturæ suæ partibus omnibus est absolutum.
5. Imperfectum, quod è paucioribus est.

Hypo-

Hypotheses.

1. Mutato elemento, focus eius mutatur.
2. Ad cœli motum elementa omnia, excepta terrâ, moventur.
3. Perpetuus est elementorum vicissitudo in mixtionibus.
4. Inferior hic mundus cœli viribus subijcitur.
5. Cœli visus calefaciunt.

DE COMMUNIBUS METEORUM CAUSIS, PRIMOQUE DE IGNITIS.

Caput I.

SUPRA communes mixtionis ejusque causas reddidimus, quemadmodum singula è quatuor qualitatibus constarent: nunc ut concretas illas corporibus accommodemus, de iisdem hinc agere incipiamus. Cum enim is ordo naturæ sit, ut simplicia concretis, in effectione quaque priora sint; necesse est, ut in iis simplicibus jam statutis, concretiones corporum omnium mixtorum, deinceps demonstrantur: Quid autem sit corpus, definitione prima statutum est. Idem verò aut simplex est, aut concretum. Simplex per definitionem est, quod forma, materia, ac duabus

bustantum constat qualitatibus, ut elementa. Concretum per tertiam definitionem est, quod præter materiam, & formam, plures habet binis qualitates, ut cætera omnia corpora, præter quatuor elementa. Rursus concreta corpora vel sunt perfectæ concretionis, vel imperfectæ. Perfectæ, per definitionem quartam dicuntur, quæcunque formæ suæ qualitates omnes, ac partes habent perfectè adiunctas: ut animalia, stirpes, metalla, lapides. Imperfectæ denique, per definitionem quintam sunt ea, quibus, vel partium propriarum, vel aliqua qualitatum, quatuor, deest, ut ea, quæ vulgò meteoræ nominantur: de quibus hoc loco, tanquam de mixtis imperfectis dicendum est: nam postea de perfectis disseremus. Meteoron, ut Aristoteles, qui hanc rem accuratissimè tractavit, acceptis à Platone parvis initiis, appellatur id omne, quod in sublimi regione, à quatuor elementis gignitur, sive id in aëre hæreat, sive in terras decidat, modò tamen id cælorum vi producat. Unde hæc *μετεωρον* id est, sublimium rerum à Græcis historia appellatur. Huiusce generis sunt fulgura, tonitrua, pluvia, ros, aliæque, de quibus suo loco diffusè. Horum sublimium, quæ ita communis nomine appellantur, efficiens causa est cælum, cuius motu Plato, & Aristoteles es
 ipsa

ipsa excitari, gigni que volunt: Materia, vapor quidam humidus (qualem è terra summo mane, vel sub noctem è locis palustribus excitari videmus) vel siccus admodum, & calidus, fere que fumi formam habens. Locus autem, in quo illa fiant, aut in aëre, aut in terris statuitur, his enim in regionibus metéora gignuntur. Horum quatuor sunt genera potissima; quæ fiunt ex alterutro illorum duorum vaporum, sub quæ variæ formæ aliæ incidunt. Primum igneorum, secundum aëreorum, tertium aqueorum, quartum terrestrium. Igneorum rursus quædam re verâ existunt, ut virgæ, æges, docæ, corruscatio, fulmina, fulgura, cometæ: alia apparent, ut hiatus, seu Chasma, colores nubium, iris, area, quam *ἀλὼνα* Græci vocant, & parallelia. Ad aëreorum genus, pertinent ventorum generatio, terræmotus, ecnephias, typhon. Ad aqueorum verò fontium, fluminum, marisque origo, pluvia, ros, nix, pruina, grando. Ad terreorum demum, quæcunque è terris defodiuntur, ut metalla, lapides, terræque, ac fossilium rerum variæ species. Quæ omnes, quoniam eadem ex vaporum materia gignuntur, in hunc locum referuntur ab Aristotele, & Platone. Horum ergo sequuti nos sententias, ut singula ordine explicemus, cuiusmodi nam sint vapores ij, quos

M

mate-

materia rerum sublimium esse retulimus, vnde
 deamus: tum singula persequemur. Exhalatio
 communi nomine id dicitur, quod à so-
 lis radijs, quasi fumus quidam excitatur. Ta-
 lem humectis è locis, oriente sole, vel è cali-
 dis, eodem occidente, videmus spirare. Eius-
 dem autem duplicem formam statuit Ari-
 stoteles, unam humectam, & calidam, qua-
 lis è locis humectis sese attollit, quam aquo-
 farum, & aërearum, terrestriumque rerum
 materiam esse ait: alteram siccam, & cali-
 dam, cuiusmodi est ea, quæ ex locis arenti-
 bus in summo solis æstu exhalatur: ex qua
 igneas formas meteoron gigni docet. Vtriuf-
 que generis causa impellens est sol, qui calo-
 re suo è terris, vel aquis eam excitat: mate-
 ria verò terræ humiditas, quæ calore deco-
 cta in aërem evanescit, ac sursum sponte de-
 fertur, propter assumptam, ab illius natura,
 levitatem (mutatâ enim unius elementi na-
 turâ per primam hypothesein, & locus eius-
 dem mutatur.) Itaque eum sol perpetuo suo
 motu terras illustrans, ac splendoris vi tepe-
 faciens, quicquid in ea humectum est, attra-
 hat ob ei insitam agendi vim, idque ad salu-
 rem, & commoditatem rerum multarum, fit,
 ut diversæ rerum formæ ex eiusmodi exha-
 lationibus partim calidis, & humectis, par-
 tim siccis, & calidis, (utriusque enim earum

generis

genus caloris particeps est) producat: quas hoc in libro breviter complectemur sententiam, Aristotelis, Plinij, ac Senecæ, quicam rem copiose tractavêre, sequuti: Nam quæ Plato in Timæo retulit, pauca, & obscura sunt, & à nobis aliàs fusiùs pertractata: quæ tamen hoc loco, cum res postulârit, adducuntur. Tres esse aëris regiones in superiori libro docuimus, unam calidam, quæ igni contigua est: alteram terras ambientem, quæ modò, calida ob solis accessû, modò frigida, ob eius recessum: tertiam utriusque mediam, frigidam. Supremam illam perpetuò calidam esse, nec eam usque, quam habeat, temperationem amittere dubium non est, cum eidem igni sit semper annexa, qui eandem caloris sui formam constantem nunquam deserit. Hanc porrò tertis adiunctam regionem quotidie mutari, experimento compertum jam habemus. Ex quo pater, regionem illam mediam, propter utriusque extremi contrariam oppositionem, quam antiparistasin appellant, esse frigidam, idque eò magis, quò calor partium extremarum acriùs urgeat utrinque, & quasi in medium locum conceptam ab aëre frigiditatem compellat. Id ita esse nubium, nivis, huiusmodique rerum frigidarum concretio declarat: quæ cum nec in hoc aëre nobis propinquo

(qui sæpe calidus etiam tunc est) nec in suprema illa regione calida gigni ullo modo possint, relinquitur necessario esse aliquam mediam regionem frigidam aëris, in qua omnes hæ rerum frigidarum formæ gignantur. Quæ cum ita sint, singulas nunc formas meteorum persequi incipiamus, initio sumpto ab ignitis. Ignitarum rerum omnium una est, eademque materia calida, & sicca exhalatio, quam *αιαθυμίασις* appellat Aristoteles: formæ verò earundem sunt variæ, propter diversam inflammationis rationem, aut materiæ subiectæ dispositionem: aliæ enim minus incensæ sunt, quàm aliæ, aliæque diuturniores aliis, & concitatiores, ut singularum effectiones consideranti perspicuum est. Ipsæ quoque in suprema aëris regione incenduntur: Quæ cum ob ignis vicinitatem siccior, & calidior sit, quamcumque exhalationem incendit, idque varijs modis, quos postmodum persequemur. Exordiamur ergo ab stipulis, quas Aristoteles appellat *πάβδus*, Seneca verò, & Plutarchus virgulas. Eadem autem sunt raræ quædam, ac latè diffusæ flammæ, quæ quasi scintillæ è fornace excitare paulatim accenduntur, serpente in longum igne. Quapropter à forma inflammationis in longum porrecta, & paulatim ignem concipiente, stipulæ nominantur.

Huiusce

Huiusce figuræ causa est exhalatio in longam veluti lineam protensa per aëris regionem, in quam est aduncta: quæ eiusdem omnino figuræ est, cum accenditur, atque antea cum erat intacta. Tales sæpe in æstate, nocte serenâ, calidis in regionibus cernimus, sed quæ brevi tempore durent, exhausto nimirum vapore, qui cœperat afflatu ignis superioris inflammari. Ita enim fit, ut hæ omnes inflammationes vaporum in suprema regione aëris accendantur propter ignis adjecti desuper vim attractricem, & inflammatricem. Atque hoc sanè modo stipularum effectio sese habet. Æges verò, ut verbo Aristotelis utar, quas Seneca capras appellat globi quidam igniti sunt, qui longius, quam latè patentes, paulatim ignescunt, propter exhalationem æqualiter porrectam, & ignem à principio concipientem. Hi tamen initio, quasi globosi sunt, ut Seneca idem ait. Postea in longum, igne serpente, ac sese dilatante, protenduntur. Talem se capræ, seu globi genus vidisse sæpe idem auctor est, ut sub Augusti Cæsaris obitum. Huiusce inflammationis, quemadmodum dixi, in causa est ignis supremam aëris regionem penetrans: formæ effectio vaporum figura diversa. Doci verò, id est, trabes, ut Plinius appellat, latæ quædam, & in longum æqualiter porrectæ in-

flammationes sunt, quæ veluti trabes accenduntur. Tales cum Lacædemonij classe visi sunt, apparuisse idem auctor est Plinius. Coruscatio, quam falcem, seu lampadem Plinius idem nominat, inflammatio est in eiusmodi rei formam accensa, quæ nisi cum in terras cadit, non antè conspicitur. Eam sub Cæsare Germanico coram universo populo Romano gladiatores spectante in meridie visam Plinius refert, ac nos etiam aliquando pueri Compluri sub noctem, quasi inter pedes discurrentem vidimus. Huius duas formas idem auctor statuit, unam earum, quæ faces propriæ dicuntur, quæ longa faciunt vestigia, priore parte ardente, alteram Bolidarum, ut vocant, quæ perpetuò ardent, longiori tracto limite. Ultramque formam Aristoteles lampadum, id est, facium uno nomine comprehendere videtur. Seneca fulgurum: quibus alias quoque formas adiicit. His addit lucernam idem Aristoteles: quæ superiori quidem parte, veluti candela quædam, incensa est, inferiori verò minimè: quoniam materiam sursum per aëra erectam ignis desuper attingit, paulatimque serpendo consumit, quousque omninò ea sit inflammata. Sunt & stellæ transvolantes, ut Seneca vocat, Plinius stellarum discursum, Aristoteles traijcientes stellas. Eædem gignuntur,
cum

cum una, eademque materia accensa aëris
 attritu in duas plurêve partes distrahitur, &
 decurrit: quemadmodum cum aquam ma-
 nibus conprimimus, guttæ per digitos ela-
 buntur, aut nuce contractâ, nuclei exiliunt.
 Itaque cum accensa est illa materies supre-
 ma in regione ignis, & ab ipsius afflatu tacta,
 aërisq; frigidi oppositu constringitur, erum-
 pit per partes, & veluti ab imo igne multæ
 scintillæ, ob inspirationem factam, sic stellu-
 læ multæ fieri, & volare videntur. Ergo ex
 una, eademque materia eadem omnes stel-
 lulæ fiunt, eodemque modo ignis superioris
 attractu incenduntur: variatur tamen inflam-
 mationis forma, propter incurfionem frigidi
 aëris, atque humiditatem exhalationis, cujus
 impulsu ignis conceptus protruditur deor-
 sum, & cadere videtur. Ex eodem esse genere
 binæ illæ stellæ videntur, quas Plinius casto-
 res vocat. Eadem enim magnis tempestati-
 bus mari in antennis navium, partibûsve
 alijs quasi igniculi quidam, aut accensi cerei
 transvolantes conspiciuntur: quæ sine dubio
 ex stellarum trajicientium numero, quæ in ea
 loca deciderint, ut sæpe fit, eodem auctore,
 censendæ sunt. Quamvis eò, quòd prope ter-
 ras gignuntur, aut propè maria, & in aëre
 proximo, è crassa, humidaque exhalatione,
 quæ tempestatis vi est accensa, oriri videntur.

tur. Atque hæc omnes ignitarum exhalationum formæ, de quibus hæcenus diximus, quæque frequenter cerni possunt diversarum figurarum, unam habent originis suæ causam, & materiam; Siquidem omnes in suprema aëris regione gignuntur, attractu ignis superioris, non quidem eo discendentis, cum semper ipse sublime petat, sed cœli motu aërem rarefactum inflammantris. Et quanquam aliæ diversæ formæ cerni ignium soleant, ad hanc, de qua diximus, causam inflammationis referendæ sunt.

DE FULMINIBUS, FULGURIBUS, FULGETRIS, TONITRUIS, COMETIS.

Caput II.

FULMINA, fulgura, seu fulgurationes, ut Seneca vocat, eandem habent generationis causam, imò sese mutuo sepe consequuntur. Nam cum exhalatio arida, & crassa est, calida tamen, & densa, eaque in aëris mediâ regione positâ (eo enim in locò hæc omnia gigni videntur) si densa aliqua, & frigida nube undique constringatur, ipsa calore interno reluctante, ac frigori resistente, magis inflammatur, adeò ut nubem magno ædito fragore perumpat, & in tetras devoluatur.

Mutua

Mutua enim illa caloris conclusi, ac frigoris constringentis pugna maiorem efficit inflammationem, natura vires assumente, ne res pereat per quintum axioma: & perturbata nube, fragor ille terribilis æditur. Quemadmodum si candelæ ardenti aquam suffundas, calor sese frigidati opponens augetur, & strepitu factò multas eijcit quasi cintillas. Idem ipsum in sale in ignem coniecto, in castanea aliqua integra pruniis imposita, in aliis denique huiusmodi rebus perspicitur. Quæ res efficit, ut idem de fulminum effectione cogitemus. Ipsum autem fulmen naturæ pestilentis, ac fœtidæ plerumque est, quoniam è crassa exhalatione, ac viscosa gignitur: idemque dura potius, quàm mollia perrumpit, ut ferrum, saxa, metalla, intactis sæpe loculis, quibus includuntur. Id fit, quia duriora magis resistunt, & in hæc vim suam illud acrius exercet, quod in globis bombardarum, qui fulmini omninò similes sunt, licet intueri. Fulminum prætereà genera, varietatem, & significationes Plinius lib. 2. ac Seneca complectuntur. Quæ quoniam cum magnâ augurum superstitione, vanitateque coniuncta sunt, nec ad ipsorum naturam noscendam conferunt, à nobis hoc loco omittantur, quæ communes fulminum causas reddidisse satis esse iudicamus. Id solum ad ipsorum varietatem

tatem cùm Seneca satis sit annotasse, tria esse
potissimum genera fulminum, quæ pro ra-
tione inflammationis inter se differant, unum
eorum, quæ terebrent, & perforent res con-
tactas propter exhalationis, qua constat, te-
nuitatem, ac puritatem: Alterum illorum,
quæ dissipent omnia propter densiorē, con-
cretioremque vim: Tertium eorum, quæ
urant propter terrenam, viscosamque mate-
riam, cuius generis lapis quidam durissimus
existit, qui quasi telum omnia devastat. Om-
nium tamen fulminum proprium est, quodd
celeri cursu decidunt, brevi que temporis
momento vim suam exercent, quodque ha-
litum quendam gravissimum ex accensæ ma-
teriz fœditare emittunt: quem vel animalia,
quæ in iis locis, in quæ deciderint fulmina,
degebant, fugiunt, desertis proprijs latibulis.
A fulmine diversum est fulgur, seu fulgura-
tio: quæ tum fit, cum nube discissa fulmen
efficitur: est enim ipsa splendor quidam ex
illius inflammatione emicans, veluti is, qui
quacunque ex flamma ædi solet. Fulgur au-
tem plerunque fulmen sequitur, tanquam
splendorem incendium: quamvis nonnun-
quam ipsum per se solet emicare, nullo eia-
culato fulmine, propterea quodd exhalatio
nubibus conclusa tenuis admodum fuit, nec
vi eiusmodi in concretionem fulmineam
potuit

potuit condensari. Fulgur porro videre prius, quàm fulmen semper solemus, ac fragor nubis perruptæ postea auditur, quia aspectus, qui tenuior est, ac per 3. axioma ab ignea vi statim movetur, splendorem prius cernit: & tamen fulmen, ac fulgur eodem fiunt tempore, alterum dum nubes perrumpitur, alterum, dum accensa materies est. Quemadmodum exonerata bombardæ, uno, eodemque tempore accensi pulveris lux emicat, & globus erumpit, tamen quia hebetior est auditus, quàm aspectus, alterum prius cernitur, quàm alterum audiri possit. Sed hujus hebetudinis causæ ex tractatione de anima melius intelligentur. Ad fulminis formam accedit fulgetrum: quod tum fit, cum exhalatio constringitur à nube, minori tamen vi, propter eius raritatem, quàm ut erumpat, aut tantum ædat fragorem, aut ut fulmen decidat. Huiusmodi fulgetra sæpe in tempestatibus, ac pluviosis noctibus videmus, solo ædito sonitu, emicare, & per fenestrarum rimulas in domos penetrare. Quò fit, ut quemadmodum fulmina fulguratio sequitur, ita tonitrua fulgetrum: utrumque enim est coruscatio exhalationis inflammatae, ob nubis rupturam. Ipsum verò tonitru nihil est aliud, quàm fragor nubis discissæ ex repugnantia caloris, qui exhalationi ineft, & frigoris ærei illam

illam ambientis. Idemque fragor, siue fulmine aliquo emisso, siue nullo, aut fulgetro facto solum, efficitur. Quapropter ad aëris tempestates tonitru referendum videtur, quandoquidem idem est fragor duntaxat, ut deinceps dicemus.

Sequitur, ut de cometis, quas Latini crinitas vocant, differamus: quarum naturæ explicatio longior est, & huic loco breviter interserenda, quandoquidem ex ignitarum exhalationum genere illæ sunt. Quidam cometas esse stellas putavêre (ut Pythagorici, Democritus, & Anaxagoras) multarum stellarum inter se coëuntium splendorem: alij denique aliud præter id, quod verè sunt. Quos omnes perpulchrè, & acutè Aristoteles, cuius sententiam in hoc loco sequimur, (nam Plato nihil hac de re statuit) refellit, nosque silentio prætereundos censemus. Cometa verò ex eadem ferè materia, qua cæteræ ignitæ res, quas retulimus, gignitur, id est, ex arida, calidaque exhalatione, quæ in suprema aëris regione est. Eademque hoc modo efficitur. Cum in suprema aëris regione multa, densaque exhalatio sicca, & crassa cogitur, motoque aëre cœlorum impulsu accenditur ab igne supremo, paulatim inflammatur, propter materiæ copiam: facta nimirum perpetua similis materiæ accessione, quam idem cœli

cœli motus, ac solis calor adducit, quamque inflammationis vis attrahit, propter vim ignis attractricem. Hinc fit, ut quod copiosior est exhalatio, eo sit diuturnior cometes, adeo ut per sex integros menses durasse quendam, Neronis ætate, Seneca referat: quanquam ediverfo Plinius ut minimum septem dies, ut summum quadraginta durare dicat: id quod vero similis mihi videtur. Ipsi verò cometæ à comis appellantur, quasi crinitæ, quoniam radios quosdam, veluti accensos emittant, qui nihil aliud sunt, quàm eiusdem exhalationis ramuli circumquaque sparsi, & æquæ, atque ipse cometes, incensi. Huiusce verò natura sicca est admodum, & hominum temperationi contraria. Fit enim calidis, ac siccis temporibus, ut in æstate, & autumnò: tum in regionibus valde æstuosis: item inter ortum, & occasum, vel ad austrum: ad septentrionem autem rariùs. Quæ omnia caloris, siccitatisque magnam vim præseferunt. Eadem porro crinita syderum cursum sequi solet, propter cœlorum motum, qui aërem, in quo est illa, secum impellit: commoto enim cœlo, aërem simul, & quicquid in eo est, commoveri, per secundam hypothefin, necesse est. Atque eam ob causam nonnulli, sed falso, stellam esse cometam existimarunt. Quinetiam ventorum, tempestatum, sterilitatis,

tatis, cladium, pestis, bellorum, tumultuum, mortis principum, ac magnatum, multorum denique malorum esse signum, cometas dicunt, idque exemplis varijs confirmant. Cujus significationis causam calori, & siccitati illarum attribuunt, quod tum videlicet humore exhausto, calor sæviat, & in corpora principum, ac magnatum, quæ delicatiora sunt alijs, agat: sterilitatem pariat, ac pestem, cæteraque generis eiusdem, quæ ferè solent à siccitate exoriri. Sed quàm sint hæc momenti exigui, ne argumentis quidem egere, ut probetur, existimo, cum eam opinionem falsus timidorum hominum error à superstitione natus pepererit, non vera aliqua ratio, quæ nulla, nisi detorta esse potest. Cometarum quoque loca, & à terra distantia discrimen Geometricis demonstrationibus quidam docere conati sunt: quorum ego in hunc locum argumenta afferre nolo, ne ab instituto meo digrediar. Ergo cometes exhalatio quædam est arida, & calida, densa, & crassa in suprema aëris regione accensa, & à cœli motu agitata, imò stellarum motus ipsos consequens. Atque hæc est cometarum naturæ brevis descriptio, non qualis ea Ioannis cuiusdam Monhemij, qui congregationem stellarum multarum cometam definiuit. Quo nihil ineptius, & à Philosopho alie-

alienius excogitari potest, ab eo præsertim, qui eandem, quam nos suprâ, cometæ originem tradidit. Iam quæ in hunc locum de cometarum effectu, & naturâ à Seneca, & Plinio adduntur, non tam ad illarum vim explicandam, quam ad historias, & exempla commemoranda spectant. Quapropter nos breviarum descriptione contenti, atque eâ maximè, quam tradit Aristoteles, plura his non addimus. Cometarum diversæ sunt formæ, quæ pro materiæ inflammatae specie diversa nomina fortiuntur: quædam enim *πρωϊνά* à Græcis, id est, barbatæ vocantur, quod ab infima parte in longam, quasi jubæ, ac barbæ formam porrigantur: aliæ *εισοντία*, eò quod veluti iaculo quodam citissimo vibrentur in terras: aliæ *ξίφια*, quod mucronis formam habeant, pallidissimæ, & splendidissimæ lucis existentes: aliæ *κεραίαι*, quod veluti cornibus quibusdam distinguantur. Sunt & diversi cometarum colores pro materiæ, aut raritate, aut densitudine: alij nimirum candidi, & argentei, propter raritatem exhalationis: alij sanguinei, ac rubicundi, ob densitudinem, & crassiciem: Quorum quidem color multò sæpius variari videtur, propterea quod noctu cernantur, scintillareque videantur. Atque hæc satis de cometarum effectione, natura, formis,

mis, & loco: plura si quis requirat, Senecam lib. 7. quæst. natural. ac Plinium lib. 2. cap. 25. legat.

DE IIS, QUÆ IN AERE

CERNUNTUR.

Cap. III.

SECUNDVM ignitarum rerum genus est eorum, quæ cum nullam habeant inflammationem, in aëre tamen ardere videntur: cuiusmodi sunt hiatus, quem cœli chasma, & voraginem vocant: nocturni splendores: nubium colores: corona, quam *αλωνα* nominant: parelia, quæ Plinius binos soles, binasque lunas: arcus, siue iris: lineæ perpendiculares: galaxias: Quorum omnium causas in hoc loco explicaturi sumus. Hiatus ergo, ut Plinius appellat, Aristoteles verò Chasma, est, exhalatio densa, & viscosa in suprema aëris regione, quæ inflammata, uti cætera omnia subito splendore videtur cœlum aperire. Id fit, quia eius viscositas, ac densitudo (quæ unum in locum coacta est) extremis partibus, quibus est rarior inflammatur, media verò, quæ densior, non accensa hiarum quendam patescere videtur, dum obscuritas illa, media luce inflammationis, circumquaque illustrata, cavitatem quandam præsefert.

sefert. Quæ cum in nubibus appareat, cœli
 patère aliquam rupturam vulgus existimat.
 Hic idem hiatus, si minor sit, & quasi angus-
 tum efficiat orificium, Dolium appellatur:
 si latior, Vorago: Utrique tamen commune
 nomen est hiatus. Atque ut pictores, qui vel
 fenestram, vel puteum, vel locum aliquem
 cavum simulant, colore nigro album, ac lu-
 cidum appingunt, ut in abdito illa obscuri-
 tas appareat, ita in hiatu densiorem, crassio-
 remque exhalationis partem, quæ partium
 tenuiorum, & inflammatarum luce ambitur,
 in medio esse cogitandum est. Eiusdem ferè
 generis est noctium splendor, qui summa in
 obscuritate nonnunquam apparet. Fit enim
 is, accensa exhalatione aliquâ tenui, & rarâ,
 quæ propter subtilitatem citò inflammatur:
 ideoque parum ipse durat, cum repentino
 motu magna cœli pars illustratur, quamdin
 incensa exhalatio lucem emittit. Ac huius-
 modi quidem lucem Plinius lumen de cœlo
 visum appeilat: quale idem C. Cæcilio, &
 Cn. Papyrio consl. conspectatum testatur.
 Hûc accedunt nubium colores, de quibus
 priusquam dico, quid nubes sit, & quemad-
 modum fiat, docendum est. Nubes est,
 multa exhalationum copia in aëris mediâ
 regione coacta: quæ calore interno, quo est
 excitata, suspenditur, adjuvante etiam aëre,

ne cadat, præsertim cum ea aëreæ naturæ ferè sit. Ex hac omnes ferè res tam in aëre apparentes, & ignitæ, quàm humectæ aliæ sunt tanquam è materiæ quadam. Nihilominus tamen exhalatio prima omnium materies est, quoniam ex ea, si multa sit, nubes in aëre coguntur. Ergo cum aër nubilosus est, ut sæpè cernimus, ipsæque nubes varijs ex vaporum generibus vel crassiorum, vel tenuiorum, vel aridorum, vel humidorum consistent, fit, ut sole in illas irradiante, colores diversi appareant. Atque ita nubes modò sunt rubicundæ, nonnunquam subfusæ, interdum pallidæ, sæpè etiam ceruleæ. Quos omnes colores tum ob earum naturam, vel minùs densam, vel crassiorem, tum ob solis splendorem in ipsas reflexum, fieri censendum est: quemadmodum alijs in rebus, luce corporibus densis, tenuibùsve admotà, varios effici colores cernimus. Ita fit, ut si flavae sint, aut rubæ nubes, exhalatione tenui, & siccà consistent: ideoque sunt serenitatis, aut ventorum indicia, quemadmodum ait Aristoteles: si fusæ, vel atræ, terrestri admodum, & aquosa: ac proinde tempestates, pluviasque significant: si ceruleæ, ac roridæ propter humoris vim magnam pluvias portentunt. Breviter ijdem colores ex collectorum vaporum varietate, solisque radijs nubes

illu-

Illustrantibus fiunt, non propter ignem ipsi-
dem admixtum, ut Plinius putat, qui nullus
omnino est, nisi forte calorem illis insitum
ignem nominet: qui etiam multo minus eos
colores addit, cum is vaporibus inclusus sit,
minime autem luceat. Tota ergo nubium
species his causis assignanda est: quæ verò
ipsæ portendunt, vel tempestates, vel sereni-
tates, vel pluvias, vel ventos, vel alia huiusce
generis, propter humoris quidem, aut aridi-
tatis diversam concretionem portendunt.
Quoniam enim humor, crassus præsertim
nigrorem, ac obscuritatem efficit, & nubes
coloris eiusdem, utpote eadem concretionem
constantes, pluvias, tempestatesque alias, hu-
mectas saltem, indicant. Quoniam etiam
ariditas vel flavum, vel rubeum colorem
gignit, eandem ob causam serenitatem, aut
ventos significant. id quod vel sole exorien-
te, vel inclinante sese ad occasum animad-
vertere oportet: tunc enim iidem colores
apparent. Age verò de corona, quam Ari-
stoteles halonem appellat, differamus. Co-
rona (sic enim à Plinio, & Seneca halon vo-
catur) est circulus quidam vel solem, vel lu-
nam, vel aliam stellam ambiens, qui in nu-
bibus apparet. Eadem fit, cum nubes rara
est, ac tenuis, motaque eius syderis, cui sub-
est, radijs, & percussa transmittitur, & arcum

quandam in medio relinquit. Exempli gratia, uti Seneca eleganter docet, quemadmodum in stagno proiecto lapide ex ictu illo circulus exiguus initio fit, multiq̃ue alij subindè, qui sese paulatim dilatant, quousque tandem evanescant, idq̃ue propter aërem aquas commoventem, & eos circulos efficiëntem: sicut etiam nubes aliqua rara, & tenuis, soli, aut Syderi alicui subiecta, radijs ejusdem commoveretur: quibus per medium traijcientibus, ipsa cedit, atque aream efficit circulo similem. Tales sæpè coronas hyberno tempore, quando maior est humiditas, circa lunam, ac solem conspiciamus: circa alias verò stellas rariùs. Quas coronas non in ipso cœlo, ubi Sydera sunt, inesse, quod Plinius falso putavit, sed in nubibus apparere perspicuum est. Portendunt hæ quoque coronæ temporum mutationes, ut Aristoteles: idq̃ue quoniam in nubibus efficiuntur. Nam si paulatim evanescant, quod raram esse, & tenuem admodum nubem indicat, serenitatem significant, si verò nigriores, densioresq̃ue fiant, pluviam, ac tempestates: illud enim argumentum est humoris, & densitudinis nubium: Si demum ab aliquâ parte frangantur ventos ab ea parte flantes indicant: quoniam & ijdem illam sic dividunt: Quandoquidem nisi sereno admodum tem-

pore fieri coronæ non possunt. Est & aliud
 imaginum in nubibus apparentium genus,
 quod Aristoteles *παρήλια*, Plinius lunas, ac
 soles plures appellat. Parelia verò imagines
 quædam sunt solis, aut lunæ in nubibus ex-
 pressæ. Eadem fiunt, cum nubes aliqua den-
 sa, & æquabilis, humectaque solis radiis illu-
 strata illius refert imaginem, immoto nimi-
 rum aëre, qui illam non conturbet: quemad-
 modum etiam in fontes placidos, & aquâ re-
 nui stagnantes, reflectentibus se solis radijs,
 imaginem eiusdem videmus. Itaque ut com-
 modè fiant parelia, & aër esse immotus de-
 bet, & nubes tenuis, levis, densa, atque hu-
 mecta, & ex adverso solis radij in illam re-
 flecti. Nam si, aëre commoto, nubes mini-
 mè constent, aut eadem nimis densæ sint,
 imaginem non recipiunt: si verò raræ admo-
 dum, ipsam transmittunt: si denique desuper
 eas sol feriat, dissipat, ac nihil imprimit.
 Quapropter magna nubium æquabilitas,
 solisque in illas irradiantris commoda positio
 esse debet, ut appareant parelia: quæ eodem
 ferè modo, atque arcus cœlestes, de quibus
 postea dicemus, fiunt. Solent aliquando pa-
 relia bina, aut terna simul apparere, his au-
 tem plura non item, ut Plinius auctor est.
 Quin parelia propriè dicuntur ea, quæ ex
 adverso solis gignuntur: quæ verò ex adverso
 N 3 lunæ,

lunæ, paraselinæ: quorum tamen genus rarum est, & ad parelia potius referendum, ut Plinius innuit: qui soles nocturnos appellari has paraselinas inquit. Sunt etiam eadem parelia pluviarum indicia, uti Seneca refert, quoniam & nubes, in quibus illa apparent, ad pluviam gignendam sunt accommodatissimæ, id est, roridæ, humectæ, densæ, ac leves: sic enim preparatis illis, pluvia effici solet. Veniamus nunc ad cœlestis arcus, quem Iridem vocat Aristoteles, effectiorem explicandam. Fit autem ille, cum solis radij in nubem humectam, & tennem, & æquabilem, ac roridam, quæ in guttas dissolvi cœperat, & ex adverso illi positam reflectuntur. Et quoniam iidem radij figuram rotundam efficiunt, sicut parelia, arcuatam imaginem in eiusmodi nubibus ostendunt. Veluti si ore aquâ pleno rorem quandam ad solem in vestes, aut aliud obstaculum velis expuere, reflexis eiusdem radiis in humorem illum tennem, omninò fiet Iridis figura. Itaque, ut Iris appareat, nubes humectæ admodum esse debent, ac roridæ, tenuesque: tum ex adverso solis opponi, ut in eam radij reflectantur. Sed dubitet fortasse quispiam, cur Iris mediâ parte arcuatâ, cur ve coloris eius appareat? Certè figura illa mediata propter horizontis rumorem fit, qui si nullus esset, integer circulus iridis

iridis appareret. Atque ita fit, ut quanto sol magis, vel ortui propinquior est, vel ad occasum vergit, maior sit Iridis circulus: contraque minor, quò ille magis supra horizonta elevatur: quoniam ex adverso radij in nubem reflexi maiorem eius partem illustant, quàm si desuper rectà reflectantur. Itaque quando sol nubis partem superiorem suo lumine penetrat, eamque nos cernimus, mediatu arcus apparet: qui integer etiam appareret, si horizontis tumor non interponeretur. Iamverò colores Iridis eandem fiunt ob causam, propter quam nubium colores, de quibus antea disseruimus. Si enim nubes sit humida, & crassa, lumine solis in eam radiante, fit color puniceus, aut viridis: si tenuis, & æquabilis, flavus. Hùc etiam facit radiorum solis longè diffusi projectio, qui cùm eò sint imbecilliores, què longiùs sol distat, in nubem humectam projecti varios ædunt colores, eosque plerunque coniunctos, ut viridem, puniceum, rubeum, seu flavum: qui prout plus, minùsve lucis conceperint nubes, gignuntur. Viridem enim, quì proximè ad nigrum accedit, minima lucis pars efficit: rubeum major, puniceum maxima omnium. Hos igitur omnes colores in Iride cernimus coniunctos tum propter nubis humorem vel crassiorem, vel tenuiorem,

tum ob solis exadverso oppositi irradiationem : nam ut fiat Iris , transversos emittat radios sol, necesse est, non rectos ut in corona. Fiunt & sæpè tres arcus coniuncti alijs alijs oppositi eandem ob causam , ob quam unus , id est , quia ut in nubem aliquam sole radios emittente fit iris , ita eadem si lucida fit admodum , aliam quoque sui reflexione efficit : atque hæc rursus aliam tertiam. Sed ex his tribus prima semper majori luce constat : secunda minori : tertia ferè nulla : Apparent præterea irides interdum , præsertim sole occidente : nocturnæ etiam Aristoteles conspectas esse eas aliquando inquit. Eadem in hyeme , aut autumno , vel pluviosis denique temporibus quacunque diei hora sunt , non in æstate , aut verno tempore : In quo si fieri ipsas contingat , sole occidente sunt propter radiorum imbecillitatem : quæ tunc major est , quàm in reliqua diei parte. Hinc fit , ut iris nec pluvios , nec serenos , ut ait Plinius , dies plane portendat , cum ob nubium humidarum reflexionem lucidam fiat , idque tum , pluvix propter earum humiditatem , tum serenitatis propter solis vim , quæ tunc sentitur , sit indicium. Hac ducti naturæ admirabilitate , quæ in iride est , Poetæ Thaumantis filiam eam esse finxere , ob id nimirum , ut Plato inquit , quod nomen Thaumantis

mantis admirationem Græcis significet. Eiusdem generis cum iride sunt lineæ perpendiculares, quæ eodem fiunt modo, quo irides: nisi quod rectæ sunt, & in longum porrectæ, non arcuatæ. Id autem fit, quoniam nubes, in quibus apparent, planè sunt veluti specula quædam plana, non concavæ, ut in iride, in quibus ut imagines sic radij solis imprimuntur. Ergo & color, & nubis concretio, & radiorum inflexio, in virgis eadem est, quæ in iride, forma verò diversa, propter nubis, uti dixi, vel planam vel concavam speciem. His explicatis, de Galaxia circulo differamus, qui est ex genere apparentium rerum. Idem autem est circulus ille candidus à colore Græcis γαλαξίας, id est, lacteus dictus, qui à septentrione in austrum porrectus ad utrumque polum extenditur. Hinc ipsum circulum solis viam esse nonnulli putaverunt (omitto enim nunc Poëtarum de illo fabulas) alij reflexionem illius radiorum in eum locum, alij stellarum multarum inter se constipatarum splendorem, alij denique aliud ab hoc diversum. Quorum omnium sententias in lib. de Philosophorum decretis Plutarchus complexus est. Sed, ijs omnibus omis- sis, Aristotelicam sequamur sententiam, quæ certior, & rationi est congruentior. Is ergo Galaxiam multarum stellarum tum maio-

tum, tum minorum congregationem continuatam per totum eum circulum, qui apparet, esse dixit: eamque ob calidam, & siccam exhalationem in eum locum, qui à solis via diffusus est, evedtam videri candidam. Atque id sanè ita esse perspicitur, si stellarum infinitam multitudinem in eo loco coactam sereno tempore spectes (tunc enim ille aperte apparet.) Huic quoque circulo Plinius vim frugum gignendarum attribuit, cujus verba hoc loco libuit adducere, ut rem magis explicarem. Est præterea in cælo, qui vocatur lacteus circulus, etiam visu facilis. Huius defluvio velut ex ubere aliquo sata cuncta lactescunt, duorum syderum observatione Aquilæ in septentrionali parte, & in austrina Caniculæ: cujus mentionem suo loco fecimus. Ipse circulus fertur per sagittarium ad Geminos solis-centro, bis æquinoctialem circulum secans, commissuras eorum obtinente hinc Aquilâ, illinc Caniculâ. Ideò effectus utriusque ad omnes frugiferas pertinent terras, quoniam in his tantum locis solis, terræque centra congruunt. Verùm hæc Plinij sententia, eo excepto, quòd galaxiæ situm benè descripsit, haud mihi sanè probatur, tum quòd eam vim universo circulo tribuat, quæ duarum stellarum, quas commemorat, longissimo inter se intervallo distan-

distantium propria videatur: tum quòd stellis non æquè, atque illarum motui virtus hæc in inferiora assignanda esset. Sed hac de re satis. Ad reliqua metéorum genera pergamus.

DE AEREORUM METEORUM GENERE.

Cap. IV.

SECUNDO hoc loco metéora aërea exponenda sunt, quando hactenus de ignitis egimus, hoc est, ventorum, terræmotus, ecnephia, typhonis, tonitruum, atque id genus aliorum causæ sunt explicandæ. Ventus est, flatus aëreæ naturæ ex vaporibus terræ factus, & per hanc aëris regionem infimam delatus. Nam aër ipse per se tenuissimus spiritus, calidus, & humectus est: qui movetur quidem, sed levi afflatu. Unde & spirabilis anima appellatur. Ab hoc ventus differt, quòd crassior, & humidior est, motuque propter naturæ inæquabilitatem concitior. Id in frequentibus aëris mutationibus licet animadvertere: quoniam sereno tempore aër esse quodammodò immobilis videtur, propter tenuitatem, quæ leviter inspirat potius, quàm movetur: cum autem afflare ventus incipit, vel tactu ipso illius rapiditatem, densi-

densitatemque persentire possumus. Quapropter à Seneca rectè ventus definitur, aer fluens in aliquam mundi partem : aer verò elementum unum est ex tribus propositis, ut antè docuimus. Fit autem ventus sententia Aristotelis, ac Senecæ, & aliorum fere omnium (Platonem enim excipio, qui hac de re pauca in Timæo obscurè attingit, cum de aëris, & aëreæ affectionis generibus loquitur his verbis: Similiter aëris aliud genus agilissimum purissimumque, quem *aithera* nuncupant. & quæ deinceps sequuntur) hinc inquam, ex vaporibus calidis, & siccis terra excitatis, & ab aëre agitatatis. Cum enim magna nubium copia in aërem superiorem evecta est, solque radiorum vi eam usque adeo tepescerit, ut non in humoris guttas, sed in spiritum degeneret, ventus gignitur. Quemadmodum viride lignum igni impositum, dum incenditur, humor omnis illius in fumum densum, & flatuosum exhalatur, sic & concretam nubium naturam rarescere, & in flatum converti ob solis vim putandum est. Quapropter, ut ventus gignatur, subesse nubes in aëris media regione oportet, easque aridas, & tenues: tum solis calorem moderatum esse, ne si vehemens sit, illarum vis omnino evanescat, neve si exiguus in pluviam mutetur: denique cælorum mo-

rus accedet, qui flatuosam illam in aëre con-
 cretionem factam concitet, & impellat. Ita
 enim fiet, ut efferentibus sese subinde calore
 solis è terra exhalationibus, & ab aëris frigi-
 da plaga occurſu ſuo repulſis, lateraliter, ut
 ita dicam, ventus rapiatur, moveaturque ad
 mundi partes diverſas. Ex quo ſequitur, to-
 tidem eſſe genera ventorum, quot mundi
 plagas: quoniam ex iis locis variæ exhalatio-
 nes excitantur calore ſolis diverſo. Nam ab
 oriente Eurſus, qui Latinis Subſolanus dicitur,
 flat: ab occaſu Zephyrus: qui Favonius:
 à polo arctico, Septentrio, qui *Βόreas*: ab
 Auſtro Auſter, qui Africus. Hi ſunt quatuor
 præcipui venti ex quatuor mundi cardinibus
 aſſantes, & ab iis nomina diverſa habentes:
 quibus Ariſtoteles, atque alii Philoſophi
 octo alios addunt, eorum unicuique binis à
 latere adiunctis, ut omnes duodecim ſint
 numero à duodecim horiſontis partibus, in
 quas eos dividi cogitamus, ex ortu. Atque ita
 Euro adherent Cæcias, & Vulturſus: ille qui-
 dem ab ortu æſtivo, hic à ſolſtitiali. Zephyro
 Corus, quod & Iapyx dicitur, ac Lyps, ſive
 Africus: ille ab æſtivo occaſu, hic à ſolſtitiali:
 Septentrioni, ſive Boreæ Arpacias, ſive Se-
 ptentrio, & Traſcias, ſeu Circius, ille ab orien-
 tali latere, hic ab occiduo. Auſtro denique
 Libonotus ab occaſu, Euronotus ab ortu.

Huic

Huic ventorum divisioni, qua veteres contenti fuere: nautæ hoc tempore numerosiorē aliam adiiciunt, in qua 36. ventos, diviso in totidem partes horizonte, faciunt. Sed horum omnium ratio Cosmographis relinquatur: nos enim hinc ventorum naturas, causasque duntaxat explicare volumus. Est præterea illud considerandum in hoc genere, diversas ventos vires pro regionis, unde spirant, naturas sortiri. Nam Eurus cum binis sibi adiunctis calidæ, siccæque naturæ est: quoniam à solis ortu, ubi humor frigiditasque omnis vaporum quasi coquitur, aspirat: Zephyrus unâ cum annexis frigidæ, & humectæ: quod flet ab occasu, ubi tanta solis vis non est: Auster cum cæteris calidus, & humidus, ideoque procellosus, & pestilens. Septentrio cum alijs frigidus, & ficcus, quia ex boreali plaga spirat. Atqui hæc sunt, quæ generatim de ventorum generatione, ac partibus dicenda videbantur: plura si quis postulet, à Plinio, & Theophrasto in libello de ventis requirat. Hinc pertinent diversa repentinorum flatuum genera: quæ, quoniam ex spirabili natura oriuntur, etiam si tempestates sint, addenda tamen superioribus sunt. Horum primus est terræmotus, quo terra solet quasi tremore quodam interno quassari, ac tremere, adeo ut magnæ in ea rimæ sæpe
fiant.

stant, saxa interrumpantur, corruant ædificia, arbores extirpentur, flumina cursus suos mutant, alia demum eiusdem generis monstra ædantur. Huiusce motus causam diversis rebus Philosophi multi tribuere, ut Thales aquæ, alij igni, alij aëri, alij denique alijs initiis. Aristoteles verò vaporibus intra terræ cuniculos inclusis. Itaque cum solis vi multi è terra vapores excitantur, iiq̃ue fortè propter sui densitudinem, terræque compactam nimis planiciem propter levitatem, mobilitatemque suam intra meatus ipsius continentur, necessariò etiam agitantur, ut foras prorumpant, sursum deorsumque impacti terram conquassant. Nec mirum est, si exiguus flatus tam acrem motum excitet, cum subinde aliorum flatuum eiusmodi accessio fiat, commotione semel factâ. Quâ etiam de causa terræmotus modò maior, modò minor existit, modò diuturnior, quam alias, ut conclusi spiritus vis, cõpiaque fuerit. Ut autem fiat terræmotus, magna esse aëris tranquillitas, serenitasque debet, imò ne exiguus quidem spiritus efflare. Quod idèd fit, quia solis calore quasi ad sese attrahente vapores conclusos, terraque nimium compacta ijs exitum prohibente, commoti illi sursum, ac deorsum agitantur, sicque terræ partem illam, in qua sunt, conquassant. Ex huiusmodi quassatu,

quassatu, non solum terræ tremor vehemens, qualis est arteriarum micantium in homine, sed etiam hiatus, ruinæque montium, & ædificiorum fieri solent: quoniam, ut in nube tonitru, sic in terris tremor, & ut in illa ruptura, fulmine exiliente, ita in hac sæpe hiatus, spiritu foras prorumpente, fiunt, uti auctor est Plinius. Terræmotus varij sunt effectus, quos hoc loco referre non libet, recensentibus præsertim eos copiose Plinio, & Seneca: ut ædificia funditus evertere, hiatus efficere, puteos obturare, montes dividere, fontes aperire, lutum, atque aquæ vim congregare, aliaque huiusmodi, prout spiritus vehementior, aut exilior fuerit, vel terræ obduratio, aut mollicies exitum cohibuerit, permiseritve. Formæ autem terræmotus à Seneca tres esse dicuntur; una, quæ succussio appellatur, cum terra conquassata sursum, ac deorsum movetur; altera inclinatio, cum eadem instar navigij aliquam in partem inclinatur: ex quo fit, ut ædificia, montesque sæpe inclinentur, eademque rursus erigantur, ab altera nimirum parte flatu alio simili sese inclinante: Tertia, quæ tremor dicitur, cum terra in seipsa vibratur. Signa porro terræmotus hæc plerumque sunt: maris summa tranquillitas, aëris immobilitas, avium in solum præ metu avolantium concursus, aquarum
putea-

putealium in imo solo conturbatio. His addit Plinius alia signa, & remedia eorundem terræmotuum, quæ in hunc locum referri non est necesse, ne historiam potius, quam eiusce motus causas attulisse videar. Hæc igitur omnia ex Aristotelis sententia dicta sint, Plato enim hæc de re nihil effert præterquam, ut de illo refert Plutarchus lib. 3. de Placit. Philosophorum, quod frequenter terra quatitur propter raritatem quandam æærium, in quibus spiritus soleat includi. Quæ quidem sententia est cum Aristotelica, nisi quod hic effectum motus illius accuratius exposuit. Veniamus nunc ad Ecnephias, cæterarumque tempestatum causas explicandas. Ecnephias flatus est quidam, concitatus è sicca, & calida exhalatione, quæ, nube compressa, erupit, exortus, ac per terras oblique delatus. Nam, ut fulmen è nubium ruptura prosilit, ita in Ecnephia conclusus quidam spiritus calidus, ac tenuis in nubibus sponte erumpit in flatum procellosum. Unde Græcis *ἐκνεφίας*, Latinis procella, ut Plinius, & Seneca testantur, dicitur. Proprium est autem eiusdem, quod vehemens, ac brevis est, igneque, & fumo aliquando constans: quoniam, ut ait Aristoteles, ille jactus, celeritatis, ac virium causa est. Eiusdem est generis Typhon: qui similem ob causam è nube

O impacta

Impacta elapsus turbine quodam gyratur, & in terras incidens proxima quæque vastat, nec tamen incensus est, ut Ecnephias, sed acer, & visuâ cuncta corripiens & versans: ex quo vortex à Latinis appellatur. Differt ab Ecnephia, quòd ille sine igne rapidus vorticem facit, cunctaque convoluit: hic autem cum igne solùm rapitur, nulla vibratione facta. Similis Typhoni est Præster, Aristoteli, sic appellatus, Senecæ verò turbo. Fit autem ille eadem ratione, & causâ, qua Typhon, nisi quod dum in terras gyratur, præmotus vi, & materiæ siccitate ignem concipit. Quapropter à Seneca igneus turbo nominatur. Et quemadmodum Typhon, uti sæpe cernimus, in terras ellisus gyros quosdam efficit, in quibus pulveris, rerumque leviorum, tum graviorum quasi eripi fiunt: ita Præster, sive turbo eisdem quoque efficit, sed ignitos, & contacta quæque inflammantes. Tonitru verò, quod ex infractæ nubis attritu semper æditur, sonitus quidam est in aëre factus, qualis is, qui è duorum lapidum mutuo attritu fit. Hoc idem sensim per aërem amplificatum acrius audiri solet, quoniam vis illa nubium collisarum, ædito sono in aëre, veluti quosdam circulos efficit, tum majores, tum minores, quousque sensum auditus feriat. Quod ipsum cum aëris sit fragor
dun-

duntaxat, ad aëreorum meteorum genus referendum est. Referri possunt in hunc locum omnes aërearum tempestatum formæ, repentinique flatus : quoniam ratio ad has causas, quas retulimus, pertinere videtur. Signa verò tempestatum, quæ diligenter à Theophrasto, & Plinio colliguntur, hûc spectant : Quorum hæc esse potest divisio, ut aliæ statis temporibus fiant, ut in hyeme, in qua venti, pluvix, nives ejusmodique alia gignuntur : aut in autumnno, ut tonitrua, venti, flumina : aut in æstate, ut terræmotus : aliæ demum fortuitæ, id est, quæ præter communem hanc temporum rationem varijs de causis excitentur, ut in media hyeme fulminare, coruscare, grandinare, tonareque solet. Quarum quidem rerum effectio ex syderum motu nasci videtur, ut Plinio, cæterisque placet, qui cuique stellæ varias excitandarum tempestatum vires assignant : ut Lunæ pluendi vim, Marti incendia efficiendi, cæterisque stellis res alias excitandi : quas omnes diligenter colligunt Astrologi.

DE AQUEORUM METEORUM
GENERE.

Caput V.

RESTANT nunc aquea meteora, quibus explicatis, tota imperfectorum mixtorum tractatio absoluta erit: Ad quorum genus hæc formæ referuntur: pluvia, nix, grando pruina, ros, nebula, fontium, ac fluminum generatio, maris falsugo, & æstus. Pluvia quidem, ut hinc auspicemur, est fluxus humidæ nubis calore solis liquefactæ in guttas aquæ. Cùm enim multæ in regionem æris mediam nubes ex halitibus calidis, & humectis coguntur, constringente eas loci frigidityte, si acrior solis vis easdem desuper feriat, statim liquescunt in aquæ guttas: quoniam ea caloris est vis, ut humecta dissoluat, quemadmodum diximus in superiori libro. Hæc igitur est pluviarum effectio ex Aristotelis sententia: nam Plato idem in Timæo sentit, sed breviter, & obscure his verbis. Igni sæpè miscetur aquæ pars tenuis, atque humida: & quæ deinceps sequuntur: quæ nos latius in commentariis annotavimus. Pluviz autem quanquam una sit ratio, & effectio, diversæ tamen sunt formæ, ut nubes in guttas eliquata, & caloris in eam agentis vis fuerit:

fuerit: Si enim illius guttæ parvæ fuerint, id quod à frigore aëris illas constringente fit, imber appellatur: qualis est in media hyeme, aut in locis frigidis. Si magnæ, ac rariores propter calorem nubes magis dissipantem, labrocera: ac tum quidem frequentius, cum pluviz guttæ ampliores sunt, in aëris hac extrema regione fieri solet, nec in media tantum: quoniam quod guttæ altiori è loco delabuntur, eo fiunt ob aëris intermediij frigus constrictæ minores: contrà verò, quod ex humiliori, eò ampliores, quia extremus hic aëre repidus tunc est, austro potissimum flante. Unde si frigeat, vel rarò pluit, vel guttulæ pluviales sunt admodum exiguæ. Pluvialis porro aquæ variij sunt saporès, qui ex diversa vaporum, quibus nubes constant, concretionè gignuntur: quidam enim salsi sunt, alij amari, alij dulces, alij insipidi, alij denique saporum aliorum. Qui omnes, ut in fontibus aqua diversos saporès sortitur propter terræ, quæ defluit, aut scaturit, varias naturas, ita diversi omninò sunt, prout vapor vel sincerior, vel magis concretus è terris exhalat. Itaque si terra salsa, & adusta sit, exhalatus ex ea humor eiusmodi erit, atque etiam pluvia. Quod idem de cæteris saporibus est judicandum. Solent aliquando pluviz prodigiose existere, ut sanguinis, lactis, carniū,

lanæ, ferri, laterumque coctorum ut Plinius auctor est, atque ranarum, uti nos sæpius in Hispania Bætica tempore æstivo vidimus, Quorum omnium causas non stellis, ut ineptè quidam existimant, cum nullâ id ratione possint docere, neque vi solis eiusmodi res attrahentis tribuere oportet, sed portento alicui, præter naturam, Dei nutu evenienti, vel dæmonum etiam præstigiis. Neque enim natura fert, lanam, carnes, lac, decoctos lateres, ferrum, aliaque generis eiusdem pluere, aut unquam solis radij illa excitabunt, ut in pluviam decidant. Quanquam ranæ, quod sæpè nos vidimus, pluere visæ sunt, idque in summo diei æstu: quæ tamen minimè per aërem delabebantur, sed ex guttibus pluvialibus magnis, crassisque, & interram calore feruente incidentibus momento temporis fiebant. Quapropter eiusmodi effectionem ex humore pluviali, & calore terræ ad generationem apto, adiuncta terræ pinguis parte aliquam ædiputandum est, sicuti mures, atque alias huiusce generis bestiolas è putrefactione ortas videmus. Signa verò pluviarum à Plinio, & Theophrasto, aliisque hæc esse dicuntur: ruborem nubium matutinum, ranarum voces obstreperas, pulicum morsus, citissimum solis exortum, sidera aliquò volantia, atque id genus alia,
quæ

quæ Physicâ ratione constare experimento est compertum. Tradamus nunc effecti-
nem nivis, quæ pluvijs affinis est. Eadem au-
tem fit, cum ob imbecillitatem caloris ante-
quam nubes in guttulas pluviales dissolvantur, frigore circumstante congelatur, atque
ita in particulas contracta in terras cadit.
Unde singulas nivis partes quasi pluviz gut-
tas esse censendum est (ut & ipsæ videntur
manifestè, quia nubes erat ad pluviam præ-
parata) fieri tamen eas coloris albi propter
frigus humorem constringens, quemadmo-
dum aquam omnem congelatam albescere,
& rigere cernimus. Itaque in media aëris
regione nives concreescere, non in infima, uti
quidam existimant, Aristoteles, & Seneca
auctores sunt, quandò in ea sunt nubes, non
in hac ultima. His Plato in Timæo breviter,
& obscurè causas nivis exponens adstipula-
tur his verbis, de humore loquens: Cum ve-
rò mitius congelatur, si suprâ terram accidit,
nix fit. A quibus tamen videtur dissentire,
quòd nivem in hac aëris regione ultima gi-
gni putat: siquidem illam suprâ terras con-
gelari ait, uti grandinem, de qua dicit paulò
post. Sed huic ego sententiæ Aristotelicam
longè præfero, quæ probabilior esse videtur.
Grando eodem ferè modo fit, & eadem ex
materia, è qua nives, nisi quod in hac aëris

regione infima gignitur, cum alicuius nubis
 liquefactę guttę aëris frigiditate cōcrescunt,
 & indurantur. Eadem verò fiunt rotundę,
 tum quia tepor gutta insitus ob frigus cir-
 cūstans sese intro recipit, tum quia guttę
 dum cadunt, rotundę sunt, ut aquę omnes
 particulę. Quod autem in extrema hac aë-
 ris regione grando gignatur, Aristoteles aper-
 te confirmat, eo quod aqua in grandinem
 cogi nequeat, antequam aqua sit effecta. Et
 cum in media regione aëris nubes liquefcere
 in guttas constet, in infima hac ipsas conge-
 lari manifestum est. Quę res efficit, ut maio-
 ri cum impetu globuli grandinis præcipiten-
 tur, quoniam ē proximo loco in terras ca-
 dunt. Est tamen per magna in globulis gran-
 dinis differentia, dum alii saepe aliis maiores
 sunt: quod ex guttarum magnitudine diver-
 sa fieri dubium non est: quo enim maiores
 guttę fuerint, eo sunt grandiores globuli. Est
 & illud animadvertendum, quod Aristote-
 les, ac Plinius commemorant, grandinem
 in autumno, aut vere frequenter aut in re-
 gionibus calidis, in hyeme vero rarius, ca-
 dere: nives contra in hyeme, aut in locis fri-
 gidis, propterea quod aquę vis maior illo
 tempore, aut in iis locis, ut grando gignatur,
 cogi soleat, quatenus calor vapores excitat
 plures, & nubes citius liquefacit in hoc au-
 tem

tem tempore, aut in his locis, quia minor fluidi humoris copia, minorque vis caloris nubem liquantis nives efficit. Atque hæc est Aristotelis de nive, & grandine sententia: quæ ex Platonis de Timæo verbis his desumpta esse videtur. Hæc quando ab igni destituta, ab aëre quoque deseritur, fit levior, & alienis expressis cogitur in seipsam, atque ita compacta, si supra terram id contigerit, grando fit. In ijs verbis Platonis vaporem calore (quem ibi ignem appellat) interno destitutum, & guttatim liquatum elabentem per aëra, si constringatur frigore, & supra terras cadat è proxima aëris regione, in grandinem mutari ait. Quæ etiam sententia cum Aristotelica planè congruit, nisi quòd breviter, & obscure Platonem rem more suo indicavit. Sequitur pruinae, ac roris explicatio, quæ facilis est, & superiorum effectiōni similis. Nam pruina fit, cum vapor aliquis tenuis in proximam aëris regionem calore solis eversus frigiditate aëris eiusdem, & noctis congelascit, antequam in aquam abeat. Huius materies est vapor humidior, quam calidus: qui præ caloris indigentia in sublimem aërem efferri nequit, ac propè terras manet. Efficiens causa, frigus aëris illum constringens in salis formam. Unde serenâ nocte, flanteque leviter Aquilone, ut in hyeme, semper gignitur

pruina. Hanc ipsam Aristotelem sententiam de Platonis Timæo sumplisse manifestum est ex his verbis. Quod si in terra ex rore crassior facta, pruina, id est, si roridus, crassusque humor à terris exhalatus frigore induretur, pruina fit. Ergo pruina, ut Plinij, & Aristoteles volunt, nihil est aliud, quam ros congelatus: eademque à nive in eo differt, quod minor in ea vis humoris inest, quodque in hac ultima regione aeris gignitur. Ros autem Platonis, & Aristotelis, cæterorumque sententia fit ex vapore tenui, & humecto, qui cum ob caloris imbecillitatem in proxima terræ aeris regione subsideat, nec in sublimes possit ascendere, in aquam muratus tenuissimis guttulis defluit, herbisque, ac cæteris rebus adheret. Inde fit, ut serenis noctibus, temperatoque aëre, non frigido, nec admodum calido, in locisque calidis ros gignatur: quoniam hæc ad eiusdem colliquationem, tenuitatemque faciant. Eandem hanc roris effectiorem in Timæo Plato, sed obscure, his verbis indicavit. At quando plurimæ aquæ species invicem commiscuntur, universum illud genus à terra per arbores stillans, liquor, humorque vocatur. Quo quidem in loco præ crassitudine, humoreque terrestri eventum è terris vaporem in aquam converti, & ex hac vicina regione aeris defluere, id quod

Aristo-

Aristoteles, atque alij censent, intelligit. Hûc pertinet nebulæ effectio, quæ roris, ac pruinæ nubiumque materies est. Eadem fit, cum vapor aliquis crassus, ac terrestris calore solis, vel summo mane, vel vesperi excitatur, nec potest ob gravitatem ultra hanc aëris regionem extolli. Hæc cum aërem obscurare tenebrosâ quâdam caligine soleat, si solis calore dissipata evanescat, indicium serenitatis est, quoniam eiusdem tenuitas ad nubes pluviales efficiendas satis non fuit. Si autem eodem calore altius evehatur, & in nubes concre scat, pluviam portendit ob humoris majorem vim. Solent verò nebulæ, ut Plinius docet, sereno, temperatoque aëre fieri: ne si frigidus admodum sit, terras constringat, nullumque vaporem excitet, néve si calidus, eundem consumat, aut si procellosus, nullus planè halitus evaporetur. Ex hujusmodi ergò nebula, & nubes, & rores, & pruina sæpè fiunt ob eas, quas retuli causas. Reliquum est, ut fontium, ac fluminum origines explicemus: Aërem per terræ meatus, qui multi ubique sunt, illabi, & in ijs propter loci frigiditatem, amisso tepore, crassescere, & humectari, auctor est Aristoteles. Hunc in aquæ guttulas defluere, paulatimque in aliquem locum decurrentem fontium, ac fluviorum scaturigines facere confirmat.

firmat idem ab aëris natura, communique fontium, & fluminum origine. Quoniam enim aër calido & humido constat, aqua que frigido, & humido, si ille calorem amittat in terræ specubus inclusus, in aquam necessario mutabitur, atque ita fiet eius scaturigo. Quod autem ex aëre terræ meatus penetrante huiusmodi aqua gignatur, hinc probat, quod fontes, ac fluvij è montibus semper nascantur, qui cum eminentiores sint reliqua planicie, facile undique perflantur, plusque aëris concipiunt. Nec verò quod fontes, & flumina perennia sint, vaporesque illi in aquam conversi tam exigui, ac pauci videantur, ob stare putat, quominus ex his illa gignantur, cum ex diversis locis eiusmodi aquarum magna fiat accessio, cumque, ne vacuum existat, perpetuam quâdam consecutione vapores iidem nunquam intermittantur. Atque hæc sanè Aristoteli fontium, ac fluminum causæ esse dicuntur: in quibus hoc ponit discriminis, quod in fontibus minor aquæ vis sit, quam in fluminibus, ideoque illi maiorem aquæ vim eggerant, quam hæc. Quam etiam Aristotelis sententiam Seneca lib. 7. quæst. natural. sequitur. Ab hac Plato dissentit, qui in Phædone, tartarum esse quoddam ait in terræ medio inclusum, id est, ingentem aquæ vim, à qua veluti è fonte, tum flumina, tum fontes,

fontes, tum etiam maria dimanent. Quapropter ejusdem eam sententiam Aristoteles lib. 2. meteoron vehementer convellit. Sed quàm rectè viderint Periparetici, cum Ecclesiastes apertè dicat: Omnia flumina intrant in mare, & mare non redundat: ad locum unde exeunt flumina revertuntur, ut iterum fluant. Ex quo sequitur, ut in corpore, sic in terra multas esse aquarum venas, alias alijs uberiores, quæ vel in ipso mundi exortu à Deo fuerint diffusæ, vel à mari per secretos quosdam cuniculos deriventur. His ergò apertis, ut cum puteas deffodimus, videre est, fontes, & flumina, eaque majora, minorave, prout aquarum vena fuerit, enascuntur, non modo ex montibus sed è planis etiam locis: ut de fontium, ac fluminum multorum constat origine. Quæ cum ita sint, rectiùs, meâ quidem sententiâ, veritatem attigisse Plato, quàm Aristoteles videtur, si Tartarum illud, ut ipse certè putavit, congeriem esse quandam aquarum sub terris permeantium, veluti venarum per corpus dicamus: ex qua fontes omnes nascantur. Quæ tamen sententia si cui minus placeat, teneamus quod certius, & experimento comprobatur, vel è sacris literis est, multas esse terræ venas, è quibus & fontes & flumina, & putei exoriantur. Ac hujusmodi ferè est omnium aquarum per terras

· terras deffluentium origo, excepta pluviali, cuius exortus manifestus est. Ipsarum præterea aquarum, ut præclare Seneca docet, per magna est varietas: quædam enim stant, ut in stagnis, aliæ fluunt, aliæ variis venis continentur, aliæ colliguntur: Quæ omnia ad loci naturam, vel situm referenda sunt, cum aqua semper spontè defluat, nisi concavo in loco contineatur, atque exitu, & alveo, quâ decurrat, caruerit. Quin varii saporès sunt aquarum, naturæque alvei diversæ, ut aliæ dulcis, aliæ salis, aliæ ferruginæ, aut sulphurei saporis, aliæ calidæ, aliæ frigidæ, aliæ salubres, aliæ pestilentes, aliæ diversorum colorum. Quæ etiam aquarum varietas ad terræ, quâ defluit, naturam referenda est. Nam si argilosa, humectaque sit terra, dulces fiunt aquæ: si salsuginea, salæ: si aluminis, ferri, sulphuris fodinas eluant, alumniosæ, ferruginæ, & sulphuræ: si bituminis aut sulphuris venas, calidæ: si lapidosa sit, frigidæ, si diversi denique coloris, tales quoque erunt illarum colores. Quemadmodum etiam vaporum, in quibus infunduntur aquæ, sapore imbuuntur, sic terræ, quâ defluunt, diversas naturas, ac vires sumunt. Quas qui diligentius persequi volet, Senecam lib. 3. quæst. natural. ac Plinium 31. lib. de nat. aquatil. copiosè differentes legat: hæc enim satis sunt ad

com-

communes fontium, ac fluminum causas tradendas. Eodem pertinet, ut marinæ aquæ generatio, & sapor, naturæque investigetur: quæ non parùm olim difficultatis philosophis peperit. Mare unum esse è quatuor elementis, nimirum aquam, perspicuum est, cum singula naturalem suum locum fuerint sortita. Et quamquam omnibus ferè corporibus aqua sit admixta, nihil tamen refert, cum eodem modo reliqua elementa cæteris rebus inhæreant, permixtaque sint. Ac mare quidem ipsum universum & Plato, & Aristoteles, & Seneca, & alij omnes cum mundo fuisse semper, nec aliquo tempore ortum habuisse testantur. Idque sacrarum litterarum testimonio potest confirmari, in quibus secretionem aquarum à Deo facta, inferiores has omnes aquas unum in locum confluisse, eamque omnium congregationem maria nominata fuisse Moses inquit. Quid autem causæ sit, cur salæ sint, aquæ marinæ, ac cæruleum illum colorem habeant, dubium est, & inter Philosophos controversum. Nam Empedocles, referente Plutarcho, perustæ terræ sudorem causam huius rei esse ait: Metrodorus terrenum lentorem per terram veluti per cinerem excolatum: alij fervorem solis, ut Anaxagoras. Quorum omnium sententias studiosè admodum Aristoteles refellit.

lit. Idem ergò, ut alios omittam, hanc eius
salsuginei saporis causam reddit, quòd exha-
lationes adustæ calore solis cum ea aqua per-
misceantur, amarumque reddant saporem.
Itaque cum semper calore suo sol dulces, ac
tenuēs vapores è mari excitet, crassos, &
adustos relinquat, fit, ut mare semper salsum
existat, non modò nunc, sed ab initio etiam
conditi mundi. Hoc in adustis terræ parti-
bus, aut in quibus calor vigeat, si aqua suf-
fundatur, usu evenire solet, ut ea quodam-
modo exsiccata fiat salsuginea. In humanis
item corporibus sudor eiusdem saporis est,
quoniam is humor calore decoctus crassescit,
& salatur. Hanc ipsam Aristotelis sententiam
Plutarchus videtur Platoniceis tribuere, qui
in libro de philosophorum decretis illos di-
xisse ait, quantum elementaris aquæ rigoris
vi ex aëre concretum sit, dulce evasisse: quan-
tum verò à terra ipsa suffitum existat, esse
salsum. Quæ reseatenus cum Aristotelis sen-
tentia coheret, quòd hic etiam adustionem
terræ mari subiectæ præter vaporum calore
solis exsiccatorum inustionē adducit: quam-
quam & vaporum ille abustionem addit, uti
salsuginei saporis causam præcipuam. Uter-
que ramen simul cum mundo salsum fuisse
semper mare inquit, indeque illius æternita-
tem probare vult Aristoteles. Nos autem,
qui

qui mundi ortum inducimus, & tuemur, sic falsum fuisse à Deo mare factum ad animantium in eo viventium utilitatem, aquæque maxime integritatem servandam dicimus. Hâc veluti prima causa statuta, sententia Aristotelis commodè cum ea potest coherere, dum solis fervori saluginis efficiendæ causam secundam assignamus. Si quidem ubi sol magis ardet, in eo loco salius mare est, ut ad orientem, cuius oceanum falsissimum esse Moses perhibet. Id ipsum experimento comprobatum est, quoniam in æstate marinam aquam falsiorem, quàm in hyeme esse constat: Cuius rei causa calori solis, uti dixi, assignanda est. Nec verò flumina, quanquam calore solis feriantur, falsa esse possunt, cum per terras assiduo decursu percolentur, mare autem in eodem loco quasi stagnans consistat, nisi ventis fortè concitetur. Superest, ut his expositis, causas marini æstus, aut fluviorum quorundam, tum diluviorum, & insularum, ac montium enascentium obiter inquiramus. Quâ in re multorum sententijs omiſſis, lunam in causa esse æstus illius censendum est. Ut enim ipsa decreſcit, moveturque ab ortu in occasum, sic mare quoque fluit, ac refluit: hic autem fluxus reciprocus æstus appellatur. Itaque dum luna supra horizonta maris paulatim sese effert ab ortu ad

meridiei terminum, fit fluxus: dum autem inde ad occasum declinat, refluxus. Eodemque modo fit noctu, luna ab occasu termino ad meridianum descendente, indeque ad alterum ortus terminum vergente. Fit quoque nonnunquam aestus maris solito vehementior propter magnam eiusdem lunæ ad mare ex motu proprio appropinquationem. Quid, quod in locis alijs majores sunt aestus, quam in alijs, & in quibusdam planè nulli, itemque euripi, ac multiformes aquarum reciprocationes. Quorum omnium natura difficilis cognitu cum sit, ad lunæ, ac syderum motus à Peripateticis refertur, & à Plinio, ac Seneca. Plato verò ad Tartari illius subterranei, de quo diximus, exundationem, ut eidem quoque tribuit Plutarchus. Sed ex his superior sententia de motu lunæ communior, receptaque magis est: quæ quamvis evidens adeò non sit, quin vacillet aliqua ex parte, vim habet, quod alia firmior non exstat. Huc pertinet Nili privata natura, qui in æstate inundat, nullam aliam Ægypto præter hanc eius alluvionem pluviam sentiente. cuius causam Seneca lib. 3. quæst. natural. ac Plinius, alijque philosophi, quos Plutarchus commemorat, reddere conati tandem è liquefactis nivibus in montibus Lunæ, unde ille oritur, fieri eam inundationem volunt.

Cæte-

Cæterorum etiam fluminum inundationis ratio aperta est, cum post magnas pluvias, aut nives liquatas exundare illa cernamus, quoniam ea omnis aquarum vis alveum influens flumen auget, ut inundet. Diluviorum quoque, quæ vocat Aristoteles κατεχλυσ-
 μος, & inundationum causa huiusmodi esse dicitur, quod cum magna vaporum in aquam liquefactorum vis in locum cavum coacta sit, nec inde possit effluere, fit, ut toto illo loco humectato, terra subsideat aquis. Cui rei si vel pluvie, vel inundationis, vel terræmotus terram aperientis vis accedat, magna solent diluvia exoriri: qualia fuisse olim in Græcia Aristoteles, auctoresque alij narrant. Sunt & huiusce rei causæ aliæ, ut maris irruptiones in loca vicina, quales in Hollandia Batavorum, & Zelandia fieri videmus: fluminum, ac lacuum inundationes in humilibus locis, fluviorum, aut maris inductiones: quas cum sæpè oportunitatis causâ homines faciant, perniciosæ admodum esse solent. Insularum præterea enascentium congestam alibi arenam maris æstu in causa esse Plinius, ac Seneca referunt. Idque consonum rationi est, & experimento compertum, cum in fluminibus id passim animadvertamus. Quæ verò de fluitantibus quibusdam insulis à Plinio, alijsque dicuntur, poetica mihi sanè

commenta, & aniles fabulæ videtur, cū terræ, quæ aqua natura gravior est, innatare nullo modo possit. Montium verò generatio duabus fieri de causis cum Georgio Agricola virò doctissimo mihi videtur, aut propter aquarum impetum locum aliquem excavantium, & eminentiorem eius partem aliam facientium, aut ob ventorum in arenosis locis acriter spirantium vim, à qua congestâ alicubi magnâ terræ mole, ut in Africæ desertis, eademque pluvijs, vel alluvione aliqua accedente constricta, primò colles, tum montes gignuntur. Atque hæc satis, quòd ad aquearum rerum generationem, mutationesque terræ attinet: nunc ad reliqua pergamus.

DE METALLORUM, AC FOSSILIVM CAETERORVM
CAVSIS.

Cap. VI.

EXPLICATA mixtorum imperfectorum generatione, quæcunque ex halitu è terris excitato gigni videbantur, reliquum est, ut fossilium omnium causas communes exponamus, non historias, aut singulorum naturas, id quod integram postulat tractationem. Fossilium autem tres sunt omninò formæ: aut metalla, aut lapides, aut terræ quædam

dam genera. Ad has permultas alias possumus redigere, quas in sequentibus commemorabimus. Ac de metallorum quidem generatione duæ diversorum auctorum sunt sententiæ, una Platonis, & Aristotelis, altera chymistarum. Plato in Timæo, qui breviter, & obscurè causas huius rei attigit, ex humore crasso, & viscoso metalla effici censet his verbis. Ex his verò, quas aquas fusiles appellavimus, quòd ex tenuissimis lenissimisque fit densissimum, &c. Quo in loco Pythagoreorum more metalla fusiles aquas obscurè nominavit, & ex his fieri tum aurum, tum reliqua censet. Hanc etiam Aristoteles in libris meteorum, sententiam sequutus, duo exhalationis genera similia iis, quibus de diximus, sub terris ponit, unum aridum, ex quo duræ res, ut lapides gignantur, alterum humidum, ex quo metalla, & cætera ferè omnia, quæ funduntur. Utrarumque rerum generationi non tam eiusmodi halicum subijcit, quàm terræ etiam crassæ, ac viscosæ particulas quasdam, quæ humore illo sive exhalatione conglutinata, indurataque frigore, vel metalla, vel lapides efficiant, prout maior, minòrve fuerint interni humoris copia. Eandem sententiam Theophrastus in libro de lapidibus, ac Peripaterici, & Academici omnes sequuntur. Altera est Chymistarum, id est, huius

ætatis infanorum hominum (neque enim antiquitus ulli tales fuere) qui duo metallorum omnium principia statuunt, Sulphur ut patrem efficiendi vi summa præditum: & argentum vivum ut matrem, quod eidem tanquam materia sese subijciat. Ex horum duorum mixtione metalla fieri omnia ita censent, ut natura semper aurum veluti perfectissimum gignere nitatur: quæ tamen frustrata vel ob inopiam sulphuris, quod in ejus metalli effectione abundare debet, vel argentum, vel stannum, vel simile aliud proferat. His addunt deinde cœlestium motuum virtutes, ac singulorum syderum vires peculiâres, quæ multum ad generationem cuiusque metalli conducant. Veluti solem auro præficiunt, lunam argento, stanno Iovem, plumbo Saturnum, æri Venerem, ferro Martem, argento vivo Mercurium. Sed quam hæc falsa sint, ne dicam cum poëtarum fabulis coniuncta, docere hoc loco minime necesse est, cum res ipsa per se nota, & explorata sit omnibus, qui in plerisque metallorum fodinis, ne ullum quidem aut sulphuris, aut argenti vivi vestigium, nec in horum venis metallum aliquod inveniunt, cumque præclare Georgius Agricola singulari vir eruditione ita locum hunc tractet, ut à me iterum tractari non oporteat. Cuius ne nos argu-

argumenta inculcemus , aut iis alia denuo addamus , quò illi defuisse quicquam ostendere videamur , ad veram de metallorum ortu , causisq̃ue sententiam exponendam accedendum est. Dux sunt efficientes non solum metallorum , sed reliquorum etiam fossilium causæ , vel ab Aristotele traditæ , calor , & frigiditas : his tanquam materia subijcitur succus quidam humectus , & viscosus terra pingui , ac tenui admixtus. Hic à calore initio quasi coagulatur , temperaturq̃ue : à frigore verò condensatus efformatur vel in auri , vel argenti , vel cæterorum metallorum aliquam formam. Ita fit , ut metalla humoris quasi congelati plus habeant , quàm terreæ concretionis : & quò sunt ea humidiora , eò sunt puriora , nobilioraque. Porro eorundem varietas ex succi illius humecti , quo constant , frigorisque condensantis diversitate provenit , non ex argenti vivi , ac sulphuris concretionem diversa , ut chymistæ absurdè imaginantur. Splendor etiam ipsorum ab humoris temperatione , æquabilitate , coloreque proficiscitur sine dubio , ut apparet. Qualis etiam metallorum humor fuerit , talis quoque color , & splendor existet. Frigus autem id efficit solum , quod humorem compactum à calore , & decoctum constringit , ac solidat. Adde quod illorum puritas ob

mixtionem terræ diversam fit: nam quæ puriora sunt, minùs habent terrenæ concretionis, ut aurum, & argentum: impuriora verò plus, ut æs, ac ferrum. Quod ipsum ex rubiginè metallorum intelligi potest, quæ nihil est aliud, quam terræ admixtio exsiccata. Unde ferrum in terram converti, si defodiatur, & ex terreis quibusdam quasi glebis illud liquatum in Cantabricis, cæterisque fodinis cernimus. Inde quoque fit, ut liquari metalla possint, quia humore constant: & ipsorum quæ humidiora sunt, ut aurum, argentum, faciliùs durioribus funduntur, ut ferro, & ære. Sunt autem metalla omnia potissimum frigidæ, humidæque naturæ, sed quæ calorem etiam, quo temperentur, ac siccitatem, qua cohereant, insitam habeant: itemque solida, densa, & ponderosa propter diversam humoris copiam, adeò ut quæcunque ex iis sunt humidiora, ut aurum, argentum, plumbum, siccioribus graviora sint, ut ære, ferro. Iam verò ad effectiorem metallorum loci, cœlique temperies maximè conducit: neque enim ubique illa nascuntur, nec in loco quocumque, sed alibi aurum, alibi argentum, alibi æs, alibi ferrum. Ad eorum autem ortum communiter tepor, & humiditas terræ, ac cœli temperatio necessaria est: his enim de causis metalla fiunt. Unde in
 Africa,

Africa, & cæteris siccis regionibus petrarè metalla gignuntur, quòd humor eiusmodi in locis non suppetat. Aurum autem, & argentum in calidis & humidis regionibus nascitur, reliqua verò in frigidis, quoniam illa calore præter humorem maximè perficiuntur, hæc frigiditate. Quanquam utrisque, quod ad duriciem, & coagulationem attinet, frigus necessarium est, sed alijs quidem magis, quàm alijs. Est & illud considerandum, metalla ita esse in fodinis, ut in arbore surculos, aut ramos, aut ipsam arborem in radice, hoc est, foveri, & alià fodinis ipsis veluti à radicibus, in quibus nitantur. Et quamquam educta propriam naturam constanter retineant, tamen quod ad fomentum, alimentumque sibi familiare attinet, ut alantur, augeanturve, carent quidem illo. Quamobrem non temerè eandem, quam stirpibus animam metallis tribuere posse videmur, cùm utraque à terris æquè alantur, æquè in ea radices agant, & crescant. Sed huiusce animæ forma suo loco magis demonstrabitur. Atque hæc satis de communi metallorum ortu, & natura. Eorundem formæ, ut quibusdam placet, sunt septem: aurum, argentum, æs, stannum, ferrum, plumbum, orichalcum: ut alijs autem, plures, hoc est, præter eas, quas diximus, formas, argentum vi-

vum, calybs, bisemutum, atque alia, quæ in libris de re metallica enumerat Agricola. Singulæ harum formarum diversas habent naturas, atque ortus. Nam aurum majori humoris parte, quàm terræ constat, illaque flava, densa, & benè calore compacta, non ex sulphure benè adusto, & mundissimo, quod ineptè excogitarunt Chymistæ. Idem in calidis potissimum regionibus nascitur, quoniam eius humor magis ibi calore decoquitur, ac defecatur. Eiusmodi fodinarum genera, & indicia varia sunt, quæ hoc loco recenseri à me ad alia properante non possunt, cum eadem accuratè Plinius 33. lib. de nat. metallorum, & hac ætate Georgius Agricola elegantissimè descripserunt. Argentum verdè ex humore non tam ex calfacto, aut puro gignitur, cum & frigidius sit, & in locis frigidis nascatur: cumque, dum funditur, aliquid ex eo depereat, quod in auro minimè fit, quodque illius impuritatis magnum est indicium. Æs etiam terræ mixtione, quàm humore constare magis videtur, cum levius sit, ac rubigine facilius obducatur, & dum coquitur quasi sordes quasdam relinquat. Idèò in frigidis, & aridis locis, ut in montibus lapidosis, nascitur frequenter. Idem autem cuprum vulgò appellatur, quod in Cypro insula magna eius copia proveniat.

Stan-

Stannum humore admodum frigido, nec omninò decocto constat, ideoque molle est, ac frigidum, leveque, & rarum. Nascitur autem in humectis regionibus, & frigidis, ut in Anglia, quæ huius venis maximè fecunda est. Ferrum humore minimo, terræ autem portione magna concretum est. Idemque in locis lapidosis, ac frigidis plerunque gignitur. Quæ res efficit, ut leve, porosum, nigrum, inæqualéque sit ferrum, quoniam in eo humor inæqualis est, & siccitatis maiori copiâ abundat: Huius formæ est calybs, id est, ferrum propter maiorem humiditatem, magisque decoctam densius. Quod proindè in calidioribus regionibus oritur, quoniam majori ut æstus decoquitur illius humor. Plumbum ex humore crasso, sed impuro, maleque decocto gignitur, ideoque molle, nigrum, grave, ac densum admodum est. Idemque in locis frigidis, & humectis nascitur plerunque. Cuius etiam diversæ formæ recensentur, pro humoris, quo constat, sinceritate calorem diversum efficiente: aliud enim est album, aliud nigrum, aliud cinereum: quorum naturas, & causas diligenter persequitur Agricola. Iam orichalcum, quod eiusdem naturæ cum ære esse videtur, humecta quoque constat natura, sed terrea, & impura, majori tamen calore decocta. Ipsum autem ære purius

purius est, ideoque nitidius, durius tamen propter maiorem decoctionem. Utrum verò idem nativum fuerit unquam, an factitium, dubium est: hodie tamen ex ære percolato fit. Quapropter è genere metallorum mixtorum esse videtur. Argentum vivum, quod Græcis *ὁδραργυρος* dicitur, humidioris quoque naturæ est, quam siccæ, itemque æreæ: qua de causa inconstans est, & liquidum. Idem gigni videtur ex aquoso humore, ac viscoso, & calore quodammodo coagulato. Huius duæ formæ sunt, una nativi, quod in venis suis fluit, metallis aliis nonnunquam adiunctum: altera factitij, quod è minio decocto exprimitur: quale in Castulonensi saltu non longè à corduba ad oppidulum Almadenum colligitur. Utriusque generis naturam, & usum Plinius diversis commemorat in locis. His formis metallorum Agricola bise-mutum, id est, cinericium argenteum addit, quod propter admixtas terræ sordes aliquas eius coloris sit, ita tamen ut ipsum amittat igne purgatum. Ac de metallorum quidem communi ortu, & natura hæc satis: reliqua apud Agricola in libris de re metallica diligens lector requirat. Secundum genus eorum, quæ terris effodiuntur, est lapidum, de quibus hoc loco etiam, sed breviter, ac generatim dicendum. Lapidem omnes eandem
ferè

ferè habent generationis causam , & formam , quam metalla , nisi quòd ob materiæ temperationem diversarum formarum fiunt. Materia quidem eorum est succus humectus , & crassus spontè lapidescens , causæ verò efficientes calor , & frigus , ille quidem , dum ipsum succum excoquit , & consolidat , uti nos etiam lateres ex argilla confici videmus. Idem autem succus in terræ venis inclusus familiari sibi alimento , id est , siccâ exhalatione , ut Aristoteles vult , augeatur , aliturque. Et cùm ille ob interni caloris vim excrescat , frequenter in lapidosus locis exoriri solent lapides , nonnunquam etiam propter aquarum rivulos , aut in metallorum fodinis. Quò fit , ut metalla , & lapides : Platonis , & Aristotelis , ac Theophrasti sententia eodem planè modo gignantur , atque in iisdem ferè locis : nisi quòd illa humoris plus habent , & ab humido halitu fiunt : hi siccitatis , & à sicco. Atque hic sanè est lapidum omnium communis ortus. Jam verò iidem inter se diversæ tum magnitudinis , tum qualitatis , & perspicuitatis , caloris , levioris , molliciei , duriciei existunt propter diversam materiæ , quâ constant , temperationem. Nam si succus ille lapidescens copiosus sit , & in terræ cavernis amplis inclusus , magni fient lapides ,

contra

contrà parui , si paucus , & in angusto abditus. Item si humor eiusdem succi perspicuus , aut coloris cuiusque fuerit , ut albi , flavi , viridis , nigri , lapis etiam eiusdem erit , quoniam idem humor à calore decoctus condensatur , & à frigore coalescit. Cui rei prodest aquarum lapides eluentium varietas , locique , in quibus illi fiunt , temperatio : quemadmodum calidis in regionibus illos oriri ferè semper videmus , quia calor nimirum ibi succum lapidescentem magis exsiccatur , & purgat. Ex huiusmodi succi calore desiccati , ac frigore densati concretionem molliciem , duriciemque fieri perspicuum est , cum magis minusve humor illius constringitur , tum levorem , aut asperitatem , prout humor idem æqualiter , aut inæqualiter fusus sit in lapidis generatione , tum perspicuitatem , aut obscuritatem contrahere. Jam verò quod ad alimentum capiendi vim , & radices , in quibus lapides sunt , attinet , eadem planè de ijs , quam de metallis diximus , cogitanda sunt : quando eodem ferè modo gignuntur , & iisdem in locis , nisi quod illi ob siccitatem , quàm maximè constant , & leviores , & minores sunt , & fundi , liquarique nequeunt. Hæc igitur est summa lapidum cuiusque generis effectio , quàm cognitam , facile formas omnes ,
quæ

quæ penè innumerabiles sunt , agnoscere licebit, vel ex Plinio, & Theophrasto, vel ex Agricola, qui hac in re omnes longè superavit. Sub tertium fossilium genus à nobis suprâ relatum diversæ cadunt terræ, atque mixtorum formæ, mediæ naturæ inter lapidides, & metalla. Quorum cum varia, diversæque natura sit, nulla certior ipsorum effectiois ratio reddi potest; quàm quòd humore tanto non constant, ut metalli formam capere possint, præsertim cum iis calor, & materiæ concretio congruens desit, nec tantâ rursus content siccitate aut calore, ut lapidescant omninò. Hujusce generis sunt multa, quæ fundi, veluti metalla cernimus, ut vitrum, nitrum, alumen, bitumen, sulphur, & ea omninò, quæ cum nequeant liquari, sicuti lapides, humidiora tamen his mollioraque sunt, atque è terris, ut illi, pariter eruuntur: veluti sal, minium, auripigmentum, sandaraca, gypsum, marmor, chalcitis, aliæque generis ejusdem: quorum longior explicatio ab iisdem, quos suprâ retuli, auctoribus traditur: nos tamen communi hâc earundem generatione contenti nihil ampliùs addamus. Hactenus Plato, & Aristoteles, quod ad communes horum fossilium causas attinet, inter se consentiunt, si paucula illa, quæ
uter-

uterque, alter in Timæo, alter in meteorum libris descripsit, perpendamus. Est etiam consentaneum, ut è sacrorum scriptorum sententia, quid sit statuendum, obiter annotemus. Oriri quidem ex humecta natura & metalla, & lapides, atque è terræ visceribus erui, lapides quidem ex lapidosiis locis, metalla ex humectis, utraque autem ex iisdem sæpe, uti antea docuimus, præclare Iob indicat his verbis: Habet argentum venarum suarum principia: & auro locus est, in quo conflatur. Ferrum è terra petitur, & lapis solutus calore in æs vertitur. En quomodo metallorum ortum describens, venas quasdam, in quibus illa cōflentur, id est, ex humecta natura efformentur, breviter quidem ille, sed aperte indicat? Idem paulò post de lapidum origine hæc. Sapphyri locus est in eius lapidibus, habetque pulveres auri, id est, in lapidosiis quoque terræ locis Sapphyri, atque adeò lapides alii preciosi gignuntur: in iisdemque sæpè aurum è pulveribus sine gleba conflatur. In quo humectam aliquam naturam subesse necesse est. Atque hæc breviter ad confirmandam superiorem Philosophorum sententiam: nunc ad mistorum perfectorum, quæ supra terras sunt, explicatio-
num accedamus.

SEBASTIANI FOXII
MORZILLI HISPALENSIS,
de naturæ Philosophia, seu de
Platonis & Aristotelis
consensione,

LIBER QVARTVS.

Axiomata.

1. Omne simile gignit sui simile.
2. Omne corpus sensu percipitur.
3. Quidquid vivit, alimento, ut vivat, indiget.
4. Omnia animalia appetitu propagandi sui simile ducuntur.
5. Omnia animalia suo simili copulari expetunt.
6. Omne animal sui expetit conservationem.
7. Animal omne, aut est mas, aut foemina, aut neutrum.
8. Omnia composita compositis aluntur.
9. Mas habet vim agendi, foemina patiendi.
10. Corpus omne ex semine aliquo constat.
11. Omne animal sentit, aut dolorem, aut voluptatem.
12. Quicquid tactu caret, animal non est.
13. Omnis mas diutius vivit, quam foemina.
14. Omne animal generans, ac patiens quinque sensibus est præditum.
15. Omne corpus concretum finem habet concretionis.
16. Omne corpus aut simplex est, aut compositum.
17. Omne vivens instrumenta, per quæ alatur, habet.
18. Omne vivens necessariis ad id instrumentis constare debet.
19. Omne corpus ab anima movetur, & vivendi vim habet.
20. Nullum animal carere sensu, alimento, motu po-

Q

Defi-

Definitiones.

- 1, Animal est corpus animâ præditum,
- 2, Animatum est quiddam à seipso movetur.

Hypotheses.

- 1, Prima animalium actio est motus,
- 2, Ad omnem generationem apta instrumenta accommodantur.

DE COMMUNI PERFECTORUM
CORPORUM DIVISIONE,
AC DE STIRPIBUS
PRIMUM.

Caput I.



ACTENVS de mistrorum omnium corporum tam perfectorum, quàm imperfectorum effectione, ac naturis (eorum præsertim, quæ ex halitu terræ gigni videbantur) dictum est. Sequitur, ut de perfectis iis mistis differamus, quæ supra terram sint nobis conspicua, & nota: cuiusmodi sunt stirpes, animalia, & mediæ inter illa naturæ Zoophyta. Impri-
mis id est perspicuum ex definitione 1. lib. 3. corpus omne id esse, quod triâ constet
magni-

magnitudine : itemque perfectum ex definitione 4. eiusdem id esse, quod partibus omnibus naturæ suæ accommodis constet: Est verò omnis corporis proprium, quòd quatuor è qualitatibus construitur, quòdque initium, & finem suæ concretionis habet per 15. axioma, si singula corpora spectemus, si verò speciem eorum quanque, diu durant, atque adeò simul cum ipso mundo. Plures his corporum proprietates addere præter eas, quæ breviter in axiomatibus, definitionibus, hypothesebusque collectæ sunt, minimè oportet, cum singula diversa quædam habeant ab aliis formis speciei suæ peculiaria, quæ obiter annotanda erunt. Illud etiam principio admonendi lectores sunt, antequam singula persequar, nos hîc de corporum omnium effectione, natura, viribusque differere, non quatenus animata sunt, sed quatenus corpora, nam de anima latius in sequentibus disputabitur. Corpora item omnia per 16. axioma simplicia sunt, vel concreta è simplicibus. De illis quidem secundo in libro dictum est, de his autem partim in superiori, partim in hoc quarto differemus. Eadem præterea in hæc quatuor genera referri possunt (naturalia inquam, non artificialia corpora, quibus de nullus à me hîc sermo habetur) in stirpem, fossilia, animal, Zoophyrum. Fossilium quidem

dem naturam, effectiōemque, communem abundē, ut arbitror, & ut Phisici munus postulat, in libro superiori exposui. De his autem tribus posterioribus stirpe, animali, Zoophyto differendum in hoc libro videtur, non ut singulorum historias, & rationem peculiarem complectar, (id quod tractationem postulat longiorem) sed ut communes eorum causas, & Phisicorum muneri congruentes reddam. Primum ergo de stirpibus, tanquam de genere corporum mixtorum minus perfecto agamus, de animalibus, & Zoophytis suo loco deinceps dicturi, quatenus nimirum hæc corpora sunt, non quatenus anima prædita: id siquidem alterius est tractationis. Stirps, quæ *Φύσις* Græcis dicitur, est corpus mixtum, è terris nascens, sensu carens, ac virescens. Descriptio quidem hæc, etsi universam stirpium naturam minimè complectitur, tamen utpote simplex, & brevis à nobis retineatur. Stirpes autem omnes communiter quatuor qualitatibus, uti cætera mixta corpora per 1. axioma libri 3. constant, humido, calido, sicco, frigido. Peculiariter tamen humoris plus habent, quàm cætera, aut metalla aut animalia. Est quoque proprium earundem, uti Platoni, Aristoteli, Theophrasto, & Galeno placet, ut ab interna natura veluti ab anima gubernentur, illamque habeant

beant ceu intimum sui principium, ita tamen ut anima vegetatrice duntaxat sint præditæ, quâ alantur, augeanturque. Iisdem quoque Galenus has quatuor, quas animalibus, facultates attribuit; attractricem, qua alimentum adducant; retentricem, quâ retineant adductum; alteratricem, qua illud in sui essentiam commutent; expultricem, qua egerant excrementa. Quapropter Plato animalia vocare ipsas non dubitat, quoniam ijs facultatibus, quæ communes illis sint cum animalibus, consent, quoddamque voluptatis, ac doloris sensum quodammodo, in congruo alimento vel capiendo, vel incommodo expellendo, habere videantur. Quam itidem sententiam Galenus in libris de placitis Hippocratis, & Platonis sequi videtur. Contrà verò Aristoteles non animantes, sed animæ solum participes esse vult stirpes, quoniam non quidquid anima constat, animatum esse censeret contra Platonis sententiam, qui quidquid animam, & corpus habet, animal appellat. Verum hac de re latius suo loco. Redeamus ad stirpium naturam describendam. Cum ergo his viribus omnes stirpes præditæ sint, eadem hoc modo gignuntur, uti Galeno videtur. Terra (quæ, ut venter in animalibus, ita in stirpibus est) humida esse debet, ut semen, qualecunque illud sit, concipiat.

Hoc calore naturali emollescens, & intumescens propter humorem illi è terra accedentem rumpitur, quoniam illius mador in aërem calore decoctus abiit. Germen verò ipsum, quò semen est ruptum, protenditur, molle quidem ac tenue principio: tamen postea firmitus, & crassius effectum: cuius quia pars una aëreæ naturæ particeps est, sursum ascendens per terræ meatus erumpit, altera verò, quia terrestris, & crassa, in terris residet. Atque ita fit, ut unus, idemque locus ille, unde radix initium, & caudex habuere, naturalis stirpium quasi generationis fons sit. Communem hunc earum omnium ortum terræ humor fovet calore decoctus, & ab interna ipsarum natura adductus. Partes verò (siquidem per axioma 17. utpote viventes habere debent alimenti instrumenta stirpes) quibus alimentum idem capitur, sunt radix, quæ tanquam os capiti animalis adiunctum est, terra verò ipsa sicuti venter alimentum illis congruens suppeditat. Caudex etiam stirpium veluti corpus est, quod fibris quibusdam tenuissimis distinguitur, ut congruens alimentum capiat: excrementa verò earum sunt folia, semen denique fructus, vel semina vaginulis inclusa, prout cuiusque forma fuerit. Hæc igitur est communis stirpium natura ex Aristotele, Platone, Theophrasto, aliisque desum-

desumpta. Iam verò earundem primæ species tres esse omninò dicuntur, arbor, frutex, herba. Arbor, stirps est ramis, surculis, foliisque constans, caudice simplici è terra sese efferens, cuiusmodi sunt arbores omnes. Frutex, ramosa quædam stirps caudice multiplici assurgens, ut hederæ, junci, eiusmodique alij frutices. Herba denique, stirps folijs quasi ramis distincta, quæ caule veluti caudice, aut tenuissimis surculis assurgit, ac semen in caule fert, ut urtica. Ad hæc tria genera formæ omnes stirpium omnium redigi possunt, quarum naturas singulas, ac historias à Plinio, Theophrasto, ac reliquis peti oportet. Habent & stirpes omnes communia quædam membra sicuti animalia: radicem, quæ uti diximus, quasi os est, per quod alimentum adducitur: caudicem, vel caulem quasi corpus, cui radix proximè ut os ipsum adhæret (quarum illa propria arborum, & fruticum, herbarum hæc est) ramos, qui à caule, caudicéve multiplices diffunduntur, & uti artus discernuntur à reliquo corpore: surculos, qui uti articuli, aut digiti in homine sunt. Adduntur his partes aliæ communes; ut cortex, lignum, medulla seu cor internum, per quod alimentum dividitur in partes: folium, flos, pediculus: unde fructus pendet clavicula intorta, vel recta, muscus, semē, fructus, nervus, caro, vena:

Hoc calore naturali emollescens, & intumes-
cens propter humorem illi è terra acceden-
tem rumpitur, quoniam illius mador in æ-
rem calore decoctus abiit. Germen verò ip-
sum, quò semen est ruptum, protenditur, mol-
le quidem ac tenue principio: ramen postea
firmius, & crassius effectum: cujus quia pars
una aëreæ naturæ particeps est, sursum ascen-
dens per terræ meatus erumpit, altera verò,
quia terrestris, & crassa, in terris residet. At-
que ita fit, ut unus, idemque locus ille, unde
radix initium, & caudex habuere, naturalis
stirpium quasi generationis fons sit. Com-
munem hunc earum omnium ortum terræ
humor fovet calore decoctus, & ab interna
ipsarum natura adductus. Partes verò (liqui-
dem per axioma 17. utpote viventes habere
debent alimenti instrumenta stirpes) quibus
alimentum idem capitur, sunt radix, quæ tan-
quam os capiti animalis adiunctum est, terra
verò ipsa sicuti venter alimentum illis con-
gruens suppeditat. Caudex etiam stirpium
veluti corpus est, quod fibris quibusdam te-
nuissimis distinguitur, ut congruens alimen-
tum capiat: excrementa verò earum sunt fo-
lia, semen denique fructus, vel semina vagi-
nulis inclusa, prout cuiusque forma fuerit.
Hæc igitur est communis stirpium natura ex
Aristotele, Platone, Theophrasto, aliisque
desum-

desumpta. Iam verò earundem primæ species tres esse omninò dicuntur, arbor, frutex, herba. Arbor, stirps est ramis, surculis, foliisque constans, caudice simplici è terra sese efferens, cuiusmodi sunt arbores omnes. Frutex, ramosa quædam stirps caudice multiplici assurgens, ut hederæ, junci, eiusmodique alij frutices. Herba denique, stirps folijs quasi ramis distincta, quæ caule veluti caudice, aut tenuissimis surculis assurgit, ac semen in caule fert, ut urtica. Ad hæc tria genera formæ omnes stirpium omnium redigi possunt, quarum naturas singulas, ac historias à Plinio, Theophrasto, ac reliquis peti oportet. Habent & stirpes omnes communia quædam membra sicuti animalia: radicem, quæ uti diximus, quasi os est, per quod alimentum adducitur: caudicem, vel caulem quasi corpus, cui radix proximè ut os ipsum adhæret (quarum illa propria arborum, & fruticum, herbarum hæc est) ramos, qui à caule, caudicéve multiplices diffunduntur, & uti artus discernuntur à reliquo corpore: surculos, qui uti articuli, aut digiti in homine sunt. Adduntur his partes aliæ communes; ut cortex, lignum, medulla seu cor internum, per quod alimentum dividitur in partes: folium, flos, pediculus: unde fructus pendet clavicula intorta, vel recta, muscus, semē, fructus, nervus, caro, vena:

quæ omnia ut in corpore animato , sic tanquam ad vitam necessaria in stirpibus considerantur per 18. axioma. Ex iisdem præterea aut humor aut liquor , aut lacrima solet effluere , id quod in multis earum sæpè cernimus. Præterea quia per 1. axioma. Cuncta sui simile procreant , stirpium aliz sponrè nascuntur , aliz semine priùs sato , aliz ex aliarum radicibus veluti surculi pullulantes, aliz avulsione , ut frutices quidam , aliz ramo , aliz surculo , aliz trunco , aliz ligno abscisso , & confito. In quibus omnibus humor aliquis internus inesse debet , ut cùm seruntur , à terræ humore adiuventur , & pullulent : nam siccz si sint , nullo modo poterunt excrecere. Quoniam præterea stirpium (siquidem per 3. axioma , lib. 3. concretioni partium sui simplicium debent esse similes) diversæ sunt facultates aut caloris , aut frigoris , aut siccitatis , aut humiditatis , quibus aliquæ potissimum excellent , (tamen si reliquas habeant adiunctas) sic à medicis quatuor gradus cuiusque pro mixtione rerum omnium statuuntur : primus , in quo calor , humor , siccitas , frigiditas vix sensu percipi potest : secundus , in quo eadem qualitates sensu percipiuntur facilius : tertius , in quo manifestius , ac efficacius : quartus , in quo mirabilem illarum vim exerunt. Ex huiusmodi quatuor

tuor ordinibus singula esse vel in primo, vel in secundo, vel in tertio, vel in quarto gradu calida, frigida, sicca, humidiorve dicuntur. Hæc igitur generatim de stirpibus docuisse satis sit. Quod verò ad earum species attinet, quæ penè sunt infinitæ, hac brevi earum divisione contenti simus, ut ipsarum aliarum sylvestres sint, quoniam in sylvis, aut agris frequenter nascantur, aliarum hortenses: quod in hortis: aliarum montanarum, quod in montibus: aliarum palustres, quod in paludibus: aliarum fluviatiles, aut marinarum: aliarum arenosarum. His generatim statutis, faciliè erit descriptiones, naturas, facultates, originem, loca, tempora singularum agnoscere ex Theophrasto, Plinio, Galeno, Dioscoride, cæterisque auctoribus, qui hac de re copiosè scripserunt: nos enim hîc tantum communes causas tradimus cum Aristotele, ac Platone, qui brevi huius rei tractatione contenti sunt. Videamus nunc, quatenus isthæc stirpium effectio cum sacris literis congruat (nam de Platonis, & Aristotelis collatione nihil apertè efferre possumus, præter paucula quædam, sparsim in locis diversis annotata, quæ ad animam stirpium, seu naturam intimam spectant, de quibus in loco de anima differemus.) Stirpes igitur, omnes à terra Dei jussu exortas, ob inditam illi naturam, ex Originibus Moscos discimus.

mus. Nam cum ait : Germinet terra herbam virentem, & facientem semen, & lignum pomiferum faciens fructum juxta genus suum, cuius semen sit in semetipso super terram : intelligimus quidem & naturam stirpes creandi terris inditam à Deo fuisse, solo eius verbo, ac nutu, & universas stirpium formas tunc in exordio mundi in se vim sui seminis propagandi accepisse. Unde fit, ut terra quasi parens natura stirpium omnium sit, idque Dei mundum creantis iussu. Hoc communiearum ortu statuto, facile universa sententia, quam supra posuimus, stabilietur, præsertim si eisdem ex scriptis alia, quæ in eam rem sese offerunt, testimonia proferantur: quæ brevitatis à me causa omittuntur.

DE ANIMALIUM DIVISIONE,
AC NATURA COMMUNI,
ET FORMIS.

Caput II.

PROXIMVS iis est gradus generationis animalium: Quæ tametsi descriptione aliqua brevi nequeant comprehendi propter eorum innumerabiles formas, & naturas, conabimur tamen, ut fieri poterit, rem totam paucis quasi finibus terminare, quemadmodum in descriptione stirpium, quæ non minus

nus latè patet, fecimus. Animal igitur quod sit ex definitione 1. hujus libri compertum est. Animalia enim omnia communiter appellantur ea, quæ corpus sensu aliquo, & vitâ præditum habent. Huiusce generis variaz & innumerabiles formæ sunt, quas omnes hâc brevi, sed adumbratâ partitione complecti poterimus, ut animalium alia sint terrestria, alia volatilia, alia aquatilia: In hanc divisionem infinitæ aliaz species cadunt, quas qui requirat, ab Aristotele, Plinio, ac Æliano, cæterisque hujus rei auctoribus petere debet, nos enim hîc tantum communia formæ cuique animalium generi trademus, hoc est, ortum, vires animæ, corporis structuram, & partes, generationem, ac propagationem generis. Qua de re priusquàm aliquid efferam, quæ sunt toti animantium generi communia explicabo. Principiò id constat ex definitione 2. animatum id esse, quod à seipso moveatur, itemque animal omne corpore, atque animæ genere aliquo præditum esse debere. His, & eiusmodi aliis, quæ inter axiomata, ac definitiones, & hypotheses posita sunt, statutis, nemo dubitat, quin per 19. axioma corpus quasi materia quædam animæ sese subijciat, & ab illa tam vitam, tum alimentum, tum sui conservationem, tum sibi simile propagandi vim internam, accipiat.

piat. Quæ omnia universo animantium generi tributa à Deo sunt, & quia vivens nihil carere alimento potest per 3. axioma, & quia omnia propagandi sui simile appetitione ducta, suo simili ad eam prolem suscipiendam miscentur naturali impetu impulsa, per 5. axioma. Et quidem corpus naturâ rude, & inutile vim solùm instrumentariam sortitur, ut animam vehat, anima verò ipsa veluti regina illud movet, quod primum in animalibus est per 1. hypothesein, tum vegetat & alit, dein sensus reddit particeps. Atque hæc est extrema animalis perfectio, homine uno excepto, cui maior inest vis, & sagacitas rationis. Hanc duarum rerum dissimilium, animæ, inquam, & corporis compaginem nullo modo describere possumus, quin utriusque mentio fiat frequenter. Ideò tamen institutum nostrum in hoc libro sit, corpoream duntaxat concretionem, non animæ vim indicare, danda quidem nobis erit venia, si huius quoque breviter mentionem fecerimus. Ad omnium ergò animalium, perfectorum præsertim, naturam rectè noscendam has omnes animæ vires, vel earum aliquas illis inditas esse, statum sit; mortricem, vegetatricem, altricem, auctricem, sensutricem. Quæ verò, aut quales hæ sint facultates, in libro sequenti docebimus. Corpus omne
ani-

animatum his saltem esse viribus præditum, quas dixi, oportet, idemque varijs ad utendum ut instrumentis, ita membris munitum. Ipsum autem corpus è quatuor constat qualitatibus, diversaque harum temperatione, quandoquidem omnia corpora concreta è quatuor sunt elementis per 1. axioma superioris libri. Antequam ergò de hac corporum animatorum communi compositione, ac partibus edisseram, illud obiter imprimis à Philosophis controversum explicabo, animalium ne species æternæ sint, an caducæ, itemque animalia perfecta ne sint, an imperfecta orta, ut fœtus nunc procreari cernimus? Certè Plato, & Aristoteles, qui mundi æternitatem confirmarunt, animalia quoque cum illo æterna esse putaverunt, nullumque illorum primum ortum re verâ fuisse, quamvis in Timæo Plato ratione quâdam effecta animalia, sicuti mundum dixit, quatenus ad ideam quadripartitam mentis suæ Deus, (quem ille animal universum in se ideas animantium comprehendens, sicuti mundus universus animalia in se universa ad eius exemplar continet, appellat) ad ideam, inquam, inspiciens quatuor animalium genera produxerit, deos juniores sive animos cœlestium, volucres seu aëreos animantes, aquatiles, ac terrestres. Quemadmodum enim in mundo

mundo hoc sensili quatuor elementa ad imaginem mundi intellectilis, qui in Dei idea fuit, continentur, sic quatuor ab illo iis respondentes animalium formæ ponuntur, ut ad perfectionem huic nihil deesset, quin omni ex parte animantibus esset confertum, ut eius exemplar horum ideis. Quapropter, & Deum ille, & Deos Iuniores, sive cœlestes, & volucres, & aquatilia, & terrestria esse animalia putavit, sed eorum alia incorporea, & æterna, ut Deum, cœlestes deos, dæmonas: alia corporibus vestita, ut homines, aves, pisces, ac cæteras terrestres animantes. Quorum sanè animalium naturam, & effectiorem ex Platonis sententia, in commentariis nostris, abundè descripsimus. At verò Aristoteles, qui mundum omninò æternum fecit, nullam huiusmodi originem animalium imaginariam agnovit; sed eam, de qua loquitur in libris de animalium generatione, & historia, non primam esse omnium formarum; sed singulorum individuorum peculiarem existimat. Atque hæc de communi animantium ortu dicta sint. Porro alij, qui mundum factum dixêre, animalia quidem initio imperfecta extitisse, nec omnibus suis partibus prædita inquirunt, paulatim verò excoli, ac perfici cœpisse, quousque absolutam sui effectiorem sint adepta. Huius sententiæ fuêre

fuere Empedocles, & Anaximander, aliique plures, quos refert Plutarchus in lib. de Philosophorum decretis. Utrorumque autem opinio quam sit absurda, docere animus non est, cum è sacris literis omnia animantia post mundi exortum nata esse, eaque perfecta suis partibus noscamus. Quod verò illa in quatuor genera cadant, & ad quatuor idearum imaginem sint facta, quod Plato censeret, eateenus verum est, quòd tria ex ijs genera, aëreorum, inquam aquatilium, & terrestrium animalium effecta à Deo ad sui ideam dicuntur: quatenus autem æterna esse cum mundo, aut ad ideam animalis exemplar genita, ijsque dii juniores, tanquam animalia adduntur, ac Deus animal censetur, omninò falsum est, & absurdum: cum in Originibus Moses Dei jussu aquatilia omnia ab aquis, & volatilia, tum terrestria, secundum genus suum, singula orta fuisse dicat. Verum hæc satis ad primam animalium originem explicandam: redeamus nunc ad ipsorum communem naturam, divisionem, & partes, ut instituimus. Diximus animalia omnia corpore, atque animo constare, illo quidem ut vehiculo, hoc ut præfecto, & gubernatore. Quod ipsum, ut magis explicemus, per quatuor illa causarum genera, quæ lib. i. retulimus, inducatur. Causa quidem efficiens animalium, Platon,

toni, Deus esse apertè dicitur in Timæo: sed quoniam eorum alia immortalia sunt, ut homines quemadmodum suo loco docebimus, alia mortalia, ut bruta animantia, animas quidem à Deo factas putavit, quòd verè immortales existant, corpora verò à dijs junioribus, quoniam nihil Deus nisi immortale possit efficere, cum ea ipse ad sui ideam, quæ æterna est, facere necessariò debeat. Hæc ergo de causa ille Deos juniores, dæmonas, animasque humanas, à Deo, inquit, ab æterno unà cum mundo factas esse: corpora verò, atque adeò concretionem aliorum animantium, quæ sunt dissolubilia, à dijs junioribus, qui nihil æternum, cum nati sunt, efficere queant. Eandem sequuti sententiam Marcion, Cerdo, Manichæi, fanaticique alij homines in absurdissimos errores prolapsi sunt, quos hoc loco referre non est necesse. Aristoteles ad naturam, & maris, ac fœminæ vim animantium ortus reducit. Quam ipsam sententiam Galenus in lib. de naturali. facult. sequutus videtur, dum animalia ab anima & natura, stirpes à natura solùm gubernari ait. Nos tamen auctoritate sacrarum literarum adducti, atque principijs antea statutis, primam omnium animantium efficientem causam extitisse Deum confirmamus, qui solo verbo cuncta fecit: secundam, verò tum naturam,

naturam, id est, præscriptum illud, & vim ab eo rebus tributam (quæ cum Basilio commodè natura potest appellari) tum etiam tharem, ac fœminam in unoquoque genere, quæ ut animal ædatur, necessario debent copulari. Iam verò finis generationis animalium, rationis quidem expertium, homo est, hominum autem, Deus ipse. Nam ad humanos usus non solum animantia omnia pertine-
re, sed etiam universitatem, nobiscum & Aristoteles, & Plato fatentur; ille quidem in Ethicis, dum nos rerum fines quodammodò esse inquit, hic in locis diversis. Nostri verò ortus finem in Deo poni fœlicitatis expertio declarat, quæ cum ab illo expetenda sit, nos etiam ob ejus causam esse natos necesse est, id est, ut illi inserviamus, & fruamur, sed tamen hujus rei explicatio aliò pertinet. Materia denique animalium vel prima est, vel secunda: prima quidem semen ex animalium procreantium coitû emissum, cujus diversæ sunt formæ pro cuiusque animalis specie: secunda verò corpus jam effectum, & absolutum: quod quia se animæ subijcit informandum, materies appellatur secunda. Et quamvis ne semen quidem materiam primam dici rectè quis putet, cum ea verè sit prima, de qua lib. i. dictum est, tamen hîc de privata generatione differentibus proxima

R

causa

causa est, non remota investiganda, id est, quæ propinqua est animalium ortus materies. Postremò generationis instrumenta sunt mas, & fœmina in omnibus animantibus: qui etsi efficientes causæ nominari possint, quatenus tamen ij solùm quasi semen conferunt, natura verò ipsa, sive Deus illud fovet, & informat, instrumenta dici potiùs videntur. Hæ igitur sunt communes omnium animantium, perfectorum saltem; causæ, quamvis eorum nonnulla ex putrefactione, & occultâ quâdam aliâ vi effici videamus: de quibus tanquam singularibus hîc nullus est sermo. Iam si cunctorum generationi cõmunia quædam addere libeat, quæ aliqua ex parte in superioribus attigimus, quoniam animâ, & corpore animalia constant omnia, idemque corpus ex aliquo fit semine per axioma 10. necesse est, ut membra ijs quasi vehicula animi adjungantur: tum coctionis, vegetationis, recipiendi alimenti, ejus distribuendi, motionis, sensuumque instrumenta, quando per 20. axioma nec sine motu, aut alimento, sensûve animal esse potest. Communia hæc animantium generi universo sunt, etsi in quibusdam perfectiora sint eadem, quàm in alijs, ut postea de ipsis dicemus. His propositis, pleniorẽ superiori aliquam divisionem animalium addamus, in quam
prout

prout fieri possit, formæ, si non omnes, at pleræque conijciantur. Esto igitur huiusmodi partitione ex Aristotelis libris de partibus animalium collecta. Animalium aliud est pedestre, aliud aquatile, aliud alatum. Eorundem, aliud multipes, aliud quadrupes, aliud bipes. Item aliud scamigerum, aliud corticosum, aliud sanguineum, aliud exanguæ. Hæ quidem formæ, tametsi communes adeo non sunt, ut omnia comprehendant, pleræque tamen complectuntur: quibus facile quisque quod experimento, historia, auditione cognorit, poterit adiungere: commodum est enim, & artis rationi congruens, generalia semper assumere, non singularia, quæ sub certam non cadunt rationem. Et quanquam hæc posterior partitione in tripartitam illam divisionem supra propositam incidere potest, tamen quia non à loci, sed ab interna natura, & proprietate animalium sumitur, præferenda illi est. Hoc etiam è literis sacris non abs re potest confirmari, cum de animalium ortu Moses edisserens primò cete grandia, & animam omnem viventem, & motabilem in aquis, tum omnia volatilia, dein die sexto jumenta, reptilia, ac terræ bestias exortas esse dicat. Quo in loco non per elementorum loca, nimirum aërem, aquam, terram animantium genera solùm distinxisse

videtur, cum volatilium, ac non aëreorum, & motabilium, sive natantium, ac viventium in aquis, non aquatilium, & jumentorum, reptilium, ac terræ bestiarum, non tantum terrestrium fecerit mentionem. Sed hæc quidem hætenus de animalibus. Reliqua in singulorum formis commodius explicabuntur.

DE HUMANI CORPORIS NATURA, ET PARTIBUS
PRÆCIPUIS.

Caput III.

DICTURI de communibus animalium formis, æquum est, ut ab hominis descriptione auspicemur, qui animalium est omnium perfectissimus, nobisque notior, quam reliqua, quique naturæ universitatis similior: unde à quibusdam exiguus mundus appellatur, quod in se illius imaginem habeat. Ad hunc ergo tanquam ad omnium animantium normam exactissimam, ut generationem, partes, ingenia, vires, & actiones illorum redigamus, de ipsius est jam ortu differendum. Quem quidem ordinem, & Aristoteles, & eo prior in Timæo Plato, sequuti de hominis origine prius, quam de animalium reliquorum descriptione disseruere.

Quando

Quando ergo animo, & corpore præditus est homo, uti cætera animalia, nosque de corporum concretionem in hoc libro dicturi sumus, à generatione corporis eiusdem initium capiamus, animæ vires obiter explicaturi. Principio corpus hominis præter materiam communem elementorum, quatuor qualitatibus constat per 1. axioma libri tertij, & ut Platonem ex Hyppocrate, Galeno teste, & Aristotelem ex illo accepisse, perspicuum est. Nam in Timæo Plato ad communem illam elementorum compositionem, quam ex Geometricis triangulis facit, alludens, è triangulis constare corpus hominis inquit. Sed reverà, ille nihil aliud, ut Galeno placet, in eo indicat, quàm è quatuor elementorum qualitatibus corpora constare. Aristoteles etiam in lib. de animal. generatione, id ipsum confirmat: postremò medici omnes. Iam ex his quatuor qualitatibus totidem humores illis respondentes nascuntur, flava bilis, quam Græci *χόλην* appellant, igni respondens: atra, quam *μελαγχολίαν*, quæ terræ: pituita, quam *φλέγμα*, quæ aquæ: sanguis, quem *αἷμα*, qui aëri. Hi ipsi humores eiusdem planè naturæ sunt cum eorum elementorum, quibuscum congruunt, qualitatibus, ut flava bilis calida, & sicca est, uti ignis: bilis atra frigida, & sicca, ut terra: pituita humida, &

frigida, ut aqua: sanguis calidus, & humidus, ut aer. In hoc Plato, in Timæo, semper ad primam elementorum concretionem, quam statuit Pythagoreorum sententia, pro qualitatibus ad triangulos recurrit, non ad humores, quemadmodum Galenus ex Hypocrate, medicique omnes faciunt: quorum uti probabiliorem sententiam in hoc loco sequemur. Itaque cum quatuor illi humores, in corpore humano, materia sint, ex qua idem conflatur, ex ijs rursus solidiores aliae particulae, quae totam illius molem construunt, nascuntur, quae similes, ac dissimiles ab Aristotele, ac medicis nominantur. Similes, sunt simplices quaedam particulae corporis, ex quatuor humorum miscella constantes, cuiusmodi est cerebrum, nervus medulla, os, pinguedo, vena, sanguis, arteria, fibra, caro, cartilago, ligamen, caeteraeque primae portiones, ex quibus membra omnia sunt. Dicuntur autem similes, quoniam similium sibi qualitatum concretioni respondeant. Dissimiles vero partes sunt, è simplicibus illis compositae, ut membra omnia integra, & absoluta, quae praeter humores quatuor, tum nervum, tum sanguinem, tum os, tum aliam quamque partium similium complectuntur. Ex hisce particulis, tota humani corporis moles construitur, ita ut vires
prima-

primarum qualitarum expressæ in similaribus
 partibus tanquam ab illis primò concretis
 insint, deinde in dissimilaribus, quæ ex eis-
 dem, ut simplicioribus componuntur. Et
 cum simplicia priora sint compositis per 14.
 axioma lib. 2. omniaque fieri ex elementis
 per lib. 3. axioma 1. constet, humores qui-
 dem, ex qualitarum quatuor mixtione con-
 cretos esse, tanquam simplicia elementa sta-
 tuimus: ex his rursus partes similes, ex
 quibus etiam sunt dissimiles. Atque ut
 humores qualitatibus primis respondent,
 tanquam ex illis primò concreti, ita quoque
 partes similes illis, quando ex eisdem ipsis
 conflantur. Ita fit, ut partium earum quæ-
 dam calidæ sint, aliæ humidæ, aliæ frigidæ,
 aliæ siccæ. Non quòd reliquis careant hu-
 moribus, omnes enim quatuor in singulis
 partibus similaribus insunt, sed quia humor
 aliquis huiusmodi, siue qualitas excellat. Fa-
 cta ergò in humano corpore huiusmodi es-
 sentia temperatione, ad partes, molemq̃
 ipsius constituendam, accedit ijs etiam con-
 stitutio, quam Græci *μεγίστη*. i. complexio-
 nem, seu temperamentum appellant. Idem
 autem est, concretio quædam dispar ex qua-
 tuor humoribus facta, ex quâ diversa cor-
 poris natura, & temperatio nascitur. Nam
 etsi in omnibus corporibus quatuor eadem

qualitates, humoresque ex ijs facti unâ cohaereant, nec illorum substantia & moles sine ipsis possit existere, tamen quia in alijs qualitate seu humorem unum, in alijs alium excellere videmus, diversæ quoque constitutionum formæ existunt pro majori, minorive illorum excessu. Ideo constitutionum genera à Galeno novem afferuntur, unum quidem temperatum, & medium, quod qualitatum mixtione temperatâ constat, octo intemperata. Harum item octo constitutiones sunt quatuor simplices, id est, qualitate aliqua simplici excellentes, ut calida, sicca, humida, frigida: quatuor compositæ, in quibus qualitas una alteram antecellit, non tamen una omnes, ut calida & humida, calida & sicca, frigida & humida, frigida & sicca. Mediæ constitutionis, est humanum corpus, id est, temperatius reliquorum animantium corporibus: in quo tamen eæ novem formæ pro cuiusque individui natura considerantur. Mediā autem constitutionem cum Galeno eam appello, in qua omnes qualitates servant æquilibrium proportionis: intemperatam illam, in qua una, duæve alias antecellunt. Quemadmodum autem humorum constitutio hæc fiat in corporibus, & quonam excessu alius alium superet, nulli hominum notum est, præterquam Deo omnium
nium

nium artificii. Constitutionem quoque perfectam, & temperatam omnino invenire in aliquo, multò minùs fieri potest, cum ea cogitatione intelligatur ad cæterarum discrimen, revera tamen non existat. Hæc igitur est summa corporis humani ex elementis, ac simplicissimis partibus constitutio: cujus diversas alias formas, ac varietates, signaque medicis relinquo, qui hanc in rem diligentius incumbunt. Pergamus ad eiusdem corporis structuram, & partes describendas, ut his absolutis, de generatione, ingenio, & viribus differamus, quæ non ante poterunt commodè explicari, quàm partium descriptio, per quam illa fiant, adhibeatur. Universum ergò hominis corpus cuiusmodi figuræ sit, oculi manifestè demonstrant, hoc est, longum, latum, rectum, teres, capite, brachijs, cruribusque distinctum: cur autem ejus sit formæ, præterquam quòd multæ rationes, & commoditates afferri possint, eleganter Poëta docet Ovidius:

*Sanctius his animal, mentisq; capacius alta
Deerat adhuc, & quod dominari in cætera posset,
& paulo post:
Finxit in effigiem moderantum cuncta deorum,*

*Pronaq, cum spectent animalia cetera terram,
Os homini sublime dedit, cælumq, videre
Iussit, & erectos ad sydera tollere vultus.*

Iam quod ad eiusdem hominis partes attinet, quoniam sic omnes effectæ sunt, ut in usum aliquem certum aptatæ videantur, eadem sanè ad istarum rerum quamcunque, quibus animal ipsum continetur, referuntur, id est, cum ali, moveri, sentire, sui que simile generare animal omne necessariò debeat, singulis eorum usibus propria quædã membra instituta adeò sunt, quæ nos ordine, ac breviter à præstantiori parte exoriri enumerabimus. Potissimã, & perfectissimã omnium hominis partium est caput, teres, globosum, & utrinque leviter compressum. In quo non modò sensuum omnium vires, sed ratio etiam, ac mens, quibus alias animantes excellimus, esse Plato, Aristoteles, Galenus, ac Philosophi omnes fatentur. Huius tres sunt partes, sinciput, quod antèrius est, & fronti conjunctum: occiput, quod posterius, cui cerebrum subiicitur: vertex, qui medium obtinet locum. Idem extrinsecus carne quadam tenui, ne mole gravetur, & multis meatibus pervia, quibus tum cerebri crassi vapores expirentur, tum pili ex ejusdem excrementis orti effluant, ut illam contegant, exornatur.

Intrin-

Intrinssecus autem osseo quodam, & concavo globo, quem *κεράνιον* Græci, id est, calvam, vocant, munitur: quod in partes divisum dentibus quasi pectine inter se commissis tres efficit commissuras, quas vocant, unam à λ. literæ figura lambdoidem in occipitio positam: alteram coronariam à temporibus utrinque in verticem porrectam: tertiam *ὀβέλασαν* à lambdoidis angulo in longum protensam, per quarum rimulas crassi è cerebro vapores exhalantur. Intra hanc ossis concavi compaginem cerebrum est, molle, & candidum, naturæque admodum humide, & frigida, ad refrigerium caloris cordis, ut censet Aristoteles: vel temperatae potius, ut rectè sentit Galenus, ut in eo facilè rerum per sensus comprehensarum imagines imprimantur: idemq; duplici pelle contextum (quarum intima mollissima est, ne illud offendantur, extima durior, ut idem confirmetur adversus ictus) cranio firmiter alligatur. Ipsa verò cerebri capacitas tres continet ventriculos, unum anteriorem, cuius duæ sunt cavitates vitalibus plenæ spiritibus, una dextera, altera sinistra: alterum medium aliquantò reconditiorem hoc: tertium posteriorem, & in una cerebri parte positum, à quo vim movendi unà cum nervis oriri putant: ex eodem cerebro nervos oriri, sensorios quidem è duobus

duobus anterioribus ventriculis, motorios ex posterioribus, Galenus auctor est, & illo prior Plato. Aristoteles verò in libro de animalium motu è corde eos nasci censet: cujus sententia erroris apertè à medicis convincitur, & ab ijs, qui quotidie corpora dissecant. In eodem cerebro plerique animæ rationis participis, sensuumque virium sedem constituunt, alij verò in corde, ut suo loco dicitur. Capiti subjecta est frons, lata, & levis, quam duo cingunt tempora, dextrum unum, alterum sinistrum. Huic rursus nasus adjungitur inter utrumque oculum positus, è molli cartilagine, & carne compactus, ac duplici meatu apertus, ut per eum spiratio fiat, & cerebri excrementa depellantur. Oculi autem utrinque, quasi in abdito loco repositi, lubrici, ac rotundi obmotus facilitatem sunt, & ob securitatem nalo, supercilijque circumtecti. Hi tribus ex humoribus constant, albugineo, vitreo, crystallino: qui duabus item membranulis tenuissimis distincti, rotundam efficiunt figuram. In quorum medio pupilla quasi foramen quoddam inest, per quod visus fit, transmissio spiritus visorio in duos quosdam nervos Opticos, qui utrique oculo annexi in formam trianguli, & ad cerebri partem anteriorem porrecti in unam cuspidem desinunt. Ipsos autem oculos palpebræ

palpebræ regunt extrinsecus, ad eorum firmitatem, & ad quietem animalis accommodatæ: quæ cilijs quasi aculeis armatæ leviorum corporum offendicula possunt cohibere. Oculis subjectæ sunt maxillæ, molli carne, & nervis, musculisque colligatæ ad motum, & pulchritudinem. Ab utraque parte capitis sunt aures duæ patulæ, rotundæ, & immobiles, è dura quadam cartilagine factæ, quæ flexuosis quibusdam anfractibus distinguuntur, ut sonum capere possint, & ad cerebrum per bina foramina (quibus duo alij nervi similes Opticis alligantur, & in cuspidem porrecti in eodem junguntur) perferunt, factâ sonitus intra capacitatem illam repercussione. Infimum locum tenet os duobus dentium, ceu vallis utrinque munitum, & labijs carnosus contextum, cujus infima maxilla, quæ minor est, inter edendum, superiori stante, semper movetur in omnibus animalibus, præterquam in Crocodilo. Intra os ipsum est lingua è carne quadam spongiosa, nervis faucibus alligata tum ad loquendum, tum etiam ad depellendos ingestos cibos accommodata. Atque tota hæc pars exterior siacipiti adjuncta communi nomine facies appellatur, in qua vultus, id est, gestus quidam animi affectionum index ostenditur. Quæ duo solis hominibus inter animalia

malia omnia tributa sunt. Tota hæc capitis structura ad sensus exprimendos, ad cibos capiendos, ad incitandum corporis motum facta est. Nam præter id, quòd caput duplici motu cietur, anteriori, ac posteriori, & in latera, ipsum etiam initium motionis universi corporis videtur exhibere, quatenus è cerebro nervi, qui motionum omnium sunt instrumenta, nascuntur. Idem sensus omnes exprimit, quoniam & cerebrum, à quo eorum nervi proficiuntur, continet. Unde per oculos aspectus, per nares odoratus, per os gustus, per aures auditus fit. Ad cibum verò percipiendum os tantum effectum est, ut per illud esculenta, & poculenta accepta dentibus conficiantur, & in globuli formam à lingua redacta in ventriculum per gulam depellantur. Quot autem sint officula, nervi, muscoli, venæ, arteriæ in eadem capitis compagine, referre minimè oportet, ne longiorem texere historiam, quàm instituti ratio postulat, videamur. Capiti collum quasi basis subnectitur, rotundum, & oblongum, spinæque, ac humeris insitum. Idem in posteriori parte, quæ cervix appellatur, vertebri 7. inter se nervis, & cartilagine colligatis foramini cuidam cerebri subijcitur, ita ut per illud cerebro ipsi ad spinæ medullam aditus pateat. Ex eadem parte nervi, & muscoli quidam

dam ad maxillas, & linguam porriguntur, qui morum illis afferunt, & firmitatem. In anteriori parte colli, quæ propriè collum dicitur, est guttur, quod in se asperam arteriam, & gulam, veluti duas fistulas, è circulis, & cartilagineo corpore factas, continet, per quarum alteram spiritus adducitur (quæ ob eam causam operculo quodam est recta, quod occluditur, & aperitur inspirato, expiratove aëre, ne quid in eam incidens spiritum cohibeat) per alteram cibum, ac potionem ingestam haurimus. Ad colli radices utrinque sunt humeri ex ossibus magnis, & duris quasi duo tubera erecti, ex quibus brachia, uti postea docebimus, oriuntur. In anteriori porrò parte corporis est pectus, latum, tumens, & costis 12. ut ait Galenus, curvis, & spinæ vertebriis alligatis utrinque constructum. Hujus duæ sunt partes, auctore Aristotele, prior, quàm propriè Græci, *θώρα*, nos pectus appellamus, & posterior, quàm dorsum. Prior quidem seu pectus à colli radice statim in partes duas distinguitur, quas utraque mamma dividit, (in qua, si fœmina sit, lac gignitur, si vir itidem, sed non tam copiosum, ut effluat, quia huius caro firmior, & constipatior, quàm illius est, quemadmodum censet Aristoteles, cui tamen sese Galenus opponens, id fieri posse negat, Plato verò nihil tale refert.)

fert.) Atque hæc est pectoris facies extrema. Intrinsicus autem illud in duas partes in longitudinem dividitur, interposito illo, quod mediastinum vocant, cui adhæret *πλάγῃ*, id est, tunica costas cingens, quæ totum intus cingit pectus costis, & dorso affixa. Ab ipsis porro costis, & dorso tegmen quoddam carneum, & musculosum oritur, ascendens usque ad os illud pectoris anterioris *ἑρφειδὲς* dictum, quod cor, & reliquas partes vitales à ventriculo dirimit, ne ejus halitibus offendantur, quemadmodum in Timæo Plato inquit, atque eum imitatus Aristoteles libr. 3. de partibus animalium. Idem autem tegmen septum transversum, seu diaphragma nominatur, habetque vim pulmones movendi agitatione suâ, esseque risus sedes à Plinio fertur. Intra hanc pectoris cavitatem à ventriculo separatam est cor sinistro in latere positum in coni figuram, eamque paululum fastigiatam: cordis verò essentia è carne solida, & benè constipata è villis multis est. Habet quoque cor idem duos ventriculos, unum dextrum, alterum sinistrum, quorum dexter à cava vena sanguinem haurit, indeque in partes alias diffundit, nimirum in pulmones, qui eo sanguine aluntur, in sinistri ventriculi pabulum, & in alios quasi ramos venarum, per quos sanguis, spi-
ritu

niru vitali, fervens emanat. Sinister autem spirituum vitalium fons est, haustumque à dextro sanguinem per intermedium quoddam utrique orificium caloris naturalis vi summâ in spiritus convertit. Ab hoc magna arteria, quam vocant Aortam, oritur, & in duos quasi ramos divisa, deinde in alios per totum corpus diffusa vitalem spiritum artubus impertit. Arteriæ enim quasi venulæ quædam sunt venis sanguinis annexæ, quæ spiritum devehunt, sicut illæ sanguinem. Ac tota quidem cordis figura simili quadam pellicula, quam *μεμβράνη του χιτώνα* medici appellant, obducitur, quæ diaphragmati, & pleuræ, ac mediastino alligata illud munit, & nativo quodam humore refrigerat, ne calore vehementi inflammetur. Quam etiam ob causam adeps illi adhæret, qui humidæ cum sit naturæ, facile summum calorem cordis mitigat. Tota igitur hæc cordis effigies in pectoris medio sita est, ita tamen ut ejus mucro in sinistrum latus ad sinistram mammam erigatur, ut calorem ei addat majorem, cum dextra ob jecoris vicinitatem satis caleseat. Quando autem è corde arterias, id est, venas spiritus vitalis oriri diximus, id ex Galeni, ac recentiorum medicorum sententiâ dici censendum est, nam Aristoteles in libr. de part. animal. Platonis de Timæo sententiam,

rentiam, sequutus in corde sanguinis originem, non in jecore, ut illi, collocat. Et quamquam in nostris in Timæum commentarijs, si rectè memini, Platonem cum Galeno consentire, differreque ab Aristotele ostendi, nunc quidem, re melius perspectâ, apertam Philosophi utriusque consensionem asserere, & eiusdem Galeni iudicium anteponere non verebor, cùm nos in jecore, ut postea docerimus, non in corde sanguinis fontem inesse videamus. Ergò motus arteriarum, & animati totius corporis origo in corde est, ut ait Aristot. lib. de motu animal. non sanguinis, aut nervorum: quando ipsam vim spirituum motoriorum cerebro, & arterijs tribuens cuncta facilè impellit. Ad pectoris latus dextrum pulmones sunt siti, quos in Timæo Plato cordis ventilabrum appellat. Hi rarâ, & spongiosa carne, meatibusque multis pervia ad spiritum hauriendum constructi sunt: iidemque asperæ arteriæ, & venulis quibusdam quasi digitis dextro cordis ventriculo alligati spiritum adducunt per illam, & quasi folles intensi in hoc remittunt, dum sese comprimunt. Moventur præterea pulmones non à sese, sed à diaphragmate, & à corde, in quibus animalis vis inest, commoti verò intenduntur, ut halitum per os, & asperam arteriam, ex aëre, adducant, cumque in se calefactum

factum nativo calore compressi in cor transmittant per venulas illas, quibus ei copulantur. Ita fit, ut respiratio, sine qua vita animalium constare nequit, à pulmonibus tanquam proprio instrumento perficiatur, & cor perpetuò refrigeretur, ne si hoc caret, nimio caloris aestu, periret animal. Quapropter latus, & in duas partes diffusus quasi bovis ungula est pulmo, perque totam pectoris capacitatem patens, & in dorsi vertebrae, ut in sede confidens, tenuique tunica obductus, perpetua vicissitudine movetur, ut loqui, aut vocem emittere possimus, & ut calor, ob cuius causam ille factus est, spiritu calefacto, & purgato refocilletur. Ideò in quibuscunque animalibus est cor, in his pulmo est etiam, & vice versa, quoniam alter alterius est causa factus. Cor enim per dextrum ventriculum in pulmones sanguinem, ut auctor est Galenus, quo alantur, effundit: hi spiritum in illud, quo refrigeretur: quem ipsi per asperam arteriam adductum, ex aëre proximo intra sese temperant, & extenuant, ut purus ad cordis ventriculum deferatur. In duabus his partibus tota vita hominis, atque adeò animalium omnium consistit, ut spiritu alantur tanquam necessario vitae pabulo. Huic cordis, pulmonamque colligantiae, quam Plato in Timæo, retisagenam vocat,

aspera arteria, veluti fistula adhæret à linguae radicibus ac faucibus eousque porrecta, & è tenui cartilagine, ac membravis facta, quæ superiori parte, qua vox editur, *λάρυγξ* appellatur, mollisq̃ue est, ac tenuis, ut dilatari, contrahi q̃ue possit, dum inspiratio fit. Huius aditum illum patentem, linguæq̃ue proximum membrana cartilaginea, quam epiglottim nominant, veluti operculum tegit, ne quid incidat in eam, quod halitum impediat. Eadem aspera arteria ad pulmones usque, uti dixi, pertinet, ut in illos aërem adducat, ad efficiendam inspirationem, vel excipiat ad expirationem. Ab interiori parte gula carne molliori, & ad contractionem dilationemq̃ue aptiori constans annectitur, per quam esculenta, poculentaq̃ue ingeruntur. Quæ ipsa initio lata est, deinde paulatim coarctatur, quousque ad ventriculum pervenerit, ut & ingesta capiat facilius, & contrahatur, dilateturve, pro cibi copia. Idè æqualiter illa ferè cum aspera arteria movetur. Sed motu tamèn contrario, dum enim deglutimus, distenditur, ac sursum ascendit, dum spiramus, contrahitur, ac descendit. Id fit, quia minùs præstans pars maximè præstanti, & ad vitam magis necessariæ cedit. Ex his duabus fistulis, gula est longior, quàm aspera arteria. nam illa à collo ad ventricu-
lum

hūm porrecta , per diaphragma, à quo coarctatur, ut commodiùs ventriculi claudatur os , transit, longioriꝛue tramite porrigitur. Hæc initio bifurcatim diuisa , hoc est parte unâ sui ad nares, parte altera ad laringem patens à pulmonibus breviori spatio excipitur. Utraque tamen quasi duo funes connexi, ut Plato inquit , à faucibus ad intima pectoris demittitur. Faucibus lingua adhæret, spongiosa , & rara ad sapores percipiendos, sermonemque formandum. Eademque initio lato quodam osse, quod Græci *ὀστέον* ab. Y. literæ figura, vocatur, quasi base fulcitur, & in cuspidem conjuncta desinit. Huic prope ipsum exortum duæ glandulæ, quas propriè, tonsillas appellamus, utrinque adjunguntur, per quas perpetuò saliva exsugitur, ut lingua madefiat, larynx, arteriæ, & pulmones. Inter illas media est columella, quam alij nomine novo vocant , gurgulionem, Græci *γούργυλον*, quæ ad vocis suavitatem maximè conducit. Ex his locis ad dentes usque palatum, ut sapores dignoscantur, ac vox perficiatur, pertinet. Mox gingivis muniti dentes, vallo duplici utrique rei profunt, & voci, & gustui. Transeo nunc ad partes humani corporis inferioris , in quibus alimentum perficitur, quando de sensus, ac motus, & vitæ præcipuis instrumentis sermo-

nem habuimus. Extremæ gulæ parti, uti dixi, venterculus adhæret, ad alimentum animantis institutus. Idemque figuræ rotundæ, & oblongæ cum sit, ac sub diaphragmate dorso alligatus angusto quodam canali, quo cum gulæ extremo committitur, par est, ne natus ejus calor, si apertus esset, exhalaretur. Iple quoque nervosâ, & carnosâ natura constat, ut præ mollicie facilè contrahi, distendique possit pro cibi copia. Hujus duo sunt officia, unum superius, quod diximus, cum gulâ committi, per quod cibus ingeritur. Alterum inferius, quod janitorem vocant, per quod cibus decoctus, & excrementa devehuntur. Utrumque autem est ad latera ejusdem ventriculi, & cum cibo ille refertus, est, occluditur, ne calor ejus effluat, rursusque aperitur, ut ingeratur, devehaturque inde pabulum. Atque hic sanè motus à villis quibusdam ventriculi ipsius æditur, adjuvaturque à diaphragmate. Natura porro ventriculi frigida est, & sicca, quanvis calore nativo, & perpetua ciborum accessione calida, & humeda videatur. In hoc tota animalium alimentis vis inest, quando vim habet attrahendi cibi, & retinendi (id quod illis villis digitorum similibus facit) tum alterandi, & concoquendi ob nativum calorem, tum etiam depellendi ad varias partes. Et quanquam calore
multo

multo ventriculus idem constet, adjuvatur
tamen à corde, jecore, & felle: quæ multum
illi addunt caloris. Hûc poculenta, & escu-
lenta confecta dentibus cum ingeruntur, ca-
lore liquata in chylum mutantur, indeque
in quoddam intestinum, quod vocant duo-
denum, depelluntur, à quo rursus illa jeju-
num, ac venæ miseraicæ arripiunt, & ad jecur
devehunt, ut sanguis gignatur. Atque hæc est
ventriculi effigies, & usus. Qui idem duplici
membrana tegitur, & ad calorem retinen-
dum, & ad firmitatem, Harum una crassior,
& pinguedine copiosa obducta à diaphra-
gmate oritur, atque anteriorem ventriculi
partem undique ambit: ad pubem usque
protenfa quam omentum Latini vocant: al-
tera quæ peritoneum dicitur, omnia intesti-
norum involucria, jecurque, ac splenem, re-
nes, omentumque integit, & quasi velum in-
ferioribus omnibus membris obtenditur, &
à diaphragmate circumtenta lumbis ad spon-
dilos affixa ad pubis usque ossa erigitur.
Ventriculo proximè adjuncta sunt intestina,
multis involucriis, & spiris tortuosa, ut cibus
in illis, quemadmodum ait Plato, diutiùs
conservetur, ne si unum esset rectum, perpe-
tuò cibus animal inhæreret. Primum eorum
est duodenum à janitore natum, ac versus
dorsum sese porrigens, ut firmitus sit, & ut in

fellis vesicam bilem per meatus quosdam depellat. Huic conjungitur jejunum, quod ad jecur, factis spiris, quibusdam, defertur per venas meseraicas, quæ multæ sunt, ut per ipsas cibus in chylum redactus transmittatur. Adduntur his alia intestina mirabili ratione involuta, & contorta ad cibum capiendum, depellendumque ad partes alias, unde sumitur alimentum. Quorum omnium ratio, quia longior, & obscurior est, à nobis omititur, præsertim cum ea de re tam capiosè scripserit Galenus. Exposita interna ventris structura, redeamus ad extimam corporis partem describendam, eam nimirum, quæ à dorso ad infima usque pertinet, quando illinc nostra aliquantulum oratio difflexit. A dorso, sive potius è cerebri posteriori parte, spina, quasi navis carina ad sacrum usque os protenditur, eaque 24. vertebriis rotundis, & concavis constans, colligataque nervis, & ligaminibus duris, ut firmior, & durior sit. Quæ, ut curuari, flectique homo possit, ad eiusdem quoque motum inflectitur. Ac intra earum vertebrarum, capacitatem medulla omnis continetur, à cerebri foramine, unde oritur, ad os sacrum protensa: ex qua etiam reliqua ossa medullam, tanquam proprium alimentum, accipiunt. Huic spinæ uti rami, sic costæ, atque ossa ferè omnia inserta sunt, in eaque
nitun-

nituntur, illa præsertim, quæ pectus intra se claudunt, à cervicis radicibus usque ad medium corpus porrecta, & summis cuspidibus in partem anteriorem incurvis vergentia: quæ verò his aliquanto inferiùs subjacent, breviora sunt, ut ventris moles nullo osse lædatur. Infimæ parti, qua sacrum os patet, coxæ illi adhærent, de quibus paulò post copiosius. Præterea intra spinam ipsam multæ venæ influunt, alimenti causa, è quibus cava vena etiam adiuncta illi est intrinsecus, ut firmiùs consistens in varias venas possit diffundi. Plato in Timæo eidem spinæ duas quasdam venas intrinsecus adhærere ait, quæ in longum porrectæ in vasa seminalia influant: cuius tamen sententiam veram non esse, in nostris commentariis ex Galeno, ostendimus. Huic ergò spinæ tota internarum partium moles innititur, uti antea docuimus, diversis ligamentorum generibus copulata. Eiusdem verò infimæ parti non longè ab ore sacro renes adhærent, per quos venæ quædam dorsales, quæ illi sunt affixæ, influunt in vasa, quæ vocantur seminalia, de quibus copiosius deinceps. Iacto hoc corporis fundamento, redeamus ad interiora, id est, ad partium interiorum, de quibus postremò egimus, descriptionem. Paulò inferiùs à corde, & pulmonibus supra diaphragma est ie-

cur, à latete dextro, à sinistro verò, lien: in quibus animalis vitæ sedes non minus, quàm in corde collocatur. Ac iecur quidem figuram habet semicirculi, estque carnosæ, & sanguineæ naturæ, fereque ut sanguis coagulatus: quapropter collectus in eo chylus, calore nativo, decoquitur, ac in sanguinem mutatur. Huius duæ sunt viæ ductæ, & directæ, quas portas iccoris appellant, altera, per quâ à ventis Miseraicis chylus invehitur, quæ inferior est, & in cava illius parte intestinis proxima, altera supra gibbum illius, quam venam cavam nominant, quæ totum sanguinis fluvium ad cordis ventriculum dextrum defert. Quoniam enim sanguis idem vitali spiritu ad alendum animal indiget, ad cor influit, ut ab eo spiritum hauriat. Itaque iecur chylum duntaxat coquens in sanguinem convertit, cor illum spiritu plenum in venas omnes effundit. Atque hinc fortè Aristoteles, & Plato sanguinem in corde gigni putarunt, cum eius profluvium ex illo cernerent, originem tamen ignorarent. Quin ex eodem corde arteriæ quædam ad iecur deferuntur, ut mutua se ope adiuvent ambo, dum alterum sanguinem, alterum spiritum impertit alteri. Ipsum quoque iecur quinque pinnulis, ceu digitis ventriculum attingeus chylum accipit, & in sanguinum humorem coquens, humores

humores omnes secernit : qui permixti in cibo erant, quandoquidem omnia, quibus alimur, è qualitatibus quatuor constare debent per axioma 8. Itaque quoniam in eodem illo chylo, qui in medio iecore coquitur, sanguis, bilis, pituita, ac melancholica insunt, horum omnium secretio ibidem fit, ita ut sanguis pituitæ admixtus in cor deferatur, bilis in fellis vesicam, quæ in media quadam ex iis quinque iecoris pinnula subest, melancholia in lienem. Et quanquam sanguis ipse in cor defluens reliquorum humorum contagionem habeat aliquam, ea ramen tanta non est, ut hæc secretio fieri desinat. Quapropter sanguis, qui per se crassus, ac densus est pituitæ simul admiscetur, ut tenuior factus fluat facilius: melancholiæ etiam, & bilis aliquid habet, ut consistentior, & fervidior existat. Ex hoc uno iecore, quasi fonte universum animanti pabulum suppeditatur. Lien ex huius adverso à sinistro latere paulò inferius positus est, qui ab illius cavo canalem quendam excipit, per quem humor melancholicus, & crassus devehitur. Figura huic oblonga est, & triquetra ferè, essentia spongiosa, nigra, & laxa, ut possit haustis humoribus aut turgescere, aut egestis contrahi: situs denique prope costas illas, quas vocant mēdosas, dorso alligatas. Ex hoc multæ venulæ
in

in partes alias derivantur , inter quas una præcipuè ad ventriculi os progressa , atrum eò succum egerit , qui , corrugato orificio illius , appetitum cibi gignit. Aliæ quoque venulæ ab eodem ad os sacrum derivantur , per quas impurus , & fœculentus succus egeritur , qui si copiosior sit , hæmorrhoidas solet gignere. Descripsimus breviter sedem , & fontem animalis alimenti , idque Platonis è Timæo , Aristotelis , & Galeni sententia : restant internæ aliæ partes , quæ tum ad ciborum excrementa expellenda , tum ad semen prolificum gignendum , accommodata sunt , ut renes : quorum hîc descriptionem subjungî oportet. Cùm in lumborum vertebriis cava vena ceu magnus canalis insideat , quæ à jecore profecta , illuc prolabitur , & in multos se ramos diffundit , huic proximi sunt renes paulò infra jecur adherentes inanibus quibusdam partibus , quæ inter costarum extrema , & os coxæ interponuntur. Hûc duæ venæ , quæ vulgò emulgentes dicuntur , aquosa excrementa sanguini admixta invehunt , ipsosque alunt , adjuvante nimirum naturali eorum calore. Venæ præterea illæ , postquam in renes receptæ sunt , in varios ramulos dividuntur , ut humor undique diffundatur ad alimentum suppeditandum. In medio etiam renum
ambo-

amborum concavus est sinus, in quem humor aquosus, biliosus à reliquo alimento secretus defluens, vesicam è membranula factam implet. Inde duo alij canales ad vesicam descendunt *σπυγγες*, id est, urinarij ductus appellati, per quos urina, id est, aquosus, & bili infectus humor à renibus depulsus excernitur. Itaque cùm vesica urinæ receptaculum sit, ipsa quidem è membrana firma constat, sitq̃ne rotundæ figuræ, quando humore oppletur. Situs illius est in coxarum antro sub osse pectinis reconditus, & recto intestino, quod ad os sacrum porrigitur, ac stercus egerit, innititur. Habet eadem longam quasi cervicem in viris, sed in fœminis brevem, per quam urina illis in penam, his in vulvam effunditur. Arque hæc sanè sunt excreandarum sordium è cibus in stomacho coctis instrumenta, quæ non minùs ad animalis salutem conducunt, quàm ea, quibus fit alimentum: quandoquidem alimenti pars magna in excreandi commoditate posita est.

DE GENERATIONE HOMINIS,
ET MOTIONIS PARTIEVS, AC
MEMBRIS EXTERNIS, CÆTERIS-
QVE OMNIBVS AD COR-
PVS PERTINEN-
TIBVS.

Caput IV.

SEQUITVR, ut partes ad prolem susci-
piendam accommodatæ describantur: in
quibus cum maris corpus à fœmineo ali-
quantum differat, utriusque obiter discrimen ostendetur. Prima gignendi instrumen-
ta sunt testes, quibus facultas seminis effi-
ciendi inest, ut Galeno placet. Iidem mol-
les, cavernosi, albi, & in ovi figuram oblongi
sunt, qui maribus quidem proprio conditi
involucro prominent ab inguinibus pen-
dentes, ut semen emittant, fœminis autem,
teste Galeno, intra ipsam vuluam efforman-
tur, eadem ferè forma, ut semen à viro emiss-
sum recipiant. Eorundem testium sinister
venam arteriæ cuidam alligatam, membrana
involutam excipit: per quam & sanguinem,
& spiritum haurit: qui aquosus quidem est,
& imbecillis, ideoque fœminis procreandis
accommodus. Dexter similem quoque aliam
venam, & arteriam à cava venæ, & arteriæ
ramo

ramo nascentem assequitur, per quam sanguinem uberiores, & calidiores accipit, ideoque semen in hoc confectum masculinæ proli congruit. Cum ergo ex sanguine in jecore cocto partem testiculi adducant, illam calore quodam interdo magis decoquunt, & in spumæ formam reddunt, addito spiritu ex arterijs. Atque ita semen ex Galeni sententia gignitur, cui Aristoteles, & Plato sese opponere videntur, qui testes duntaxat seminis attrahendi, non gignendi vim dicunt habere. Sed hac de re paulo post. Efecto iam semine, si sit copiosum, & ad generationem redundans, libido gignitur: quia dum illud foras erumpere conatur, appetitus incenditur. Cum ergo emittendum est idem, per abditos quosdam anfractus distantes ab illis, per quos urina devehitur, è testiculis ad penem, (qui è vertebris factus & ligaminibus, ac venis, & arteriis est) pro arbitrio erigitur, aut residet. Atque hoc de seminarijs vasibus masculorum. In fœminis porò matrix ad suscipiendum semen accommodata est: cuius duæ sunt partes, una, quæ semen, ac fœtum continet, quæque pro eius magnitudine intenditur, & dilatatur, altera angusta quasi collum, per quam semen infunditur. Atque illa superior cum sit, & penitus recondita, duo quasi cornua, quæ coxis

affi-

affiguntur, facit, intraque eam capacitatem
 fœtus continetur. Addit hûc Galenus præ-
 ter Platonis, & Aristotelis sententiam, habe-
 re fœminas testes, juxta illa cornua utrinque
 reconditos, sed frigidiores virilibus, ac proin-
 de reclusos. E quibus etiam illis semen emit-
 ri vult, aquosius tamen, & imbecillius, ideo-
 que ad patiendum aptius. Qua etiam de re
 suo loco. Eo fit, ut fœminæ corpus à virili hoc
 tantum differat, quod illius omnia infima
 membra ad recipiendū semen, retinendum-
 que accommodata sunt, huius ad emittendum.
 Itemque illius uterus in duos sinus distingui-
 tur, unum dextrum, alterum sinistrum, inanes
 quidem illos & cavos, sed nullo intervallo
 dissectos: à quibus communis est via in os
 uteri, quod angustissimum est. Intra uterum
 verò ipsum diversæ venæ, & arteriæ à ramu-
 lis cavæ, & maioris arteriæ nascentes porri-
 guntur, quæ ad coxas, & cura confluunt. Ex
 his quædam ad nutrimentum uteri perfe-
 runtur, aliæ in uteri sinus contendunt, quos
 acetabula nos, Græci κοτυληδόνας appel-
 lant. Per hos menstruus sanguis, statis tem-
 poribus, effluit, aut, si gravida est fœmina, in
 alimentum fœtus vertitur. Hactenus, ut vi-
 deor, internas humani corporis partes gene-
 ratim, prout instituta postulat brevitās, enu-
 meravi: nunc progrediamur ad externa mo-
 tus

tus instrumenta. Eadem autem sunt brachia, manus, digiti, articuli, ungues, nates, coxæ, femora, genua, tibiæ, pedes. Brachia quidem oblonga, & mobilia, è binis ossibus solidis constructa, ad omnem actionem accommodata, ut cernimus, sunt: quorum radices insunt humeris, quibus nervis rigidissimis colligantur, ut moveri in partem quamcunque possint. Quæ ipsa idcirco musculis, nervis, & arterijs, venisque magnis compacta sunt, ut magis alantur, & ad agendum sint firmiora. Medium in his locum quasi nexus quidam durissimis è nervis factus tenet cubitus: qui propriè, Galeno auctore, tota illa pars dicitur, quæ humero, & carpo interjecta est. Extrema brachiorum pars, cui manus adhæret, carpus nominatur, qui duplici ordine distinctus, octoque ex ossibus constructus, nervis, & cartilagine firmiter constipatus rotundam penè facit figuram. Metacarpium, tota illa ossium compages, appellatur, quæ inter carpum, & digitos posita articulorum radices habet. Hæc nervis, venis, carneque molli, & tenui ad percipiendum tactum compacta est, digitosque quinque quasi ramulos emittit, ternis ex ossibus factos, nervisque duplicibus ad contrahendam, dilatandamque manum alligatos: quorum quaterni metacarpo affixi sunt, pollices verò è carpo nasci

T

viden-

videntur. Extremas digitorum partes ad firmitatem ungues muniunt ex ossæ ferè natura geniti: à quibus non solum decor manibus accedit, sed utilitas summa, ne parte illa digiti læderentur, si carnei omninò essent. A brachiorum exortu, & dorso usque ad os sacrum spina lumbis carne quâdam nervosa, & stipata factis utrinque tegitur, ut vertebrarum structura firmior, ac tutior existat. Sub ejus aurem finem ad nates duo quædam ossa latissima, & durissima ab utroque latere committuntur, quibus spinæ radix affixa oris sacri aditum parefacit, porrigente se illuc usque recto intestino, per quod excrementa depelluntur. Ab his duobus ossibus, quæ coxendici utrinque, quasi acetabula adherent, femorum capita nexu validissimo ligata exoriuntur. Femora binis ossibus magnis, & teretibus constant, quorum utrumque coxendici adherens superiori parte rotundum efficit caput, indeque paulatim extenuatum in duo tubercula desinit, quibus tibiæ rigidissimis etiam nexibus affiguntur. Figura femorum rota paululum sima est in medio, in eorumque exortu duo exigui sunt progressus, quos *τροχαῖνες* vocant: quorum extimum, qui major est, natem nominant; quæ carne molli, & multâ contegitur, quò homo sedere commodius, & insistere
firmius

firmius ex animantium genere universo solus possit. Itsdem porò femoribus tibiæ subijciuntur, id est, pars illa tota inter genu, & talum interjecta. Hæ binis ossibus constant, quorum alterum, quod internum est, & majus, nomine tibia, femori solum adhæret: alterum, quod externum, sura vocatur. Hæc duo ita colliguntur, ut in medio parum dehiscant, in utroque verò extremo tubera quædam habeant, quorum altero femoris capiti committuntur, genuque rotundum faciunt, adhærente illis ossi cartilagineo, quod patella nominatur, quodque tibiam ipsam ita femori colligat, ut in posteriori parte curvari crus totum possit, relicto ibi sinu, quem nervi, & ligamina contracta efficiunt, tum genua flectuntur. Basis universi corporis sunt pedes, è multis etiam ossibus, & articulis, digitisque totidem, quot manus, constructi, quò corporis molem sustentare terris infixi, & incedendi usui inservire possint. Qui veluti manus inferiori parte, quam plantam vocant, paululum, cavi sunt, ac lati, ut gressus terræ commodè firmentur, superiori verò fastigiati ab infimo suræ, ac tibiæ capite (cui committuntur) ad extremum usque digitorum ordinem leviter declives. Et quemadmodum in manu carpo metacarpium annexum cavâ sui parte volam seu palmam, ex-

tima autem carpum efficit, ac digitorum radix est, sic pars illa in pede, quæ adhæret tibiz, quæque incurva est aliquantum, mons appellatur, quatuorque constat ex ossibus: inferior hujus, convexitas seu planta, quæ ex quinque. Quæ omnia durissimo cuidam ossi, quod calx dicitur, quodque, directe tibiz, ac suræ capiti adhæret, annectuntur, & firman-
tur. Digiti præterea pedis totidem sunt, at-
que manuum, iisdemque constant ossibus, &
colligantijs, nisi quod breviores, magisque
sunt incurvi ob incessus firmitatem. Expo-
sitâ sic generatim membrorum omnium ra-
tione, addamus nunc ea, quæ Deus horum
decori, & usibus alijs præter eos, quos retuli,
adjecit. Eadem sunt ossa, cartilago, nervi, li-
gamina, muscoli, membranæ, venæ, arteriz,
fibræ, caro, pinguedo, medulla, pili, cætera-
que generis eiusdem, quæ ad similes, ac dis-
similes partes referuntur. Ossa universi
corporis structuram efficere, & continere du-
bium non est, cum ad illorum formam se
corpus in animalibus omnibus accommo-
det, & eadem quasi trabes, & parietes in adi-
bus, sic totam corporis fabricam, sustentent.
Quot verò sint illa numero, aut cujus ma-
gnitudinis, docere loci hujus non est, ne in-
jucunda narratione, & prolixâ lectores deti-
neam. Tantum id addam ex Galeni sententia,
ossa

ossa omnia terræ naturæ esse, id est, frigida, & licca: etsi humores etiam calorisque aliquid habeant admixtum, quatenus dura, & compacta sunt. Itaque ut viscolo è terræ genere, calore decoquente, & indurante frigore lapides oriri supra diximus, sic ossa è seminis parte crassiori, & terrestri, calore coquente, induranteque frigore, gignuntur. Fieri autem illa è sanguine in nervum, & è nervo in cartilaginem, atque ex hac indurata, ut censet Aristot. qui huiusmodi partium ortum affert, Galeno auctore, falsum est, cum è semine ossa, ut similes aliæ partes, tantùm gignantur, ac sic comminui eorum aliqua eveniat, in eorum locum os aliud nunquam, sed cartilagineum quiddam gigni soleat. Peculiare ossium alimentum est medulla, quæ ab spinæ medulla quasi è fonte dimanat per reliqua ferè omnia, quæ illi, ut rami trunco inseruntur. Quo fit, ut pleraque ossa cava, & porosa sint, ut alimentum illud sibi congruum exsugant. Proximè ad naturam ossis accedit cartilago, quæ una etiam è partibus similaribus est, quæque mollior cum sit, ad firmanda membra molliora accommodatur, ut ad articulos, & ossium extrema. Hanc ex muscoso quodam humore illi circumfuso ali, gigni que ex semine, non ex sanguine, aut nervo indurato, Galenus auctor est : à quo Aristoteles in lib. de

animal. dissentiens mihi minimè probatur. Sequuntur nervi, quorum usum ad corporis motum, ac sensui adendos esse nemini dubium est, cum ex his molliores, ac tenuiores sensuum organa sint, duriores verò motus: utrique autem è cerebro ita nascantur, ut initio molles, deinde duriores existant, prout corporis regionem diversam fuerint sortiti. Atque hoc ex Galeni sententia. At Aristoteles in libro de animal. motu è corde eos oriri censet: quod quàm sit absurdum, subtilius medicis differendum omitto. Hos etiam è femine gigni, non è carne calore decocta, & indurata, Galenus idem confirmat, & merito, cum semel abscissus nervus nunquam restitui possit. Eiusdem generis sunt ossium ligamina, quæ ad nervi naturam maximè accedunt, eaque in eum usum duntaxat effecta, ut ossa firmitus, quàm nervis, colligentur. Hæc eadem, uti cætera è femine fiunt, & ex partium simularium sunt numero. Musculi è carne, nervis, venis, fibrisque constipati ad movendum aliquod membrum, vel partem integram corporis accommodati sunt. Horum extremæ partes nervosâ plerunque constant naturâ, quia motus membrorum instrumenta cum sint, congruenti concretione præditi esse debent. Et quia partibus similaribus iidem constant, inter compositas seu dissimilares

lares annumerandi esse videntur: aluntur enim illi à venis, & arteriis, uti reliqua caro. Membranae quoque è genere similarium sunt à semine ortæ: quarum usus est delicatas aliquas partes, & teneras, ac necessarias obtegere, ut cerebrum, cor, intestina: quapropter humore tenui, & viscoso maximè aluntur. Unde à quibusdam è nervorum substantia esse putantur. Iam venæ, & arteriæ viæ quædam ductæ per quas sanguis, & spiritus devehatur, sunt. Has quoque similes partes, & è semine generatas putandum est, neque enim si incidantur, resarci facile possunt, ut refert Galenus. Venæ autem omnes è vena cava proficiscuntur, quæ à jecore quasi trunco exorta, & per cor transiens in duas partes dividitur: quarum altera sursum ad jugulum, altera deorsum ad infera circa dorsum deferretur. Arteriæ quoque è cordis sinistro ventriculo nascuntur, quæ ex arteria magna oritur cœli trunco, à qua uti fontem multi rivuli dimanant venis ipsis adherentes, per quas vitalis spiritus, & animalis defertur. Addamus & his brevem utramque descriptionem, ut rationem alimenti corporis humani tam providentem exponamus. Præstantissimæ animalium functiones, quibus potissimum ea ad vitam utuntur, sunt cibus, & potus, vegetatio, motusque, ac sensuum vires. Harum omnium

arteriæ, ac venæ causam, & originem præstant: nam venæ sanguinem ut necessarium alimentum diffundunt toti corpori, arteriæ spiritum ut sensus, ac motionis instrumenta. Liquato enim cibo universo in jecore, uti antea retulimus, & ad cordis ventriculum delato, emissoque in cavam venam (quæ truncus omnium venarum est) singulæ corporis partes à singulis venis, quibus omnes irrigantur, congruum sanguinis alimentum percipiunt. Quo fit, ut nulla pars corporis vel minima necessario careat pasto, cum idèd esculentis, & poculentis utantur animalia, ut illorum succus in sanguinem versus, per venas (quæ undique perviæ sunt) diffundatur. Arteriæ etiam, cum è magna cordis ventriculi sinistri arteria proficiscantur, vitalem inde hauriunt spiritum, quem cor in eo ipso ventriculo gignit, decocto admodum sanguine, & in halitum quandam tenuissimum, & calidissimum extenuato. Nam ut è vino liquorem eum, quem vulgò adustum vinum, seu ardentem aquam appellant, exprimimus, evaporato humore ferè omni aquoso, & in spirituosum, calidumque admodum mutato, ita cor nativo illo, & vitali calore sanguinem à jecore acceptum in sinistro ventriculo extenuat in spiritus ferventissimos: qui per arterias digressi motum, sensum, ac vitam corpori universo adferunt:

adferunt: sensum videlicet, cum ad cerebrum
 evecti in nervos sensorios incidunt: motum,
 cum in motorios: vitam denique, cum calo-
 rem quendam vitalem, animaleque omni-
 bus membris impertiunt. Idem enim spiritus
 pulsum, quem vocant, micare facit, musculos
 movet, sanguinem devehit, nervorum mo-
 tus adjuvat, imperante nimirum illis volun-
 tate, atque animâ, quæ his ut proximis admi-
 nistris, ac sibi congruentibus utens reliquas
 partes, quæ sunt crassiores faciliè impellit. Ita-
 que actiones omnes vitales, & animales hu-
 jusmodi spirituum ministerio ab anima æ-
 duntur. Verùm hæc satis de venarum, & ar-
 teriarum usu, & origine: longiorem verò qui
 illarum descriptionem desideret, Galeni li-
 brum de venarum, & arteriarum dissectione
 legat: nos enim brevi huius rei descriptione
 contenti sumus. A venis tenuissimæ quædam
 aliæ venulæ quasi pili per carnem inseruntur,
 quæ fibræ nominantur: hæ etiam inter alios
 usus sanguinem devehunt, & partes corporis
 diversas perpetuò quasi rete circumligant, &
 obfirmant, sanguinemque consistere faciunt.
 Eædem è sanguinis crassiori, & magis terre-
 stri parte sunt, ideoque in calidorum anima-
 lium, ut leonum, ac taurorum sanguine, plu-
 res sunt, quam in frigidorum. Universam
 corporis structuram caro ceu velum obtegit,

quæ ut in fœtu ex menstruo mulieris gignitur, ita postea sanguinis accessione fit, & alitur, compacto sanguine, consolidatoque à calore naturali. Inde fit, ut calidæ, & humidæ naturæ caro existat potissimum, nihilominus tamen reliquas habeat qualitates: quapropter densa, & solida est. Carnis præterea tres sunt omninò formæ, una musculorum propria, quæ sanguine copioso perfunditur, quæque purior est reliquis: altera glandularum, quæ crassâ, densaque materiâ conficitur, in quibus est, diversa ratio, & forma carnis; tertia est ea, quæ Græcis *παγέυχυμα* dicitur, quasi affusio, quod ex alijs quoque rebus præter sanguinem purum concreseat. Nullam autem carnem puram esse perspicuum est, cum si esset, quasi sanguis quidam concretus deberet existere, non solida, & fungosa, ut est ob aliarum rerum accessionem. Usam porro carnis in corpore humano indicare, haud multis opus est, cum eadem ossa contingi, internaque omnia recludi quasi tegumento tutissimo videamus. Est enim ipsa mollis, ut tactu (qui per universum corpus diffunditur) quamcunque rem percipiamus, & ut per eius meatus sudor, & crassi alij vapores exhalari possint. Quam etiam ob causam illa diversam in membris habet formam: in alijs enim densior est, quàm in alijs: itemque alibi durior,

durior, & firmior: aliàs mollior, & laxior, prout membri ratio tulerit. Hinc Plato in Timæo, sensuum, & motionis instrumenta exigua, & molli è carne contegi, reliqua verò membra duriori, majorique inquit, carnem extrinsecus cutis regit è semine, ut Galenus ait, facta, ideoque nunquam, cùm scinditur, cohærens, quin cicatricem efficiat. Hæc in hominibus levis est, ac tenuis, & multis meatibus pervia, ut humores sæculentos foras emissos expromat, tactusque sensum facilius excipiat. Unde quo durior ea est, eo major sensum hebetudo inest hominibus. Cuti ab interiori parte adeps sive pinguedo adhæret, quæ inter pares similes enumerari potest. Eadem ex pingui, frigida, tenaci que sanguinis parte oritur, dum è venis excidens frigidis partibus adhæret, ac frigore congelatus candescit. Hujus diversæ sunt formæ, diversa que nomina pro concretions, & loci varietate, nam quæ crassior, & terrena magis est, sebum appellatur, quæ humidior, & laxior, adeps. Quæ ipsa, ut in partibus corporis diversis est, ita major, vel minor esse potest. Ab his longè distat medulla, quæ simularium etiam est è genere, quandoquidem è semine gignitur, auctore Galeno, & intra ossa recondita sanguine accedente nutritur, non tam illa, quæ in spina later, quàm ea, quæ in reliquis ossibus.

Senten-

Sententiæ huic Aristoteles repugnat, è sanguine fieri medullam putans, non ex semine. Sed medicorum se omnium huic schola, & Platonis de Timæo auctoritas opponit, quæ multis quidem rationibus, & evidentius è sanguine gigni medullam negat. Quibus ego tantum in hac parte tribuo, ut ne illorum quidem rationes huc afferre, opus esse putem. Platonis verba manifesta sunt, in quibus ille de ossium, & carnis ortu differens, medullam uti semen à diis junioribus in corpore satan inquit. Quod quemadmodum fieri putarit ille, in nostris commentarijs retulimus. Iam de pilis, & unguibus, qui ad decorem, & utilitatem corporis facti videntur. Pili ex crassiori, & fuliginoso humore per cutis meatus à calore depulso, & frigore indurato gignuntur, nigrique sunt, aut flavi, aut fusci, prout calor humorem concoquens major, minorve fuerit. His rari, & in partibus corporis humani varijs ad ornatum nascuntur, vel ab ipso statim ortu, ut in supercilijs, & palpebris: vel postea, ut in mento, pectore, alis, cæterisque notis locis. Eiusdem ferè sunt naturæ ungues, eodemque humore geniti ad summas digitorum partes muniendas necessario affixi: qui id radice molles sicuti pili, in extremo duri, ac lati sunt ad digitorum firmitatem. Exposui humani corporis partes omnes generatim,

neratim, ut suscepti à me instituti ratio postulabat, neque enim omnia exactè medicorum more, qui hac in re versantur, persequenda erant, sed universè, & adumbratim, ut animantium omnium communem quandam descriptionem traderemus, quæ Philosophiæ studiosis aliquam lucem afferret. Reliqua ipsi ex Galeni libris de usu partium, cæterisque auctoribus petant, qui hinc Medicinæ artis capiunt exordia. His ergo Physices finibus contenti, redeamus ad communem hominis naturam depingendam, id est, ad ingenium, vires, actiones, & generationem: id quod hîc breviter, & in aliorum animantium descriptione faciemus. Hominis ingenium hoc loco à nobis appellatur non vis illa discendi infita omnibus, sed ipsa animi peculiaris natura. Hæc ut à nobis pingui, quod aiunt, Minerva hîc describatur, rationis est particeps: in quo ab alijs animantibus discrepat. Eademque corpori illi, quod depinximus, adjuncta intelligendi, ratiocinandi, recordandi, memorandi, cupiendi, sentiendi movendi, vegetandi, gignendique vires supeditat. Quæ omnes ita sunt in homine perfectæ, ut quanquam alijs cum animalibus aliqua ex parte communes sint, nihil esse ijs possit in universo genere perfectiùs: Quæ autem, aut quales, quòtæ hæ vires sint commemoratæ,

moratur, copiosius in sequenti libro monstrabitur. Ex hac animi humani natura similes ei vires, & actiones proficiuntur, id est, cum ratione, aut sensu, aut cupiditate conjuncta: cujus generis sunt ea, quæ manibus fiunt humanis, quæ cernendo, audiendo, gustando, odorando, tangendoque percipimus, ad quæ peragenda movemur, quæ inquirimus, exco- gitamus, loquimur, tractamus, agimus, confe- rimus, volumus, decernimus, cupimus, dete- stamur, amplectimur. Breviter quicquid ab uno hoc animali rationis particeps fit, id eius vis, actioque à nobis appellatur. Quæ adeò latè pater, ut sub se artium, inventorum, ne- gotiorum, virtutum, vitiorum, actionumque omnium genera comprehendat. Verùm hæc externa sunt. & à Phisici contemplatione ab- horrentia. Veniamus ad eiusdem animalis generationem, non primam quidem illam generis humani (de qua supra) sed ad secun- dam hanc singulorum, quæ à parentibus fit. Marem, ac fœminam esse generationis prin- cipium Aristoteles lib. i. de animal. generatio- ne testatur, nosque id, quomodo fiat, supra diximus. Quoniam verò ad generationem ipsam instrumenta debent accommodari per Hypotesin 2. mas (qui vim habet agendi per axioma 9.) & fœmina (quæ patiendi) accom- modata à natura, & congruentia huic rei membra

membra sortiuntur. Mas enim testes, penem, seminis emittendi vim, semenque agendi facultate præditum habet : fœmina uterum, vulvam, matricem, atque, Galeno auctore, testiculos inversos, in quibus omnibus fiat generatio, concepto semine. Cum ergò ex alimenti corporci, quod ex cibo, & potu fit, pars quædam, uti anteà ex Galeno docui, in testiculos per feminales venas deriveretur, indeque semen in vasibus seminalibus fiat, quod appetitum excitet libidinis, fit, ut mas, ac fœmina inter se coëant, & agitatione viri semen in vulvam fœminæ effundatur, quod per matricis collum receptum formandi fœtus materia existat. Hic Aristoteles semen non ex omnibus corporibus partibus, sed ex ultimi alimenti excreatu (qui è sanguine fit) exprimi, ipsumque agendi vi præditum, & in adultis hominibus, & robustis esse contendit. Idemque fœminas semen emittere, ut viros negat, ideoque menstrua illarum quasi materiam esse inquit duntaxat, cui semen utile conjunctum à viro tanquam à fabro sui movendi initio in fœtum formetur. Atque hæc est vera Aristot. sententia Galeno interprete libro 1. de semine. At Plato in Timæo spinalis medullæ defluvium seminis esse fontem inquit, in quo idem, quod Hippocratem, putasse ipsum, in commentarijs nostris docuimus,

cumus, idque ex eiusdem verbis apparet, in quibus semen è medulla exprimi, animatumque esse, & spirans ob ejus spiritus, atque appetitum aviditate effluendi ciere, vimque agendi imperiosam habere inquit. Id autem in masculis ita indicat, in foeminis verò mirabilem ejus seminis aviditatem ponit, adeò ut morborum multorum sit causa, si eo illæ priventur. Porro Galenus, & cum eo medici omnes contra sententiam Aristotelis, & Platonis (qui ut ait Plutarchus idem putavère, id est, foeminas semen non emittere, sed viduum humorem ex ea luctatione quasi sudorem) semen esse excrementum negant, itemque foeminas semen emittere probant, quod aquosius, & frigidius cum sit, virili tanquam materia subijciatur in generatione. Itaque cum coitus sit, utriusque semen & viri & foeminae agitatione excerni, & in vulva misceri, sicque ad matricem per collum ejus depelli dicunt. Ex quo intus incluso, & compresso, menstruoque sanguine ut alimento sustentato foetum formari censent. Quæ quidem sententia & verior, & probabilior mihi videtur, non solum quòd à doctissimis viris confirmetur, sed quòd rationibus multis evidentibus demonstrari potest, quas brevitatis causa Medicis omitto. His statutis è Galeni sententia, semen esse patet, sanguinem in seminarijs

narijs visibus decoctum, & in humorem densum, & spiritu plenum, ferventemque conversum. Ipsum quoque semen animatum esse facultate, non re ipsa, dubium non est, idque Aristoteles lib. 2. de animal. ortu ostendit. Et quanquam in eo tanta vitalis spiritus vis insit, ut congelari non possit, sed liquidum semper, & fluidum existat, animatum tamen revera non est, quemadmodum Plato innuere in Timæo videtur, sed facultate, uti diximus, utque Aristoteles & Galenus docent. Commixtum igitur, & conclusum in foeminae utero semen, à menstruo sanguine (qui tunc effluere cessat) alitur, foetusque paululum efformatur, ab interna vitalium spirituum seminis vi, & natura. In ea verò formatione Aristoteles cor primum tanquam vitalium partium initium gigni, & è sanguine per umbilicum alitur, tum spiritu singulas seminis partes distinguente, venas, cerebrum, jecur, dein ossa, nervos, cæterasque partes tam similes, quàm dissimiles gigni, tandemque corpusculo vel foemellæ (si semen fuerit frigidius) vel masculi (si calidius) formato, animam infundi: maribus quidem intra diem 40. ut auctor est Plinius, foemellis intra 90. Quo facto, ejusdem animæ vi foetus ipse augetur, qui intra membranam utero inclusam occultatur, aliturque per umbilicum

à materni alimenti portione, quousque septem, aut novem mensium maturitate accedente, membrana rumpantur, ac infans edatur. Quod ipsum quemadmodum fiat, si longius quis velit edoceri. Galeni lib. de semine, ac fœtus formatione, & Hippocratem legat. Obiter lectores admonendi sunt, hanc de partium fœtus formatione sententiam Aristotelis Galeno, & Medicis displicere, qui jejucur imprimis, tum cor, deinde cerebrum, mox ossa, & reliqua omnia in fœtu formari censent. Quod Medicis ipsis omitto disquirendum, quibus hac in re plurimum tribui oportet. Hactenus ergo de hominis natura, effectione, ingenio, viribus, partibus, generationeque breviter dictum sit: reliqua diligens lector è Galeni libris de partium usu, ac de semine, & Aristotele de animal. generatione, ac partibus requirat: nos enim communiterum, & adumbratâ descriptione contenti singularia ferè omnia prætermittimus.

DE QUADRUPEDIBUS ANIMALIBUS.

Cap. V.

PERGAMUS ad reliquorum animalium descriptionem, quæ quia varia inter se sunt, peneque numero infinita, in communia maximè

maximè genera redigantur. Sumamus denique exordium à quadrupedibus, quæ quoniam innumerabiles habent formas, sub hanc divisionem incidere posse videntur. Quadrupedum omnium animalium alia animal pariunt, quæ Aristoteli ζῳότοκα, id est, vivipara dicuntur: alia ovum, quæ ὠοτοκα, id est, ovipara. Ex his rursus alia sunt multifida, alia bisulca, alia solipeda. Omnia tamen communiter sanguinem habent, duobusque saltem prædita sunt instrumenti generibus, ad vitam necessarijs, uno ad cibum capiendum, & coquendum, egerendâque excrementa, alterum ad sensus expromendos. Differentiæ verò formarum singularum ab aliqua hujusmodi re petendæ sunt, aut à partibus diversis: aut à ratione victus: aut à vitæ ratione: aut colore, aut actione, aut motu, aut à loco, in quo degant, ac nascantur. Ex his enim, & hujusmodi alijs accidentium modis animalium diversitas intelligitur, eaque ad singulas eorum formas dignoscendas diligenter notanda est. Dicamus ergo de genere quadrupedum viviparorum (ut ita dicam) eodem ordine, quo in hominis describenda natura usus sumus. i. primò de corporis constitutione & partibus, tum de ingenio, actionibus, & generatione. Humana naturæ proxima est quadrupedum vivum animal parientium, adeò

ut quibusdam in dubium sit vocatum, ea ne etiam ratione uterentur, ut homines. Quocirca ipsa animalia eisdem è partibus similibus, quibus homines, constant, iisdemque humoribus, & horum constitutione. nisi quod ut in homine quovis constitutio variatur pro loci, regionis, victus, institutique natura, ita in singulis quadrupedum formis eadem diversa est. Nam in canibus bilis, in leonibus melancholia, in alijs denique animalibus diversi excellent humores, ideoque omnino diversæ sunt eorum constitutiones. In partibus præterea similaribus, ut sanguine, carne, ossè, cartilagine, nervo, membrana, atque adeò cæteris omnino convenit illis cum humano corpore. In dissimilatis eodem ferè modo, quando omnia caput, collum, pectus, dorsum, spinam, cor, pulmones, jecur, splenem, intestina, seminalia vasa, testiculos, vulvam, matricem, ac reliqua habeant, eo solum excepto, quòd prona in terras sunt, quòdque caput longius habent humano, quòdque pro brachijs bina habent in anteriori parte crura, binosque pedes, vnde nomen accipiunt. Sed universo eorum generi hæc omnia communia sunt. Cur autem eadem ejusmodi sunt effigiem sortita, aut à quo ita effecta, ipsæ nos sacræ Literæ docent, ipsorumque animalium actiones, & vitæ genus

nus cum omnia ratione privata terris solum
 q̄ o lammodò incumbant, cœleste verò nihil
 allequantur, aut cogitent. Jam quod ad simi-
 lates alias quadrupedum partes attinet. præ-
 ter eas, quæ omnium animalium generi ne-
 cessariæ sunt (de quibus supra diximus) sin-
 gulæ formæ evariant. Nam animalium ipso-
 rum alia cornuta sunt, ut tauri, hirci, arietes,
 alia mutila, ut canes, equi, leones. In ipsis et-
 iam cornutis alia ramosiora habent cornua,
 ut cervi, alia bina tantum ut tauri, arietes, ca-
 præ, alia unum, ut unicornus. Quæ verò cor-
 nuæ gerunt, communiter bisulca sunt, ut bos,
 capra, cervus, quæ mutila, solipeda. In omni-
 bus etiam his animalibus cornua & ungulæ
 in eisdem hærent corporis locis. i. in fronte,
 ac pedibus, ejusdemque naturæ sunt. i. ex hu-
 more crasso & viscoso (qui calore decoctus
 induruit, & frigore densatus est) gignuntur,
 ut in hominibus ungens, adhærentque ossi-
 bus semper vel firmiter ut in tauris, vel deci-
 dua, ut in cervis, quibus decidunt faciliè cor-
 nuæ. Corporis præterea integumentum par
 omnibus quadrupedibus ferè est, id est, du-
 rum & pilis hirtum corium, sed alijs tamen
 durius, quàm alijs aut magis hirsutum, ut in
 equis, canibus, ovibus capris. Habent omnia
 præterea rictum oris humano majus, ac nares
 longiores & acutiores, tum aures longas, &

capiti appensas, linguam duram & magnam, cilium in inferiori palpebra nullum, caudam prolixiorē, & pilis vestitam. Intranearum etiam partium diversa in illis ratio est, alia enim dicuntur felle carere, ut cervi, alia hienem habent rotundum, ut cornigera, & bisulca, alia quaternos ventris sinus, alia utraque maxillam dentatam, alia unam. Arque hæc sanè, quod ad naturam, & partem quadrupedū attinet, generatim. Ingenium porro ipsorum rationis est imprimis expers, itemque omnia sensibus iisdem, quibus homo, ut aspectu, auditu, olfactu, tactu, gustu, memoria, imaginatione, motu, vegetatrice facultate, auctrice, generatrice, alijsque omnibus, excepta ratione, constant, præterquam quod has ipsas facultates hebetiores humanis habent. Sed hæc de re vberius suo loco. Actiones præterea quadrupedum præter eas, quæ ab animæ vi excitantur, ut sentire, moveri, dormire, vigilare, vegetari, alii, gignere, diversæ inter se sunt. Quædam enim ruminant, quod ordine dentium superiori careant, ut oves, boves, alia sub terræ specubus latent, ut vrsæ, gliræ. Victus etiam, & ætas illarum varia est, siquidem alia carnibus vescuntur, ut feræ, & quæcunque serratos habent dentes, tales sunt leones, lupi: alia herbis, ut cornigera, omnia: alia lambendo bibunt: alia hauriendo.

siendo. Aëtas quoque è dentibus, superciliorum canicie, sinubus circa supercilia relictis, alijsque hujusmodi signis perspicitur, quæ propria sunt speciei cujusque, quæque sub certam rationem cadere nequeunt. Voces præterea quadrupedum variz sunt, propriæque singulatum formarum: quædam enim balant, vt oves, quædam rugiunt, vt elephantes: alia mugiunt, vt tauri: alia denique vocum alijs formis vtuntur. Sed jam de generatione ipsorum. Commune est universo quadrupedum generi vel cum hominibus, vt cum eorum alterum sit mas, alterum fœmina, libidine æquâ corripiantur, vel statis anni temporibus, vel quocunque promiscuè: & cum ea sint ratione expertia, appetituque maximè agantur, libidine generandi immoderata incenduntur, adeò vt tempore coïtus mares, post partum verò fœminæ omnes ferociant. Quo ante modo illa coëant, perspicuum est, cum omnia ferè parte posteriori misceantur, mare fœminam pedibus supergrediente. Fœtus verò in utero eodem ferè modo, quo in mulieribus & concipitur, & alitur, nisi quòd esse multiplicior solet propter multos eorū ventris sinus, in quibus semén continetur, vt in singulis animalium formis videre est. Jam cum fœmellæ pariunt, vel perfectum ædunt animal, vt quæ pauca ædunt animalcula: vel

imperfectum, ut quæ multa. Pauca quidem solent ædere solipedes, aut bisulcæ, multa, quæ multifidiæ sunt, ut sues. Editum ergo in lucem fortum lacte ferè omnia alere solent: quod eodem modo è sanguine fit, quo in mulierum corporibus. Ad communia hæc genera viviparorum quadrupedum (quibus de diximus) referri hæc formæ possunt, elephantēs, qui multifidi sunt, simiæ, canes, lupi, hyena, crocuta, tygrides, pantheræ, ursi, hystrices, erinaceus, scyuri, vulpes, lepores, cuniculi, feles, mustelæ, viverræ, cameli, chamelopardalis, choui, cephus, lynces, Indici boves, eale, equi, capræ, tauri, oves, aliæque hujusce generis, quorum historiam Plinius lib. 9. Aristoteles sparsim, & Ælianus in lib. de historia animalium persequuntur. Restant quadrupedia ovum parientia, quæ nos secundo in loco posuimus. Eadem, sicuti vivipara sanguine constant, præterquam quod ovum pariunt, contra atque illa, itemque corporis temperatione ex qualitatibus, ac similaribus, dissimilaribusque partibus ferè eisdem sunt prædita, atque illa: nisi quod partes dissimilares in lingulis formis evariant, unde petitur earum discrimen. Omnia enim illa partes has saltem ad cibum capiendum necessarias habent, etsi non adeò expressas, ut vivipara: os, linguam (excepto crocodilo) dentes, sed serratos,

ratos, nares, oculos, pedes quatuor, caudam, lingulam, eamque integram, præter serpentes, & lacertos, qui bifidam habent, collum (canceris exceptis, ac serpentibus) reliqua denique interiora membra, & exteriora ad vivendum necessaria, si non ut in hominis corpore, diversa tamen in singulis ferè formis. Figura corporis una omnibus non est, ut nec viviparis: pedes tamen habent cuncta multifidos, caudam longiorem, oculos, sed palpebra inferiori conniventes, loco narium foramina ori vicina, linguam duram, & bifidam in multis. Mammas carent, cortice loco pilorum plerunque reguntur: vox omnibus diversa, & quibusdam nulla, quia exiguo admodum pulmone sunt, & bifido, ac fungoso. Reliquæ partes diversa sunt pro cuiusque forma. Jam quod ad quadrupedum oviparorum attinet ingenium, quinque sensibus exterioribus esse illa prædita cernimus, itemque vegetatrice, altrice, reliquisque facultatibus vitalibus. De memoria vero, & imaginatione eorum nihil certò possumus statuere. Actiones eorundem similes sunt ingenio, id est, hebetiores quàm viviparorum quadrupedum, pastui enim, & libidini tantum intenta nihil ingeniosiori natura dignius præferunt. Quo fit ut multa eorum sub terræ specubus degant, multa tum in aquis, tum in

terris, herbisque atque animalibus alantur, aut aquatilibus. Quin etiam coitus, & generatio horum eodem modo fit, quo viviparorum, mare nimirum foeminam supergredientem. Et quanquam eadem genitalia, atque illa, non habeant, eorum loco tamen habent simile quiddam, unde semen maris effundatur, & in quod recipiatur. Ipsum verò semen ut foetus quidam, ita in ovi figuram efformatur, illudque foras editum calore postea viram, & formam corporis perfectam accipit. Tempus foeturae omnibus illis idem non est, sed alijs in vere, alijs in aestate, alijs circa autumnum. Jam ova alia longiori temporis spatio excludunt, quam alia, quo ipsa tum duriora habent putamina, tum molliora pro cuiusque specie. Locus item incubationis idem omnibus non est, quaedam enim terram defodiunt, ibique ova recludunt, alia in specubus ejus incubant. Quorum omnium ratio diversissima est, propriaque adeò singularum formarum, quae longiori egent historia. Huc referendae sunt testudines, ranae, crocodili, stellion, mures, lacerti, chameleon, salamandra, serpentium formae omnes, quae habent pedes quatuor. Quorum qui historias audire volet, eosdem, quos supra citavi, auctores legat.

DE GENERE SERPENTIIUM

AC REPTILIIUM.

Caput VI.

OVIPARORVM quadrupedum generi proximè accedunt serpentes, & reptilia omnia. Quæ cum latissimè pateant, generali etiam circumscriptione terminanda sunt. Serpentes omnes sanguinem habent tam terrestres, quàm aquatiles, qui pauci omninò sunt. Unde ipsos iisdem similaribus partibus, & humoribus præditos, quibus animalia superiora, esse credendum est. Quamquam nec certo præfinire possimus, partibus nè similaribus omnibus constent, an earum solùm quibusdam, alijsque proportionè similibus. Habent enim omnes carnem, ossa, nervum, sanguinem, reliquaque generis hujus, etsi non tam perfecta, quàm homines, aut quadrupedes vivum animal parientes. Partes corporis diversæ in iisdem serpentibus sunt, figura quoque diversa. Alia enim sunt alijs longiora, majoraque prout singulæ species nascuntur. Communiter autem serpentes omnes se ingressu è terris non attollunt, ac longiores sunt in genere suo alijs animantibus, tum cortice duro integuntur. ne, cum humi repant, lædantur. Iidem caput habent, dorso
tamen

tamen affixum, nullo collo interposito, nares, aures, oculos, eaque foraminibus quibusdam designata, non eminentia. Palpebrae praeterea his inferiores tantum moventur, superioribus fixis Lingua quoque ijs est dura & oblonga, atque atrii coloris utpote venenata plerumque, itemque bifida, eo quod villis tenuissimis distinguatur. Dentes habent omnes serratos, sed ijs duos in superiori maxilla longiores, & perforatos. Porro his pedes aut nulli plane sunt, aut perexigui, adeo ut non conspiciantur. Interna corporis viscera dissimilia in iisdem sunt ab alijs omnibus, hoc est longiora & tenuiora. Gula item longior, cor oblongum, & exiguum, pulmo simplex, & fistulis patens, ac fungosus, lien rotundus, & exiguus, ventriculus intestino similis, hoc est longus, & angustus. Testes his desunt, qui oviparis, sed meatus quidem horum locodati, qui cum prolifico humore pleni sint atritu masculi, ac feminae sese mutuo implantium, ad coitum conducunt. Mares eorum à feminis magnitudine superantur, ut ovipara omnia. Color singulis formis diversus, in plerisque tamen masculus variegatus. Breviter communis omnium serpentium natura frigida est, & terrea, ideoque cibo frequentius, quam potu utuntur, & in terrae specubus maximè latitant, hyeme praesertim.

Jam

Jam verò ingenium his nec rude, nec imperfectum est, etsi corporis imperfecta structura: nam præter id quod serpentes præditi sunt sensibus exterioribus, magno etiam naturæ instinctu vruntur ad vitam tuendam, deligenda latibula, senectutem in hyeme exuendam, pastum quærendum, prolem suscipiendam, aliaque generis ejusdem, vsque adeò ut astutia in ijs esse summa dicatur: ad quam imitandam nos Christus adhortatur, sed in bonum vsum: Estote, inquit, prudentes, sicut serpentes. Actiones eorum & vires manifestæ sunt, vt pascere tum herbas, & terram, tum animalcula seipsis minora, latibulis sese abdere, venena evomere, eaquæ perniciofa, prout victus ipsorum fuerit, aliaque speciei cujusque peculiaria facere. Postremò generatio serpentum mutuo complexu fit ob ineptam corporis formam, & lubricam, ac longam, ideò ægrius coeunt, semenque emittunt. Hoc autem per tenues meatus concepto, sæmellæ ova tandem pariunt, quæ calore postea formata excludunt. Sub hoc genus animalium formæ innumerabiles cadunt tum majorum, tum minorum, ut hydri, angues, aspidæ, viperæ, dipsadæ, cerastes, hammodytes, sepedo, basilisci, dracones. Reptilia his proximè adjungantur, quæ naturæ ejusdem, cum illis sunt, ideòque peculiari explanatione

catione non egent, nisi fortè singulas formas describere velimus, quod immensi est laboris. Quapropter huc omnes vermium formæ ut bombyces, sanguisulæ, lumbrices, aranei, atque ad eò genera omnium animalium humi repentium referantur, siue ea sint amphibia, id est, partim aquis, partim terris viventia, siue terrestria. Quæ omnia brevi oratione nequeunt comprehendi, cum ex putredine plerunque oriantur, novisque ferè quotidie formis varientur. His etiam addere possumus cimices, pediculos, pullices, papiliones, aliæque generis eiusdem, quæ eadem fiunt ex causa. Quorum omnium naturas diligentissimè complexus est Aristoteles in lib. de animal. historia, & Ælianus, ac Plinius.

DE AVIUM GENERE.

Caput VII.

VOLUCRIVM natura, quæ latè admodum patet, notior est, quàm serpentium, quoniam se nostris oculis magis exponit: de qua jam in hoc loco differamus. Volucrum genus est animal aligerum, pennatum, bipes, multifidum, species verò immunerabiles. Corpora, ut omnium animantium, iisdem humoribus quatuor, eorumque temporatione, ac partibus similaribus conflata sunt, nisi quòd.

quod aëris plus habent, quàm terrestria, calidioraque sunt ijs, & sicciora. Unde Plato, in Timæo, aves inquit, è genere hominum levium effectas esse ad Pythagoricam animorum commutationem in varia corpora alludens. Itaque levis est omnibus, & pernix avibus corporis natura, ideoque boni succiillæ à Galeno esse dicuntur. Partes similes his eadem sunt, quæ hominibus, siquidem iis sanguis, caro, nervus, cartilago, cerebrum, vena, arteria, cæteræque omnes insunt. Dissimiles etiam partim eadem, partim verò diversæ. Eadem nimirum sunt, caput, collum, dorsum, spina, & quod pectoris rationem habet, bina crura, sed quæ in aversum flectantur. Diversæ, quòd hæc tota corporis figura peculiaris ipsarum est generi, id est, caudatæ omnes sunt aves, rostratæ, plumis vestitæ, alis præditæ, cristis nonnullæ ornata, tum oculos habent binos sine cilijs, palpebramque inferiorem connivent, ungues grandes, & eiusdem essentia cum rostro, multifidos, & aduncos, aut planipedes, linguam oblongam, & serpentinae similem, sed formæ diversæ, loco narium binos meatus in rostro, binæque foramina pro auribus. Verum hæc partes externæ, atque aliæ huiusmodi avibus peculiares pro formis singularum variantur. In ipsis quoque internis permagnum est e-

rum

rum discriminē reliquis animantibus, quandoquidem lingula, sive epiglotide carent, pulmonem habent exiguum, iecur simile omnino quadrupedum viviparorum, lienem adeo exiguum, ut ferè non appareat, renes, & vesicam non habent, cum tamen testiculis introrsum reclusis non careant. Ingenium verò volucrum idem ferè est, quod aliorum animalium, quatenus ad sensus attinet. Nam & ijs aspectus inest, quo vel remotissima quæque cernunt, itemque auditus, & odoratus, gustus, & tactus, motus corporis citissimus voces diversæ, ac peculiare species cuiusque. Reliquas animæ partes ad vitæ necessitatem pertinentes, sicuti reliqua animalia, habent. Iam memoriam ijs aliquam inesse, & imaginationis vestigia, minus expressa, quam quadrupedibus vivum animal patientibus verisimile est, cum aves quasdam humanas voces imitari, ut turdus, psittacus, alias homines agnoscere, à quibus alantur, ut accipitres, videamus. Hinc variz in earum genere actiones cernuntur, quæ tum ad victus, tum ad loci, & volatuum rationem spectant. Videmus enim omnes aves, quæ ad uncoi habeant ungues, carnivoras esse, ut aquilas, accipitres, cervos, miluos, alias vermiculis vesci, ut fringillas, alias herbis, alias frugibus, ut columbas, quæ omnes plani-

planipedes plerunque sunt. Cumque universum ferè avium genus aut è terra, aut è fluminibus, aut ex mari, aut ex aëre ipso sumat alimentum, id est admiratione dignum, quòd potu exiguo contentæ sunt, imò magna ex parte aduncæ aves ab eo abstinent. Jam nidificandi, incolendique loca cuique pro natura deliguntur, aliæ enim saxosa, & confragosa petunt ut aquilæ, aliæ silvas, & arbusta, ut pupa, aliæ terræ cavernas, aliæ campos, aliæ sata, aliæ lacus, aut flumina, ut cygni, aliæ mare, ut halcyones. Item aliæ loca mutant pro temporis varietate, ut grues, hyrundines, aliæ in iisdem semper degunt, aliæ in urbibus, & ædificijs. Est & volatuum maxima differentia pro cuiusque speciei natura, nonnullæ enim incedunt, ut anseres, corornices, aliæ saliant, ut passerres, aliæ præcipiti volatu sese efferunt. Inter omnes tamen pernices admodum sunt eæ, quæ validas habent alas, quæque loca incolunt montosa, ut carnivoræ, graves autem illæ, quæ in terris, aut aquis degunt, ut anseres, gallinæ. Hactenus ergo de avium ingenio, & communibus actionibus, nunc ad ipsarum generationem pergamus. Cùm aves, uti diximus, habeant testiculos inclusos, tamen lumbis, adhærentes, earumque formellæ vulvam, & eam juxta septum

adjunctam, vel statis anni temporibus, vel quocunque tempore copulantur. In ipso autem coitu singulae inter se formae differunt, aliae enim foemina humi confidente, incubanteque illi mare coeunt, ut gallinae, aliae stantes, ut grues, passerres. Foetus etiam tempora plerisque aut in vere, aut in aestate sunt, alia tamen saepius, & quocunque anni tempore, ut columbae, gallinae, atque adeo oves omnes domesticae, & urbanae. Generandi quoque fecunditas eadem omnibus non est, carnivorae enim (quae minus sunt salaces) pauciora adunt ova, columbae vero, & gallinae, quae salaciores, plura. Pleraque aves in nidis pariunt, ut sylvestres, & urbanae, aliae tamen in densis fruticibus, ut graviores, quales sunt perdices, coturnices, aliae etiam juxta aquas, ut aquatiles omnes. Iam avium omnium partus est ovum: concepto enim semine genitali à foemellis, coitu masculorum, illud statim coalescit in globulum lutei coloris, quod pro tempore pariendi cuique praescripto augefcit, circumfusoque humore quodam albo, quem albuginem appellamus, deindeque tenui quadam pellicula, quae postea durefcit, ovum perficitur, atque additur. Situs vero ovarum superius ad septum transversum est, & spinæ adherere videtur quemadmodum in gallinis cernimus, apertum

earum corpusculo. In ovis, quæ vicem fœtus habent, duæ sunt partes coloris diversi, ex quibus pulli gignuntur, una albuginea, & externa, altera lutea, & interna, quæ prima gignitur, quæque vitellum appellatur. Uterque circumtegit putamen initio molle, & ejusdem ferè essentia cum albugine, postea tamen durius, & firmitus. Atque hæc quidem generatim ovis omnibus insunt, privatim tamen singulæ avium formæ diversas habent ovorum tum figuras, & magnitudinem, tum colores. Nam aquaticarum ova plus habent lutei coloris, quàm terrestrium: color etiam putaminis eorum diversus est: ut in perdici- bus, gallinis, columbisque, candidus: in aqua- ticis pallidus: in alijs maculis quasi punctis, distinctus, ut in Phasianis. Ova item alia alijs rotundiora sunt, maioraque, ac exiliora pro avis magnitudine. Et quidem cum in ovis altera pars sit magis lata, & rotunda, altera acuminatior, alia tamen rotundiora, & oblongiora sunt alijs. Unde oblonga, & acuta ova fœminam ædunt plerunque, rotunda, & lata marem. Iam incubandi, excludendi- que ratio ferè eadem est avibus omnibus, ut fœmellæ ovis incubent, & calore naturali efformata illa intra certum temporis spa- tium excludant. Huc etiam ars aliquid ad- jecit, quod in locis calidis, aut vasibus repi-

dis sæpè ova excluduntur: ut in *Ægypto* olim finio inclusa *Aristoteles* excubari solita refert, atque hodie ab ocularis testibus ego accepi. Illud etiam vulgare est, quod aves alias pro alijs incubare ovis alienis, eaque excludere passim videmus. In quo permagna est naturæ providentia, & diversitas in singulis ferè earum formis. Porro ex ovorum substantia sic pulli generantur, ut incubante ijs scemella, calore ipsa ova vegetentur, & vitam accipiant, majora quidem seriùs, minora citiùs. Sic autem partes singulæ distinguuntur. Luteus humor ad ovi fastigium (quod umbilicum vocant) tunc temporis effertur, & cor sanguinei coloris gignitur in albugine consistens. Hoc effecto, & vitam scetus, & motum accipit, venæque sanguineæ inde ad tunicam ambientem utramque derivantur. Ex his venarum meatibus exorta membrana fibris distincta sanguineis liquorem jam album circumregit. Eo modo corpus pulli incipit paulatim discerni iniridè candidum, & inflatum postea nativi coloris, & formæ factum. Itaque ex albo, ovi pulli origo est, alimentum ex luteo per umbilicum. Ita fit, ut die decimo corpus pulli conspiciuum sit, patentibus manifestiùs membris, quæ confusa priùs erant. Et cùm initium, uti dixi, ortus ab albo pullus habeat, & a
Luteo

luteo sumat alimentum, progressu temporis luteum imminuitur, crassius, & lentius effectum, adeò ut novissimè pallidum existat. Formatis singulis membris, & membranulâ quâdam tenui contextis, tum demum plumis vestitur pullus, atque erigitur, cum caput priùs cruri dextro impositum admotumque ilibus, & ala contextum esset. Erectus is denique, naturæ tempore postulante, pipit, & rostro putamen ovi rumpit, quousque à matre adjuvatur, & excluditur. Atque hæc est avium omnium communis generatio: quam Aristot. lib. de animal historia sexto tradit copiosius. Quod verò hic de cordis effectione idem ait, cum illud imprimis formari refert, Galeno minimè placeat, qui ut antè docuimus, jecur in animantibus primo gigni censet, utpote quod sanguinis origo sit, non cor. Referantur in genus hoc avium, de quo hæc formæ, plurèsvè his, quas quisque observavit. Aquila, accipiter, anas, alcedo, Haliaëtus, Ardea, Attagen, Attricapilla, Bubo, caprimulgus, carduelis, ciconia, cinclus, chalcis, collurio, columba, coturnix, corvus, cornix, culicilega, cuculus, ficedula, fringilla, fulica, gavia, galerita, gallina, galgalus, grues, hyrundo, apodes, lingulaca, buscinia, mergus, cygni, merula, milvus, noctua, onocratalus,

ossifraga, pardalus, passer, pavo, perdix, phasianus, psyracus. Harum historias, & ceterarum avium, quæ possunt sese offerre, ab Aristot. in lib. de historia animalium, & à Plinio lib. 9. atque Æliano petere oportet.

DE INSECTIS ATQUE OM-
NIBVS EXANGVIBVS ANI-
MALIBVS.

Caput VIII.

INSECTORVM restat natura, quæ è genere terrestrium animalium est, quæque latissimè etiam patet. Commune est huius generi universo, quod sanguine caret, ejus tamen loco humorem alium habet, quo alitur. Ideò caloris habet minùs, quàm reliqua animalia, respirationeque, ut ait Aristoteles, caret. Constitutio insectorum ex humoribus est quatuor, qui omnibus animantibus insunt, sed in eorum temperatione magna est diversitas, cum pro sanguine humorem alium habeant, ac pro reliquis humoribus alios, quos ut certò designare non possumus, ita ratione intelligimus, cum omnia corpora præter elementa concreta sint per 1. axioma libri 3. Sed enim magna est hujus generis diversitas, nec universè quicquam

quam de illo potest constirui. Quo nomine ipsum partiamur, ut per species singulas progrediamur. Quatuor sunt huius ordinis formæ maximè communes, quæ sub se alias innumerabiles complectuntur: prima est propriè insectorum, quæ Græcis *ἔντομα* dicuntur: secunda mollium animalium, quæ *μαλακία*; tertia crustaceorum, quæ *μαλακόσπρακα*: quarta testaceorum, quod durioribus crusta integantur: quæ *ὀσπράκωδες*. In quatuor his formis omnibus sanguis, uti dixi, nullus est: membra etiam minimè dignosci possunt propter corporis tenuitatem. Sed ea saltem inesse ijs necesse est, quæ animantes habeant omnes, ut caput, alvum, ac medium quiddam ijs interjectum, quibus & sentiant, & vivant, & alantur. Dicamus ergo principio de genere insectorum. Hæc communi nomine ea vocantur animalcula, quæ è putredine ferè gignuntur, & incisuris quibusdam distinctum habent corpus, ut crabrones, vespæ, muscæ. Eorum alia pennata sunt, ut muscæ, apes, alia vaginulâ quâdam pennas habent inclusas, ut cantharis, carabus, alia ijs catent, sed pedibus multis sunt prædita, ut formicæ, centipedes, alia humi perreptant alis, ac pedibus carentia, ut vermes. Hæc ergo omnia communi nomine insecta nominantur, auctore Plinio, quod in-

cisuris binis, trinisve in genere cujusque pro collo, & pectore, separantur tenui quasi fistulâ coherentia. Eadem ipsa communibus ijs partibus constant, quas suprà posuimus (de corporis autem illorum temperatione generatim etiam egimus) id est, capite, ventre, & intermedio aliquo spatio. Os præterea, linguam, olfactus instrumentum, oculos, colque duos, & palpebris nudatos, tribuere huic generi universo necesse est, quando his saltem sensibus ad vitam necessarijs constant. Dentes etiam non modò victus, sed etiam armorum causa quædam habent insecta, ut ea, quibus est in ore aculeus. Sunt & quibusdam bina cornua oculis adjuncta, mobilia, & ociosa, ut muscis. Quibus verò sunt alæ, ex binæ, ternæ, quaternæve solent esse pro formarum varietate. Ipsæ verò alæ sine caule sunt è tenui quadam, & fragili membranula. Interiores insectorum partes corporis, earumque situm propter subtilitatem describere non possumus, id tantum exploratum est, vitæ ipsæ tuendæ necessaria habere instrumenta. Ingenium eorundem tamen in quibusdam acre admodum est, & sagax, ut in apibus, & formicis, communiter tamen est imperfectius omnibus alijs. Habent illa motum, gustum, tactum, aspectum, odoratum, auditum,

ditum, sed cum obscurum adeò, ut dubitarsi de illo possit. Respirationem etiam multis inesse ijs negant, ut Aristoteles in lib. de respiratione: alij dicunt, ut Galenus, ac Plinius lib. II. naturalis historię, (nam Plato hac de re nihil effert) Probabilior tamen, ac verior Galeni ratio videtur, qui respirationem insectis, ac piscibus non minus tribuit, quàm alijs animantibus, quandò hæc sonum quendam ædunt, & olfaciunt, id quod sine aliquo interno spiritu fieri non potest. Quanquam Aristoteles eum bombum cicadarum, & vesparum inflexione alarum, & corpusculi, non spiritu intetno, ædi dicat. Habent vivacissimam naturam insecta adeò ut in partes contracta adhuc vivant, & aquâ oleove (quod est ijs perniciosum) suffocata reviviscant, si cineribus involvantur, vel ad solem ponantur. Actiones verò hujus generis, vitæque ratio varia est, aliz enim humore tantum pascuntur, ut apes: alia venatu minorum animalium, ut aranei: alia fructibus, ut formicæ: alia omnibus rebus, ut muscæ: omnia tamen exiguo egent alimento ob frigiditatem, tenuitatemque corporis. Quid, quod eorundem nonnulla in agris degunt, alia in civitatibus, aliaque diuturnioris vitæ sunt alijs. Omnia autem hyeme conduntur in locis apricis, exceptis domesticis, vixque

integrum vitæ annum peragunt. Porro generatio insectorum magna ex parte fit è putrefactione : aliquæ tamen formæ ex coitu animalium nascuntur, ut phalangia, aranei: quædam autem averfa coeunt, ut coire muscas videmus. Principiò tamen ortus sui insecta omnia quasi ova sunt tenuissima, postea formantur calore vitam accipientia: quo destituta, vel membris contorta pereunt. Hæc igitur satis de insectorum genere: sub quòd hæ præcipuè formæ cadunt, apes, quarum est summa sagacitas, vespæ, crabones, aranei, bombyces, formicæ, scorpiones, phalangij, scolopendræ, centipedes, culices, cicadæ locustæ, scarabei, cantharides, erucæ, papiliones, ac denique omnes bestiolæ, quæ aut ex ceno, aut ex lignis, & arboribus, aut ex brassicis, stirpibusque alijs, aut ex putredinis alio genere oriuntur. Quarum omnium naturas Aristoteles in lib. de animal. historia, & Plinius lib. II. describunt. Veniamus ad tertium genus mollium animalium: quæ, cum aquatilia magna ex parte sint, quia exanguia, & imperfecta, ad insectorum genus spectant. Hæc frigida naturæ sunt, ut exanguia omnia, licet alijs humoribus tribus composita. Partes eorundem similes ab insectorum partibus differunt: habent enim carnem, cutem, & ossa, eaque

eaque magis expressa : pro sanguine verò
 crassum quendam humorem, ut sepia. Dis-
 similares ijs partes, ac membra corporis sunt
 hæc, brachia, eaque multiplicia, cirri seu bar-
 bę, caput, cruribus medium adhærens, sinus
 latus, & capax loco ventris, quem ut aculei
 pinnae ambiunt. Pedes omnibus octoni,
 forma tamen, & longitudine inter se diver-
 si : linguę loco caruncula quædam oculi
 grandiusculi, fistula caput penetrans, quæ
 aquam transmittunt, cerebrum, os, gula, ven-
 triculus, intestina, sed hæc proportionem ve-
 ris animalium partibus respondentia. Quali
 verò animę genere hæc constant animalia,
 dubium non est, cum motum, tactum, gu-
 stum, aspectum, auditum, olfactum, vege-
 tandi, alendique facultatem habeant. Respi-
 rationem autem Aristotelis sententiã, non
 habent, cum nec sanguine constant, cujus
 causa fit respiratio. Jam horum generatio ex
 coitu maris, & fœminę fit, sed obscurâ ra-
 tione, atque adeo speciei cuique peculiari :
 omnia tamen complexu brachiorum, oribus
 admotis, coire videntur. Pariunt autem ova
 imperfecta, eaque candida : quæ corpori
 masculi adhærentia, seminéque illius aspersa
 foventur, & excluduntur. Verum hæc brevi-
 ter de mollium genere dicta sint : singulæ e-
 nim eorum formę variantur, ut polypus,
 sepia,

sepia, loligo, lollius, lepus marinus. Restant
 crustacea, quæ generis etiam exanguis sunt:
 quorum ab Aristotele quatuor formæ recen-
 sentur: una, quæ καράβων, id est, locustarum
 dicitur: altera ἀστέων, id est, geminarum: ter-
 tia καρίδων, id est, squillarum, quarta καρ-
 κίνων, id est, cancerorum. Harum omnium ea-
 dem est frigida, & exanguis natura, figura
 etiam diversa pro formæ varietate, partes
 item differentes, & ingenia, actiones, ac gene-
 ratio. Quæ quia prolixiora sunt, & singula-
 rum formarum propria, ab Aristotele lib. 4.
 de animal. historia, & à Plinio requirantur.
 Sed jam de testaceorum genere quarto, quod
 duricie integumentum à superiori differt. Testa-
 cea illa dicuntur, quæ foris duro quodam
 cortice, & solido sepiuntur, tenui intus ca-
 runculâ relictâ. Horum magna est varietas,
 tum in carunculæ forma, tum etiam in testæ.
 Communiter tamen omnia sunt aquatilia,
 exceptis limacibus, aut alijs, si quæ sint gene-
 ris eiusdem. Itaque cùm hoc genus animalis
 duabus constet ex partibus præcipuis, testa, &
 caruncula, utraque sanè in singulis formis
 variatur. Nam alijs nulla est caro, ut echinis,
 alijs ea nimis recondita, ut limacibus, purpu-
 ris, ac tori ferè turbinatorum generi, quod
 σπομβοειδές Aristoteli dicitur. Jam quædam
 in anfractus tortuosos turbinatas habent te-
 stas,

flas, ut buccina: alia in globum retortas, ut echini: alia duplici concha integuntur: quæ in medio carnem complexa modò clauditur, modò aperitur, prout caro sese moverit: cuiusmodi sunt conchylia, & ostrea. Testaceorum etiam magna est diversitas, cum alia rotunda sint, alia plana, alia in formam ovi excavata, alia mollia, alia dura, alia magna, alia exigua. Quorum omnium ratio comprehendendi faciliè non potest in tanta naturæ subtilitate, ac varietate. Id ergo commune est generi huic, ne singula morosè persequar, quòd caro interna quasi animal ipsum est, externa verò testa veluti integumentum, quodque eadem caruncula exanguis, & informis existit ita tamen ut necessarios ad vitam habeat meatus, quibus & vitalem contineat calorem, & alimentum capiat. Quales autem insint, aut quomodò firi, difficilè est dictu, ob incertam amplissimæ rei cognitionem, cum singulæ formæ inter se plurimum distent. Atque hac de re breviter attigisse pauca satis sit, quando in genere Zoophyrorum plura dicentur, nosque hîc exanguium animalium naturas commemorare voluerimus, ut institutæ satis divisioni faceremus.

DE PISCIBUS, ET ZOO-

PHYTIS.

Caput IX.

NATURA piscium, quæ omnem varietatem formarum, magnitudinemque terrestrium superat, explicanda hoc loco restat. In quo aquatilium sanguineorum ratio solum exponetur non exanguium, de quibus plura in præcedentibus disseruimus. Communiter ergo universum hoc genus aquatilis, & sanguinei animalis piscium nomine continetur. Pisces autem omnes naturâ frigidi sunt, & humidi, si cum terrestribus animalibus conferantur, propter vivendi rationem, & loci, ac victus frigiditatem. Habent enim omnes in suo genere sanguinis minus, quàm terrestres animantes, suntque corpore vastiori ob humiditatem majorem, quâ constant. His quoque præter communem illam humorum quatuor temperationem (de qua suprâ dixi) similes partes proportionem quâdam insunt, ut caro, sanguis, ossa spinæ, medulla spinæ ipsi inclusa, nervi, alięque veris partibus similitudine respondentes. Corporis partes, ac formam hoc genus à terrestri habet diversam. Sunt enim
 pisces

pisces maxima parte oblongi, & terrestres, cervice, pedibus, brachijs, & alis carentes. Caput autem habent, idemque proportionem corpore majus: oculos, sed lubricos, ac palpebris nudatos: nares, aut aures perspicuas habent nullas, sed harum loco branchias, quas movent identidem. Os in omnibus satis manifestum est dentibus serratis distinctum: itemque lingua, sed dura, & ferè ossæa. Corporis parti extremæ pinnas alarum loco habent, & caudam, quâ velut alis innixi natant. Quid, quod branchiarum, quæ solis insunt piscibus, permagnum est discrimen. Nam cum per eas humorem reddere, & respirare videamus, ipsæ quidem in alijs osse lato integuntur, aperiunturque faciliè, in alijs reconditæ sunt, in alijs sunt binæ, & rubræ, in alijs multiplices. Est & aliud piscium generi peculiare, quod ij nullis aut pilis, aut plumis, aut testâ, corticève integuntur, sed cute glabrâ, & squamis operta, exceptis cartilagineis, quæ cutem habent asperam, ac squamis nudam. Quin etiam partium interiorum summa est in hoc genere varietas, paucis enim gula est, ut anguillis, & congruis, alii ventrem habent ori adiunctum. Cor item inest plerisque, sed inversum contra, ac in reliquis animalibus: à quo in branchias meatus quidam porriguntur,

per

per quos duci videtur spiritus. Pulmone carent pisces, & arteriâ, ideoque non respirare dicuntur. Venter simplex: lien, jecur intestina iisdem insunt, sed magnitudinis, ac formæ diversæ, tum à reliquis animalibus, tum à seipsis. Testes nullos huic generi esse perspicuum est, sed bini meatus à vena maiuscula, ad spinam protensi, in ostium excrementis apparent: qui pleni humore seminali statuto tempore coitus in meatus foeminarum effundi videntur attritu maris cum illa. Quo fit, ut discrimen sit etiam aliquod sexus in piscibus. Ingenium rude, & hebes admodum illorum est, &, ut Plato in Timæo, Pythagoræ sententiam secutus inquit, ex hominum hebetissimorum genere ortum. Nihilominus tamen præter motum, ac vim vegetatricem, & altricem (quæ omnibus insunt animalibus) aspectu, gustu, tactu, auditu, odoratuque pisces esse præditos, ac dormire, & stridorem quasi vocem quandam æthere multi testantur. De ipsorum etiam respiratione controversum à Philosophis est. Aristoteles in libro de respiratione pisces respirare negat, quod pulmone careant, quodque frigidum admodum, & exiguo sint sanguine: quibus in rebus potissimum sita est respiratio. At in Timæo, Plato respirationem quidem, sed illam hebetissimam, & exiguam illis tribuit.

tribuit. Quam etiam sententiam Galenus lib. 9. de usu partium sequutus, respirare illos per branchias confirmat. Unde à majoribus piscibus, ut balenis per fistulam capiti adjunctam respirationem fieri docet, ut apertissime navigantibus constat. Quod de re ne longam instituamus disputationem, quam alio etiam loco habuimus, ad piscium actiones veniamus. Multæ sunt, & inter se omnino diversæ illorum actiones, quas qui accuratè persequi volet, longam sine dubio historiam sit scripturus: nos tamen breviter summa rerum capita sequamur. Piscium alij perpetuò iisdem in locis versantur, ut à piscatoribus, qui ea loca observant, exploratum est: alij loca mutant pro tempore, ut in æstate refrigerationis causâ in medium penetrant pelagus, in hyeme ad littora ob teporem confluant: alij etiam à locis, ubi nascuntur, in alia tendunt excludendorum ovorum causa, ut thynni, ad Beticæ Hispaniæ oram juxta fretum Herculeum adnatantes: alii sub saxis, & rupibus occultantur. Est & in hoc genere animalis id admiratione dignum, quod Aristoteles refert, maximam piscium partem congregatione delectari, ducemque aliquem sui cœtus habere, quem in Pontum confluentes pabuli causa, quod creberrimum ibi est, turmatim sequantur. Jam, quod ad

temporum observationem ipsorum vitæ necessariam attinet, magnum habent naturæ instinctum pisces omnes, dum tam cautè loca commoda & pabulo, & habitationi quaerunt dum alij hyeme latent, seque proferunt in æstate, ut coracinus, thynnus, atque omne cartilagineum, & saxatileorum genus: dum, alij mutant pro tempore colores. ut turdi, ac merulae, qui in æstate candescunt, cum hyeme sint nigri. De quiete verò piscium per noctem plerique consentiunt historici, qui eos vel ad arenam, vel saxa, vel sub limo, vel ad littora, vel in medio pelagi dormire inquit, id quod piscatorum probant testimonijs. Verùm hæc de re proposita satis. Cætera quæ de piscium optimorum, ac saluberrimorum victu, & alimenti ratione dicuntur, Medicorum propria sunt: in quorum ingredi fines non docet. Jam piscium generatio similis est cuiusque formæ sexui. Quoniam enim in illis & mares, & foemellas esse constat, ex mutua eorum copula gigni ova necesse est, ne frustra videatur à natura sexus separatus. Quocirca omnes, ut ait Aristotelis supinis partibus coherentes coeunt, exceptis planis generis cartilaginei. Quo autem pacto universæ species copulentur, effatu est difficile, cum ne omnium quidem teneamus cognitionem: tantum id asserere cum

eum Aristotele, cæterisque scriptoribus possumus, pisces utpote testibus privatos (quemadmodum animalia omnia pedibus carentia) vel caudæ attritu copulari, vel partibus planis invicem admotis, vel fricatione natis in arenam semine emisso, & à fœminis excepto, quod quidam scribunt. Utcunque demum id sit, coïtus in illis semper brevi tempore absolvitur, semenque ipsum quasi humor quidam est aquosus: qui condensatus, & conglobatus in ovi formam fœtui materiam præbet. Jam quemadmodum ova excludantur, dubium est. In quibusdam enim formis ea ædita à fœmellis mares complectuntur, & affusione quâdam seminis fovent: in alijs fœminæ ipsæ ova ædita per branchias recipiunt, & ut in nido, ita in illis continentes fovent, quousque excludantur, ut thynni. Magna denique hujus est generis varietas, non solum in concipiendi, & pariendi forma, atque in ipsorum ovorum differentijs, sed in tempore etiam, quo illa omnia fiunt. Qua de re uberius Aristot. lib. 3. de animal. historia, & Plinius lib. 9. de aquatilibus. Huc referri possunt formæ piscium innumerabiles, tum maiorum, qui cete communiter nominantur, tum minorum, ut thynnorum, delphinorum, remoræ, anguillæ, atque adeo plusquam trecenta genera;

temporum observationem ipsorum vitæ necessariam attinet, magnum habent naturæ instinctum pisces omnes, dum tam cautè loca commoda & pabulo, & habitationi quaerunt dum alij hyeme latent, seque proferunt in æstate, ut coracinus, thynnus, atque omne cartilagineum, & saxatileorum genus: dum, alij mutant pro tempore colores. ut turdi, ac merulae, qui in æstate candescunt, cum hyeme sint nigri. De quiete verò piscium per noctem plerique consentiunt historici, qui eos vel ad arenam, vel saxa, vel sub limo, vel ad littora, vel in medio pelagi dormire inquirunt, id quod piscatorum probant testimonijs. Verùm hæc de re proposita satis. Cætera quæ de piscium optimorum, ac saluberrimorum victu, & alimenti ratione dicuntur, Medicorum propria sunt: in quorum ingredi fines non docet. Jam piscium generatio similis est cuiusque formæ sexui. Quoniam enim in illis & mares, & fœmellæ esse constat, ex mutua eorum copula gigni ova necesse est, ne frustra videatur à natura sexus separatus. Quocirca omnes, ut ait Aristotelis supinis partibus cohærentes coeunt, exceptis planis generis cartilaginei. Quo autem pacto universæ species copulentur, effatu est difficile, cum ne omnium quidem teneamus cognitionem: tantum id asserere
cum

eum Aristotele, cæterisque scriptoribus possumus, pisces utpote testibus privatos (quemadmodum animalia omnia pedibus carentia) vel caudæ attritu copulari, vel partibus planis invicem admotis, vel fricatione maris in arenam semine emisso, & à fœminis excepto, quod quidam scribunt. Utcunque demum id sit, coïtus in illis semper brevi tempore absolvitur, semenque ipsum quasi humor quidam est aquosus: qui condensatus, & conglobatus in ovi formam fœtui materiam præbet. Jam quemadmodum ova excludantur, dubium est. In quibusdam enim formis ea ædita à fœmellis mares complectuntur, & affusione quâdam seminis fovent: in alijs fœminæ ipsæ ova ædita per branchias recipiunt, & ut in nido, ita in illis continentes fovent, quousque excludantur, ut thynni. Magna denique hujus est generis varietas, non solum in concipiendi, & pariendi forma, atque in ipsorum ovorum differentijs, sed in tempore etiam, quo illa omnia fiunt. Qua de re uberius Aristot. lib. 3. de animal. historia, & Plinius lib. 9. de aquatilibus. Huc referri possunt formæ piscium innumerabiles, tum maiorum, qui cete communiter nominantur, tum minorum, ut thynnorum, delphinorum, remoræ, anguillæ, atque adeo plusquam trecenta genera;

quæ Plinius esse ait. Infimi ordinis animalium omnium sunt ea, quæ communi nomine à Græcis *ζωῶν ὅντων*, à nostris, si verbum verbo reddamus, plantanimalia dicuntur, eò quòd ipsorum natura media inter stirpes, & animalia sit. Videmus enim hæc ipsa ad naturam stirpium accedere in effigie corporis, & motu, alendi quæ, ac vegetandi sese facultate, ad animalium verò, in sensu quodam hebetissimo, quo saltem prædita sunt ad vitæ commoditatem. Sed horum etiam diversæ formæ sunt pro majori, minorive sensus facultate, omnia tamen saxis, vel arenæ, vel limo adherent, pleraque enim aquatilia sunt, indeque cibum sibi capiunt. Et quanquam exiguam habeant pleraque carunculam testa inclusam, in qua vires sensuum aliquæ sint: nihil tamen præter gustum, & tactum, & motum contrahendi, dilatandi quæ sese habere videntur. Quapropter genus hoc Aristoteli testaceorum esse dicitur: de quibus nos, quia suprâ, quæ satis erant collegimus, nihil amplius addamus. In hoc ipsum genus diversissimæ cadunt formæ, ut holothurio, stella, urtica, marinus pulmo, sponsia, conchyliorum pleraque genera. Quorum omnium naturas ab Aristotelle, Plinio, Eliano, Alberto Magno, cæterisque animalium historie scriptoribus petendas

tendas censemus. Sed hæc satis de anima-
lium omnium communi natura,
quatenus ea corpora so-
lùm con-
stant

Y 3

SEBA

SEBASTIANI FOXII
MORZILLI HISPALENSIS,
de naturæ Philosophia, seu de
Platonis & Aristotelis
consensione,

LIBER QUINTVS.

Axiomata.

- 1 Quidquid à se movetur, animatum est.
- 2 Nullum corpus à se moveri potest.
- 3 Omnia animata sui simile procreare cupiunt.
- 4 Omne corpus animatum ab anima vitam accipit.
- 5 Quidquid alitur, vitæ particeps est.
- 6 Omnia se ipsa conservare cupiunt.
- 7 Materia omnis est propter formam.
- 8 Quidquid aliquid recipit, caruisse illo necesse est.
- 9 Quæcunque subiecto differunt, essentiâ differunt.
- 10 Omnes partes animalis sunt animatæ.
- 11 Agere melius est, quàm pati.
- 12 Quicquid expetitur, ratione boni expetitur.
- 13 Nullum corpus animatum est simplex.
- 14 Diverſarum actionum diverſæ sunt cauſæ.
- 15 Omne corpus vitæ particeps alimento eget.
- 16 Omnis calor, & frigiditas est efficax.
- 17 Omnis ſiccitas, & humiditas patitur.
- 18 Omnis exceſſus rei ſenſilis lædit ſenſum.
- 19 Diverſorum ſenſuum diverſa ſunt obiecta.
- 20 Similia ſentiuntur à ſimilibus.
- 21 Uno, & eodem tempore, aut ratione nihil agere, ac pati po teſt.
- 22 Alimentum rei altz debet congruere.
- 23 Omnia habent vitæ, ac magnitudinis ſuz terminum præſcriptum.

- 24 Quidquid citò crescit, citò perit, & econtras
- 25 Quicquid gignitur, finem est etiam habiturum.
- 26 Nullum animal perpetuò labore uti potest.
- 27 Opposita suis oppositis adjuncta clarius clucescunt,

Definitiones.

- 1 Animatum est id, quod animà constat.
- 2 Vivere est, motum ab anima habere.
- 3 Sentire est, moveri ad rem percipiendam.
- 4 Sensorium est, corporis instrumentum, quo fit sensus.
- 5 Subiectum est aliquid externum sensum movens.
- 6 Medium est id, quod ad sensum pariendum interponitur.
- 7 Perspicuum est id, quod quanquam fit visibile, coloris tamen accessione, ut cernatur, eget.

Hypotheses.

- 1 Ab anima dicitur animal.
- 2 Animalium initium est anima.
- 3 Omnes animi affectiones cum corpore existunt.
- 4 Differt inanime ab animato, quod vivit.
- 5 Sensorio ad motum objectum nullum parit sensum.
- 6 Inter objectum, & sensum spacium interponi debes accommodum.

DE ANIMI ESSENTIA OPINIONES
PLATONIS,
ARISTOTELIS
GALENI.

Caput I.

EUM in efficiendo ordinem naturæ sequitur, ut initio sibi materiam omnium actionum subijciat, huicque formam deinceps adhibeat tanquam effectiōnis suæ finem. Hoc in omnibus corporibus fieri passim videmus, & ars ipsa naturæ imitatrix nos docet. Ideo qui de natura recte disputaturus est, illius ordinem, ac viam tenere debet, ut ejus quam describit, rationem, quantum fieri possit, sequatur. Quamobrem & nos absolute Physices artem pro vigili instituturi, explicatâ corporum omnium, tam simplicium, quam compositorum, effectiōne, proximum est, ut de forma illorum i. anima, sine quæ nullum esse animal, per definitionem potest, differamus. Cujus sanè rei explicatio, tamen nec Physici proptia sit (quandoquidem à corporis essentiâ diversa est anima) tamen utpote media inter Physici, & Theologi munus extremo loco adijciatur. Nam cum tribus ex scientiæ gener-

generibus circa rerum contemplationem versantibus, Physica, inquam, Mathematica, Theologia, quam Metaphysicam vulgò nominant, prima in corporum essentia, secunda in rei partim corporeæ, partim incorporeæ magnitudine, tertia in experte corporis natura, versetur: disputatio quidem de anima secundæ illi tantum adjungenda videtur, non alijs: quoniam tum animæ naturam, quatenus adhæret corpori, investigatur, tum quatenus ab eo sejuncta est. Hunc differendi ordinem in animi tractatione Aristoteles, ac Peripatetici omnes, & Plato prior in Timæo Mathematicis rationibus eius essentiam ostendens, sequuti sunt, nosque in præsentia sequendum statuimus. Quantum autem utilitatis sit, hæc de anima disputatio allatura Physicis, & artium omnium studiosis, haud quaquam satis dici potest, cum ea tam latè pateat. Nam ut nihil perfectè vel eorum, quæ posita extra non sunt, intelligere possimus, nisi nos ipsos prius noscamus, profectò disputatio de anima cum primis omnibus necessaria est: quippe cum sine illa non modò nos ipsos non nosse, sed ne artes quidem ullas, quæ sint cum ratione coniunctæ, intelligere possimus. Quamobrem & Aristoteles de animo scripturus prudenter eius noscendi utilitatem, dignitatemque obocur-

los ponit, ut eiusdem ad studium omnes acrius incendat. Omitto nunc quid ea de re Plato, multis in locis, senserit, quamque magnificè loquutus fuerit: quid Iamblicus, & Plotinus: quid alij demum omnes summi Philosophi. Veniam ergò ad propositam de animi essentia tractationem: quam sic instituam, ut quid sit de illa verè sentiendum, ostendam, non quid Plato solum, aut Aristoteles censuerit. Sumamus itaque exordium ab ea quæstione, quæ quanvis aperta est, ob aliquorum dubitationem, & ordinem doctrinæ videtur præponenda: Nunquid animus extet in rerum natura, uti asserunt omnes, an inane sit eius totum hoc nomen, frustra que animalia constare anima dicantur (quòd nullus sit animus) ut Dexarchus apud Ciceronem putavisse fertur. Esse animum aliquem, à quo animalia nomen accipiant, nemini esse dubium existimo naturam corporis intuenti: cum per 2. axioma nullum à se corpus moveri possit, cumque animatum corpus à nobis dicatur per definitionem 1. quidquid animo constat, id est, internà movendi se vi. Huc accedit, quòd in eodem animante actiones diversas intuentes, diversas quoque naturas illius esse judicamus: cum actionum diversarum per 14. axioma diversæ fiat causæ. Itaque dum aliud in eodem sub-

jecto

lecto motum affert, aliud ab eo impellitur,
 internam esse vim quandam, quæ animus
 appelleretur concludimus. Hæc dubitatione
 paucis sublata, quid anima sit, jam videamus:
 nam quod nominis animi, & animæ discrimen
 à quibusdam affertur, otiosum est: cum
 neque Cicero eloquentiæ parens ullum esse
 putarit. De animi essentia permultæ sunt o-
 piniones, quas Aristoteles lib. 1. de anima, &
 in Tusculanis Cicero, ac Firmianus enume-
 rant. Quibus omnibus omissis, Platonis, &
 Aristotelis, atque Galeni sententias perpen-
 damus, quæ in usu magis versantur: cæteras
 aliorum Philosophorum iidem illi auctores
 copiosè refutant. Plato in Timæo animum,
 ut è tota ejus sententia colligitur, definitivè
 essentiam intellectualem, mobilem, ad nume-
 rum concentu quodam compositum sese mo-
 ventem. Cujus sententiæ summa est, animam
 esse illam essentiam corporibus insitam ani-
 matis, quæ & motum ipsi afferat, & ipsa rur-
 sus moveatur, in eoque motu concentum
 quendam è numeris harmonicis, quasi tem-
 peratum efficiat: eadem verò incorporea, &
 intellectibilis existat. Quam ob causam è
 duplici essentia illam effectam esse inquit,
 una intelligibili, quam Pythagorico more
 ipse individuum appellat, altera sensili, quam
 dividuum, quoniam anima eadem mediæ
 naturæ

naturæ sit, id est, partim intelligibilis, partim
 sensibilis, & corpori adhaerens. Motum porro
 animo tribuit, non eum, quem habeant cor-
 pora ab uno loco in alium, sed alium in sola
 possum actione : qui nihil sit aliud, quam
 ipsa animi actio in corporibus ædita : quam
 idem nomine motionis voluit significari.
 Eundem animum harmonicis è numeris con-
 structum dixit, non quòd sit ipse numerus,
 sed quia ejusmodi habeat essentiam, quæ nu-
 merorum naturæ sit similis. Nam ut nume-
 ros solâ cogitatione concipimus, nullâ ipsi
 corporum contagione additâ, ita animum
 intelligibilem facit. Quem ipsum concentu
 harmonico præditum esse ait, quòd magnum
 in actionibus suis ordinem, & rationem ser-
 vet, non quòd Musica constet harmonia, uti
 Aristoxenus putabat : id quod in Phædone
 refutat Socrates. Hæc est summa Platonis de
 animi natura sententia : quam omnes etiam
 uno ore Academici tuerentur. Sequitur, ut
 Aristotelicam addam. Animam Aristoteles
 in libris ea de re bifariam describit, princi-
 pio initium, quo vivimus, sentimus, move-
 mur, ac primò intelligimus. Quæ quidem
 definitio ab ejusdem actionibus sumpta rei
 minus exprimit essentiam. Secundò *ἐν τῷ
 λείπῳ*, id est, actum primum corporis or-
 ganici vitam potestate habentis. Quæ etiam
 definitio

definitio obscura cum sit, quid hoc nomen *ἐπιλέχεια* significet, inquiramus. Cicero in Tusculanis sententiam Aristotelis recitans, *ἐπιτέλεσσαν* per δ. literam continuatam vocat motionem. Itaque motum illum internum animalium, animam esse ex Aristotele vult. Alij, ut Peripatetici recentiores, *ἐπιτέλεσσαν* per γ. actum primum, seu perfectionem quasi perfecti habiam (ut vocat Hermolaus) reddunt. In quo animam formam esse primam organici corporis dicunt. Posteriores hanc interpretationem recentiorum plerique amplectuntur, Tulliana omnino rejecta, ut ex Politiani Miscellaneis liquet. Sed omissa hac de nominis significatione controversa, ipsam Aristotelis sententiam explicemus: quâ intellectâ, nominis significatio ipsa intelligetur. Duplicem esse naturam ex præcedentibus constitutum est, unam, quæ sese actioni subijciat, id est, materiam: alteram, quæ in subiectum essentiam inducat, id est, formam. Utrunque in rebus omnibus, quæ sunt, ita ponimus, ut à forma præcipua existendi vis oriatur. Eodem quoque modo in animantibus corpus, uti instrumentum, ac subiectum, animam uti formam imperantem illi addimus: quæ ab ejusmodi informatione vocetur *ἐπιτέλεσσαν*. i. forma corpus reddens animatum. Et quamquam

quam diversa formarum genera sint, ut propriarum, & accidentalium, atque primarum & secundarum: animam quidem primum esse actum dicimus, quod primò ipsa veluti essentialis forma corpus, utpote materiam, informet. Sed neque corpus quodcunque ab anima informari dicimus, nisi illud, quod instrumenta ad actiones animæ proferendas à natura habeat instituta, quodque per hæc eadem vitæ officia exerceat, ac possit exercere: id enim Aristoteli dicitur, facultate vitam habere. Ergò esse illud formale animantis in corpore animato, Aristoteles animam non tam in homine, quàm in aliorum animalium formis appellat. Hanc ipsam essentiam, quæ corporis forma existat, sive continuatam motionem, ut Cicero, seu actum primum, ut alij, vocemus, nihil refert, cum utrunque Aristotelis sententiæ congruat, idemque planè sit continuata motio, atque actus primus, quatenus utrumque pro forma animalis capitur. Nam & actus ille seu *ἐνέργεια*, ut Plutarchus indicat, & perfectio ad formam efficacem in animali referuntur, ut lib. 3. Physic. Aristoteles *ἐντελέχεια* nomen capit, & Themistius, ac Peripatetici alij permulti. Sed omisse hac nominis questione inutili, vera Aristotelis de animi essentia sententia est, ipsum nec corpus esse aliquod
 è qua

è quatuor elementis concretum, nec etiam
 simplex, sed quintam naturam, ut Cicero
 vertit: quæ quoniam forma sit corporis ani-
 mati *enteλεχτα* novo nomine appelletur.
 Hac in sententia id convenit Platoni cum
 Aristotele, quod uterque animum esse cor-
 pus negavit, quodque forma corporis ani-
 mantis dicitur, ut ex Timæi verbis perspicue
 intelligitur. Id tamen est discriminis, quod
 Plato animi naturam penitiùs videtur inspe-
 xisse, dum illum intelligibilem facit essen-
 tiam numerorum naturæ persimilem, ma-
 gnoque partium suarum concentu quasi har-
 monia se moventem. At Aristoteles in id,
 quod est ob oculos positum, intuens, illam
 animantis corporis formam animum esse di-
 xit: quid verò eadem esset, haud satis ape-
 ruit. Restat Galeni sententia, quæ à vulgò
 Medicorum acerrimè argumentis quibus-
 dam non admodum efficacibus defenditur.
 Ille itaque multis in locis, ut in lib. de ani-
 mi morum, & corporeæ temperationis con-
 secutione, animum esse ipsam corporis tem-
 perationem, è quatuor elementis certâ
 proportionem concretam inquit, id quod è
 morbis cerebri, ac partium aliarum corporis
 ob commutationem humorum, aut tempe-
 rationis, alijsque huiusmodi signis confir-
 mat. Quam ille sententiam ex Hippocrate
 desump-

desumpſiſſe, & novis alijs rationibus confirmari videri vult.

POSITARUM OPINIONUM

EXAMINATIO.

Caput II.

SED videamus quàm rectè illi de animorum essentia ſenſerint, ne quam erroris anſam relinquamus, veritate ignoratâ. Duo ſunt omninò in Platonis ſententia errores: unus, quòd omnes animas intelligibilis naturæ feciſſe in adducta definitione videtur, ſi ea eſt omnium animalium generi communis, ut eſſe debet: aut ſi hominum propria, quòd manca eſt, quando anima debuit univerſè deſigniri. Alter, quòd à Dei mente decerptos, & ex eadem eſſentia, ex qua reliquas cœleſtes animas, animantium animos eſſe arbitratur: ut in Timæo docet manifeſtè, cùm in animalium generatione Deum animas, Juniores autem Deos corpus procreaſſe, ſicque effectum eſſe animal inquit. Quod ipſum ex migratione animorum in diverſa corpora magis confirmatur: Cùm ſi eadem vera eſt ex eius ſententia, eadem quoque ſunt animalium omnium animæ. Qua de re poſtea ſuo loco. Illud nunc indi-

indicasse sit satis, hinc animam universè definiendam fuisse, non aut humanam, aut bel-
luinam, aut cæterorum animantium tantum-
modò. Quapropter communem aliquam
definitionem quæramus, cui adjuncto ali-
quo discrimine, vel belluarum, vel cætero-
rum omnium, vel hominis animæ definian-
tur. Quod cum ita sit, vera esse illa Platonis
definitio non potest, cum, si, uti diximus, ea
propria sit hominis, eatenus rejicienda sit,
quod communis esse omnibus debuit, vel si
communis sit (in quam ipse sententiam ma-
gis adducor) quod congruere hominibus so-
lùm possit, præterea nullis. Veniamus ad
Aristotelis sententiam. Hæc quamvis à ple-
risque rerineatur, quod communis omnium
animis sit, quodque universam animorum
essentiam declaret, non singularem, tamen
nonnihil habet obscuritatis, & vitij. Primò,
quod animam obscurè definivit: quod vi-
tium in definitione summum est: Secundò,
quod ad humanam animam definitionem il-
lam accommodat, cum minime accommo-
dari possit, ni alia differentia, quæ efficiat
speciem, adjungatur. Nam cum esse corpo-
ris actum primum inquit, imprimis animam
à corpore separari non posse ostendit: id
quod falsum est, ut postea dicemus ex Pla-
tonis sententia: siquidem ad corpus illam

Z

refert,

refert, ita ut ab eo separari non posse videatur: tum motricis, ac sensutricis animæ vim, non rationabilis exprimit, quod maximè debuit observare. Quocirca si ad animam omnem illa Aristotelis definitio referatur, vera erit: si ad hominem tantum, nullo alio discrimine addito, falsa, & truncata. Porro quæ in hanc eius sententiam obscuram, & ambiguum aliqui argutantur, dum nec animæ essentiam explicari per actum illum primum seu *ἐντελέχειαν* dicunt, sed eius vim solum, & actionem per exigui momenti sunt. Cum Aristoteles nec corpus, nec materiam, nec formam corpoream esse animum voluerit, sed agitationem, seu actum, sive formam illam, à qua corpus & fit animatum, & vitam, quam in se habet potestate, ob participationem accipit. Eiusdem ferè modi sunt, quæ Gregorius Nyssenus lib. 2. de anima, & Justinus Martyr, atque alij contra hanc Aristotelis sententiam asserunt: quæ omnia reiicienda sunt tanquam ad nostrum institutum parum pertinentia. Modo illud constitutum maneat, definitionem Aristotelicam, reliquo animantium generi congruere, non tantum hominibus, qui & animam à corpore habent separabilem, & eandem intelligibilem, ac rationis participem: quod in definitione superiori minimè ostenditur.

ditur. Jam quæ Galenus de sua illa anima ex quatuor elementis temperata dicat, perpendamus. Quod anima sit harmonia, seu temperatio è quatuor elementis facta in corpore, nullius per se essentia particeps, atque adeò, *negōis* illa humorum apud Platonis Phædonem Simmias probare contendit, & Dynarchus Philosophus asserere conatus est. Quam quidem sententiam mirificè Socrates convellit, ac refutat rationibus efficacissimis: quas, ne sim longior, in hunc locum asserre nolo, præsertim cum eas in nostris commentarijs in Phædonem collegerimus. At quales sint Galeni rationes, inquirassius. Principiò si corporis temperatio sit anima, inde animatum esse corpus omne sequeretur, cum nullum temperatione quatuor elementorum careat per 1. axioma lib. 3. Quo fiet, ut in lapide, ligno ferro, statua, cæterisque corporibus anima existat, quando elementorum est ijs temperatio. Præterea si humorum constitutiones ex Hyppocratis, & Medicorum sententia pro ætate, loco, victuque commutantur, & varijs afficiuntur modis, animam etiam eodem modo immutari, necesse est. Quid, quod si anima temperatio sit, impedire corpori non possit, aut ejus impetus cohibere: qui pro corporum temperationis forma nascuntur. Quod cum fieri contrà vi-

deamus, ut anima sit tanquam gubernatrix corporis: relinquitur, ipsam non posse humorum temperationem esse. Postremo cum temperatio qualitas sit, hæcque à subjecto tanquam accidens separari, & eidem inhaerere possit: certè animam esse accidens, quod faciliè commutari possit, subjecto incorrupto, aut eandem non esse temperationem, necesse est. Quapropter aliud quidem est animus, quàm corporis temperatio nimirum essentia quædam incorporea, quæ vitam, motum, sensum, viresque reliquas corpori afferrat, ita ut eius temperationem sequatur propter æctissimam, cum eo connexionem. Hactenus igitur adductæ opiniones de animi essentia examinatæ sint. Sed quoniam, qui de natura disputaturus est, universè omnia principio debet complecti, deinde singula, ut à nobis est, hucusque observatum, æquum est, ut de toto animorum omnium genere differatur, non de humano solum, quod Plato in Timæo, & in secundo de anima libro Aristoteles fecit. Itaque generatim animi essentia exponi debet, quantum fieri possit, ut à toto genere ad partes disputatio progrediatur. Animam ergo incorpoream quandam essentiam, vitam, ac sensum eumque perfectum, aut inchoatum animatis corporibus tribuentem definire possumus. Quandoquidem

dem esse illam essentiam necesse est, cum accidentia vitam, aut sensum, aut ejusmodi vires alias præbere non possint: cumque ex ijs, quæ ante conclusimus, anima esse accidens nequeat, ne vel à corpore separata, subjectum ipsum remanere incorruptum sequatur, quod absurdum est. Quod etiam essentia hæc animi expers sit corporis, dubium non est, cum si esset, duo in eodem subjecto corpora coherrentia inveniantur, duæque formæ, & materiæ, altera animi, altera verò corporis: id quod 1. axiomati lib. 2. contrarium est. Quæ verò deinde superiori adduntur descriptioni, quod vitam, ac sensum corporibus animus tribuat, loco differentiarum, seu proprii ponuntur, cum ejus essentia incorporeæ proprium sit, vitam, ac sensum corpori animato asserre, ut intelligamus, essentias esse alias incorporeas, uti angelos: quia nulli eum sint corpori alligatæ, nullum sensum, aut vitam corpoream efficiant. Ergo animæ omnis proprium est, corpori adherere, & animalis, quod ab anima sic appellatur, vitam, ac sensum constituere: ne si vitam ei solum tribuamus, cum stirpibus, & metallis, ac lapidibus, quæ vitam solum habent, congruat, aut hæc etiam animalia vocentur. Ideo sensum vitam addimus, ut qualis ejusmodi vita sit, exprimatur: eumque tum perfectum esse dici-

mus propter perfecta animalia, tum inchoata propter inchoata: qualia sunt Zoophyta. Hanc ergo definitionem & maximè communem, & verissimam esse arbitror, quòd animi essentiam, quæ satis intelligi non potest, quodammodo declaret, quòdque animalium omnium animas contineat. A qua, nec nostræ religionis decreta puto dissentire, cum in literis sacris animæ omnes spiritus, atque animæ viventes passim vocentur, ut in Originibus: Dixitque Deus: producat terra animam viventem in genere suo: & in aliis multis locis, quæ longum est persequi. Ex quo intelligitur animam omnem esse incorporeæ naturæ, & corporibus ita adherere, ut vitam ijs, ac sensum suppeditet. Arque hæc satis de animi essentia.

**DE ANIMÆ UNITATE, AC
NUMERO, ET ORIGINE, ILLIUSQUE
CUM CORPORE CON-
NEXIONE.**

Caput III.

OCCURRIT hoc loco difficilis admodum, & antiqua dubitatio, num anima una sit (non dico omnium simul animalium, sed singulorum) an multiplex potius: deinde

de eadem ne ab æterno corporibus annexa
 extiterit, ut quidam arbitrantur, an ab ali-
 quo temporis exordio sit nata: ac si nata,
 quemadmodum nata, corpore ne prior, an
 posterior. Qua de re ut dilucidius differa-
 mus, auctores harum sententiarum afferre
 commodum erit. Unam universi animam
 Plato in Timæo, dum eius explicat origi-
 nem, ponit. Hanc, ut in nostris docuimus
 commentarijs, è duplici essentia, Deus effe-
 cisse, adhibita septenaria numerorum har-
 monia compositorum proportionem, ab eo
 dicitur. Quarum unam individuum i. intel-
 ligibilem essentiam vocat: Alteram dividuam.
 i. sensibilem. Mediam inter hæc animi uni-
 versi essentiam facit, quod intelligentiæ, ac
 sensus particeps existat. Atqui hanc animam
 ille (cujus diffusè ortum ostendit) in univer-
 so mundo latissimè vagantem collocat, esse-
 que unam, & æternam, atque adeò simul
 cum mundo à Deo creatam inquit. Itaque
 ut mundi corpus ille æternum, relatione
 quâdam tamen effectum à Deo putat: ita
 illi animum ab æterno adhæsisse, ipsumque
 cum Deo æquè esse æternum existimat. A
 quo & si factus è numeris dicatur idem, prin-
 cipij tamen seu causæ prioris habitâ ratione,
 id dictum intelligit. Hunc igitur universitatis
 animum Plato, & cuncti Academici unum,

& à Deo factum, tum animos singulorum animalium ex eadem essentia origine (quam is in Timæo vocat craterem) productos arbitrantur. Unde in eam etiam sententiam Marcus Cicero lib. 1. de nat. Deorum, locisque alijs animos nostros è divina mente decerptos, & ex sempiternis stellarum ignibus demissos cum Platone ait: Quoniam is videlicet animos omnes eiusdem essentia esse cum mundi anima putavit, id est, ex eadem temperatione, ac numerorum concentu, quo mundi anima effecta est: id quod in ijs verbis Plato ipse in Timæo declarat. Hæc factus in eodem rursus craterè, in quo mundi totius animam permiscens temperaverat, reliquias superioris temperationis miscendo perfudit. Quocirca ne totam Platonis sententiam, quam uberius alio loco complexi sumus, huc afferam, id satis sit, admonuisse: unum videri esse universi animum è Platonis sententia, atque unas singulorum animantium animas. Quæ omnes cum è corpore excesserint, vel pro vitijs in alia corpora commigrent, vel purgentur, vel in cælum ad astrum aliquod, (cujus animæ sint similes) evahantur. Aristoteles unam esse in unoquoque animalium animā, vel Themistio affirmante, videtur indicare: eam tamen varijs partibus seu viribus constare inquit, quæ per diversa membra sese profec-

proferant, planeque diversas adant actiones. Cui quidem sententiae Plato assentitur : qui cum multis in locis animam esse unam dicat, tum in Timæo, ubi singulas animas suis astris, quasi vehiculis ait impositas. Cuius hæc verba sunt. Denique cum universum constituisset, astris parem munerum distribuit animarum, singulis singulas adhibens, eis tanquam vehiculo impositis. Ex quo intelligitur, unam esse animam corpori unicuique tributam, non multiplicem. At verò Plutarchus in lib. de virtute morum animam unamquamque, variis ex partibus compositam, non simplicis naturæ esse, probare vult ex Pythagoræ, Platonis, & Aristotelis sententia. Hunc sequitur Galenus in lib. de corporis humani partibus, qui multas in eodem animalis corpore animas ponit. Itaque cum illi rationem ab iracundia, & hanc à cupiditate tantum differre cernerent, in eam adducti sunt sententiam, ut putarint, diversas esse in eodem corpore animas. Et quidem illi dum suam Platonis, & Aristotelis auctoritate tuentur opinionem, non planè falluntur: nam iidem Philosophi obscure, ac variè de hac re iudicarunt, seu potius nihil perspicuè tradiderunt. Quò fit, ut de illorum tam lubricis sententijs pro certo affirmare quicquam nequeamus. Quin potius è nostræ religionis decreto, unam esse

animam, in singulis problemus, non solum quia eadem forma cum sit, duplicata alicui inesse corpori non possit, cum omne corpus sit una forma solum contentum per axioma 1. lib. 2. Sed etiam quia multis sacrorum scriptorum oraculis id confirmetur. Nam in Genesi Moses ait. Et factus est homo in animam viventem: & apud Mathæum Christus: nolite timere eos, qui corpus occidunt, animam autem occidere non possunt. Atque in Exodo: omnes animæ ingressæ in Ægyptum fuerunt 75. Item in Actibus Apostolorum Paulus apertius. Ne turbemini, inquit, anima ejus in ipso est. Quibus ex locis, alijsque similibus clarâ voce animi unitas comprobatur. Transeo ad quæstionem alteram de animorum ortu tempore, ac modo: in quo iidem Philosophi discrepant. Nam Plato, ut paulò antè dixi, æternam æquè, ac Deum animam facit, generatam ab eo tamen ratione quâdam, uti mundum. Eandem quoque in Timæo corpore priorem inquit extitisse, quoniam præstantiora minus præstantibus antecellant, quodque immortalis cum sit anima, corpore, quod mortale est, fuisse prior debeat. Cujusmodi etiam ille argumento ad immortalitatem animorum tuendam in Phædone, ac locis alijs utitur. Cum autem corpore priorem animam Plato facit, id de

id de animalium singulorum corporibus intelligendum est, non de toto mundi corpore: quo etsi animam illius priorem quodammodò apud Deum fuisse putat, nunquam tamen re ipsa ab illo eam separavit, ita ut tempus aliquod in animatione intercesserit. Quam sanè sententiam Plotinus, ac Plutarchus, & Academici plerique amplectuntur. Porro animas corporum singulorum omnes certo quodam numero, qui nec augeatur, nec minuat, factas à Deo Plato censuit, easque singulis cœli stellis natura consimiles: sic ergò animalia omnia indies commigratione quâdam perpetuâ excurrentium ex alijs, & in alia corpora commeantium, aut in cœlum evectarum, & inde demissarum animarum, fieri arbitratur. Unde animam in corpora descendere, è cœlesti illo numero propter imbecillitatem, & necessitatem mali gustandi ex corporum connexionem idem ait, ac Plotinus in lib. de animarum descensu in corpora, & Porphyrius, atque alij Platonici testantur. Ergò Platonis sententia & animam universi, & omnium animalium animas ab æterno conditas esse, perspicuum est: connexionem verò animi mundani cum eius corpore æternam esse: singulorum etiam animalium temporariam, ita tamen ut nullo tempore hæc illarum copulatio cum singulis corpori-

corporibus incoeperit, aut intermissa fuerit. Hæc est universa Platonis sententia de animarum ortu, numero, & cum corporibus connexionem. At Aristoteles ne verbum quidem hac de re usque apertè fecit. Quoniam tamen ille mundum æternum esse, & cum eo semper animalia extitisse, ac mentem humanam uti divinam aliundè provenisse inquit, conjectare licet, eum æternam cum Platone mentem judicare. Nam & Alexander Aphrodisæus ejus interpres, & Sarracenis Averroës Cordubensis ex Aristotelis sententia esse id arbitrantur: mens nostra, atque intelligentiam (quam intellectum agentem vocant Peripatetici) ab universali quâdam intelligentia per omnia diffusa quasi nobis provenire: sensibilem autem animæ partem ex corporis connexionem cum illa. Sed ab hac interpretatione Themistius dissentiens intellectum agentem in nobis tanquam propriam animæ partem esse putat, non uti Deum: Id tamen inter plerosque Peripateticorum constat, intellectum ex Aristotelis opinione in omnibus hominibus esse unum, & eum immortalem, ac illis extrinsecus advenire. In quo tamen quid verè Aristoteles sentiat, statuere nequeamus, cogitare tamen licet, illum cum Platone mentem aliam æternam (à qua idem emanet intellectus agens) posuisse.

fuisse, & ex hac singulos animos decerptos corporibus alligari, eamque animi partem, quæ communis est toti animali, constituere putavisse. Verùm hac de re suo loco copiosius. Illud interim præstinxisse satis sit, animas ex Aristotelis sententia æternum habuisse principium, unde profectæ fuerint : eamque perpetuò corporibus alligari solitas, quandò in mundo (qui æternus est) animalia nunquam defuerint. Hæc est igitur (ut ego quidem existimo) Aristotelis sententia: quam conjecturis ex ejus verbis colligere necesse est, cum ipse, vel obscuritate affectatâ, vel occultandæ opinionis suæ causâ, nihil, quod apertè dici queat, affirmet. In hac ille sententia cum Platone consenrit, quòd mentem aliundè nobis provenire arbitratur, sensum autem à corporis contagione: Sed collatione hac utriusque in locum suum omissa, quid nos de animarum origine debeamus, sentire, explicetur. Animalium omnium animas cum mundo simul exordium habuisse, nemo dubitat, qui sacras literas legerit. Nam cœlo, & terra effectis, & exornatis, jussisse Deum, inquit Moses, ex aquis pisces, & volucres, è terra jumenta, reptilia, belluas, atque omnem animam viventem oriri: postremò ipsum suis manibus, id est, vi suâ hominem fabricasse, & illi vitæ speraculum, id est,

id est, animam indidisse. Ex quo perspicuum est, generatis corporibus inditas statim animas fuisse: quod quidem in hominis formatione tunc temporis, & hodie fieri cernimus. Quanquam nonnulli sunt, qui cum angelis hominis animam simul natam, & postea corpori inclusam fuisse arbitrentur: quorum è numero est Augustinus, & alij, quorum ego minimè sententiam approbo tanquam omninò Platoniam, & sacrarum literarum testimonio non congruentem. Nam si quæ nunc ortus animarum ratio est, eadem fuit olim in prima effectione, ut Theologi omnes fatentur. Certè post corpus effectam animam fuisse, sicut hodie videmus in fœtu efformato, necesse est: vel certus aliquis animarum fuit numeris à Deo factus antè animalium omnium effectiorem: id quod Platonici, & Origenes falsò putaverunt: vel ex traduce semine (ut vocant) animæ oriuntur. Quæ omnia cum vera esse non possint; relinquitur, animos omnes ortum habuisse, eosque corporibus jam effectis inditos esse. Hinc alia exoritur dubitatio, non parum à Theologis controversa: num animæ, humanæ præsertim, è semine parentum præterea cum corpore deriventur ex eadem gigantis animæ essentia, an à Deo factis corporibus postea inducantur. Superioris sen-

tentia fuit Apollinarius Episcopus, cujus opinionem egregiè Gregorius Nyssenus, atque alij multi convellunt: huius autem optimi quique Theologi, qui animos adhuc à Deo fieri, & corporibus includi docent, quemadmodum Esaias sub Dei persona loquens testatur: omnem, inquit, statum ego feci. Et in Levitico Moses legem gravidarum percussoribus statuens: si egressus fuerit formatus fœtus, reddet oculum pro oculo: dentem pro dente. Ac paulò post: si autem non egressus fuerit formatus, multabitur. Quo in loco manifestè post fœtus efformationem animam corpori infundi intelligit. Quod ipsum Plinius lib. 7. testatur, qui post fœtum formatum die 40. masculis, 90. fœmellis animam tribui fatetur: atque Aristoteles in semine partes animi corporeas facultate inesse, deindè actu, adveniente extrinsecus intellectu, inquit. Arqui hæc satis ad quæstionem præpositam diluendam. Est & aliud maximè cognitu difficile, quod vix unquam satis percipi potest: quonammodò anima sit corpori inmersa. Quod quanquam vix satis intelligatur, dicam tamen quid Platonis senserit (nam Aristoteles in libris de anima nihil ea de re loquitur.) Is ergò cum animum naturæ simplicis, & incorporeæ videret esse, cum corpore misceri eum non posse existi-

existimavit, cum in corporea corporibus
minimè coalescant, cumque si essent mixta
ea duo, & anima cum corpore interiret, &
majori ejus contagione inquinaretur: Cujus
quia expertus est, si naturæ ipsius sinceritatem
spectemus, illam non corpori commixtam,
sed ut gubernatricem præfectam illi esse cen-
set. Unde ipse verum hominem, verumque
animal non corpus, sed animam esse vult:
quæ illo tanquam vehiculo utatur. Quapro-
pter animal Plato non illud è corpore, at-
que animo compositum appellat difficulta-
te connexionis deterritus, sed animam ait
corpore inditam illi imperare. At verò Am-
monius Plotini præceptor diligentius hanc
rem scrutatus, eam inquit intelligibilium re-
rum esse naturam, ut possint corpora pene-
trare, & puritate suâ retenta, illis sese alliga-
re, quod in aëris illustratione cernitur: cum
lux, quæ incorporea est, illum corporeum
perfundens illustret, ipsa tamen minimè in-
quinetur. Sic ergò ille animam incorpoream
alligari putat corpori, ut ei minimè miscea-
tur, sed incorrupta manens illi vitam, mo-
rum, ac sensum omnem asserat. Hanc sequi-
tur opinionem Gregorius Nyssenensis: qui ra-
tione etiam probare, qualis sit illa corporis,
& animi copulatio, nititur. Sed ne ille qui-
dem, nec alius quisquam id mihi apertè vi-
detur

detur ostendisse: id enim omnes, vel auctore Aristotele, intelligimus, animam diversæ naturæ esse à corporibus, eamque cum illis nullo modo posse commisceri, tamen ita ipsi adhærere, ut animal unum constituat viribus multis præditum. Unde etiam videmus, quod optimè Galenus in lib. de corporæ constitutionis, & animi morum consecutione mutua ostendit, animam sui corporis temperationem adedò sequi, ut quædam videatur esse illius temperatio. Nam ut lucem in aëre modò magis esse perspicuam, modò obscuriorem propter nubila, vel serenitatē conspiciamus, ita pro corporis temperatione animi vires, præsertim eæ, quæ toti animali sunt communes variantur. Hinc alios ad iracundiam, & libidinem proclives propter calidam corporis naturam cernas, alios ingeniosos, alios hebetes, obliviosos alios, quosdam austeros, ac difficiles, multos hilares, & faciles, alios denique morum, & ingeniorum aliorum. Quæ omnia fieri ob corporis temperationem (quam anima sequitur) necesse est. Omnino autem, quoniam humiditas, & frigiditas corpora rudiora, & graviora efficit: calor, & siccitas leviora, & acriora. Homines, aut reliqua animantia, quæ huiusmodi corporibus constant, tale habent ingenium, qualis corporis fue-

rit temperatio. Huc accedit victus ratio, institutio, natalis soli natura, cœli, & aëris temperatio, consuetudo, aliaque generis ejusdem: quæ non solum corporis mutant temperationem, sed ingenij vim etiam.

DE ANIMÆ DIVISIONE, AC PARTIBVS.

Caput IV.

SED jam ad animæ formas explicandas accedamus, quando de genere universo dictum est supra. Quia in re intelligendum est, definitionem illam à nobis adductam universo animalium generi ita congruere, ut formas singulorum præcisè non exprimat, sed universi generis animam describat: quatenus commune id est animantibus omnibus, quod animam habeant, & sensum. Nunc verò incorporeæ essentiae, vitam ac sensum tribuenti (quæ est descriptio animæ superiori capite tradita) ut unumquodque genus exactius enuncietur, addenda est proprietas aliqua, quæ veram speciem constituat. Eadem autem ex tali divisione petenda esse videtur. Animorum aliud præter vitam, ac sensum rationis est particeps genus, aliud verò expers. Hujusce porro generis aliud est

est absolutæ irrationalitatis ut sic loquar : aliud inchoatæ : singulæ divisionis , hujus partes diversas sub se formas animalium comprehendunt. Nam sub animorum ratione constantium genus humanam animam cadere intelligimus : sub absolutæ rationis expertium perfectorum animalium omnia genera : sub inchoatæ verò irrationabilitatis animalium inchoatorum varias differentias : quæ cum nec sensus omnes habeant , nec partes animæ omnes , diversum animæ genus à perfectorum animalium animis habere videntur. Nec refert quicquam , an stirpes , & metalla , cæteraque omnia , quæ quoniam vita constant , animalia Platonî dicuntur , ab hac ego definitione excludam , cum Aristotelis sententia non quidquid vitam habet , animal dici debeat : quando anima in ijs , quæ sensum habeant expressum , ut in animantibus , quæque internam movendi se vim , collocatur duntaxat. Quapropter , ut apertius animæ cujusque partes , & vires dignoscantur , divisionem eam , quam facit Aristoteles , sequamur , Quinque sunt præcipuæ animi partes , quæ è diversis vitæ formis colliguntur : Altrix seu Vegetatrix , Appetitoria , Sensitiva , Motrix è loco , Rationalis. Unaquæque harum diversas in se vires habet , propriaque est alicuius genetris : ut Altrix ,

ac Appetitoria omnium, quæ vitam, ac non
 modo sensum habent: cuiusmodi sunt stirpes,
 metalla, lapides: Motrix, ac Sensitiva om-
 nium animalium est tam perfectorum, quàm
 inchoatorum: Rationalis propria unius ho-
 minis. Harum partium in quibusdam omnes
 conjunctæ sunt, in alijs aliquæ. In hominum
 quidem genere sunt omnes: in animalium
 perfectorum, Altrix, Vegetatrix, Motrix ac
 Sensitiva perfectæ: In inchoatorum, Altrix,
 Vegetatrix, & Motrix, sed inchoatæ. In stir-
 pium, metallorum, ac lapidum Altrix, & ve-
 getatrix. Atque hæc est Aristotelis de animæ
 divisione, ac partibus sententia. Quam ipsam
 Plato in Timæo, atque alijs locis viderur ha-
 buisse, dum partes easdem tripartita, quæ-
 dam divisione omnino complectitur. Nam
 in Timæo cum animæ humanæ situm in cor-
 pore indicare velit, ac rationem in cerebro,
 iram in corde, cupiditatem in jecore consti-
 tuat, rationem esse ait, eam, quæ verè sumus
 homines: iram, quæ belluæ, cupiditatem,
 quæ stirpes. Quo in loco, ut ex libris etiam
 de Repub. atque alijs perspicuum est, eas tres
 animæ facultates diversas esse putavit, pro-
 priasque cujusque animalium formæ, ut in
 libris quoque de Hippocratis, & Platonis
 decretis Galenus testatur. Nec trium earum
 partium unamquamque vocare animal Plato
 dubitat.

dubitar, quoniam, ut ait idem in Timæo, quidquid vitæ particeps est, jure animal appellatur. Hinc idem in libris de Rep. hominem è duobus animalibus, quibus ratio ut auriga præsit, veluti colligatis constare inquit: nimirum quia partes has animæ inter se diversas esse viderat. Ergò hac in re Aristoteli cum Platone rectè convenit, nisi quodd nominum appellatione, ac partium enumeratione dissentiant: quodque Plato certis in corporis partibus animæ vires posuit, ut rationem in cerebro, iram in pectore, appetitum in jecore: Aristoteles verò ipsam animam æquè per totum corpus fusam esse ait, ut & ille tribuit Themistias. Itaque altericem, vegetatricem, & appetitoriam, ut vocat Aristoteles, Plato *Ἰσχυρομυτικήν* privatim nominat, *αἰσθητικήν*, id est, sensitivam, hic *θυμειδὴν*: cui adhibet mottricem: *λογικήν* eodem modo ambo appellant. Ab hac ergò utriusque philosophi sententia minimè dissentire video nostræ religionis decreta, cum ubique in literis sacris earum animæ partium mentionem fieri cernamus. Cumque id antiqui Theologi passim confirmant: cuius rei testimonia huc asserre, minimè est opus, ne in te tam aperta longius evagemur. Quin ad earum quinque, quas antè proposuimus, partium explicationem nos

convertamus, à vegetatrice sumpto exordio.

DE VEGETATRICE ANIMA,

ET EIVS PARTIBVS.

Cap. V.

VEGETATRIX, & Altrix animæ facultates, quæ diversis nominibus ita vocantur, eadem sunt re ipsa: ratione tamen diversa duas habent nomenclationes, quatenus corpus vegetatur, aut alitur: quod utrumque idem est. Quapropter à nobis hic pro una, eademque facultate, quâ vivunt corpora, ea duo nomina capiantur, quoniam ut ait Aristoteles, omne animatum ab inanimi sola vita differt, quam anima exhibet: animal à non animali solo sensu: de quo est inter Platonem, & Aristotelem discrimen, dum ille animal quidquid habeat sensum, esse ait, hic negat. Ergò enim prima viventium omnium facultas sit Vegetatrix, quemadmodum ait Aristoteles, & ratione etiam constar per 15. axioma, quoniam omne corpus vitæ particeps alimento cum primis egeat: consequens est, ut à primis vitæ corporeæ officijs ad ultima progrediamur. Vegetatrix ergò animæ facultas, quam uno nomine *Vegetatrix* vocat Aristoteles, Galenus, ac Medici naturalem

tim, quæque omnium prima est, à Themistio definitur actus corporis organici ad cibariam functionem; id est, animæ facultas corpori tributa, quâ necessarium alimentum, quod omnia per 15. axioma appetunt, accersitur. Hujus finis est conservandi corporis appetitio, quæ omnibus rebus est à natura tributa per 6. axioma: instrumentum seu vis, quâ eadem vegetatio fiat, est calor, qui per 16. axioma suapte naturâ est efficax. Quo quamdiu aut animata, aut inanimata sunt prædita, vegetantur, destituta marcescunt, & pereunt: quanquam & eundem calorem non ita esse purum debere arbitramur, ut nulla humoris alterius fiat accessio: quandoquidem illi humorem in multis adhærere necesse est majorem, ut in stirpibus: in alijs verò minorem: omnia tamen viventia pro alimenti calore, & humiditate continentur, à siccitate, & frigiditate tanquam contrarijs vitæ qualitatibus dissipantur. Materia verò vegetaricis animæ succus est ex cibo, & porione in animalibus, vel ex humore qualicunque in reliquis viventibus: quo deficiente, cessat vegetatio, & corpus emartescit. Sunt & hujus facultatis tria officia ab Aristotele, ac plebisque commemorata: primum alendi corporis, alterum augendi: tertium propagandi aliud sibi simile. Instrumenta, quibus ea

dem tribus obeantur, diversa sunt in uno
 quodque animalium, ac viventium genere, ut
 & deinceps edocebimus. Sed exponamus
 imprimis singulorum rationem ab Altrice,
 sive nutriendi vi, ut vocant, sumpto exor-
 dio. Altrix animæ facultas est ea, quæ cor-
 pus vivens alimento necessario, ac sibi con-
 gruente alitur: Nutritio verò, quæ illius est
 effectus, alimenti sumpti à corpore vivente
 mutatio in partem existentem ejusdem cor-
 poris. Cum enim per 15. axioma quidquid
 vivit, alimento egeat, quoniam calore sem-
 per in ipsum agente, ex ejus substantia ali-
 quid decedit, id Altrix facultas efficit, ut o-
 mne id, quod decessit, assumpto alimento re-
 paretur. Ipsum autem alimentum Aristoteli
 dicitur id, quod cum corpore, quod alitur,
 tandem coit, & coalescit. Idemque simplex
 nequâquam esse potest, cum compositis ne-
 cessario compositis alantur, cumque omne
 animatum corpus axioma 13. simplex esse
 non possit. Quod fit, ut quemadmodum è
 quatuor qualitatibus concreta sunt corpora
 vivencia, sic eadem alimento ex iisdem con-
 creto ali necesse sit, ut singula viventis cor-
 poris qualitates qualitatibus alimenti sibi re-
 spondentibus alantur. Ex quo sequitur, ali-
 mentum simile debere esse rei, à qua per axi-
 oma 22. non dissimile. Quid, quod alimentum

idem immutari debet in rei alendæ substantiam, ut commodè fiat nutritio: alioquin perinde est, ac si nihil accedat. Eadem verò illa alimenti immutatio à calore interno corporis animati tanquam vegetatricis instrumento fit, propter agendi vim, quam habere illum axioma 16. diximus. Sed quoniam nec mutationis illius, nec modum nutriendi percipere, nisi cognitis animati cujusque corporis instrumentis, quibus ea fiant, possumus, revocanda in memoriam sunt ea, quæ in superiori libro de corporum animatorum partibus diximus. Itaque in homine novem partes potissimum sunt, quibus nutritio fit: os, eui dentes accedunt: stomachus: venter: intestina: jecur: venæ, quibus adduntur arteriæ: bilis utraque: & renes. His quoque adjungi partes aliæ possunt, quæ nutritionem adjuvant, sed parùm ad rem faciunt, dum præcipua instrumenta indicentur. Os est prima illa pars, qua esculenta, & poculenta capimus, quaque cibos acceptos dentibus dividimus, ac genuinis concificimus, ut macerati ad ventriculum depellantur, adjuvante confectioni, ac depulsioni huic, lingua: stomachus: confectas escas adducit, & in ventriculum demittit: in quo decoctæ illæ calore naturali in succum quendâ, quem Medici chylum vocant, per venas miseraicas,

ut suprà diximus, ad jecur deferuntur, ibique calore illius, & bilis, quæ in fellis est vesica, adjuvante, denuò concoquuntur, & in sanguinem mutantur: qui eius calor est tum ob calorem, tum ob jecoris colorē ipsum, quem succus accipit. A jecore per cavam venam ad cor, indeque per venas alias unā cum arterijs inde nascentibus sanguis deferitur, qui singulas corporis partes succo suo alit, ijs adherens, & in carnem sese convertens. Et ut purum alimentum singulis partibus reddatur, intestina lordes, ac decrementa ciborum excipiunt, & per os sacrum egerunt: fellis vesica secretam bilem è sanguine: renes id, quod serosum est, splen bilem atram. Itaque hoc modo purum alimentum, ad omnes artus pervenire potest, factā hanc in ventriculo, & jecore humorum secretionē, atque coctionē: quæ quadruplex est, si omnia rectè perpendamus. Prima in ventriculo, secunda in iecore, tertia in venis, quarta in singulis membris, in quorum substantiam sese sanguis convertit. Atque hinc sanè non solum Altricis facultatis instrumenta, sed etiam nutritionis formam, & modum arbitror intelligi. Quando autem eam singulis nutritionis instrumentis vim tribuimus, harum singulis quatuor facultates naturales addere cum Galeno necesse est, attractricem, quæ omnibus inest ad escam capi-

piendam: retentricem, ad eandem concoquendam: alteratricem, quæ illam in accommodum corpori alimentum immutat: expultricem, quæ recrementa ex alimento relictæ foras depellit. Atque attrahendi quidem vis ventriculo potissimum est insita; quo attrahibile perfuso, ciborum appetitus excitatur, & accepti ore illi, & confecti adducuntur. Itaque in calidi, & sicci facultate attrahendi vis posita est, quoniam hæ qualitates frigiditate, & humiditate cibi aluntur. Retentrix vis in eodem ventriculo, & intestinis primo posita à siccitate attrahibilis, & inflexione spirarum adjuvatur, ne cibus antè coctionem effluat: deinde in reliquis membris est ob eandem frigiditatem, quæ humorem in se constringit. Alteratrix omnibus ferè nutritionis instrumentis inest, ut ori, ubi cibi conficiuntur in chylum: ventriculo, in quo liquantur in chylum: jecori, à quo in sanguinem mutantur: singulis membris, in quorum essentiam convertuntur. Expultrix in iisdem est partibus, in quibus & alimenti alteratio, nisi quod per diversa sit membra, à quibus excrementa depelluntur: ut per caput capilli: è cerebri excrementis nati: per oculos lachrymæ ex humore melancholico: per aures cera illa ex bilioso succo: per totum corpus sudor: per os factum stercus: per genitalia urina. Iam cum
alte.

alteratis cibis in corpore calore naturali, hæc omnis distinctio fiat, & alimenti concretio, huic rei tres adsint vires: una, quæ elixatio Aristoteli dicitur, cum calore quodam humecto cibi decoquuntur in ventriculo: altera, quæ maturatio, cum cibi calore dedecoqui, antequam elixentur, id est, in humorem dissolvantur, incipiunt: tertia, quæ assatio, cum alimentum calore tortetur, & consolidatur, ut partibus singulis altius corporis adhæreat, quæ propria est cujusque membri. Totidem his respondent vitia contraria, quæ aut ex caloris imbecillitate, aut cibi prava natura oriuntur: Inquinatio elixationi contraria, cum cibi in ventriculo corrumpuntur: cruditas adversa maturacioni, quæ alimentum recrudesceat, dum à calore nequit immutari: Imperfecta assatio, cum alimentum incommode adhæret partibus alendis, aut impurum est, & incongruum, ita ut eas vitiet potius, quàm alat. Hæc omnia ad animalia perfecta, & inchoata pertinent, quamvis iisdem partibus non fiant: satis enim est, ut per alias his respondentes edantur. In stirpibus verò, & metallis, ac lapidibus eadem quoque ratio servatur, nisi quod instrumenta nutritionis, & alimentum, atque eius confectio, & forma diversa sint. Nam stirpes radicem ha-

beant

bent pro ore ; pro alimento humorem , quem adducunt per internam illam partem , quam cor vocant : excrementa sunt folia , id est , in lapidibus , & metallis terræ ipsius venæ , quasi radices sunt , per quas ducitur alimentum : ipsum verò alimentum est humor : instrumenta , quibus illud perficitur , tenuissimæ quædam fibræ , quæ cerni vix possunt : excrementa denique rubigo. Verùm hujus rei explicatio longior est , & à nobis , qui communi rerum descriptione contenti sumus , aliena. Cætera , quæ de fame , siti , coctionis commoditate tuenda , ad alimenti puritatem dicuntur , & facilia sunt , & Medicorum propria : cùm famem apperitionem esse calidi , & humidi : sitim frigidam , & humidi manifestum sit : cùmque in coctione ciborum imprimis cavere oporteat , ut post cœnam , ac prandia gravem omnem corporis motionem vitemus , quæ calorem ventriculi in artus dissipare possit , & malam cibi reddere coctionem. De hoc tota prior vegetatricis animæ parte , nimirum nutrice , nullum est inter Platonem , & Aristotelem discrimen , nisi quòd ille rem breviter in Timæo indicavit : hic uberius in libris de anima , & de animalibus. Alterum vegetatricis animæ officium est , augere corpora , quæ alantur à Nutrice facultate : unde

facul-

facultas, quæ id efficit, proprio nomine *Auctrix* appellatur. Eadem est autem vis, quæ corpus animatum ab exortu ad præscriptum à natura magnitudinis tempus provehit. Hæc Nutrice facultate posterior est tempore, seu potius illam consequitur: cum enim alitur corpus in prima illa animalis ætate, quam juventam dicimus, quæ propter nutricis facultatis vim, quæ tum vehemens est, admodum, augefcit, facultas etiam auctrix viget, quousque magnitudo ejusdem perficiatur. Et cum à natura omnia præscriptum vitæ tempus, & magnitudinis formam per 23. axioma habeant, usque eò dum aluntur, accrescunt, ut adepta naturali magnitudine rursus senescant, & imminuantur. Eò fit, ut nutrix facultas initio valentissima sit, & accepto alimento, non modò singulas partes alat corporis, sed etiam iisdem ad magnitudinem multum addat, quousque perventum ad perfectam ætatem fuerit. Quæ etiam diversa cum sit in animalibus, atque adeò corporibus omnibus viventibus, gradus itidem habet, ac tempora crescendi varia: in alijs nimirum longiora, in alijs breviora. Semper tamen quæcunque breve habent vitæ tempus, ea citius adolefcunt per 24. axioma, ut citò senescentia ad exitum perducantur. Hinc ergo perspicuum est,

Auctricis

Auctricis finem esse, corpus animatum promovere, ad præscriptam sibi à natura magnitudinem: ejus verò causam existere ipsam naturam ab animi calore adiutam, quæ alimentum singulis partibus accommodans corpus, efficit majus. Porro instrumenta, quibus fiat auctio, eadem planè sunt, quæ nutritionis, nisi quòd effecto jam alimento, ac per corporis partes distributo, dum singulæ familiare sibi asciscunt & agglutinant, fit incrementum. Modus denique augendi corporis est, dum singulæ illius partes proportionem quâdam quod sibi congruit, accipiunt, & ad magnitudinem suam adjungunt. Id autem unâ cum nutritione fit, beneficio naturalis caloris, alimentum omne concoquentis, & in suam vertentis naturam: & frigiditatis illum jam consolidatum retinentis. Hæc est universa crescendi ratio, animatis rebus à natura tributa: ut stirpibus, quæ è seminis putrefactione usque ad perfectam arboris, fruticis, aut herbæ perveniunt magnitudinem: ut metallorum, ac lapidum, quæ eodem ferè modo in terræ venis orta augescunt: ut animalium tam perfectorum, quàm imperfectorum: ut hominis denique, cujus ratio est manifesta. Quamobrem incrementum, cum hoc modo fiat in corporibus, quemadmodum Platon,

to, Aristoteles, & Galenus auctores sunt, id tamen, uti dixi, perpetuò fieri nequit, quoniam deinde calor, & humor animati corporis, in quo tota illius vita sita est, paulatim flaccescit. Et cum in iuventa naturæ tanta vis sit, ut & alat corpus, & augeat, post adeptam tamen perfectam illius magnitudinem, sensim debiliratur, vixque potest, quod calor ex nativo humore consumpserit, alimento accepto, reparare, quin perpetuâ vi agendi calor ipse imminuatur, per 5. hypothesein libri 2. & exhausto magna ex parte nativo humore, tota corporis compages dissolvatur, sicque mors fiat: de qua suo loco dicemus. Ad auctricem facultatem, præter ea, quæ diximus, accedunt alteratrix alimenti vis, & assimilatrix ejusdem, quæ, ut Galenus ait, ex ciborum qualitatibus congruentes unicuique corporis parti qualitates accommodant, non ut in tumorem excrecant, sed ut solidentur magis calore naturali, qui eas illis apponat, & agglutinet, sumpta ex sanguine venarum necessaria portione: quæ augmenti materies est in animalibus sanguineis, ut in exanguibus, & animatis alijs corporibus humor alius eorum naturæ consentaneus. Sed de Auctrice facultate hæc satis: cum in eam rem copiosè Galenus in libris de natural. facultat. scripserit.

scripserit. Tertia Vegetatricis animæ vis, est Generatrix : quæ ipsa non minus ad naturæ necessitatem spectat, quàm duæ superiores : tamen extra animatum sit corpus. Est autem Generatrix, facultas animatorum, quâ sui simile procreant : nam cum à natura, cuncta per axioma 3. hujusmodi appetitu ducantur, quò genus universum conservetur, fit, ut ad propriam cujusque conservandi sese cupiditatem, proximè accedat posteritatis cura. Quæ res efficit, ut facultatis generatricis finis sit speciem suam singula velle per se conservari : quando ipsa diuturna esse nequeunt, omniâque, ut ait Aristoteles, fieri immortalia maximè cupiant. Materia ejusdem facultatis est semen, sed illud quidem diversum in singulis animatorum corporum formis. Nam in homine est humor quidam calidus, & densus coloris albuginei, ut in superiori libro docuimus : in cæteris animalibus sanguineis ejusdemetiam formæ : in exanguibus, & inchoatis aliquid proportionem illi respondens : in stirpibus conspicua aliqua semina, ramis adnascencia : in metallis, & lapidibus obscurum quiddam, & in eorum venis occultum. Jam instrumenta, quibus eadem fiat in omnibus animatis corporibus, satis, ut ipse arbitror, in libro superiori descripsi.

Quo nomine hîc , eadem ut repetantur, minimè necesse est. Cur etiam sui simile univèrsa procreent in genere suo , tametsi docere velit Aristoteles, non magis probare mihi videtur, quàm cum antè quæsiuit, cur fœmina , & mas fuerint à natura conditi, cum is sit impetus naturæ, sui simile in unoquoque genere procreare per axioma 3. quemadmodum & ad id efficiendum mas, fœminaque nati sunt. Addamus nos etiam has generatrici facultati tres vires , quibus omninò perficiatur: expultricem, commutatricem , formatricem. Expultrix est ea, qua semen naturale, ad generationem emittitur, ab instrumentis seminarijs, ut à masculo animali in fœminam, vel ab stirpe in terram. Commutatrix illa, qua idem semen formatur in fœtum, qualis est in animalibus sanguineis, aut oviparis ovum. Formatrix denique illa, qua singulæ seminis partes naturali calore alteratræ formam sui generis sumunt. Et quanquam in unoquoque genere animatorum monstra quædam fieri, pro vera prole, soleant, id vitio materiæ non aptè compositæ, aut imbecillitati alicui efficientis causæ, tribuendum est, non naturæ errori, quæ in communioribus eventibus, non in raris cernitur. Complexus sum vegetatricis animæ vim, ac partes, & earum ratio.

tationem abunde : nunc antequam ad animæ partes reliquas progrediar , breviter ostendam, num illæ partes, quas retuli, eadem sint, an diversæ : tum quid Plato, & Aristoteles hac in re sentiant. Unam esse animæ facultatem vegetatricem, quæ vel per se sola in metallis, stirpibus, ac lapidibus, vel connexa cæteris partibus in alijs animantibus sit, planum est : ita tamen ut eadem una cum sit, diversis prædita sit viribus, quas pro actionum varietate habet diferentes, quemadmodum ait Aristoteles, quatenus enim corpus alitur, Altrix oritur facultas: quatenus augetur, Auclrix. quatenus gignit sui simile, Generatrix. Itaque origine, unde proficiscuntur, & fine, in quem tendunt, tres hæ sunt eadem omnino: subiecto tamen agendi diversæ, quando ex eodem principio diversos effectus produci, nihil obstat. Et quemadmodum in animantibus vegetatrix adjuncta est cæteris animæ viribus, ijsque tanquam fundamentum sese præbet, eademque omnino est cum cæteris: ita in viventibus solum corporibus eadem est una tribus illis facultatibus prædita, non autem triplex anima. Sed hac de re fusius suo loco. De hac animæ vegetatricis essentia, & partibus omnino convenit Platoni cum Aristotele. Ambo enim pariter eas-

dem huic vires tribuunt, eamque propriam animatorum corporum, non perfectorum tantum animalium esse dicunt: Quapropter in Timæo Plato de humani animi sedibus faciens mentionem, in jecore vegetatricem, seu appetitoriam, cujus partem videtur hanc facere, collocat: atque eam stirpi comparat, ut ex ejus verbis his videre est. Postremò eam animi partem, quæ esculenta, & proculenta cupit, & reliqua omnino, quibus corpus eger, expetit, mediæ regioni inter diaphragma, & umbilicum applicavere: ubi quoddam quasi præsepe ad totius corporis alimoniam extare volebant, & ibidem illam animæ vim tanquam agreste animal alligarunt. Ergò si singula Platonis verba tum in hoc loco, tum in sequentibus consideres; animam appetitoriam vegetatrici quasi præficit: easdemque ferè tres illi partes tribuit, alendi, inquam, augendi, & gignendi, ut in toto eo loco ostendit, ac in libris de Hippocratis, & Platonis decretis ei Galenus adscribit. Quod idem Aristoteles censet, ut hætenus exposuimus: nisi quòd in corde vegetatricem ponit, contrà quam Plato, ut ex libello de juvenia, & senectâ licet intelligere. Est & illud hîc breviter animadvertendum, vegetatricem animam in corporibus viventibus, ut stirpibus, metallis, ac lapidi-

lapidibus ita inesse , ut ab ijs minimè possit separari : sed cum illis pariter intereat , atque etiam in animalibus sit alijs animæ partibus præditis eodem modo , itemque in homine , quoniam corpori annexa est tanquam lux ipsi ab animo affusa. Atque hæc est utriusque Philosophi sententia paucis explicata : quam latiùs adhuc deinceps exponemus. Ab hac minimè dissentit Christianæ Religionis decretum, quod suam stirpibus , ac cæteris omnibus vitæ participibus alendi sese , augendi , atque aliud gignendi vim assignat propter commune illud opificis Dei imperium omnibus rebus intus conditi orbis præscriptum : Crescite, & multiplicamini, & replete terram. Quod sanè in rebus viventibus natura erit , seu anima vegetatrix : in animalibus verò animæ facultas , ut in alio etiam loco Paulus ostendit. Animalis homo non intelligit ea, quæ sunt spiritus.

DE VITA, ET MORTE, IUVEN-

TA, ET SENECTA.

Caput VI.

Uperiori animæ facultati adjungatur nunc
 disputatio de vita, & morte, deque juven-
 ta, & senectæ animalium, tum quia propter
 vitæ conservationem data est omnibus vege-
 tatrix anima, tum quia eadem vegetatricis
 vis à vita & nasci, & eandem conservare vi-
 detur. Quamdiu enim corpus vivit, vege-
 tari debet necessariò per 15. axioma: quam-
 diu verò vegetatur, vivit, & animatur. Ita-
 que altera res vicissim comseat retrorsum
 cum altera, quia quidquid vegetatur, vivit,
 & retrorsum: ipsam autem vegetationem
 juvenus, aut senectus, ut umbra corpus, se-
 quitur. Vita ex Aristotelis; & aliorum sen-
 tentia est, actio animæ, quæ per se corpus
 alitur, & augetur. Nam etsi cum vita pari-
 ter multæ aliæ vires conjunctæ sint ut in per-
 fectis animalibus, tamen ejus potissima vis
 in vegetatrice facultate posita est: quando-
 quidem illius finis vitæ ipsa est conservatio.
 Huius rei causa efficiens est anima, quæ ad-
 hærens corpori; ut lucem, sic vitam primò
 illi impertit: ipsa verò vita, quæ singulis re-
 bus

bus à natura diversæ durationis data est, calido, & humecto potissimum continetur. His enim duobus vigentibus, animatum corpus, consistit, flaccescentibus, aut extinctis, interit. Et quando calor, ut sæpe antè diximus, agendi vim habet, atque humor perpetuendi, necessarioque ignis alimento indigeat aliquo per 7. axioma lib. 3. consequens est, ut ille idem humectus sit semper ob accedens alimentum, quo natus humor alitur, ne si arescat, universam corporis constitutionem dissipet. Id possumus faciliè exemplo in lucernis accensis ostendere, quæ dum oleum subest, paulatim ardent, ac lucent: eo verò exhausto, maiorem excitant flammam, & extinguuntur. Eodem modo animato corpori accedens alimentum calorem semper alit, ac fovet, sicque vita illius conservatur: eo autem deficiente, calor exardescit: qui naturâ foras erumpens, aut depascens omnem humorem, corpus animatum conficit. Hinc liquet, vitam omnem in calore nativo, tanquam agente causâ, sitam esse, atque in humore veluti alimento necessario. Quæ duæ qualitates cum omnibus à natura viventibus concessæ, ad vitam tuendam sint, alimento cibi accedentis fove-
ri debent perpetuò, ut illud non modò calorem agentem vi suâ mitiget, & cohibeat, ne

omnia depascat, sed etiam ut humor natus
accessione perpetuâ augeatur. Inde etiam
fieri videmus, ut alia eum sint vivaciora aliis
in suo genere, causaeque vitae longinquitatis
calori sit primum tribuenda, deinde humo-
ri: quando ille agit, hic patitur: ita tamen, ut
in iis, quae vivaciora sunt, maiorem esse calo-
rem, quam humorem intelligamus. Nam si
calor sit minor, ab humore facile obrui po-
test, & extingui, uti in igne aqua suffuso cer-
nimus. Ex quo etiam patet, mares utpote
fœminis calidiores, & homines in regionibus
calidis natos septentrionalibus, atque terre-
stria omnia aquatilibus diutius vivere, pro-
pter caloris vim majorem. Nec verò talem
calorem debere esse censeo qui facile humo-
rem omnem exædat, & inflammer: sed pin-
guem, ac humectatum, & ut sic dicam, con-
stipatum, quò firmior sit, & diuturnior. In
hac mutua caloris, & humoris temperatione
id frigus, & siccitas efficiunt, quòd vita su-
stentatur. Quorum illud vim caloris cohi-
bet, & intra suos fines cogit, hæc fluxam
humoris naturam constringit, & obfirmat.
Habes communem vitae in omnibus anima-
tis rebus causam, & rationem: quam accom-
modare singulis formis facile est, ut stirpi-
bus, ut metallis, ut lapidibus, ut animalibus
sanguinis expertibus, quæ humore aliquo,
sibi

sibi congruo aluntur, agente semper inter-
no eorum calore, denique sanguineis om-
nibus, quorum vita sanguine, id est, humo-
re calido, & denso sustentatur. Offert sese
hoc loco dubitatio, cur stirpes, quæ minus
habent caloris, quàm animalia diuturnius
vitæ habeant tempus, quàm illa: cuius qui-
dem perfacilis est responsio: quòd illa cum
adjunctum à terra sibi habeant humorem,
quem per radices adducant, vetustatem
suam semper reparant, quòdque firmiorem
habent humiditatem, quàm reliqua. Sed
hac de re, deque vita satis. Contraria est vi-
tæ mors, quæ nihil est aliud, quàm nativi ca-
loris, aut humoris extinctio. Cum enim ijs
duobus tota vita contineatur, deficiente ip-
sorum alterutro, dissolvi eam necesse est;
tamen si calori vitæ actionem potissimum
assignamus, ut mortis frigiditatem: quo-
niam calore extincto mors sequitur, & vi-
gente, vita conservatur. Extingui autem ca-
lor varijs modis potest, vel humore planè
exhausto, ut in ijs, qui præ senio intereunt:
vel calore alio majori extincto, quoniam
ignis, ut ait Theophrastus, etiam minorem
ignem extinguit: ut si febris ardentissimâ,
calidissimove alimento, vel incendio ani-
mal inflammatum pereat, vel nimio humo-
re alimenti, aut alterius rei obruatur: ut in

ijs, qui ob ingurgitationem cibi, aut immersionem in aquis moriuntur: vel si ejusdem sedes & receptaculum dissipetur, ut confraeto, dilaceratoque corpore animato: tunc enim calor dissipatur: vel denique cum naturæ imbecillitate marcescit, atque evanescit, ut in senescentibus. Quot ergo causæ nativi caloris extinguendi sunt, totidem etiam sunt mortis: idque in omnibus animatis rebus apertum est. At quoniam animata omnia caloris sui habent receptaculum, tresque partes, uti suprâ diximus, ad vitam necessarias, ut eam, quâ cibum capiant, quâ egerant excremeuta, & mediam, in qua fiat vegetatio: considerandum est, in singulorum formis eadem receptacula, & partes variari. Nam in stirpibus per radices à terra sumitur alimentum: in caulice, aut caudice vis tota illius continetur: excremeuta per ramos abeunt in folia. In metallis, ac lapidibus simile quiddam est cum stirpibus, tametsi obscurum, ut venæ, moles ipsa illorum, & muscus, aut rubigo quædam. In animalibus omnibus apertum est os, aut huic simile aliud, quâ cibus capitur, & meatus, quâ depellitur excrementum, & corpus intermedium, in quo fiat vegetatio. Adde huc, quòd in omnibus, cor, utpote caloris initium, vitæ sedes sit, ut in animalibus
apertè

apertè cernimus: quæ, corde calescēte, vel reliquis membris frigefactis, vivunt, frigefacto, statim moriuntur. Reliqua etiam animata, ut stirpes, metalla, lapides habere aliquid simile in radicibus, unde tanquam à corde omnis calor proveniat, dubitari non potest, quamvis quale sit illud, ostendere nequeamus. Unde Galenus in libris de valetudine tuenda, locisq̃ue alijs vitæ exitum definit cordis vacuitatem, ac cessationem ab actione, quoniam, palpitante illo, non vivere animal non possit, ut nec quiescente non mori. Arqui hæc satis de vita, morteque dicta sunt ex Aristotelis, atque omnium sententia. Media inter ea duo sunt quasi inter fines, juvenus, & senectus: quarum illa ab exordio vitæ inchoatur ad maturitatem usque animati corporis, hæc ab ea declinat ad interitum. Nam id imprimis perspicuum est ex axioma 22. lib. 2. omne quod gignitur habiturum etiam finem: quod multò magis in vita animantium apparet, quæ cùm aliquando vivere incœperint, æterna esse non possunt, quia ad exitum perveniunt. Ergo & ejusmodi progressionis quasi gradus quidam interjecti erunt, per quos idem, quod vivit, modò crescat, & valeat, modò minuat, & flaccescat. Quò fit, ut juvenus in animatis omnibus sit illa prima vis naturalis,

vigens

vigens ab eorum ortu usque ad medium vitæ terminum : quâ animalia , ob majorem, quàm aliâs, calorem, indies augmentur, & corroborantur. Senectus verò sit occasus, ac declinatio ab eodem termino ad exitum: quæ, marcescente calore , semper ob agendi vim, jam remissam, fiat. Duplicem hunc vitæ cursum in universis vita præditis animadvertere licebit, nam & stirpes, prima ætate, sæliciter pullulantes, ad justam perveniunt magnitudinem, indeque rursus decrescere, & arescere incipiunt. Est & metallis, ac lapidibus juvenus sua, & senectus, non minùs, quàm illis: id quod eruditè ab Agricola differitur. Animalia item omnia apertissimam etiam ætatis speciem nobis ostendunt. Quæ ex re intelligitur , omnibus rebus esse aliquem exitum constitutum , ad quem, cùm naturæ vi tendant, primò florescant, veluti quodam ortus sui impetu facto, deinde remittantur, quemadmodum motus omnis vi pulsus initio vehemens, postea remittitur. Ergò senectutis, & juventutis nulla est alia causa præter naturæ institutum, calorisque vim, aut infirmitatem: quando & hæc duo vitæ sunt, ac mortis principia, cùm enim calor viget, & omnia in alimentum corporis convertit, est juvenus: cùm verò idem emarcessit, ac remittitur, senectus. Atqui hæc generatim, ut proposita tracta-

tractationi satis fiat: singula cujusque rei propria, ut animalium, stirpium, metallorum, ac lapidum ortus, juvenus, senectus, vitæ spacia ex harum rerum historicis petenda sunt. Cum his, quæ nos hæcenus ex Aristotelis sententia diximus, Plato in Timæo consensit, quanquam in hominis natura id solum ostendat. Quem quia factum ex elementorum triangulis, id est, qualitatibus retulit, ad has rursus alludit, ut in omnibus Pythagoram imitetur. Itaque totam de vita, morte, juventute, senectuteque sententiam his verbis complectitur. Recens ergo animantis cujusque constitutio, novos cum habeat quasi ex ligneo contextu triangulos, validam etiam habet eorum structuram: & quæ sequuntur usque ad eum locum. Morbi autem unde nascantur, nemini dubium. Sed neque ab eadem sententia Christianæ pietatis decretum discrepat, quod animalium vitam in sanguine, caloreque positam confirmat, quodque omnibus ijs, quæ ratione, atque experimento comperimus, minimè repugnat.

D E

DE SENSITIVA FACULTATE,

ET DE EIUS DIVISIONE.

Caput VII.

DIXIMVS in divisione animi quædam
 esse corpora animantia, quæ vegetatrice
 facultate duntaxat prædita, nihil aliud ha-
 berent, ut stirpes, metalla, lapides: alia, quæ
 præter illam, alias quoque haberent facul-
 tates, ut sensitivam, & reliquas. Unde fit,
 ut animatorum gradus sint quidam, tum
 perfectorum, tum inchoatorum, cum alia
 pluribus animæ viribus exornentur, quàm
 alia, quemadmodum deinceps docebimus.
 Proximus ergo vegetatrici gradus est sensi-
 tivæ facultatis: quæ, ut auctor est Aristoteles,
 quæ constant animalia, incipiunt nominatim
 non à vita, seu vegetatione tantum, ut Plato
 vult. Nam vegetatrix quidem ad corporis
 viventis conservationem, & salutem cum sit
 instituta, nihil eo habet præclarioris, nisi vi
 aliâ maiori, & ad res extra se positas capien-
 das commodiori constet, id est, sensu aliquo
 externorum, quo non tam interna, quam ex-
 terna etiam percipiat: quod maioris est præ-
 stantia in natura. De hac ergo sentiendi fa-
 cultate generatim est imprimis differendum.

tum

tum de singulis illius partibus. Sensitiva ergo facultas, est animæ vis, quæ quæ sunt extra nos, posita parte aliqua, corporis comprehendimus. A qua sentire per 3. definitionem id dicitur, quod à re sensili movetur, & eam percipit. Sensus verò facultas est quædam, singulas res aliquo accommodato, ad id instrumento corporis percipiens. Sed videamus principio, quæ sit sentiendi facultas, & qualis. deinde quomodo annexa corpori: tum eius vis facilius intelligetur. Est ergò sentiendi vis non illa quidem vegetandi corporis, quæ muta quodammodo, & cæca nihil præter alimentum requirit, sed acutior, & sagacior: quando & ad corporis commoditatem, vitæque præsidia, & ad cognitionem ejus rei data est animalibus, quò melius sibi quærant utilia, & perniciosa reiiciant. Nam cum per 6. axioma universa se conservare cupiant, & ad id agendum necessaria quærant remedia, data est in huius rei usum sentiendi vis, quæ quasi delectum utilium, & inutilium habere possit, quemadmodum in animalibus omnibus cernimus, & in stirpibus etiam quodammodo: quæ dum accommodum capiunt alimentum, & incommo-
modum respuunt, vestigium aliquod sensus habere videntur. Ergò potissima rectè conservandi corporis vis à sensu proficiscitur,
qui

qui sensus quò expressior in animalis natura fuerit, eò magis illius utilitati consultum est. Sed hic dubium est, nunquid sentiens facultas animæ per se propria, an corporis etiam, an compositi totius sit. Nam cum à corpore tam sagacem vim proficisci non posse videamus, eam esse animæ propriam credimus. At quoniam multa corporeæ concretionis in sensu vestigia sunt, eam rursus haudquaquam corporis expertem esse arbitramur. Quapropter tenendum est id, quod certius, & vetius est, sensitivam facultatem totius esse compositi animalis, non alterius tantum partis: cum enim anima corpori ita sit inclusa, ut ei vires alendi sese, ac vivendi præbeat, sentiendi quoque affert illi commoditatem, dum ipsa quasi partes ejus omnes illustrans facultates has subministrat. Itaque cum alia in animante peculiaris sint animæ, alia corporis, sic sensus utriusque communes sunt: quando ab anima sentiendi facultas profecta, à corporis instrumentis adjuvatur. Hinc Plato in Timæo, atque alias, ut Plutarchus etiam testatur de illo, sensum definiri animæ, ac corporis communionem, quod facultatem animus habeat, instrumentum verò corpus, rei autem in sensum cadentis perceptio fiat ab utroque, dum corpus illam comprehendens ad animum perferat. Ejus autem verba

In Timæo hæc sunt. Cum in id, quod moveri facile solet, perpeſſio aliqua vel exigua incidit, illius pars quævis ſequentibus undique perpeſſionem eandem tranſfert, quouſque ad prudentiæ ſedem perveniatur. Ubi hos quaſi per nuncios illius, quod perpeſſionem attulit, facultas agnoſcitur. Conſtans eſt, & nota in ſequentibus, & præcedentibus verbis Platonis ſententia intuenti cogitatione illius inſtitutum. Cum in eo loco docere velit, ab animali toto ſenſitricem facultatem exoriri. Hanc ſequitur Ariſtoteles ſententiam tum in libris de animo, tum in eo, qui de ſenſu, ac re ſenſili inſcribitur. Nam in utroque ſenſum communem eſſe toti animali inquit, ut & ſomnum, vigiliam, & huius generis cætera. His ita propoſitis, quæ communia ſunt omnibus animæ partibus: ſenſitricis facultatis vim exponamus, antequam ſingula perſequamur. Principiò id conſtat ſentiendi facultatem, ut à cauſa movente, ſic ab animo proficiſci: à corpore enim non poſſet, cū hoc nihil per ſe, niſi ab anima habeat: niſi fortè in eodem, exhalato animo, aliquid adhuc ſuper-eſſe ſenſus, dicamus. Corpus autem ipſum, quod animi materies eſt, actioni huius ſemper ſubiicitur, quatenus res ſenſiles excipiens ad animam tranſmittit: idem in hoc loco pati dicitur, id eſt, recipere: agere

vero, id est, movere, adducereque res sensibiles. Itaque cum hæc duo ad sensus pariendos subesse, alterum ut efficientem causam, alterum ut materiam necesse sit, sensus quidem omnis ex mutua utriusque actione, ac perpeffione gignitur: quæ propterea Aristoteli dicitur Alteratio quædam in corporis sensorio ad sensum unumquemque accommodato. Nam singuli sensus, ut postea dicemus, per partem aliquam corporis fiunt, quæ sensuum organum sive sensiterium nominatur. Unde ad sensum quemlibet pariendum hæc subesse necesse est: facultatem sentiendi in anima: accommodatum in corpore sensiterium: objectum aliquod externum sensui accommodatum, quod facultatē illam movens per sensiterium ad animum deferatur: alterationem aliquam objecti moventis, & motus facultatis mutuam, ex qua sensus ædatur. Proponatur exempli causa gustus, vel alius sensus quicumque: imprimis objectum ei sensui accommodatum tanquam causa primò movens ponendum est: tum facultatem illam gustandi in anima ab eo cieri, ac moveri cogitemus: motam verò ipsam per sensiterium. i. palatum objecti formam adducere. Ex hac ergò adductione fit gustus. En quomodo fieri sensum omnem cogitamus. Nam objectum ut moventem causam extra nos
posi-

positam statuimus: facultatem animæ sensitricem tum moveri, siue pari ab objecto, quatenus allicitur, & immutatur, tum movere ipsam, quatenus adduci objecti imaginem putamus: sensorium verò tanquam aditum patefieri sensationi futuræ, & preparari volumus, ut per idem fiat mutua illa alteratio ex objecto, & facultate animæ, quam sensum appellamus. Hoc igitur modo sensum omnem fieri arbitramur, cumque tria hæc necessaria habere dicemus, objectum, facultatem animi, sensorium: quibus sensatio fiat, ac sensus. Siquidem agitationem illam actionis, & passionis vocamus sensationem: quod verò ex illa paritur tandem, quòdque ad animam perfertur, sensum. Est & illud considerandum, sensorium, seu sensiterium ab objecto pati autè debere, quàm sensus & datur: siquidem sensus quasi effectus quidam est ex animæ facultate, & objecti mutua actione productus: Item in sensu efficiendo perfectionem ab externo objecto ponimus, quatenus ab hoc ille cietur: & actionem ab animo proveniente, quoniam in eo rei comprehensæ iudicium inest. Ideoque sensum animo adiunctum statuere necesse est, quando ab utroque rei perceptæ nascitur diiudicatio. Unde Galenus non alteratione, sed dignotionem alterationis in sensorio factæ ab objecto,

& animi facultate sensum esse existimat, quando sensuum instrumenta alterantur motu oppositi obiecti, dignotio verò illius alterationis à tota sentiendi facultate fit. Quæ quidem sententia, ut mihi quidem videtur, exactè sentiendi monstrat rationem. Hinc nascitur dubitatio illa apud Aristotelem, sensus ne agant, dum æduntur, an patiantur: tum quid sit causæ, cur illorum sensoria non sentiant. Sed, ut acutè docet Priscianus Lydus in commentariis de Phantasia in lib Theophrasti, sensus partim agunt, dum rerum perceptarum imagines ad animum deferunt, partim perpetiuntur ab obiectis, quatenus cum alteratione quadam sensorii fiunt ab eodem obiecto, & facultate animi. Ex quo etiam sequitur, sensum omnem corporeæ concretionis habere semper vestigia, quatenus corporeorum obiectorum imagines comprehendit, ab eorum tamen materia separatas: siquidem aliâ ratione animæ nihil percipere, nisi factâ secretionem illa formæ à materia, potest. Nec vero sensoria sensus iidem sentiunt, cum illa horum instrumenta sint, non obiecta, cumque remotum à sensitrice facultate obiectum esse debeat, ut sensus ædatur, quando per Hypothesin, obiecto sensorii admoto, nullus sit sensus: qui, ut fiat, accommodum spacium in medio habere debet per 7. Hypothesin.

thefin. Restat hîc ad extremum exponen-
 dum, quo instrumento, aut ratione sensitiva
 animi facultas sensus efficiat, cùm ipsa in-
 corporea, & objecta corporea sint, ac per
 corporis instrumenta ædatur sensatio. Quo
 in loco animadvertendum est, in animalibus
 esse aliquos ex alimento corporis spiritus te-
 nuissimos, ac semi incorporeos, qui per ar-
 terias delati sensuum pariendorû instrumen-
 ta existant, quibus anima in objectis perci-
 piendis utatur. Nam cùm nativo calore ali-
 menti pars quædam extenuetur adeò, ut in
 halitum calidissimum, qui vitantueatur, mu-
 tetur, is ipse ad singula sensuum organa di-
 gressus ab animæ sede, tanquam mediæ natu-
 ræ, inter corporea, & incorporea, ab objectis
 corporeis moveri, & incorporeas ex ijs per-
 cipere imagines potest, quas anima ipsa com-
 prehendat: ijdem autem spiritus per nervos
 sensorios adducti in animalibus omnibus
 sensus ædunt, ut gustum, aspectum, tactum,
 ac cæteros. Quòd autem hîc spiritus sensuum
 sit primum instrumentum, quo anima utatur,
 non modò apertè docet Galenus, sed Aristo-
 teles etiam in lib. de anima indicat, qui sen-
 sum omnem calido i. spiritu quodam anima-
 li ex alimento extenuato, ab anima fieri cen-
 set. Addam huic loco perbreuem vulgaris
 ejus quæstionis dissolutionem, num sensitiva

anima sit à corpore separabilis, necne, eum nullus sine corpore possit effici sensus: cuius est facilis responsio, si facultatem sensitivam in anima esse intelligamus, reliqua verò ad sensum pariendum necessaria in corpore. Sic enim, etsi à corpore separetur anima, semper facultatem sentiendi retinebit, actionem verò ipsam nunquam, nisi cum corpore. Cetera, quæ de sensuum comprehensione adduntur, ea ne verasit, an falsa, fusiùs in singulorum explicatione tradentur. Atqui hætenus de communi sensuum facultate dixisse satis sit: nunc addenda est illorum divisio. Ipsorum ergo sensuum alij interni sunt, alij externi. Interni dicuntur ij, qui intra animam ipsam pariuntur, & sola ratione intelliguntur: ijque tres sunt, Phantasia, communis sensus, memoria. Externi verò, qui per diversas corporis partes æditi externas res comprehendunt. Qui iidem sunt quinque, tactus, gustus, aspectus, auditus, olfactus. De his ergò imprimis discedendum est, initio à tactu sumpto. In tota hac de sensitiva anima, ejusque facultate, ac natura disputatione nullum est à Platone Aristotelis diffidium, multoque minùs à nostra religione.

DE TACTUS SENSU.

Cap. VIII.

PRI^MVS omnium sensuum , & universo
 animantium generi communis est tactus:
 quæ si aliquod careat esse animal non potest.
 Ergo ab hoc tanquam universi sensus primo
 initio auspicemur. Tactus est animi facultas,
 quâ corporum contactam superficiem per-
 sentimus. Hujus efficiens causa est sentiens
 ipsa animi vis, de qua supra dixi, huic sensu
 pariendo accommodata. Dum enim illa res
 tactiles comprehendit, fit tactus, quemad-
 modum & ad objecta alia convertens sese,
 alios parit sensus. Obiectum eiusdem tactus
 est corpus omne, sive simplex, sive compo-
 situm, cuius nullum est aliud indicium verius,
 quam quod tangatur. Eatenus enim corpora
 esse dicuntur, quatenus tactui sese præbent.
 Et quemadmodum variz sunt in corporibus
 qualitates tum primæ, tum secundæ, ita variis
 modis afficitur ipse tactus. Hoc est easdem
 quoque omnes percipit, modo sint tangiles,
 ut duriciem, molliciem, asperitatem, levita-
 tem, calorem, frigiditatem, siccitatem, humi-
 ditatem. Itaque omnes has corporum quali-
 tates, quæ tangi possunt, huic sensui assigna-

ri, tanquam obiecta propria, necesse est. Ab eodem etiam iudicium voluptatis, ac doloris proficiscitur, quoniam ut tactus animalium primus est sensus, ita duo illi affectus primi omnium sunt, adeo, ut iis animal carere nullo modo possit. Quomodo autem iidem affectus gignantur, suo loco dicendum est: nunc ad institutum redeamus. Quoniam per Hypothesin 7. inter sensorium, & obiectum illi appositum esse aliquod spacium debet, ut agitatio fiat sensationis, tactum quidem suum habet medium, quo fiat, suumque sensorium. Medium eius quibusdam caro esse visa est, ut Aristoteli: aliis non medium, sed sensorium, ut Alexandro Aphrodisiensi: cuius Thæmistiis sententiam refutat. Sed cum nullius esse sensus participem per se carnem videamus, ut eleganter docet Galenus, intelligemus profecto, eam non sensorium, sed medium esse potius contactus, verumque sensorium illius esse partes nervorum extremas, per totum corpus diffusorum: quæ admotis corporibus carni tanquam per medium qualitates contingant, ac diiudicant. Itaque quod aliis sensibus est medium interstitum ad sensationem, hoc tactui est caro: id quod in animalibus omnibus conspiciamus. Hinc fit, ut quemadmodum totum corpus animalis carne circumtegitur, sic eidem universo sit tactus diffusus.

fusus, perque illius partes multas possit ipse fieri. Nec obstat, quod animalia tum duriori, tum molliori cute, aut corio, testave integantur, cum ea omnia per carnem illam, quam habent, tactum percipiant, modò hebetiorem, ut ea, quæ dura sunt cute, modò aucutior, ut homines, qui tactus acumine reliqua superant: è quibus etiam, qui sunt cute molliori, majorem tangendi vim habent, quam cæteri. Id fit, quia nervi carni annexi facilius rem tactilem comprehendere possunt, quò eadem caro fuerit mollior, & tenuior. Nec verò tactus idem cum reliquis sensibus comparari debet: quòd acutior sit in hominibus, qui longè est hebetissimus illorum omnium, cum sine corporis applicatione ad carnem fieri non possit. Jam quia tactiles res diversæ sunt qualitaris, ut paulò ante monui, tactum etiam easdem potestate, quâdam in se continere necesse est, id est calidum, frigidum, & alijs qualitatibus esse, facultate affectum, quatenus idem, ut commodè fieri possit ut in omni sensu, mediocritatem, & convenientiam objecti cum sensorio, & hujus cum illo habere debet, ne alterum lædatur ab altero. Ut si, vel ardentia, vel admodum frigida carni applicentur, vel si caro ipsa, vel nervi, quibus fieri sensatio debuit, læsi sint. Quemadmodum autem fiat tactus

in animalibus, obscura ratio non est, si singularum formarum corpora, & eorum structuras inspiciamus: videbimus enim nervos per universos artus carni proximos porrigi, eosque non tam motum, quam sensum etiam afferre, propter animalem spiritum ijs vitam, ut cæteris partibus, tribuentem. At Aristotelis illud è libro de sensu, & sensili: tactus sensorium in corde situm esse: dici putandum est: quod ut superiori in libro dixi, is ortum nervorum è corde esse non ex cerebro existimavit. Quæ de re ibi, quid esset tenendum, à me ostensum est. Atqui hæcenus de tactu hæc satis ex Aristotelis sententia. Quæ vero in eadem rem Plato affert in Timæo quamvis per pauca sint, & obiter, cum de aspero, & levi, duro, ac molli edisserit, dicta, eodem fere pertinent.

D E G U S T U.

Caput IX.

TACTUS affinis est gustus adeo, ut ni obiecto, & sensorio discreparet, idem tactus quidam appellari possit: quando quidquid gustatur, contractu gustatæ rei debet percipi. Est vero gustus, facultas animæ sentientis gustatiles res capiens. Quatenus enim eadem
anima

anima sese gustui capiendo accommodat, fit
 gustus, quasi peculiaris sensus ciborum. Un-
 de quemadmodum in animalibus primus
 est tactus, sic gustus: sine quo vivere, aut ali-
 mentum capere illa non possunt: cùm cibo-
 rum alenda vitæ necessariorum inesse ali-
 quem gustum animali oporteat, si commo-
 de, & jucunditer sit victurum; id quod om-
 nibus animalibus in suo genere natura est
 largita. Gustus verò ipse proprium habet
 sensorium in omnibus corporibus palatum,
 ac linguam, sive aliquid aliud huic ratione
 respondens: siquidem per eas partes sapes
 omnes percipiuntur. Atque ut in reliquo
 corpore ob nervos latè diffusos tactus, ita in
 palato, & lingua, propter alios nervos gu-
 standi facultate præditos, gustus perficitur:
 qui nervi ad cerebrum, ut Galenus ait, de-
 lati & spiritum animale transmittunt, quo
 sapes dignoscantur, & eorum imagines de-
 ferunt ad idem cerebrum, ut harum fiat di-
 judicatio. Medium verò gustus, & spu-
 tum, sive saliva, ex ciborum, & linguæ rore
 percepta, quâ tanquam instrumento, cujus
 sit quidque saporis, deprehenditur: vel ca-
 ro etiam fungosa linguæ, ac palati, sicuti re-
 liqua caro est tactus, ut antè diximus.
 Quodcunq; sit demum eorum duorum me-
 dium gustatus vel saliva, vel lingua, aut pala-
 tum,

tum, uno tamen ille modo fieri videtur, id est, quòd lingua humore necessario gustabilem rem debet contingere, atque humore illo naturali, quâ ipsa est circumfusa semper, perfundere, ut rei saporem percipiat. Itaque saliva commodè appellari medium potest, quando per eam res gustamus, adeò, ut si aridum os sit, percipere nihil valeamus. Quæ eadem temperata esse, debet, ut se humori rei gustabilis accommodet: nam nimia si sit, & humore multo linguam madesfaciat, minùs fieri sapor potest, quàm cum magna est ariditas. Qua ex re intelligitur, saporis vim universam in humiditatis temperatione positam esse, quoniam cum gustatiles omnes res è quatuor constant qualitatibus, humorque propter crassiciem tactui sese præbeat, idem etiam ad efficiendum gustum, qui tactus est quidam, subesse debet. Item cum similia similibus cognoscantur per 20. axioma, salivaque linguæ offusa humecta sit, eadem etiam humorem rei gustabilis, quasi elicit, & cum eo permixta qualitatem gustabilem, id est, saporem comprehendit: quem per nervos linguæ, & palati ad cerebrum defert, ut auctor est Galenus. At unde saliva hæc in animantibus gignatur, apertum est, cum ex humore alimenti è ventriculo in tonsillas perfuso
semper

semper fiat: quo gula, fauces, lingua, & palatum humectatur ad sápores percipiendos. Hinc fieri videmus, ut gustus pro sputi sapore varietur, ut idem si sit biliosum, sapor amarus fiat: si salsum, salus: si dulce, dulcis: quali denique fuerit lingua humore imbuta, talem ipsa gustum habebit. Atqui hæc satis de gustus sensorio, deque medio. Quæ in re, id est, inter Galenum, & Aristotelem, ac Platonem discriminis, quod ille gustus iudicium posuit in cerebro, à quo omnem sentiendi vim putat proficisci: hi verò duo in corde: in quo vim ponunt sentiendi. De Galeni quidem sententia nihil est dubium cuiquam, de Platone verò, & Aristotele multò etiam minus. Cùm ille sic loquatur in Timæo: Tenduntur à lingua venæ ad cordis sedem saporum nunciæ: & quæ sequuntur. Hic autem in libris de sensu, & sensili aperte sensuum sedem ponit in corde, ab eoque ait, nervis undique porrectis, sentiendi vim ad omnia sensoria diffundi: cum quo tamen idem Plato de ortu nervorum aperte non congruit. Itaque ambo Philosophi hac de re idem sentiunt, & à Galeno pariter dissentiunt. cuius ego sententiæ in hoc loco plus iudicio tribuendum: cum nec à corde oriri aliquos nervos, & à cerebro vim omnem sentiendi proficisci videamus. Sed
omissâ

omissâ hâc disputatione , de gustus ob-
 jecto, tandem differamus, hoc est, de saporibus.
 Est autem sapor, gustabilis qualitas
 alicui corpori, propter mixtionem qua-
 tuor qualitarum, insita. Nam ut omnia
 corpora concreta, præter qualitates pri-
 mas enatas ab ijs, alias secundas sortian-
 tur, ut levitatem, gravitatem, asperitatem,
 & alias generis eiusdem, ita lapidam quan-
 dam qualitatem habent, quæ quoniam à
 gustus iudicio deprehenditur, gustabilis ap-
 pellatur. Hæc eadem in simplicibus cor-
 poribus esse nequit, quoniam duabus tan-
 tum qualitaribus singula eorum prædita
 sunt, quemadmodum in elementorum ex-
 plicatione supra ostendimus. Ex quo liquet,
 ipsam in compositis solum inveniri, tum
 quia secunda qualitas sit, tum quia vitæ ani-
 malium curanda necessaria, quæ nullo nisi
 concreto alimento è quatuor qualitaribus
 utantur. Ergo cum mixta omnia corpora
 habere aliquam debeant qualitatem gusta-
 bilem, eam tamen omnia minimè præse-
 rant, quia nec sensorio se possunt accom-
 modare: ut lapidos, atque illa, quæ insipi-
 dum habent saporem, aut ea, quæ magnâ
 vi aliquâ lædunt sensorium, ut feruentia, ac
 frigidissima. Quæ omnia, communi nomi-
 ne, possunt ingustabilia nominari. Cetera
 vero,

verò, quæ sui præbent gustum palato, gustabilia & sunt, & dicuntur, quorum gustabilis vis in humore potissimum consistit, eoque ipsis facultate quâdam ipso, ut si à saliva moveatur, in actum quasi redacta re ipsa humectetur, & saporem ædat suum. Hinc etiam patet, sapores facultate inesse corporibus, actu verò in ore animalis, quoniam illorum humor, in quo situm esse diximus saporem, ab hujus sputo commoveretur, ut sapor exprimi possit: qui qualis ipse fuerit, tali modo afficit sensorium: quod pro saporum varietate affectum diversas gustus formas percipit. Saporum autem duo genera simplicia ab Aristotele in libris de animo, ac sensu, & re sensili ponuntur, ex quorum concretionem variorum compositorum formæ oriuntur: dulce, & amarum: quæ cum inter se contraria sint, medios tamen alios habent sapores, ut acrem, austerum, suavem, acutum, acerbum, acidum. Eandem fecit divisionem Plato in Timæo, sed alia duo diversa genera assignavit, austerum, & acerbum: ex quorum intensione, ac remissione majori, minorive totidem sapores, quot ex Aristotelis sententia posuimus, gignantur: cuius etiam sententiam Galenus sequutus videtur. Harum autem sententiarum quam putem verissimam, multò minus iudicare possum,

possum, quàm quæ sit omninò salsa. Nam ex mixtione quatuor qualitarum, sapores omnes effici constat : quo autem modo fiant, aut quibus de causis, vel è quo saporum genere, docere potest nemo: cum id potius è qualitarum proportionè, huiusque formâ provenire, quàm ex sapore aliquo, qui qualitas secunda est, videatur, præsertim cum in qualitates secundas eam vim cadere gignendi alias non posse, vero sit similis. Sequatur ergo quod quisque volet in obscura, & difficili re: mihi saltem unicuique rei proprius à natura sapor tributus videtur, qualitarum primarum, vel excessu, vel defectu. Nam in quibus calor admodum abundat, & siccitas, saporem esse amarum cernimus: in quibus humor, & calor est moderatus, dulcem: in quibus frigidis, & siccus, austerum, acidum: in quibus frigidus, & humidus, insipiditarem quandam. Quoniam videlicet saporì admixtus calor, & siccitas aliqua esse debet, cuius vi gustus efficiatur. Omninò autem sapores septem sunt numero: dulcis, amarus: quos putat Aristoteles simplices esse: salus, acurus, austerus, acerbus, acidus: quos compositos: quibus pinguem addidit Theophrastus: è quorum etiam numero Plato austerum, & acerbum
simpli-

simplices, reliquos compositos existimavit esse. Sed dissidijs his Philosophorum omissis, singulas formas breviter percurramus. Dulcis sapor, est qualitas è calido & humido mediocriter temperata, linguam suavitare deliniens: quæ cum vitæ nostræ percommoda sit, quæ duabus ijs qualitatibus sustentatur, & sapor ille etiam affert, ut in sacaro, melle. Amarus est ex multo calido, & sicco constans, ac linguam vi suâ penetrans, & vrens, ut in aloe, absinthio. Salus è calido, & sicco terrestri concretus, ac linguam adstringens, ut in sale, nitro. Actis è frigido, & sicco moderato, linguam mordens, ac rodens, ut in pipere, zingibere. Austerus è frigido, & sicco linguam exasperans, & adstringens, ut in piris sylvestribus, & immaturis. Acerbus, seu ponticus ab illo parùm differt, nisi quod linguam magis contrahit, ut in mespilis immaturis. Acidus est tenui frigiditate, ac siccitate nimia, linguam arrodens, ut in aceto, ac melorum citreorum succo. Pinguis denique est, ex humore nimio, & calore mediocri, linguam hebetans, uti in butiro, adipe, atque adeo omni pinguedine. His addit suave Plinius, quem ego à dulci minimè separarim: atque alias formas, quæ variz sunt admodum. Verùm hæc de saporum præcipuis formis satis: nam quæ in condimentis ex ijs omnibus commixtæ fiunt, nullâ possunt ratione compre-

hendi. Has tanquam simplices species natura rebus ad alimentum suavitatem indidisse videtur. cetera hominum luxus, & gula extogitavit, quæ in omnium animalium genere gustu sunt acutissimo, ita saporum varietate, & voluptate excellunt.

DE OLFACTU.

CAP. X.

QUoniam ad vitam tuendam animalibus necessarios natura sensus attribuit, & eos præteriti, qui ad victum pertineant: postquam de tactu, & gustu disseruimus, consequens est, ut de olfactu verba faciamus. Qui idem adeo est cum gustu conjunctus, ut sine ipso ille commodè fieri non possit, cum ad gustum percipiendum olfactus conducatur. Est verò olfactus, facultas animæ sentientis ad odorem corporis percipiendum. Etenim inter secundas qualitates odor cum sit, veluti sapor, ad hunc quoque deprehendendum olfactus accommodatus est, ne quæ in corporibus mixtis qualitas vel sensu, vel mente non percipiatur. Hujusce sensus instrumentum, sive sensoria externa sunt nares: quæ in omnibus animalibus, quæ sunt adoratus participes, aut expressæ sunt, aut inchoatæ: internum verò Aristoteli, ac Platoni aliud, aliud Galeno dicitur. Aristoteles quidem

dem in lib. de sensu, ac re sensili, duas esse carunculas, veluti mamillas in narium commissa, cum fronte positas, inquit, per quas odor immissus, perque alios meatus ad cor, ubi sensuum est vis, porrectus odoratum efficiat. Plato in Timæo quid hac de re senserit, obscurum est: nisi ex ijs, quæ præcesserunt, sedem olfactus, sicuti gustus, in corde ponere illum dicamus, quod est maximè verisimile. nam & similia venarum, per quas ante gustum fieri dixerat, facit, de olfactu differens, mentionem. Cujus sunt verba. Sed nostræ circa hæc venæ ad terræ, & aquæ genera angustiores sunt, ad ignis, ærisve genera ampliores. Idem paulò post de gravi loquens odore, omnem illam capacitatem, quæ à summo capitis vertice ad umbilicum pertinet, offendi eo refert his verbis. Hoc quidem disturbat, violatque omnem eam capacitatem, quæ à summo capitis vertice ad umbilicum porrigitur. Quo in loco sentientem animi vim, atque adeo instrumentum odoratus internum, non in cerebro tantum, sed & in corde, atque jecore, in quibus reliqua vis animi à ratione diversa inest, ponere videtur. Sed hac de re nos aliàs copiosius. Ab Aristotelis sententia, Galenus in lib. de olfactus instrumento dissentiens, meatum inquit olfactus manifestum esse nares, per quas odor omnis excipitur: hujus verò duplicem meatum patere,

quorum alter ad interiores oris pertineat partes : alter ad cerebrum rectà deferatur . Et cum natus ex calvarie anteriori parte natus sit, & ad cerebri anteriores ventriculos pertinens, in iisdem esse odoratus organum concludit. Ita tamen ut quidam pateant meatus , membranâ quâdam, ut opercula intecti : quæ dum aperitur, odor fiat, dum recluditur, idem quasi contineatur intra cerebrum. Quæ sanè sententia longè eâ verior esse invenitur. Cum Anatomicis , & medicis rationibus multis id comprobari possit : quæ nos causâ brevitatís omitenda putamus . Iam verò objectum odoratus est odor, id est, qualitas secunda, in halitu quodam mixti corporis calore expressâ. Necessè enim est eandem quasi evaporati, & fumare, ut odor ejus possit sentiri. nam si res admodum siccæ sint, aut frigidæ, humectæve, nullum è se odorem emittunt. Itaque calore debet ea qualitas corporis excitari, ut odor deprehendatur. Unde in regionibus calidis, odoratas res majorem exhalare odorem , quàm in frigidis, videmus. Odorum autem genera varia, & vix explicabilia sunt, quemadmodum & Aristoteles, & Plato testantur, duo tamen genera in Timæo Plato idem ponit, unum suavis odoris, quod sensum gignit suavem : alterum molesti, quod gravem, & injucundum. Ejus verba hæc sunt. Duæ igitur eæ in his varietates expertes nominis existunt,

existunt, nec ex pluribus, nec ex simplicibus formis, sed duo in ijs nomina solum nota sunt, suave, & molestum. Aristoteles, & si nullam odorum distinctionem apertam posse fieri videat, tamen ex saporum discrimine odores dignoscendos arbitratur: ut alij amarum redolent saporem, alij dulcem, alij austerum: alij denique alium. Cujus etiam sententiam Galenus amplectitur, quod utriusque rei sensus ad cibos discernendos pertineat, quodque odore saepe saporis deprehendamus rerum nondum gustatarum: sed, quoniam de odore multa dicimus, æquum est, ut ejus naturam exponamus: nam de odorandi ratione, postea dicetur. Imprimis odorabilia omnia, Galeno auctore, halitiosa esse intelligendum est: nam quæ inepta sunt concretione, ad vaporem emittendam, ut lapides, & quæ adeò tenuem exhalant spiritum, ut persentiri nequeant, ea inodorabilia dicuntur: reliqua verò omnia, quæ spiritum ex se aliquem emittunt, odorabilia. Odoris autem essentia, vapor est quidam fumidus, ut Aristoteles ait, in libris de anima, & in Timæo Plato his verbis. Omnisque odor aut fumus est, aut caligo. Idemque vapor humectæ, aut frigida naturæ esse per se nequit, cum nec solum frigus, nec humor halitum aliquem excitent, nec siccat etiam, aut frigida tantummodo, cum in his minus inesse possit vaporis: sed calidæ, &

humectæ. Nam ut ex aqua calore solis frequen-
tes exhalationes videmus excitari, ita è corpori-
bus emitti halitum quendam calidum, & hu-
mectum, qui odor appelletur, putandum est.
Hujusce verò halitus magnum est discrimen,
prout calor, aut humor in eo magis excelluerit:
alij enim odores vehementes sunt: qui omnes
capitis adferunt dolorem: alij lenes, & suaves,
qui plurimum eidem conducunt. Et cum sen-
sorium ipsum olfactus, Galeno teste, halituo-
sum sit, etiam per se, idcirco odores externos
percipere, qui quasi fumi sunt quidam, facilius
potest. Itaque mediæ sunt naturæ odores inter
humorem, & siccitatem, siquidem à calore
ijdem excitantur, ut fumi. Vnde si humecta
sit admodum res, nullum ferè emittit odorem,
ut aqua: si sicca etiam, multò minus, ut arena.
Quapropter ex utraque qualitate halitus, id est,
ex humoris, & siccitatis medio quodam vapo-
re, & calore moderato debet temperari, ut odor
existat. Arque hoc est illud, quod Plato in Ti-
maeo refert, odores semigeniæ naturæ esse, ac
mediæ inter aërem, & aquam. Cujus de opi-
nionem in Timæi commentarijs nos plura. Re-
liquum est, ut quo fiat modo odoratus, expona-
mus. Sensum omnem egere aliquo medio,
quo adjuvetur sensatio, antè ostendimus, ac
nunc etiam in olfactu perspicuum est. Vt enim
odorari quicquam possimus, aërem, aut aquam
mediam

mediam interiici oportet, quâ fumigationem
odorum in nares adducamus, inde quo ad cere-
brum. Ipsa verò odoratio fit hoc modo. Res
odorata imprimis, quæ animæ facultatem com-
moveat, subiicitur; hujus deinde vaporem ear-
dem facultas per nares accipit, & per membra
illos, ad cerebri anteriorem partem pertinē-
tes admittit, operculo illo, quod cor integit
respirationis vi aperto. Vnde ut olfactus gigni
possit, respirationem fieri necesse est, quæ &
cerebrum inspirando dilatat, & odorem eò per-
ferat. Expiratio verò ad id confert, quod cras-
sos cerebri halitus efflamus, ne multa idem op-
pleatur vapore: qui vapor si crassus sit, ac len-
tus, & à calore excutatur, sternutationem effi-
cit, ut aspicientibus nobis, solem eorum quo-
rum cum cerebri vapores, calore per nares
subeunte, excutiantur, sit sternutatio. Hinc
ergo perspicuum est, Galeni sententiâ, & cere-
brum respiratione indigere, ad olfactum gi-
gnendum, & in ijs, qui respiratione careant,
odoratum nullum esse; cum vel naso compres-
so, & respiratione cohibita, nihil olfaciamus.
Hactenus ergo de olfactu sit dictum, quem ani-
malibus omniū perfectis, & inchoatorum ple-
risq; inesse cernimus, nisi quæ sint, quæ ad stir-
piū naturam magis accedant. Addam huic loco
per brevem hujus quasiuncula à multis agitata
solutionem: an odores in subjectis corporibus

sint tales, quales ad nos perveniunt, an in nobis
 potius. Quod sanè cognitu difficile non est:
 cum objecta sensibiles qualitates in se facultate
 ita habeant, ut ab animi vi commota, in actum
 redigantur, & easdem et qualitates infundant:
 ut odoratis in corporibus odor semper inest fa-
 cultate: tamen idem in olfactus sensum in-
 ducens, in animo sentitur & corpore illius secre-
 tus, non in se ipso. Cui rei conducit perma-
 ntia percipi natura in animalibus, quorum
 alia magis, alia minus alijs olfaciunt, quod mi-
 nus aptam ad odores hauriendos habeant tem-
 perationem. Unde quo sunt aridiori cerebro
 praedita animalia, eo longius olfaciunt: ut ca-
 nes, qui semidam odoris naturam ariditate sua
 excipiunt facilius. Quod fit, ut homo inter om-
 nia animalia minimi sit olfactus, quod om-
 nium maximè habeat cerebrum humectum.
 Quae verò de apibus, & insectis, huiusmodique
 alijs hoc loco quaeruntur, qui fiat, ut olfaciant
 vel flores, ad quos accedunt depascentes, vel
 fumum, cum abiguntur, cum minimè dicantur
 respirare, mihi certe inutilia videntur: cum
 si olfaciant, respirare illa necesse sit, quando
 nullo modo fieri odoratum, sine respiratione,
 ante docuerimus. Verum hac de re latius, cum
 de respiratione differatur.

DAVIDIT V.

CAP. XI.

Quoniam Deus omnibus animantibus res solum necessarias tribuerit, ut ex illius opificio licet contemplari: alia tamen ad ornatum, & solertiam maiorem adiecit, ne parvus in distribuendis beneficiis videretur. Itaque post tactum, gustum, olfactum, ad vitam tuendam necessario animalibus omnibus tributos: alios etiam acutiores his sensus addidit, auditum nimirum, & aspectum, quod se possent non modo melius conservare, atque alere, sed plurimum etiam rerum imagines comprehendere. Exponamus ergo auditus rationem imprimis, ut à minus absolutis ad maxime perfecta progrediamur. Est vero auditus animæ facultas, quæ sonum à corporibus duobus inter se collisis auditum excipit. Huius origo est ab anima sentiente, ut reliquorum sensuum, profecta: eadem enim ad sonos percipiendos digressa auditus efficit sensum. Sensorium illius externum, sunt aures in animalibus plerisque expressæ: in aliis vero inchoatæ, ut superiori in libro retulimus, internum vero, meatus quidam ad cerebrum pertinentes. Nam, auctore Galeno, ut ad oculos bini nervi optici à cerebro nati porriguntur, per quos videmus: sic ab eodem ad aures

totidem alij demittuntur, qui voces omnes excipiant. Idem verò duobus foraminibus ossium, quibus aures affixæ sunt, adhærentes pelliculâ quâdam integuntur: quæ ingruentis soni agitatione inflexa sonum cerebro reddit per auditorios nervos. Huc facit etiam spiritus ille animalis per sentiendi nervos omnes diffusus, qui vocis imaginem quasi devehit ad cerebrum. Extra hæc foramina binæ aures patent in plerisque animalibus amplæ, ac flexuosæ; per quas sonus redditur: quæ patulæ sunt, & inflexæ; ut expressiorem sonum transmittant, amplificato intra eam cavitatem sono. Et cum animalium alia aures moveant, alia verò minime, omnia tamen ipsas arrigunt, ut sonum possint excipere: ut in equis, ac cæteris quadrupedibus animadvertimus. Iam verò auditus medium, externus ær est nobis offusus: per quem sonus ad animalis aures defertur. Ipse enim contiguus cum sit nobis, quemcunque sonum auribus reddit gyratione quâdam illius factâ: quemadmodum in aqua lapillo aliquo incusa sit, quæ multos efficit circulos, alios aliis majores minoresque. Hæc æris, ut Aristoteli placeat, gyratio ab interno alio aëre pelliculæ aurium foramina tegenti intrinsecus offuso adjuvatur, dum hic ad illius commotionem impellitur, ac sonum amplificat. Vnde & cum aliquis flatu in cerebro receptus est, qui conclusum

sunt ibi halitus illum commoveat, tinnitus
 aurium quidam exoritur: qui idem, manu au-
 ribus admotâ, perſentitur, quoniam aër ille in-
 ternus agitur. Qui quamvis eſſe immobilis
 dicatur, quia foras minimè diffunditur, aut agi-
 tatur, per ſe tamen impellitur, auribus obura-
 tis. Atque hic etiam aër internus auditus me-
 dium ab Ariſtotele, ac Themistio nominatur,
 non minùs, quàm externus. Aqua item audi-
 tionis appellari medium poteſt, quando homi-
 nes inter natandum ſe immergentes, voces
 audiunt, & audite piſces, notum eſt. Sed aqua
 ob denſitatem non tam commodè poteſt ſo-
 num ferientem transmittere, quàm aër, qui
 tenuior eſt. Objectum auditus, eſt ſonus om-
 nis è corporum ſolidorum attritu auditus: qui
 ſi ab ore animalis proficiſcatur, vox dicitur.
 Sonus autem ut fiat, tria hæc ſubefſe necesse
 eſt, duo nimirum minimum corpora ſolida,
 quæ inter ſe collidantur, (nam mollia ſi
 ſint, ut lana, veſtes, nullum ædent ſonum)
 deinde ſtrepitum è collisione auditum per æ-
 rem deferri: qui plaga infractus illum exci-
 piat, & auribus reddat facile. Quo nomine
 ſonus ab Ariſtotele breviter beſinitur, aër
 eliffus, & infractus. Hujus duo ſunt formæ,
 una cùm idem aër ab animali aliquo exci-
 tur, quæ vox appellatur: altera, cùm è qui-
 buſque auditur corporibus, quæ ſonus com-
 muni

mini nomine. Vtriusque tamen formæ duo sunt modi, qui pro ratione collisionis variantur; quique à tactu quâdam similitudine ducuntur: gravis, & acutus. Gravis sonus, est is qui auditum leviter movet: Acutus, qui vehementer. His omiſſis, quæ difficilia cognitu non sunt, de vocis ratione disseramus. Aëream esse vocis naturam, ut soni cujusque apertum est, cum illa emitti absque aëre nequeat. Eadem collisione quâdam linguæ in animalis ore fit, uti soni alij è corpororum solidorum attritu. Nam ducto ab animali per asperam arteriam spiritu è pulmonibus, si idem animi cogitatione ad rem aliquam inita, linguæ agitatione in palatum reflectatur, & in dentium obstacula incidat, vox fit. Quæ sola ideo animalium perfectorum, ac respirantium est propria, non reliquorum, quòd, cum nullo illa utantur spiritu, nec vocem habeant. Hoc loco querit Aristoteles, cur nam cicadæ, apes, atque huiusmodi alia insecta, vocem emittant, cum exanguia sint, atque omne animal exangue respiratione careat. Cui objectioni respondens ipse, cicadas attritu aëris in septum transversum, quod membraneum est, vocem, ait emittere, sicuti pisces aliquos inflexione branchiarum. Sed hæc de re nos suo loco. Ergò cum vox in animalibus perfectis, uti supra dixi, formetur, diversi tamen est eadem modi pro cuiusque speciei natura: alio enim modo

modo aves garrunt, alio hinnunt equi, leones rugiunt, tauri mugiunt, alias denique cætera omnia animalium genera peculiare voces habent. Quarum quidem omnium eadem est illa causa communis, quam paulò antè reddidimus, quod unumquodque animal incitatum imaginatione aërem eductum à pulmone lingua veluti plectro in palatum inflectit, & dentium septo conformat. At in homine quanquam eodem modo fiat vox, obscuriorem aliam habet effectationis suæ rationem. cum enim è pulmonibus est in fauces spiritus eductus, occultus, & vix perceptibili ratione, vox mentis cogitationem, & sensum statim concipit, ac ratione, & intelligentia plena linguæ agitatione, ac dentium percussione formatur, atque articulata, & significans efficitur. Cujus sanè rei causam nullam aliam asserere possumus, nisi quod origo spiritus eadem est, quæ in animantibus aliis, eademque illius agitatio, & inflexio. Mentis verò ille conceptus, & cogitatio è cerebro proficiscitur privatâ quâdam, & obscurâ vi humanæ naturæ: quæ soli eius auctori Deo nota est. Cum hæc ita se habeant, doceamus nunc, quæ sit forma auditus efficiendi: tum quo pacto Echo gignatur. Ea est sensuum ad res sensiles consensio, ut si objecta sensibili re, organum sensus sit integrum, sensus continuo pariatur. Quod idem in auditione efficienda perspicimus,

mus, ut objecto sono, qui suapte naturâ est
aereus, & per aerem, utpote sibi congruum,
deferatur, facultas animi auditiva sese illi statim
percipiendo accommodet. Ita fit, ut sonus omnis
& corpore auditus, sive is significet quicquam,
sive nihil, in ovi figuram, uti placet quibus-
dam, per aerem deferatur inexplicabili ratio-
ne, ac per aurium anfractus immixtus pellicu-
lam ossis foramina obtegentem concitet: quæ
inflexa tympani more internum aeris flatum
excutit, quousque tinnitus ille per nervos au-
diendi ductus in cerebrum ab imaginatione
dijudicatur. Hæc prout sonus fuerit, ita judi-
cat, alio videlicet modo in animalibus ratio-
nis expertibus, alio verò in hominibus. Nam
illa quidem cum voce significationes natura-
lium rerum percipiunt, alia nimirum aliis
acutius: hi autem mirabile habent iudicium
de vocis forma, sono, significatione, concen-
tur. In quo illud admiratione dignum est, quod
non modo vocis sonum homines percipiant,
cùm facile sit, aerem auribus accipere, sed co-
gitationem, & instinctum illius. Ex hac audi-
endi ratione tam mirabili, quemadmodum
Echo fiat, intelligetur. Nam cum aer è corpo-
rum collisione auditus in aliquid debeat neces-
sariò incidere: si fortè is in cavum, aut emi-
nentem locum incurrat, ita ut reciprocetur,
& quasi eo, unde impulsus est, reflectatur,

Echo

Echo fit, id est, reciprocata vox eadem, aut sonus, qui ex corporum attritu fit elisus. Et quidem si locus, in quem sonus incurrit, sit planus, & æquabilis, ita ut idem sonus integer reddatur, voces absolutæ recipiuntur: si inflexus, ut ille confringatur, ac dissipetur, imperfecta. Hactenus igitur de auditu, & eius objecto, forma, & ratione, ex Aristotelis, & Platonis sententia. quorum ille in libris de anima, hic in Timæo idem planè sentit: qui sic eo in libro loquitur. Tertiā præterea vim sentiendi, hoc est, auditum ita oportet considerare, ut quibus è causis illius affectiones eveniant, doceamus. Quo in loco audiendi vim à cerebro ad jecur usque protendi ait, ut de gustatu, & olfactu antea dixit: quod in ea capacitate, sonorum omnium dijudicatio consistat, pulsato nimirum, ut refert Plutarchus, interno capitis aere, & ad principis animi sedem, id est, ad cerebrum reflexo. Cui etiam sententiæ Galenus assentitur, qui auditum in cerebro inquit persentiri. A qua minimè dissentit Aristoteles, qui in corde sentiendi vim esse sitam existimat, cū eam inde ad omnes corporis partes diffundi censeat, præsertim ad eas, quæ sensuum sint instrumenta.

Praestantissimus omnium sensum est aspectus: a quo, tanta ut Plato inquit in Timaeo, tamque multa ad nos commoda perveniunt; ut ne haec quidem, quae de Philosophia naturae disputantur, novisse, destituti oculorum beneficio possemus. Hinc ejus praestantia praeteris intelligi datur, quod animalia omnia, excepta una talpâ, aspectu minime carent, tanquam optimo, & ad vitam recte tuendam necessario sensu: ipsamque in sublimi corporis parte, id est, capite, ut animae quandam speculam habent. Est igitur aspectus, animae sentientis facultas, quâ corpora conspiciamus objecta. Hujus sensoria sunt, oculi bini, ac lucidi, & capiti omnibus animantibus affixi, aut in suprema corporis parte, quo & commodius semotas res aspiciant, & reliquo corpori provideant. Oculorum autem structuram, & formam, ac situm uberius in superiori libro descripsi: quo nomine de vi ipsa sentiendi duntaxat differendum hic est. Medium, quâ visus perficitur, est aër lucidus, qui conspectarum rerum imagines adducit, & oculis quasi luminibus infert. Nam si corpus visile oculis opponatur, aut aër sit tenebrosus, visio fieri nullo modo poterit. Obje-
ctum

tum denique, est color cuique corpori effu-
 sus, & videndi facultatem alliciens. De quo
 antequam dissero, æquum est, ut rationem vi-
 dendæ tradam imprimis. Duos esse & in homi-
 ne, & in alijs animalibus visu præditis nervos
 opticos, à cerebro in oculos bipartito diductos,
 per quos spiritus animalis profectus sensum
 moveat, & causa sit aspectus, supra diximus, &
 nunc in memoriam revocari oportet. Hic spi-
 ritus cum semicorporeus sit, facile ab objectis
 formis impallitur: quo facto, facultas quoque
 animæ illo quasi vehiculo usa incitatur. Cum
 autem ab objecto facultas est mota, ipsa rursus
 in oculos, qui, ut res. melius cernantur, bini
 sunt, incurrens imaginem percipit objecti, tan-
 quam per animi aditus, eamque ad cerebrum
 deferat, atque ita fit visio. Ipsi etiam oculi, luci-
 di cum sint, & humore illo pellucido, & per-
 spicuo compositi, imagines rerum externarum
 in se, ut in speculum recipiunt, ut per pupillæ
 foramen, quod nervi optici extremo adjunctum
 est, deferantur. Sed hic ingens, & obscura na-
 scitur quæstio inter Platonem, & Aristotelem:
 num visio fiat extramissione virtutis visivæ,
 quam visorios ipsi radios appellant, in obje-
 ctum: an imaginis objecti intramissione in
 eosdem oculos. Quæ res ut facilius intelliga-
 tur, simulque proposita diluatur quæstio, sen-
 tentias primò utriusque Philosophi exponere

necesse est. Plato in Timæo de aspectu loquens, lucida vim quandam in oculis sitam esse inquit, quam nos spiritum illum visivum, & animale, cuius supra fecimus mentionem, appellare possumus. Hanc vim ab oculis foras prodeuntem, & in objectum visile incurrentem per medium ærem lucidum illius referre imaginem, atq; ita fieri visionem, existimat: Eam autem internam oculi lucem per radios quosdam, quos vocant Perspectivi visivos in coni figuram emitti, cuius basis sit in conspecta re, coni verò ipsius cuspis in oculis. Ad commodiorem huius sensus rationem ærem interjectum objecto, & oculis lucidum esse debere addit, ut interna oculorum lux ab aeris luce, cui congruit, adjuncta, & quasi ad objectum prosecta facilius imaginem possit comprehendere. Ideò nec aëre obscurato, nec noctu, videre nos posse putat, quòd familiari luce aeris radij oculorum visivi priventur. Nota est Platonis in Timæo sententia de visionis forma ei, qui verba illius rectè considerarit, aut commentarios in eum nostros legerit. Quocirca nihil addendum est amplius. Hac in re tantum à Platone dissentit Aristoteles, quòd eam hic videndi rationem, quæ sit radiorum visivorum emissionem, ab oculis tollit, illà verò, quæ in emissionem eorundem, tueretur. Putat enim ille objectorum formas ad oculos per ærem lucidum referri, & in humorem illum tenuem,

ac perspicuum oculorum representari, adjuvante nimirum videndi vi, ac spiritu, qui & animi moveat potestatem, & oblatas formas excipiat. Sententiam hanc Arist. in lib. de anima, & de sensu, reque sensibili contra Platonem tuetur, ac rationibus nititur probare. Quas quoniam alio loco subjecimus, & examinavimus, atque Galenus accuratè insectatur Platonis sententiam secutus, inculcare hinc non oportet. Mihi tamen Platonis ratio commodior, ac verior videtur: quam Opticorum demonstrationibus illam frequentium confirmare possem, ni longior esse nollem. Ad eos ergo qui exactè re nosse volet, recurrat nos Physices tantum finibus libenter continemur. Ergo cum oculis vis quædam insita sit videndi colores omnes, quæ ab spiritu animali eò confluente suppeditatur, ipsa tamen una est, & ab una cerebri parte per binos opticos nervos diducta: ut cum per duos oculos forma objectæ rei capiat unam solam, non duplicem percipiat. Ita fit, ut utroque ab oculo ad ob objectum radij protensi, reductique, ac per nervos opticos ad cerebrum delati in unum locum concurrant, unamque imaginem cerebro invehant. Ideo ad rem commodè videndam radij oculorum in eam directè insigi debent, ne si limis, quod aiunt, oculis cernamus, nihil percipiamus aperte. contra qui vel radiis dextrâ, aut levâ inflexis, vel sursum elevatis, aut deorsum depressis, inspiciat, hunc varij

videntem errores sequentur, dum lava sapè caput pro dextris, aut hæc pro illis, sublimave pro humilibus. Quos errores omnes accurate demonstrationibus Geometrarum persequuntur. Quoniam autem, ut fiat aspectus, aerem interjectum ut causam adjuvantem lucere supra diximus oportere: sciendum est, lumen, auctore Platone, atque Aristotele incorporeum esse, & à cœli spheris in aerem hunc effundi, quò illustretur. Nam is perspicuus cum sit, perspicuumque omne naturâ suâ lucem possit accipere per definitionem septem fierique conspicuum: si luce idem solis, aut ignis offundatur, illucescit, & cernentium vim oculorum adjuvat. Ergo perspicuum facultate dici lucidum potest, actu verò, cum splendor incorporeus, per illud totum effunditur. Si enim lux esset corporea, commisceri aeri, aut aquæ non posset, cum duo corpora in eodem nequeant contineri, per axioma 8. li. 1. itemque lumen Aristoteli actus eius perspicui, quatenus est perspicuum, esse dicitur caligo autem carentia luminis in eodem perspicuo. Nam cum in opacis corporibus lux esse nequeant, ut experientia nos docet, sed in perspicuis, eadem profecto non aliâ ratione commodius, quam quòd illius actus sit, potest definiri: aut caligo, quam quòd eiusdem privatio existat. Sed locus hic jam postulat, ut de aspectus objectio differamus. Visibile communi voce appellatur, quidquid aspectui

aspectui obijcitur: veluti tactile, quidquid obijcitur tactui: gustabile, quidquid gustui: quandoquidem sensus singuli peculiaria habent objecta per 10. axioma. Huic color ut absoluta objecti forma adijcitur, qui in eiusdem heres superficie aspectui sese primò offert. Et quanquam visibile à colore subjecto non discrepat, tamen quia illud latius, quàm hic patet, imperfectiusque, & obscurius est, quodammodo dicitur differre. Quocirca color aspectui propriè subjacet ut objectum: ipse autem extrema corporis visibilis superficies est, luce offusâ. Nisi enim corporis extremitas, adjecto splendore, illustretur, color effici non potest: quoniam ad illius temperationem è corporis essentia, & ignis vi factam accedere lux debet, ut color perspicuiatur. Idcirco ille ab Aristotele, motus quidam perspicui actu existentis, definitur, id est, qualitas expressa, & conspicua in corpore perspicuo, lucis splendore jam illustrato. Atque hîc tamen perspicuum vocari, ne aerem medium, aut aquam interjectam objecto, & oculis arbitrere, sed corporis superficiem è lucis, & qualitatum suarum temperatione coloratam, atq; ab aëre jam illustrato quodammodo immutatam. Nam alia est corporis superficiiei lux, alia aeris externi: illa quidem interna, & ex ignis temperatione facta corpori inhaeret: hæc à sole, ac syderibus in aerem effunditur. Quod autem aliqua sit lux in corporum

superficie, quæ colorem efficiat, minimè dubium est: cum & corpus omne naturâ suâ sit opacum, & colores quo lucis habeant plus, eò sint magis conspicui. Atq; id ipsum ex definitione coloris Platonica in Timæo patet, qui sic illum definit. Color est quasi flamma quædam, & fulgor à singulis corporibus emanans, partes habens vi suâ ad sentiendum accommodatas. Nec verò, si qui sunt intra ipsam corporis molem colores, discerni possunt, nisi illi tantum, qui in superficie: quoniam eò splendor oculorum penetrare nequit, qui in extremitatem oppositam terminatur. Hinc liquet, diversa esse coloris genera pro majori, minoriye lucis portione, corporis extremitati adherente. Quæ eadem tum simplicia, tum composita esse dicuntur. Simplicia coloris genera, duo sunt contraria: album, quod, quia luce constat multâ, luci responderet: nigrum quod, quia nulla, caligini, aut splendoris privationi. Ex his alij colores sunt multi intermedij: quorum est varia compositio, & ratio concretionis tum ex albo, & nigro, tum ex ipsis intermedijs, ut rubrum ex albo: & nigro compositum flavum ex majori albi portione, ac rubri minori: croceum ex majori rubri, & minori albi parte: viride ex rubro pauciori, & nigro pluri: purpureum ex pluri rubro, & pauciori nigro. Horum omnium colorum rationem, ac temperationem investi-

investigare obscurum est, solique Deo, ut Plato inquit, cognitum. Quo nomine, duo illa genera, supra à nobis posita, tanquam lucis partes sunt: è quatum temperatiorne reliqui sunt colores, quando omnes pro lucis portione variantur. Atque hujus est sententia Aristoteles in lib. de sensu, ac re sensibile: & Plato, cujus hæc sunt verba in Timæo. Nunc de coloribus potissimum hoc modo probabilia dicenda esse videntur. Et quæ sequuntur. Cum hæc de aspectus ratione, deque objecto sint dicta, dubium est, quomodo tenebras ipsas inspiciamus, cum & earum color obscurus: nullo certo termino contineatur, id quod in omni colore maxime necessarium est: tum quâ ratione per aerem obscurum vel stellas, vel lucem aliam procul distantem cernamus, cum aspectus medium lucere diximus oportere. Cujus sane ratio emissionem esse radiorum aliquam ab oculis aperte indicat, cum nihil aspectum præter colorem moveat, aut in eam suam speciem emittat. Nam cum oculis tenebrae offuscæ sunt, vel per medium aliud lucidum à nobis conspiciuntur, vel per nullum: si per aliquod, illa jam vice coloris nigri sunt: si per nullum, sine dubio ipsa oculorum lux emicans, vel medio nullo interjecto, caliginem ipsam aspiciunt. Atque ita fit, ut commodius obscura in nocte visuri oculis conniveamus, &

visivos radios magis intendamus, quò lux oculorum facilius ad tenebras sese accommodans eas inspiciat: id quod noctu vagantibus apertum est. Iam vero per mediam caliginem lucem aliquam inspicimus, ut stellas quasdam, lucernam, animalium quorundam cornua, & capita, aut oculos: quoniam ea ex se lucem aliquam emittant, quæ oculorum lucem adiuvant, ut quod in medio deest, ipsa suo suppleant splendore. Verum hæc de re satis, ne singula longè persequar.

DE SENSIVVM QVINQUE

collatione.

CAP. XIII.

Dixi de quinque omnium animalium sensibus exterioribus, tactu, gustu, olfactu, auditu, aspectu, nunc antequam ad alia progrediar, breviter dicendum est, quæ communia iisdem illis sint, quæ peculiarium etiam quique gradus ipsorum. Principio id experimento constat, hos quinque sensus solum esse, nec plures: quòd nemo aliū sensum in animali quoquā peripexit. Iisdem autem perfectis duntaxat insunt animantibus, modo ne læsa, aut corrupta sint, non inchoatis, quæ velotruino, vel pluribus aliis prædita sunt: ut zoophyta, quæ tactu solum habet, nam talpa, quæ aspectu dicitur carere, suos quoque habet oculos, sed membrana quadam obstructis, ita

ut agrè

ut agrè inspiciat. Ergo quæcumque incedunt animalia, quæque partibus corporis omnibus perficiuntur, eos habent omnes quinque sensus, ut Aristoteli, atque alijs placet. Iam quia visibilia omnia objecta quatuor è qualitatibus constans, & per decem axioma similia à similibus sentiuntur, sensus quidem ipsi quatuor qualitatibus respondent: ut tactus terræ, quia omnium est hebetissimus: gustus aquæ, quia sine humore non fit: olfactus aeri, quod ex fumigatione odorumpariatur: auditus eidem aeri, quod à sono movetur: aspectus igni, ut Plato vult, quia luce videtur, quæ ignis naturæ est, quam Aristoteles aspectu aquam ob perspicuitatem, non ignem, respondere dicat: quem omnibus sensibus æquè esse offusum contendit: cujus discriminis ratio ex questione illa de visus emissionem pendet: quam ut tollat Aristoteles, & igneam etiam illam oculorum vim, à Platone inductam, rejicit. Accedat eodem id, quod proprium sensuum est omnium, in comprehendenda nimirum rerum imaginibus, formas tantum materia carentes concipi, non sine aliquo tamen ejus vestigio. Cum enim colorem, saporem, sonum, aliudve hujusmodi sensu capimus, minime quidem ipsa objecta, ut sunt, corporata, percipimus, sed eorum imagines, quatenus corporibus adhærescunt. Id ex sensationis modo facile intelligetur, cum ipsa

in medio intervallo sensus, & objecti reflectione quâdam fiant. Nam cum audimus, ipsa soni species in aëre aucta ad aures perfertur; non sonus ipse, eodem modo sunt reliqui sensus. Est & illud ipsis omnibus commune; quod si à majori, minorive objecto moveantur, aut leduntur maximè, aut omninò nihil sentiunt per 16. axioma: ut in ijs, qui propter gravissimi soni alicujus tinnitum, ut bombardæ, sæpe surdesunt: aut ob majorem splendorem nihil planè cernunt. Atque etiam si objectum tam sit exile, ut sensum movere nequeat, multominus efficitur sensatio, ut si sonus sit admodum exiguus. Item sensus omnes objectum aliquod habent peculiare; quod ab alio minimè percipitur: ut aspectus colorem: auditus sonum: gustus saporem: odoratus odorem: tactus qualitates omnes tactiles. Eodem quoque modo singuli organa propria habent, & media, quibus perficiantur: ut visus oculos, ac lucem: olfactus nares, & aërem: auditus aures, & aërem: gustus linguam, & salivam: tactus nervos toti corpori circumfusus, & carnem. Præterea nullus omnium sensuum aliorum formas comprehendere, præter sibi congruentes, potest: ut visus sonum, auditus colorem, gustus vocem. Et quoniam sensus qualitates corporum percipiunt, eaq; sunt inter se contrariæ, iidem quoque non modò objectorum formas, sed etiam eorum

eorum privationes percipiunt: ut visus colorem, & tenebras; auditus sonum, & absoum: sed non eodem modo: alterum enim movet, ut objecti forma, alterum ut privatio. Postremo quia imbecilla sensuum vis est, congruenti egent illi ad objecta percipienda intervallo per Hypothesin, ne si aut longius, quàm par sit, distent, minimè sentiantur: neve si propinquius, aut sensorio adempta, multò minùs. Addam hoc loco quæstionis ejus difficillimæ, inter Academicos, & alios controversæ, solutionem, verane sit sensuum comprehensio, an falsa: ut cum cernimus, audimus, tangimus, percipiatur ne id certò, ut est, an error aliquis lateat: quo decepti putemus id comprehendisse nos, quod non sit perceptum. Sententiam hanc Academici ab infirmitate humanæ cognitionis, & errore multis in rebus magno probare, ac tueri conantur. Contra sentiunt Peripatetici, qui aliqua etiam certò percipi posse contendunt, dummodo animo intento sensus rebus adhibeamus, ipsaque organa eorum apta, & objecto accommodata sint. Nam objectorum quidem comprehensio sensuum est propria, dijudicatio verò animæ. Quod si autem rectè, & aptè sensum intendamus, perceptio certa erit, nec eâ animus fallitur; si verò leviter, & quasi aliud agentes, non dubium est, quin per multi errores inde oriantur.

Verum

verum hac de quaestione alio loco copiosius. Præterea objectorum sensilium alia propria sunt sensus cuiusque: ut ea, de quibus hæcenus diximus: alia communia alijs. Propria sunt ea, quæ uno tantum sensu comprehenduntur: ut color aspectu sonus auditu. Communia, quæ tum duobus sensibus, tum pluribus capimus; ut motus, status, figura, numerus, magnitudo. Ad hæc sunt & peculiariora quedam alia sensuum singulorum, quod ad eorum rationem, & comprehensionem attinet: quæ nos supra exposuimus, nec hæc denudè repeti debent. Postremo sunt gradus quidam dignitatis in sensibus pro cuiusque sagacitate, ac præstantia. Nam tactus omnium hebetissimus, & crassissimus est: hunc proximè gustus sequitur, quo tamen est præstantior, quod qualitates alias occultas, præter eas, quæ sunt in corporibus apertæ, quasi elicit, nimirum sapores. Hos magno intervallo superat odoratus, qui vel semotatim rerum comprehendit, non odorem solum, sed etiam saporem. Omnium eorum sunt præstantissimi auditus, & visus: qui diversarum rerum imagines nullo contactu capiunt, & dijudicant: quorum eo major naturæ admirabilias est, quod ratione quadam, vix intelligibili pariuntur: & dum sonos, eorumque varietates comprehendimus, & dum res ob oculos positas ejusdem, cuius sunt, magnitudinis, formæ, & coloris,

loris, percipimus. Quæ omnia ut animantium perfectorum generi universo insunt, ita sunt in homine perfectiora, quoniam ratione, & intelligentiâ adjuvantur. Hæc ergo satis de sensibus externis sint: ad internos nunc progrediamur.

DE INTERNIS SENSIBVS,

AC PRIMO DE COMMUNI SENSU,

& imaginatione.

CAP. XIV.

EXternus sensus à nobis is supra dicebatur, qui ad aliquod extra corpus animalis positum objectum ferretur, cujusque imaginem perciperet. Internus verò, hîc nominatur cognoscendi vis quædam interna, cujus vi omnia dijudicantur externa. Hujusmodi esse aliquem in animalibus omnibus, præsertim perfectis, sensum, dubium non est: cum si sola rerum objecta percipienda essent, nec alia solertiori ratione dignoscerentur, magnus esset error in sensibus: cumque sensus facultates animæ quædam sint, ad comprehendendas imagines, non ad discernendas. Neq; enim cum videmus oculis, aut gustamus lingua, aut olfacimus naribus, colores, sapes, odores, discernimus: sed interiori vi aliâ, à qua omnes ij sensus proficiuntur. Nec etiam cum perceptarum imaginum à
sensi-

sensibus recordamur, easque cum rebus presentibus conferimus, & examinamus, id effici ab aliquo sensuum eorum, quos retulimus, existimandum est. Quapropter hanc vim tam sagacem in animalibus ab officio sentiendi diverso variatam in duos sensus interiores Plato dividit, & Aristoteles: nimirum in communem sensum, quem vocant *συναισθησις*, Latini autem visum, & in memoriam. Quos illi sensus tametsi objecto cognoscendi diversos, & actione esse putant, in una tamen anima sentiente ponunt, tanquam eiusdem vires proprias, sicuti aspectum, auditum, ac ceteros exteriores. De interiorum autem ipsorum sensuum partitione inter se Philosophi discrepant. Nam Aristoteles in libris de anima, & Plato in Timæo duos tantum statuunt, communem sensum, uti dixi, seu phantasiam, ac memoriam: alij vires animi exactius investigantes, tres faciunt, communem sensum, imaginationem, ac memoriam: alij his addunt aestimatricem facultatem, & imaginatricem, ab ea, quam phantasiam supra vocavi, differentes. Verum his partitionibus, quæ magnam afferunt difficultatem, ac tædium, omis-
 sis, teneamus tripartitam illam divisionem, quæ mihi brevior, & commodior esse videtur. neque enim ego à phantasia, (retineamus autem hoc nomen, ut usu fiat magis tritum) aestimatricem, aut imaginatricem discerno, quæ non re,
 sed

sed nomine videntur discrepare. Exordium itaque summam à communi sensu, qui externis esse vicinior videtur. Hic autem est animæ sentientis vis, quæ sensus omnes connectit, & colligit. Nam cum in ipsis, uti antè dixi, sensoriis rerum perceptarum dijudicatio non fiat, sed in alia quadam animæ facultate communiori: iidemque ab una sentiendi vi proficisci debeant, quæ in eadem anima una sit: sensum statuimus communem quasi centrum, ut ait Aristoteles, exteriorum sensuum: à quo iidem illi digressi diversa capiant objecta. Perspicuum, id est, ex essentia animorum, ac rerum aliarum, quæ dum subiecto suo insunt, unæ sunt: postea tamen, dum actiones varias exercent, ab unitate in multitudinem abeunt. Atque ita sensus communis in anima esse vis quædam sentiendi omnia tam similia, quàm cōtraria videtur: quatenus autem eadem variis corporum utitur organis, varios ædit sensus. Hæc enim est vis illa, quæ videre, audire, gustare, olfacere, ac tangere nos sentimus, quæque res etiam dissimiles eodem tempore comprehendimus. Quæ si in iisdem externis esse sensibus posset, nullo modo ab iis esset seorsum collocanda. Possem & aliis permultis argumentis docere, aliquem esse sensum communem in animantibus: Sed illa satis evidens ratio esse debet, quòd eodem tempore variarum rerum formæ à sensibus diversis precipi non possunt,

possunt, nisi prior eas aliquis alius, quasi per
aditus diversos extipiat, quodque ipsæ compre-
hensarum rerum imagines alicubi debent con-
necti, ut à phantasia examinentur: non tamen
in sensorijs ipsis existere, cum nihil agere, ac
pati eodem tempore, & eadem ratione queat.
Quibus rebus constitutis videamus, ubi nam
iste communis sensus existat, aut qualis sit,
quamque vim habeat in animalibus, quando
illum omnibus, quæ externis sensibus quinque
prædita sunt, esse oportet: cum nec iidem illi
dissipari, nec origine aliqua, ac principio carere
possint. Ergo omni sensum communem vim,
solum connectendi formas, à sensibus perce-
ptis habere constet, in anteriori capitis parte,
unde omnium etiam omni sensuum vires vi-
dentur, collocari necesse est. Nam cum oculis
videamus, audiamus auribus, olfaciamus nari-
bus, gustemus linguâ, tangamus toto corpore,
sensuum istorum imagines per nervos sensorios
ad anteriorem cerebri partem seu ventriculos
perferuntur, & occultâ quadam ratione, ab
eodem communi sensu connectuntur. Huic
verò non modò vim formas sensiles connecten-
di, sed etiam discernendi tribuimus: tum eo-
dem tempore conspecto colore, magnitudine,
odore, alijsque rerum formis, diversis eas in
rebus, aut diversæ naturæ esse, sensus commu-
nis dijudicat. Et quidem cum sensus nullus
perce-

percepisse se quicquam judicet, ut ratione ipsa docemur, tota hæc dijudicandi, & examinandi singula forma, prout sunt à sensibus comprehensa, in communi est sensu posita: qui, veluti in homine ratio, ita in omnibus est animantibus perfecto sensu præditis. Nec ideo in hominibus ille minus est, quod ij rationis sint participes, cum nec omnia statim, ab illis ratione recta æstimentur, sed prout fuerint comprehensa à sensu. Ex quo intelligitur, aliam esse vim æstimandi in homine sensibus adjunctam, quæ possit vel sine rationis judicio quicquam æstimare. Quæ ipsa, ut in hominibus rationis est experts, sic cæteris in animalibus quasi ratio quædam inest. His ita statutis, perspicuum est, sensum communem esse animæ sentiæ facultatem, in anteriori cerebri parte positam, quæ rerum sensu perceptarum imagines animalia concipiant, ac discernant. Transeo ad imaginationis vim explicandam: quam, ut antè retuli, à sensu communi Plato, & Aristoteles minime sejungunt, communi utranq; appellatione, phantasia, nominantes. Est verò imaginatio, facultas animæ sensitivæ, quæ imagines à communi sensu perceptas, diligenter examinat, & cogitat. Nam rebus à sensu communi temere, & confusè perceptis, ut hominis, equi, montis, arboris, civitatis, belli, cæterarumque huiusmodi rerum diversarum formis, imaginatio adest

continuò, quæ illas connectat, & componat, ordine adhibito, & unaquaque de re judicet separatim. Quapropter eam ut rationi viciniorem in media capitis parte, seu in medio cerebri ventriculo constituunt, tum quia formæ ab anteriori parte, in qua sensus communis est, eò delatæ diligentius examinantur, tum quia speciem ratiocinationis quandam illa habet. Ab hac omnes animalium cogitationes, judicia, ingenia, æstimatioq; proficiscitur, non modò rerum præsentium, sed absentium etiam. Nam sensus præsentium, cum sint rerum comprehensiores, ipsæ imaginationi, tanquam judici cuncta offerant, ipsa quidem & præsentia percipit, ac dijudicat, præterita colligit, & recolit, futura, præmeditatur, æstimat, excogitat, utilia quærit, vitæ incommoda, necessaria comparat, sibi consulit, breviter, quidquid in homine ratio efficit, hoc ipsum in animalibus phantasia, seu imaginatio. Quæ eadem, ut in homine ipso, rationis est experta, quemadmodum antea diximus, ita præstantior, quàm in cæteris omnibus, quoniam majora habet rationis vestigia. Cum ergo animales victum quærere, moveri, quò volunt, nidos, & latibula deligere, & extruere, adversaria, & nocua declinare, utilia inquirere, prolem suscipere, & amore illius tuendæ summo teneri, magno denique uti instinctu videmus, id ab imaginatione, seu phantasia proficisci dicimus.

Qua

Qua si illa sint destituta, nec lupos oves fugiant, nec formicæ in æstate frumenta congerant, nec apes mella, & favos, nec aves nidos sibi faciant, aut loca mutant pro temporum occasione, nec alia, quæ sine rationis vi magna fieri non possunt videntur, agant. Hæc eadem facultas in hominibus magis est perspicua, quàm in cæteris, rationique similior, ita tamen, ut expersejusdem sit, & fallax: ut in somno videre licet, in quo cum eadem sæpe vagetur libera, & soluta, res planè diversissimas, & turpissimas colligit, æstimat, cogitat, connectit. Verum hæc de re latius dicendum, cum de rationis vi differatur. Porro ut singuli sensus suas habent proprias imagines, quas perceperint, ut aspectus visibilia, tactus tactilia, & eodem modo reliqui: ita quoque phantasia, quam imaginandi vim in animo sitam, esse judicamus, sua habet visa, quæ Aristoteli *phantasmata* dicuntur: cujus generis sunt rerum omnium imagines, quæ animo obversantur, quæque se nobis passim offerunt, vel minùs cogitantibus. Et profectò, quia imaginatio sensitivæ animæ, quæ corpori adhæret, pars est, sicut hæc corporis naturam, ac temperationem sequitur, ita & illa. Nam cum animum sequi corporis temperationem dicimus, propter utriusque copulam, indeque mores huic similes oriri, id quidem de imaginatione dici putandum.

452 DE NATVRÆ
est, quæ corporis proclivitatem maximè am-
plectitur, quæque pro illius temperatione, ani-
malis format ingenium. Hinc quadam inge-
nio magis, & astutiâ valere cernimus, quia bili-
atra eorum corpus potissimum constat: ut ho-
mines melancholicos, qui multum imaginatio-
ne valent, & vulpes, & eiusmodi alia animalcula
ingeniosissima: alia stolidiora sunt, & hebetissi-
ma, ut oves, ac pecudes omnes: alia deniq; aliis
majori ingenij industria, & sagacitate prædita:
id quod animalium historias legenti fiet perspi-
cuum. Ex eadem hac animæ facultate ferè
omnes affectus animalium nascuntur: ut iræ,
amores, tristitiæ, iucunditates, furores, aliæque
generis eiusdem, de quibus est suo loco dicen-
dum. Atqui hæc satis de sensu communi, &
imaginatione.

DE MEMORIA, ET RECOR- datione.

CAP. XV.

SEQUITVR memoria, quæ tertia est sensuum
interiorum, quæque imaginationi præstò
adest, tanquam formarum sensu perceptarum,
conservatrix, & custos. Cum enim ad vitam ani-
malium tuendam, & ad ingenij solertiam non
satis sit formas præsentium rerum percipisse,
nisi eas etiam absentes retineamus, ut ex utroq;
quadam

quædam cognitio fiat : in hunc usum memoria est animantibus data , quæ perceptas imagines conservet. Quapropter eadem ab Speusippo, in libello de definitionibus , definitur animæ dispositio , inhaerentem illi veritatem custodiens : ab aliis autem sic. Memoria , est interna animi sentientis facultas , conceptarum rerum imagines conservans. Eadem enim tam in belluis , quàm in hominibus sentientis animæ pars est , quando in illis , cum ratione careant , perspicui , id est , in his verò non minùs : quia memoria sensilium rerum est propria , & eorum , quæ ab imaginatione cogitata sunt. Intelligibilia verò , si quæ contineat , accidentariò ea percipit , quatenus hæc ab imaginatione adjuvantur , non per se , cum & res in sensum , & imaginationem cadentes solum capiat. Ipsa præterea , memoria in postrema cerebri parte constituta est , ut experientia docet , cum læsâ capitis parte , quæ occiput dicitur , memoria sæpè imminuatur , aut penitus tollatur. Nec id est etiam à ratione alienum , cum post perceptas res à sensibus , & à communi sensu , atq; imaginatione connexas , ac dijudicatas , id efficiat memoria , quòd illa in se retinet , & conservat. Atq; ut illæ duæ animæ facultates in prima , & media cerebri parte esse dicuntur , quò suo possint officio uti commodiùs , ita hæc longiùs ab illis distita , & in abdito quasi posita , & occultata est , ut commissas retineat imagines.

Objectum memoriae est, quidquid in sensum, aut imaginationem cadit, vel omne id, quod sensu est comprehensum. Nam futurorum quidem in animalibus alijs imaginatio, in homine verò mens saepe esse praesaga, & cōiectatrix solet: praesentium verò sensus duntaxat capaces sunt: at memoria praeteritorum est solum, quando praeteritorum recordari, non ea sentire, aut imaginari dicimur, ut à Platone in Timæo eleganter, & ab Aristotele in lib. de memoria, & recordatione monemur. Idcirco ad rerum memoriam efficiendam necesse est, tempus interponi aliquod inter sensum comprehensionem, & ejus in mentem revocationem. Ita enim fit, ut cum recordari volumus, praeterita recolamus, & quae prius sensu percepimus, refricemus. Ratio verò recordandi communis est, & eadem ferè omnibus: in qua id solum postulatur, ut quae antè vidisse nos, audisse, olfecisse, aut sensu alio cepisse contingat, intento animo in mentem revocemus. Quae animi vis necessaria cum sit, & ad sensus conservandos, & ad rerum multarum notitiam, animantibus ferè omnibus tributa est, quaecunque sensuum, & temporis notitiam habent. Nam & aves in mutandis regionibus tempora observantes habent sine dubio aliquam loci, ac temporis memoriam: eodemque modo quadrupedes, ac caetera omnia perfecta animalia, paucis fortasse exceptis, quorum natura nobis

nobis ignorata, & obscura est. Habent eandem homines memorandi vim cum brutis animalibus, sed acutiorem, utpote, quæ rationi sit adjuncta: siquidem bruta id solum nesciunt, se quicquam modò invenire, aut invenisse olim: at homines non solum recordantur ejusce rei, sed sciunt etiam se recordari. Atque ex ipsis etiam hominibus, ac brutis animantibus quidam majori sunt memoria, quam alij ob corporis temperationem diversam. Siquidem qui temperato sunt cerebro, id est, nec frigido, nec humido, nec sicco admodum, magnam habent memorandi vim: qui verò humido nimis, perfacilem eam quidem in percipiendo, sed labilem: qui vero sicco, aut frigido, difficilem in capiendo, tenacissimam tamen. Quarum rerum indicia sunt manifesta in capite, fronte, capilitio, naso, alijsq; partibus, ut doctè, & acutè docet Galenus, & Aristoteles. Hujus porro facultatis magnum est in animalibus discrimen. nam aut memoria rerum est sensu perceptarum, aut earum, quæ cogitatione, & indagatione mentis comprehenduntur: illa quidem communis est & hominibus, & belluis: hæc hominum propria dumtaxat: quando ut intelligentia unum cadit in hominem, ita rerum intellectarum recordatio ejusdem est propria. Vtraq; tamen facultas in omnibus ex æquo esse sine imaginatione non potest. Nam cum sensilium, & in

imaginationem cadentium memoria per se ipsa recordatur, uti antea diximus, tamen intelligibilium recordatur accidentariò, quatenus ne hoc quidem sine imaginationis adiumento fieri potest. Itaque res intelligibiles cogitari, & in imaginatione obversari debent, ut memoria eas concipiat: quæ nihil nisi per illam tanquam per aditum admittit. Quo nomine ad memoriam vis plurimum imaginationis confert; quæ, cum pro ætate animalis, modò validior, modò infirmior existat, ita memoria variatur, præsertim quia corporis temperatio diversa est: quam non modò ipsa sequitur memoria, sed imaginatio, quemadmodum supra docuimus. Ita quosdam felicissimâ memoriâ esse videmus, alios infelici, alios mediocri, alios facili ad percipiendum, sed labili, alios variâ, alios difficili, sed retentrice, alios rerum, alios verborum, alios denique aliarum rerum recordatione magnâ vigentes. Quorum omnium, ut antè dicere incœpi, causa est, Galeno auctore, cerebri temperatio: quæ sicca si sit, res difficilè comprehendit: diu tamen retinet, ut in senibus; si humecta, facilè, sed ægrè conservat, ut in iuvenibus; si frigida nihil planè, aut parum capit; si calida, & moderata, felix est. Itaq; in cerebri natura vis hæc memorandi, & varietas posita est, si Galeno credimus, non in corde; quod falsò putat Aristoteles, quia, vel illo frigido existente, homines

homines valere cernimus memoria, ut melancholicos; frigido verò cerebro neminem: itemque læso cerebro, lædi etiam memoriam, eoque curato, refarciri, id quod in lib. de locis affectis eleganter idem docet Galenus. Ergo ut sigillo quamcunque imaginem in cera, aliave materia imprimamus tum facile, tum difficile, pro ut materies ipsa fuerit subjecta: ita in cerebro tanquam sigillum sic imaginatio rerum formas sculpsit, & recondit. Ex quo patet, ad insigendam memoria res imaginationem visa sive phantasmata conjunxisse, distinxisse, & perpendisse diligenter prius debere, tum memoriam illa recipere tanquam, ut afferrentur, & retineantur, sibi commissa: ut cum imaginatio in brutis, vel mens in homine illa quasi reposcat, tum ipsa memoria reddat statim. Ideò fit, ut rerum præteritarum tam multæ nobis formæ, & animalibus brutis in animo versentur, quia eas imaginatio, quæ nunquam quiescit, evolvit, & educit, mens in homine ab illa quasi per manus accipit. Quæ ex evolutione, atque educatione memoria uti aut recordari dicimur, quasi res memoriæ prius mandatas explicare, & producere imaginationis vi: quæ & ipsas memoriæ mandat, & cum opus est, repetit. Ob hanc imaginationis, & memoriæ connexionem tam arctam sæpe multi eorum, quæ fuerint aliquando imaginari, recordari se putant, ut de Antiphe-

xonte Oreta narrat Aristoteles : qui ob ingenij acumen, quæ fuerant eius animo aliquando obversata, tanquam certa, & gesta recenserebat. Cuius rei causa est, quod ea, quæ verè imagines non sunt, pro veris imaginamur: ut si quis inani meditatione quid egisset, aut quo pacto fecisset hoc, vel illud cogitans, vel ea, quæ certa sunt, ut dubia accipiens, eorum postea recordetur : quia memoria, quidquid phantasia cogitat, excipit: recordari se eorum putabit, quæ minimè aut fecit, aut egit. Contraria huic affectio est, cum quis meminit alicuius rei, cuius aliquando nesciat se meminisse, ut si audiisse me orationem cuiusquam eveniat, pauloque post ferè oblitus, audiisse me illum recorder, dubius tamen sim, audierim ne aliquando, an non: dubitatio est igitur magna, num audierim. Cuius item rei causa est, quod memoria vel est labilis, vel non admodum intento animo rem comprehendimus, ut eius firmam teneamus recordationem. Oritur hinc alia questio, num eorum, quæ percipimus, recordemur, an eius objecti, unde illa percepta sunt: veluti si conspecto prius leone, recordetur eius postea quisquam, habeatne in memoria leonis ipsius vivi imaginem, an imaginis conceptæ recordationē. Cuius sanè questionis perfacilis est dissolutio: cum sensus, & imaginatio solam rerum imaginem, ut antè diximus, à materia separatam comprehendat, huiusque imaginis

imaginis conservatio fiat in memoria, ita tamen ut ratio subjecti habeatur, à quo illa imago desumpta est. Verùm hæc satis de memoria: veniamus ad recordationem, quam Græci ἀνάμνησις, nonnulli reminiscētiam appellant. Hæc minimè differt à memoria, velut diversa animæ facultas, nec in ipsa percipiendi, retinendique ratione, sed in renovatione quadam eorum, quæ partim oblitterata sunt. Nam aut ea, quæ percipimus, firmiter retinemus, aut obliiti penitus sumus, aut partim recordamur, partim obliviscimur. Quorum firmiter recordamur, est memoria: quorum obliiti sumus, oblivio: quorum deniq; partim sumus obliiti, partim meminimus, recordatio. Quocirca media est inter memoriam, & oblivionem recordatio, quasi renovatio quadam eorum, quæ partim exciderāt memoria, partim vestigia quædā oblitterata ferè reliquerant: veluti si vidisse se quisquam recorderetur Cæsaris, aut Pompei imaginem, nesciat tamen cuius modi formæ illa fuerit, aut quo in loco viderit: si conjectando, ratiocinando, colligendoq; tempus, locum, personam, aliaque adjuncta, memoriam refricet, & notitiam rei menti prius insitam renovet, recordari, aut reminisci dicetur. Quam quidem ad rem necessaria omninò est mentis, ac rationis inductio, quæ id, quod fieri ab imaginatione non poterat, faciat, & oblitterata quodāmodò recolat. Nam è loci, temporis,

poris, situs, personæ, aliarumque huiusmodi circumstantiarum conjectatione in memoriam rei penè oblitæ venire, id proprium rationis est: & idcirco hominis solum est recordatio, non aliorum animalium, quæ cum ratiocinandi vi careant, recordatione etiam careant, necesse est, Ex ipsis etiam hominibus, qui iudicio magis valent, imbecilliori esse solent memoriâ, quàm ij, qui hac pollent, quoniam illi ad percipiendum faciles, & apti sunt, id quod iudicij quidem est magni, labilis tamen memoriæ: hi verò ad retinendum apti cum sint, inepti tamen ad percipiendum sunt, ideoq; minùs valent ingenio. Quamobrem recordatio ut fiat, memoriâ, imaginationem, inductionemque animi adhiberi oportet, quæ vestigia illa imaginis collapsæ clariùs exprimant, & renovent. Modus autem reminiscendi unus est, & idem omnibus, quod ad animi ratiocinationem attinet, cum omnes pariter ratiocinando, & inducendo recordentur: quod autem ad causas, & principia recordationis eliciendæ, diversus, & cuiusque ingenio accommodatus. Nam alij ex oblitterato penè rerum principio in memoriam alicujus veniunt per aliud: ut qui audita Cythara in musicæ recordationem veniunt: indeq; ad Orphei, aut Lini artem, de qua priùs legit: alij ex aliquo ejusce rei, cujus recordantur, principio: ut si retentâ memoriâ loci, meminerint ejus, quod

quod actum in eo sit: alij è dissimilium collatione: alij ex similibus: alij ex propinquis circumstantijs, & adjacentibus. Itaque semper, ut recordemur, necesse est, medio aliquo uti tanquam syllogismi, quo in memoriam oblitz rei veniamus. Quamobrem multum conducit rerum, quæ memoriæ mandantur distinctio, ordo discendi, firma rerum comprehensio, consuetudo frequens cogitandi, imaginationis vis acris, aliaque generis ejusdem, quæ recordationem adjuvant mirum in modum. Vnde memorandi ars effecta est, quæ locis quibusdam, & signis, aut nominibus certis constat: ex quorum recordationem, memoria sæpè renovatur. Sed ex omnibus tamen ejus artis præceptis, quæcunque illa sint, nullum est verius, quàm ut corporis, atque adeò cerebri temperationi consulatur, quod ad cibos, victumque attinet, & ad exercitationem corporis: quibus cerebrum purgatur è multis pravis vaporibus: tum ut ordinem, ac rationem certam, & distinctionem eorum, quæ didiscimus, observemus. Hactenus igitur de memoria, & recordatione.

DE SOMNO, VIGILIA, INSOM-
niis, divinatione ex somnio.

CAP. XVI

AD DAM ad extremum tractationis de sen-
sitivæ animæ facultate explanationem, cau-
sasque somni, vigiliæ, insomniorum, ac divina-
tionis eius, quæ fieri per somnia dicitur: non
solum quia hæc sensitivæ animæ propria sunt,
sed etiâ quia omnibus insunt animalibus, quæ-
cunque sensus, ac vitæ sunt participia. Nam si
sensus illis quasi ad munera obæda accommo-
dati sunt, & quietem etiam aliquam ut vacatio-
nem eorum dari oportet, quâ perpetuo à labore
resciantur per 6. Hypothésin. Hoc in studiosis
hominibus, aut alicui rei mirum in modum in-
tentis perspicuum est, quos in morbos gravissi-
mos incidisse, aut ad insaniam redactos, vide-
mus, quod nullâ fuerint sensuum quietem, ac
feriatione usi. Qua quidem ex re intelligitur,
quis auctori Deo fuerit finis tribuendi animan-
tibus somni, cum si illa perpetuâ uterentur vi-
giliâ, nec vivere possent, nec vires sensuum ca-
piendis rerum imaginibus pares haberent: cum
nec alicui rei diu intenta esse nequirent. Sed
antequam de somno ipso quicquam edisseram,
videndum est, cuius sit ille proprius, animine,
an corporis. Plato quidem in Timæo, & Aristot-
eles

oteles in libello de somno, & vigilia in universo animali somnum statuunt, ita ut neque proprius is animi sit, neque corporis. Nam si animi sentientis, ut antè dixi, facultas communis est toti animali, & somnus etiam, qui ad illius quietem institutus est, eidem ipsi erit communis. Quia si vigilia, quæ somni contraria est, in sensuum actione consistit, somnus item ei adversus in illorum feriacione consistat, oportet. Ad eandem enim corporis partem, & animi vim, ut ait Aristoteles, utraque res pertinet: nec incidere in diversas poterit, cum & origine, & fine pariter somnus, ac vigilia congruant: origine nimirum, quatenus à sentiente anima fiunt, sive, quatenus ad quietem, actionemve animalis spectant. Ipse autem somnus, ac vigilia actiones animæ sunt, non vires, ut sensus, imaginatio, aut memoria: idè neque corporum omnium vita præditorum sunt, sed animalium duntaxat. Nam stirpes, lapides, metalla etsi vitam habent, somno tamen non utuntur, quia nec sensibus. Zoophyta etiam dormiant, nec ne, obscurum est, & ignoratum, nisi longâ observatione comperitum sit. His ergo exceptis, reliqua animantia tam terrestria, quàm aquatilia, & volucra somni, & vigiliæ participia sunt. Est verò somnus (nā de vigilia postea dicemus) ut Aristoteles definit, affectio quædam sensitivæ facultatis, quæ
sensibus

sensibus consopitis, animal quiescit. Etenim cum, sensibus omnibus laxatis, animalis corpus quasi mortuum jacet, nec movetur, somnus obrepit. Itaque sensus omnes, excepta phantasia, quae libera tunc vagatur, colligantur, ne animal quicquam videre, audire, olfacere, gustare, aut tangere ullo modo possit. Atque hujus sane soporis, & immobilitatis causa potissima est, quod tactus, & communis sensus, qui radix est aliorum, sopiuntur. Nam communi sensu ligato, & exteriores omnes una colligantur. Tactus etiam, qui primus, & hebetissimus est in animalibus consopito, corpus universum immobile, & sensus expers redditur. Unde somni sedes in cerebro est, non in corde, ut Aristoteles existimat: siquidem sensus à cerebro oriri antè dictum est. Quod si autem feriatio sensuum est somnus, & ij in cerebro sunt, somnus etiam ibidem ponatur, necesse est. Quod ipsum experientia docet manifestò, cum gravato quocunque modo cerebro, somnus obrepat, vel corde minimè refrigerato; ut in ebrietate, in qua cor non calefcere maximè non potest vini calore; somnus tamen fit, quia vapor vini cerebrum offuscat. Ergo non cordis refrigeratio, sed cerebri, somni est causa, nec cor ejus est sedes, sed cerebrum. Iam verò somnus, ut ejus effectiorem exponamus, hoc modo gignitur, Galeno auctore. Cum naturalis animantium calor

calor aut fatigatione, aut nimia siccitate ad alimentum sese conficiendum convertit, aut ob nimiam humiditatem prodire foras, & ad omnes partes corporis diffundi nequit, vapores multi humecti ex stomacho excitantur: qui ad cerebrum per meatus occultos ascendentes spiritus sensuum, ac motus cohibent, ac nervos proinde, per quos illi commeant: quo facto corpus sine sensu, ac sine motu jacet consopitum. Itaque potissima efficiendi somni causa est humor, ut in pueris, ebrijs, & pituitosis hominibus patet. Contra in senibus, melancholicis, & sicci cerebri hominibus exiguus est ille, quia humore ij carent congruenti. Hinc ergo perspicuum est, somni causam efficietem humorem esse, sive frigidum, sive calidum, (sed frigidus tamen majorem gignit soporem quo calorem intra ventriculum cogente, cerebrum humectatur, & somnus obrepit: formam vero, modumque illius refrigerationem, & humectationem spirituum animalium, qui ad sensuum organa digrediuntur: quibus cohibitis intra cerebrum, & sensus consopiantur, & animal jacet immotum: sedem præterea cerebrum, quo ab stomachi vaporibus offuscato, somnus efficitur, non cor, ut putat Aristoteles: in cujus refrigeratione somnum constituit: quod eo, tanquam sensuum principio refrigerato, sensus cohibeantur, ac somnus fiat: mueria vero vapores esse ab stomacho

ad cerebrum ascendentes, quibus ipsum humectatur, & spiritus cohibentur: finem denique animalis commoditatem, & salutem, ut sensus requiescant, & ut corporis vegetatio commodè fiat. Quoniam autem efficiendi somni præcipuam in humore causam ponimus, intelligendum est anima, omne ita esse à Deo conditum ut unà cum sensu vim pariter alendi, vegetandi; sese acceperit. Quod ipsum fit calore in ventriculū recepto, quò cibos coquere, & conficere possit facilius: siquidem è postrema ciborum coctione alimentum animalis fit, ut antè docuimus. Hanc ob causam cunctis animantibus somnus, noctu præcipuè obrepit, quia eo tempore magna est aëris humiditas, quæ cerebrum offuscat: tum quia tempus illud quieti animalium est aptissimum, item quia accepti in stomachum cibi tunc possunt commodè confici, & in alimentum converti. Eò fit, ut quandiu se calor in ventriculū recipit, cibosque ibi coniectos decoquit, animal somno correptum jaceat: quia dum reliqua membra destituta calore sunt, totus cordis calor ventriculo intentus est, ad alimentum perficiendum, gignendumque in jecore sanguinem, indeque ad reliquas partes corporis dividendum. Hoc facto, animal excitatur, quia peractâ nutritione, calor ad artus omnes diffunditur, sicque animal, quasi stimulis quibusdam expergitur. Atque etiam altrix
facul-

facultas, cum corpori alendo intenta sit semper, & dum vigilamus, & dum aliud quicquam agimus, tamen noctu inter dormiendum multò magis viget: quia calor omnis, qui motum, sensumque corpori divisus afferebat, per somnum in stomachum receptus, ad eam juvandam se convertit. Vnde etiam videmus dormientes cibos concoquere citius, quàm vigilantes. Cum denique animal membris refrigeratis laxari, & quiescere videmus, caloremque in stomachum recepto vapores multos excitari, qui sursum, ac deorsum, eurypi more, ad cerebrum ascendant, idemque obtenebrent: tum demum consopiri incipit. Quæ res efficit, ut corpus quasi emortuum jaceat, & immobile consistat. Iacent quidem homines, quia soli ex animantium omnium genere recti stant, propter calorem nimium membrorum: quo recepto in ventriculum, incumbunt: stant verò, aut adhærent alicui rei dormientes reliquæ animantes, quia in terram pronæ sunt. Videre est etiam in somno, ut singula sensuum instrumenta frigescant animali spiritu destituta, utque motu, & sensu omni priventur, veluti oculi, aures, nares, lingua, manus, totum denique animalis corpus. Addubitet hîc fortasse quisquam, num somnus refrigeratio quædam cum sit, è frigiditate nascatur, an à calore: certè calor in stomachum receptus somni.

est causa potissima: accidentaria verò, humiditas vaporum cerebrum offendens. Frigiditas quoque quodammodo causa est, quatenus calorem per se refrigerat, & cogit: ut ex ciborum frigidorum, & humectorum esu evenit, qui somnum inducunt homines etiam pingues, & quæ venas habent reconditas somniculosi sunt eandem ob causam, quia indicium frigiditatis est, eas recondi, ut caloris ipsas eminere. Itemque qui contemplationi intenti sunt, aut cogitationi alicui vehementi, obdormiscunt, quia calore in cerebrum recepto, crassi ex stomacho, & malè cocti vapores ob malam coctionem efferuntur, qui somnum inducant. Atqui hæc satis de somno: cui vigilia contraria est: quæ nihil est aliud, quàm sensuum actio, & corporis motus, quæ calor per omnia membra corporis diffusus efficit. Tandem de insomniis, & eorum causis disseramus: quorum perspicua erit explicatio, si probè causam somni teneamus. Quemadmodum à sensitiva facultate somnus, ut affectus quidam, oritur, sic ab eodem somno insomnium. Est autem idem, non opinio, aut comprehensio rei alicuius, aut, visum, seu phantasma, cum nihil horum sine sensu fiat: qui tunc temporis consopitus est: sed imago quædam in cerebro obversans, quam imaginatio à memoria eductam agitat. Nam cum memoria, ut suprà dictum est, rerum sensu captarum

rum formas contineat, atq; imaginatio in somnis libera vagetur, hæc quidem ut vaga, & dissoluta est, illas temere à memoria delumit, & agit. Cumq; cerebri spiritus exhibiti sunt stomachi vaporibus, iidem formas easdem versant, ita ut novæ aliæ comprehensiones sensuum videantur. Ideoque id somnij proprium est, quod vera esse illa putantur, quæ dormientes imaginantur. Hujus porro causa idem ille vapor est, qui somni. Nam hic, spiritu animali intra cerebrum coacto, formas rerum sensibus perceptarum tum memoriæ, tum sensorii, ut Aristoteles vult, inhærentes excipit: quæ ab imaginatione motæ sursum, ac deorsum varia ædunt visa, quæ animo quiescentibus obversantur, tanquam certa, & explorata. In ipsis autem insomniis magna est perturbatio, & confusio propter imaginum varietatem, & imaginationis celeritatem. Cum enim hæc temere, utpote rationis expers, diversas formas colligat, & confundat: ut leonis, mentis Romæ, Neronis, maris, stirpium, aliarumque rerum omnino dissimilium: diversissima sunt insomnia, eaque ferè semper formis rerum conceptarum similia. Nam qui de Roma, Neapoli quidquam legit, fuisse se aliquando ibi somniat: qui de mari, navigasse: qui de elephante vidisse. Cui rei accedit corporis constitutio, victus ratio, & ætas, consuetudo, institutio, humorumque

in ventriculo, innatantium natura. Si quidem melancholici horribilia habent insomnia, propter atræ bilis naturam frigidam, & siccam, quæ timidos reddit homines, & cogitabundos: sanguinei volare sese, aut in montes excelsos ascendere sibi videntur: biliosi ardere, pugnare, rixari, incendia, & contentiones videre, aliaque generis ejusdem, quæ biliosorum propria sunt: pituitosi fluminibus immergi, natare, è fontibus haurire aquam. Præterea qui studijs dediti sunt, de literis, de quæ ijs, quæ legerint, aut disputarint, somniant: qui mercaturæ, de mercibus: quam militiæ de pugnis, & obsidionibus, expugnationibusque urbium, Demum qualis natura corporis, aut vitæ negocia, & actiones fuerint cujusque, talia etiam erunt in somnia. Vt autem fieri insomnia possint, neque altissimo sopore esse debemus sepulti, quoniam spiritibus cerebri omnino ligatis, & imaginatione impedita, nihil somniamus: neque etiam irrequietum somnum agere oportet, cum propter exiguam humiditatem, quæ cerebrum offuscare planè nequit, quies commoda non sit. Quo nomine pacatam esse quandam in somno quietem, necesse est, ut spirituum adjumento imaginatio rerum formas è memoria, sensorijsq;eductas agitet, & insomnia pariat. Atq; ut animalia pleraq; somni sunt, & vigiliæ capacia, ita etiam insomniorum, quæ à somno proficiuntur.

gur. Id in canibus, equis, pecudibus, alijsq; mul-
 tis cernimus, quorum inter dormiendum in-
 somnia manifesta sunt, aut ex motu, aut ex gestu
 alio corporis diverso: quò perturbata ab imagi-
 natione incitantur. Multum ab his distant ho-
 minum insomnia: quæ tamen ab imaginatio-
 ne oriuntur, ratione tamen cohiberi maxime
 possunt: id quod dormientibus aliquando sua-
 vi somno evenire solet, ut cum turpibus insom-
 nijs efferantur, assentiri ijs, aut dissentire posse
 liberè videntur. Contra fit, cum gravato cibus,
 aut potionibus corpore, discedimus cubitum:
 gravia enim, & turbida tunc somnia obverfan-
 tur, quæ crassissimorum vaporum copia gignit.
 Neq; huic rei obstat, quòd à cibo statim anima-
 lia non somnient: cum illud temporis spacium
 interjectum ob agitationem ex alimenti calore
 factam paulisper somnum cohibeat, non tamen
 planè tollat, quin deinceps, agitatione sedata,
 idem exoriat. Eandem forè ob causam nec
 pueri, nec viri quidam tota virà, aut serò ad
 modum somniasse feruntur, quia his multus ab
 stomacho fluxus halituum ascendit, qui motio-
 nes excitet multas, insomnium autem nullum.
 Ergo, ut dicendi modum faciam, sciendum est,
 in sensorijs motiones quasdam sensuum non
 minus remanere, quam in memoria. Quas,
 dum levi somno & suavi corpus requiescit, ima-
 ginatio revolvit, & agit, adjuvante nimirum

animali spiritu cerebri: indeque varia adit insomnia, pro corporis natura, aut ingenio animalis. Quæ eadem paulatim excitata magis, minulve inculpuntur in memoria, prout intentus iis animus fuerit. Et quemadmodum in fluminibus, vertigine aliqua facta, multi, ac sensim dehiscentes orbes apparent: quorum alij ampliores aliis fiunt: ita in cerebro variæ illæ formæ ab imaginatione eductæ, modo magis, modo minus inhaerentes, & expressæ firmitus memoriæ inculpuntur: adeo ut insomniorum post quietem sæpe recordermur. Atqui hæc de re satis dixisse videor, ne singula quæque persequar minutula. Reliquum est, ut de illa divinatione, quæ per somnium fieri putatur, edisseram. Esse aliquam divinationem inter homines & argumentis, & exemplis multis docere in primo libro, ea de rescripto, Cicero contendit, alique multi philosophi, ut Plato, & Stoici omnes. Aristoteles in lib. de divinatione per somnium, nullo modo eam admittit: quoniam siquid forte, quod aliquando, somniaverimus, eveniat, id temere evenisse inquit, non quod ulla in eo divinandi vis fuerit. Ergo & somniorum genera omnia complectitur, nullumq; probat, aut provenire à Deo posse, quando vel bruta animalia somnient, aut eventurum aliquid significare, cum vel fortuito id fiat, vel quia, ut Plutarchus alibi refert, per instinctum quon-

quendam lymphaticum, perque somnia saltem
 fiant, quatenus aliquid divini habet immorta-
 lis pars animi humani, sive mens. Verum nos,
 religione Christiana edocti, esse aliquam divi-
 nationem per somnium, quæ à Deo immittat-
 ur, fatemur: qualem fuisse Iacobi, Iosephi, Da-
 nielis, & aliorum virorum sanctissimorum, sa-
 cræ literæ testantur. Divinationem verò illam,
 quæ naturæ quodam instinctu, aut rationalis
 animi curis vacui, liberiq; vi fiat, planè tollimus,
 cum ne vigilans quidem homo futura prænosse
 possit, ne dum somnians. Quapropter Aristote-
 lis quidem sententia probanda est, quatenus nul-
 lam divinationem ex somniis evenientem ad-
 mittit: rejiciendam, quatenus omnem divinan-
 di tollere occasionem videtur, cum Deus priva-
 to quodam consilio viris optimis insomniis di-
 vinare sæpe permiserit. In tota hac disputatione
 de somni, insomnij, & divinationis causis, &
 effectione parum est inter Platonem, & Ari-
 stotelem discriminis. Nam & Plato in Timæo,
 cum de oculorum usu sermonem habeat, som-
 ni, ac somniorum causas breviter reddit, his ver-
 bis. Idcirco videre desinit, ac somnium inducit.
 Etenim salubria palpebrarum integumentum
 dii oculis machinati sunt. Nota sunt reliqua
 verba, in quibus idem, quod Aristoteles, Plato
 sensit, ut superiori extractione, & commen-
 tarius nostris liquet. Idem quoque in eodem

dialogo cum de jecoris, ac lienis situ, atque usu loquatur, divinationem confirmat. ita tamen ut eam à Dæmonibus mitti nobis existimet tranquillè dormientibus. A quo mihi Aristoteles minimè videtur dissentire, ut antè admonui. Sedem porro divinationis, in illa jecoris, & lienis capacitate, Plato idem statuit, quòd ab anima appetitoria oriri eadem videatur. Qua de re nihil Aristoteles affert, cur cum illo debeat conferri cætera perspicua sunt, & nullà explanatione indigentia.

DE APPETITORIÆ ANI- mæ facultate.

CAP. XVII

SAtis, ut ego quidem arbitror, sentientis animæ facultas, & eius partium ratio explanata est: sequitur, ut de tertia illius parte, quæ ἐνθυμητικὴ Græcis, Latinis, novo quidem, sed necessario nomine appetitoria nominatur, edisseram. Hæc una cum sensibus animalium generi universo arctissimè connexa est, adeò, ut si sentiens sit animal, appetitoria esse vi præditum ipsum, necesse sit. Et quanquam supra de animæ altricis facultate differentes, appetitum ei quendam cibi, & conservationis adiunximus: ille tamen proprius eiusdem non est, sed alterius communioris, quæ non modò altricem ad ipsam,

ad ipsam, sed ad omnes alias animi vires pertinet. Nam & sensitivæ, & rationali, & motrici appetitum adjungimus, nulloque modo animal sine illo vivere, aut conservari potest. Ergo si quid sensus est particeps, appetitionis est etiam, ac proinde facultatis illius, unde hæc nascitur appetitio. Sed inquiramus, quid hæc eadem sit appetendi facultas: nam postea de illius actionibus, ac viribus differemus. Est igitur appetitoria animæ vis ea, quæ animal ad aliquid expetendum, fugiendumve impellit: ut stirpes, & alia quæ vita, uti supra diximus, constant, appetunt quidem pastum, & sui conservationem. Sed illa appetitionis forma communis est omnibus rebus, ideoque hoc loco prætermittatur. Animalia item omnia dum aliquid sensu comprehendunt, quod imaginatio perspexerit, ac dijudicarit, vel eius cupiditate ducuntur, vel offensione deterrentur: cupiditas appetitio, offensio fuga dicitur, & utrunque ab appetitoria anima nascitur, quatenus ea in expetendo bono, aut malo fugiendo æquæ cupiditate trahitur: siquidem bonum pari ratione cupimus, & dum per se expetitur, & dum malum fugitur. Hæc eadem animi facultas à Platone, Galeno, atque aliis in jecore collocatur, quoniam ex eo cupiditates omnes oriri censent, ut latè disputat in Timæo Plato. Aristoteles verò, qui nullam animi virium fecisse certam sedem videtur
lib. 3.

lib. 3. de animo omnibus partibus appetitoriam adjunxit: ut rationali, altrici, atque motrici. Idem in libris Ethicorum duplicem animi vim ponit, unam rationis participem, ut mentem, & intelligentiam, de qua postea suo loco: alteram expertem: cujus duas etiam facit partes, unam rationi obtemperantem, alteram non obtemperantem: illius speciem esse inquit temerarium quendam animalium impetum, quo sine ratione incitantur: hujus rursus duas affert partes, appetitoriam, & irascibilem: quarum illam in corde Plato, hanc in jecore statuit. Ergo sola in partium enumeratione philosophi hi differunt, non re ipsâ: cum uterque appetitoriam facultatem à ratione diversam, ei tamen tum obtemperantem, tum obsistentem subijciat: cumque hanc ex animi, & corporis copula oriri censeat, itaque propriam esse animantis totius dicat, non alterius partis tantummodo. Verum tamen collatione hâc sententiarum omisâ, quæ supra à me repetita, & in commentarijs in Timæum relata est, ad nostræ hujus sententiæ explicationem deveniam. Est igitur appetitoria, uti paulò antè dicebam, facultas illa animantis, quæ quidquam appetit ad sui conservationem, vel fugit, ac declinat eandem ob causam. Hanc etsi stirpibus inesse, quatenus cibum, & sui conservationem appetunt, diximus, ab ijs tamen separantes in solis animalibus

bus sensu præditis ponimus, quoniam à bono ipsa moventur: bonique cognitio in sentientibus est tantum, non in viventibus. Nam appetitoria quidem facultas bono tanquam objectio proprio illicitur: ut colore aspectus, sono auditus. ea verò animal ad illud ipsum incitat: ex quo non modo corporis motus, sed varietiam alij appetitus nascuntur. Eadem ipsa quaquam à Platone in jecore ponatur, universo tamen, ut ait Aristoteles, corpori unà cum anima fusa est, cum non esculenta solum, & poculenta expectamus: quod jecoris est proprium: sed opes, honores, divitias, scientiam aliaque hujus generis, aut bona, aut eorum speciem habentia. Quocirca toti animali est communis, non alteri tantum, illius, parti: siquidem corpus, quatenus animam constat, appetendi vi præditum est, non per se ipsum, aut illa duntaxat. Vim hanc appetendi omnibus in animalibus imaginatio comitatur, quæ appetitus omnes excitat: sed ea tamen in brutis rationis expers cum sit, in homine verò rationi adjuncta, diversa in excitandis iisdem habet rationem. Nam in brutis perturbatas, & planè belluinas ædit appetitiones, quatenus eadem rei cupiditate ducta efficit, ut belluæ impetu, ac vi quadam naturæ raptantur: idque quod præsens est duntaxat, considerent. at in hominibus ipsa opinione, ac iudicio aliquo utitur, in exsequendis ijs, quæ sese

offe-

offerunt. Ex huiusmodi appetendi varietate, ac ratione tres appetitoriae animae partes oriuntur, una, quæ, quoniam facultati Altrici annexa est, appetitio vegetationis, seu naturalis impetus, quo se omnia viventia conservari, & ali cupiunt, appellatur: de qua hîc differere non opus est: Altera, quæ, quia cunctis inest sentientibus, sensitiva dici potest. Quæ ipsa quia vitæ & cultui animalium accommodata est, vel tactui adhæret, (qui solum necessitate quâdam ad vitam est datus animalibus) vel aliis etiam sensibus, qui ad ornatum, & cultum potius sî ectant. Ac si tactui quidem ea adhæreat, voluptatem, ac dolorem gignit: qui affectus proprii eius sensus sunt, ut in Timæo Plato vult, & Aristoteles: si verò alijs sensibus, præter ipsum tactum, motus ædit quosdam in corde, quibus animal incitatum, aut bonum persequitur, aut malum declinat. Ex quo vis omnium affectionum oritur, non tam in hominibus, quàm in brutis animantibus. Tertia pars est ea, quæ quia hominis est propria, rationalis appellatur cupiditas, seu voluntas: neque enim voluntas est aliud, quàm appetendi facultas cum ratione conjuncta. Sed quoniam de hac postea suo loco differemus, ac de prima appetitoriae parte antea diximus, superest, ut de secunda nunc differamus, itemque de affectibus, qui ab illa omnes oriuntur. Sensitivam animæ appetitoriae vim rationis expertem Plato in Timæo,

mæo, & Aristoteles in Ethicis appellant, quod à rationali parte diversa sit, quodq; impetus ex se omnes, ac motus animalis turbidos procreet. Eademque, quatenus vel parere potest rationi, vel obsistere, rationis expers, aut particeps nominatur: quemadmodum in libris Ethicæ Philosophicæ latius exposuimus. Hanc ipsam Plato in Timæo, alijque postea, quorum è numero est D. Gregor. Nyssenus, in duas scant partes, unam irascibilem, quam ponunt in corde, quamque turbulentarum affectionum esse fontem existimant: alteram appetitoriam, quam in jecore, ac mitiorum esse perturbationum volunt. Tota hæc vis appetendi, sive in corde ponatur, sive in jecore, una est animæ sentientis facultas, quæ in brutis omnino expers rationis est, in hominibus modo expers, modo particeps, prout fuerit illi ratio dominata. Hinc tota perturbationum vis nascitur, quarum originem etsi alio in loco uberius, ut ipse arbitror, ostendi, hîc rursus, quando instituti ratio id postulat, paucis indicare oportet.

DE AFFECTIBVS, EORVMQVE

ortu, ac formis, & causis.

CAP. XVIII.

Motus ij, qui sine tactu aliquo fieri ab appetitoria sensitiva dicti sunt, communi nomine $\pi\alpha\theta\eta$, id est affectus, ac perturbationes nominantur. Iidem etsi variè definiri solent, ut nos etiam aliàs indicavimus, commodè tamen sic describentur cum Gregor. Nysseno. Affectus est, impetus animæ appetitoria sentientis ex imaginatione boni, aut mali, ortus. Nam cum appetitoria facultatis objectum, uti diximus, vel bonum existat, vel ejus species, si eadem boni, aut mali cogitatione à Phantasia rapiatur, impetus ille $\pi\alpha\theta\eta$, id est perturbatio, & affectus nominatur. Itaque affectuum origo est appetitoria facultas: movens causa, extra ipsum animal, posita tanquam objectum vel bonum, vel malum, illud alliciens, hoc deterrens: efficiens, & excitans facultatem animi phantasia sive imaginatio. His accedunt aliæ quoq; causæ, ut corporis temperatio: quam cum imaginatio sequatur, fit, ut illius motus naturæ hujus congruant: institutio, ac vitæ modus: consuetudo: ignorantia: aliæque generis ejusdem, quæ ad effectus excitandos vim habent non mediocrem. Ordo præterea, modusque

dusque, quo affectus in animalibus excitantur,
 hic est, ut in homine, saltem videmus, Imagi-
 natio, quæ vaga, & soluta est, opinione, ac sensu
 rerum perceptarum ducitur: quæ corporis tem-
 perationi, seu proclivitati naturali, cōsuetudini,
 ignorantique maxime solet congruere. Et
 cum eadem imaginatio ab externo aliquo bono,
 malove impellitur, uti ab objecto: pro corporis
 uti dixi natura, ignorance, consuetudineve in-
 citatur: Siquidem hæc tanquam affectionum fa-
 cultates sunt quædam: quarum commotiones,
 ab imaginatione factæ, affectus dicuntur. Ergo
 commota phantasia, vel boni opinione ducitur,
 vel mali, utriusque verò aut instantis, aut even-
 tui. Si bonum sit instans, affectiones hæc inde
 nascuntur: Voluptas, amor, gaudium, delecta-
 tio. Si futurum: spes, cupiditas. Quod si autem
 malum instans, hæc: odium, dolor, pudor, vere-
 cundia, invidia, livor, æmulatio, ira, offensio, in-
 dignatio. Si futurum: metus, audacia, fiducia.
 Quorum omnium affectuum duo capita Plato-
 ni, & Aristoteli esse dicuntur, voluptas, & do-
 lor: Stoicis verò quatuor hæc: voluptas, & libi-
 do: quæ duobus ex bonis opinatis nascuntur,
 illa ex præsentibus, hæc ex futuris: atq; ægritu-
 do, & metus: quorum illa ex opinione mali præ-
 sentis, hæc ex futuri fieri dicitur. Atqui hæc de
 communis affectuum origine, causis, ac divisio-
 ne. Opponunt sese hoc loco Stoici Academicis,

& Peripateticis, affectus à natura nobis inritos non esse, sed ab opinione probantes. Quorum profecto sententia eo minus vera est, quòd si affectus à natura tollamus, virtutes etiam, atque omnem animalium actionem unà tollere necesse sit. Nā & cum movemur, agimúsve quicquam, id sine aliquo affectu fieri non potest: itemq; virtutum actiones omnes affectibus plurimùm utuntur, ut magnanimitas, temperantia. Quid: quòd sacrae literæ passim homines affectu carentes improbant, ac reprehédunt: ut ad Romanos Paulus scribens *ἀσέπυς*, id est, affectu vacuos vituperat. Veruntamen hac de re latius in nostris libris de morum philosophia. Hinc illud statutum sit breviter, affectus naturales esse, & utiles humanæ vitæ, eosq; semper corporeæ temperationi cuiusq; animalis, vel vitæ institutioni, aut rationi similes existere: qui ipsi modò lenes sunt, ut ij, qui ab appetitoria facultate jecoris nascuntur, modò turbidi, & concitati, ut illi, qui ab irascibili. Appetitoria, quam alij solent concupiscibilem nominare, sex sunt affectuum formæ: tres ex opinione boni, totidem ex mali nascentes: amor, desiderium, gaudium, odium, detestatio, tristitia. Irascibilis sunt quinque, qui ex opinione boni, aut mali oriuntur: spes, desperatio, timor, audacia, ira. Ex his alij à frigida, & sicca quadā qualitate, quàm sequitur phantasia, nascuntur: ut tristitia, metus, despe-

desperatio, alijque his affines, qui in melancholicos potissimum homines cadunt: alij à calida: ut gaudium, spes, audacia, ira, amor, ac ceteri, qui calidos cadunt in homines. Nam qui frigidâ naturâ constant, & humectâ, ut pituitosi levibus, & frigidis affectibus incitantur: qui calidâ, & humectâ, ut sanguinei callidioribus, ut gaudio, lætitiâ, voluptate, ira, audacia: qui calidâ, & siccâ, ut biliosi, ardentibus, & concitatis, ut irâ, excandescentiâ, audaciâ, æmulatione, invidiâ: qui denique frigidâ, & siccâ, ut melancholici, frigidioribus, sed turbidis, ut metu, livore invidiâ, æmulatione, desperatione. Ad hanc corporum naturalem proclivitatem catenus vitæ ratio, institutum, & consuetudo, atque ignoratio additur, quatenus sæpè homines impatientiæ assuefacti, iracundi, & audaces fieri solent, aut gulæ dediti, intemperantiores, aut malè viventes, vitij magis obnoxij: quoniam ad naturam vitæ consuetudo maximè accedit, eamq; imitata, similes affectus ijs, qui à corporis proclivitate poterant oriri, excitat. Sed tamen singula nos affectuum genera, & causas præsertim communium persequamur, ut eorum apertius ratio intelligatur, tametsi hac de re latius à me dictum alio in loco sit. Sumamus igitur exordium ab eo genere appetitionis, quæ unâ cum tactu fit, quando inde affectuum formæ duæ præcipuæ, voluptas, ac

H h 2 dolor,

dolor, oriuntur: quarum explicatio tametsi longa sit, tamen hic breviter erit repetenda, prout Physici postulat manus. Voluptas, ut Plato vult in Timæo, est animi irrationalis affectio naturæ corporis congruens, sive eam delinens: suavitatem aliquam: ut ea, quæ suavium ex rerum tactu, gustuque percipitur. Hæc quamquam in auditu, aspectu, olfactu, sensuque rerum aliarum est, tamen præcipue tactu continetur. Erut huius variae sunt formæ: ita illius: atque ut ipse totum per corpus diffunditur, sic & illa. Ergo per nivos tactus vim habentes voluptas percipitur, eademque naturæ corporis dicitur congruere, quia id, quod voluptatis affert sensum, similitudine quâdam congruere naturæ nostræ debet. Unde magna est in hominibus, aliisque animantibus (æquæ enim est in omnibus voluptas, sicuti tactus: sed major, & exquisitior in homine, utpote rationis particeps, ingenijque maioris) voluptatis diversitas, quoniam alij rebus aliis magis delectantur, ut calidi calidis, frigidis frigidis: eodemque modo ut singuli pro corporis temperatione, consuetudine, ita rebus illi congruentibus afficiuntur. Contrarius est voluptati dolor, id est, affectio naturæ animatis repugnans, eamque offendens. Nam cum id, quod tangitur, gustaturve, sensum offendit, vel quia excellit magnitudine, vel exilitate: si animus abhorreat, & aversetur, motus ille dolor appellatur.

tur. Hic autem in eam animi partem, idemque sensorium, in quod voluptas, cadit, quando affectionum contrariarum capax est animal: & in quem cadit voluptas, in eundem dolor etiam incidat, necesse est. Quam ob causam, quia variae sunt animalium voluptatis formae, doloris sunt etiam, si singulis voluptatis singulas doloris causas contrarias opponamus. Quae tamen omnibus eadem non erunt, sed unicuique pro ingenio. Siquidem aliis alij magis offenduntur, quam alij: ut calidi frigidis, frigidi calidis, humecti siccis, sicci humectis. Atqui haec duae sunt potissime affectionum formae, quae per omne animalium genus latissime patent, adeo ut si iis careat quisquā, animal non sit, cum & tactu, qui omnibus inesse debet, unā careat. Quapropter circa universum corpus in Timaeo hoc duplex affectionis genus Plato ponit: his verbis. Sed earum affectionum, quae corpori universo accidunt, communiter ea restat maximè, quae voluptatis, ac doloris est causa in iis, quae diximus. Quo in loco ille communes omnium perturbationum causas, quarum genus esse illas duas existimat, longius persequitur. Aristoteles etiam in secundo Ethicorum libro eadem ipsa duo genera statuit, dum circa illa omnes virtutes esse ostendit, quemadmodum etiam Eustatius eius interpretes testatur. Veruntamen de his satis. Pergamus ad appetitionis partes eas, quae sine tactu fieri sola

cordis seu appetitoriae totius animæ commotione dicta sunt : ex qua affectus oriri omnes censebamus. Quoniam ergo hanc appetendi vim ita duas in partes distribuimus , irascibilem , & concupiscibilem ex Aristotelis , ac Platonis , & Galeni sententia , ut ex illa turbidos , & concitatos affectus , ex hac lenes , & moderatiore nasci diceremus : atque irascibili formas quinque perturbationum , concupiscibili sex alias subiecimus , singulas nunc ordine persequamur. concupiscibilem autem appellamus eam animæ facultatem , quæ quoniam in jecore est , & sanguine ad alimentum vititur maxime , appetens est , & cupida , ac non solum hos affectus , quos dicemus , excitat , sed innumerabiles etiam alias cupiditates , quæ ratione comprehendere non possunt. Vim hanc Plato in Timæo , librisque aliis tertiam esse animi partem censet , eamque à ratione valde remotam , quod pastui semper intenta sit , & tanquam præsepi bellua , sic jecori ipsa adhareat. Aristoteles verò in Ethicis eodem ferè modo illam circumscribit , eamque non tertiam animi partem tantummodò , sed alià quandam esse arbitratur , quemadmodum in partitione animæ nos supra retulimus. Cum igitur ab ea quinque has perturbationum formas oriri dixerimus , tres quidem ex boni opinione , amorem , desiderium , & gaudium : totidemque ex opinione mali , odium detestationem , tristitiam : exponamus

ponamus nunc earundem unamquamq;. Amor primus esse affectionum omnium videtur, idemq; omnibus animalibus aut erga suum genus, ac sui cōservationem, aut erga suum simile existit. Nam id imprimis omnibus est insitum per 6. axioma lib. 4. quod sibi sunt quàm charissima, & suo simili delectātur, mutuaq; omnia similia copulantur benevolentia. Illud autē perturbationis est cuiusq;, quòd conspectā, perceptāve alio sensu re aliquā, quæ voluptatem afferat, ea statim imaginationē pellicit, & conciliat. Quæ rursus objectæ rei allubescencia ducta, amore capitur illius, eamque sibi nititur alligare: quod amoris est proprium. In quo optando appetitoria facultas ab imaginatione movetur tum mitius, tum vehementius pro cuiusq; corporis temperatione, aut natura. Nam in calidis hominibus acrior illius motus est: in frigidis mitior. Ideò amor definitur affectio appetitoria facultatis, quā bonum aliquod suavitate imaginationem deliniēs expetitur: quod sibi animal alligare cupit, instigante ad illud ipsum cordis fervore. Huius porro variae sunt formæ: ut alius amor vehemens, & concitatus, qualis in animantibus, & parentibus est erga filios: alius moderatus, ut in amicis: alius turpis, qui turpi de causā nascitur: alius honestus, qui causā ex honesta. Omnino autem amor omnis aut naturalis est, aut consuetudine, rationēve cōparatus. Naturalis omnibus inest ex

æquo, sed alijs maior, alijs minor pro temperatione corporis, ut dixi. Qui verò consuetudine, aut sensu pariter, inest pariter & brutis, & hominibus: ut canibus erga dominos, hominibus: inter seiplos qui idem atigeri vel minui pro natura cuiusq; potest. Amor illè denique rationi conjunctus hominis proprius est, & virtuti adherens: ex quo nascitur amicitia, de qua nos aliàs non pauca. Sequitur desiderij seu cupiditas. Hæc propria est facultatis appetitoria, referturq; ad bonũ futurum. Cũ enim, id quod bonum imaginationi visum fuerit, absens sit, si hæc in illud intenta ipsum cupiat, & attrahere ad se velit, motus hic desiderij appellatur: quod in appetitoria anima ponitur, quoniam in jecore, sive in sanguinis vi animalibus est cupiditas. Vnde & sanguinea animalia cæteris appetentiora sunt, & sanguinei homines alijs plus appetunt: quia humor, qui natura utpote pariens, qualitas est appetentissimus, sanguineis inest multus, cui si calor adhibeatur, crescit in immensum cupiditas, quia idem calore instigatur. Cupiditatis autem seu desiderij totidem ferè, quot rerum, quæ amantur, formæ esse videntur. Nam aut optantur turpia, aut honesta: & eorum alia vehementius, alia moderatius, prout natura, & ingenium fert cuiusque. Si quidem calida corpora vehementer expetunt omnia, frigida remissius. Restat gaudium, seu voluptas,

voluptas, quæ in applicatione quadam rei amatur, ac desideratur ponitur: cum enim id, quod prius expetebatur, jam adest, & arripi potest ab animali cupiditate incitato, ejusce rei præsens fruitio voluptas, nominatur: quæ aded est varia, & multiplex, ut & in tactu, quemadmodum supra diximus, & sine illo esse possit. In tactu quidem inest, ut antè retuli: sine illo verò, cum reliquorum sensuum perceptionem consequitur. Nam & aspectum sequitur voluptas, cum res conspectæ delectant, & auditum, cum auditur, & odoratum, cum odores, & imaginationem, ac mentem, cum ea, quibus delectamur, præsentia sunt. Breviter delectationis omnis genus in hanc cadit affectionem. Quæ de re hæc satis in præsentia. Veniamus ad reliquos tres affectus ex opinione mali nascentes, quorum primum est odium. Hoc amoris contrarium est, & ab irascibili non parùm adjuvatur. Cum enim id, quod imaginationi sese offert, offendit, & quasi lædit naturam animalis, si imaginatio illud respuat, & reiiciat, fuga illa, seu detestatio, odium appellatur, quemadmodum rei oblectantis complexio amor: ideo contrarium est odium amoris, & ex offensione imaginationis proficiscitur. Idem in appetitoria facultate ponitur, quoniam è cupiditate nascitur: quâ dum animus offenditur, exardescit, & in rei offendentis detestationem accenditur. Hujus

quoque varij sunt modi pro cuiusque animalis natura: hoc est, modò acrius, modò remissiùs, modò diuturnum, modò breve esse odium solet. Communiter autem in biliosis, ac melancholicis corporibus diuturnum, & acre plerumque existit, quoniam hæc diutiùs iram conservant: in humectis verò, & frigidis, remissiùs, & breve, quia hæc minùs irà commoventur, eaque solet in ijs brevis esse, ac remissa. Odium committatur detestatio, sive offensio, adedò ut nisi priùs hæc fuerit, illud non sequatur, cum nemo aliud odio persequatur, nisi offensum. Itaq; si res animo objecta imaginationem à se alienet, & offendat, quando hæc illam refugit, & detestatur, appetitoria facultatis motu atque incitatione, & motus ille offensio dicitur, & affectio hæc in eadem appetitoria collocatur. Quæ tamen non parum ab irascibili incitatur, cum sæpè videamus iracundiores homines, & calidiores citissimè quâcunque re offendi, quia irascibilis vis in illis propter calorem concitator est, ac motu facilior. Contrà frigidi, humecti, & sicci ægriùs offenduntur, ideoque illis tolerantiores sunt. In utrisq; autem offensio æquè semper non durat, quia in iracundis tum brevis esse solet, tum diuturna, in mitioribus quoque eodem ferè modo. Demum in ijs, qui tenaci fuerint natura, ut in melâcholicis, & biliadustâ infectis corporibus diuturnior est offensio, ideoque

que in odium vertitur facilius: in biliosis, ut cito excitatur, ita brevi remittitur: in humidis quasi diffluit pro temperationis mutabilitate: in frigidis ob pituitam diuturna esse solet, sed non æquè, atque in melancholicis. Ex offensione, atque odio tristitia oritur, quæ & illa duo solet aliquando præcedere: ut cum ex molestia, dolorque nascitur odium, & offensio. Tristitia autem in hoc loco à nobis capitur pro motu quodam appetitorie facultatis, animum contrahente. Quæ ideo commodè definiri potest perturbatio graviter contrahens, & premens animum. Hujus, uti diximus, prima origo est appetitoria, quoniam si quid sibi adverteretur, offenditur, atque dolore angitur, ut rebus secundum ejus naturam fluentibus delectatur. Quo nomine voluptati eadem opponitur, non illi tantum, quæ in tactu est, sed ei quoq; quæ omnes ad sensus diffunditur, quæque idcirco non minus latè patet, quando in alijs est rebus, quæcunque animum offendunt, quatenus, ob eas ille contrahitur, & languescit. Ipsa quoque tristitia, etsi propria facultatis est appetitorie, multum ab irascibili commovetur, quia cor propter tristitiam quodammodo premitur, & contrahitur, sicuti ob voluptatem dilatatur, & erigitur, Cuius rei causa Galeno, ac Gregorio Nysseno videtur esse, quod melancholiz multum in tristibus ad ventrem accurrat, mordica-

ditionemque gignat quandam, quæ animali
mœrorem inducat, ita ut ipsa frigida cum sit, ac
sicca partes illas constingat, quæ calore prius
amplificabantur. Hoc inde patet, quod ad tri-
stitiam tollendam uti vino, aut alijs rebus cali-
dis, & humectis, quæ spiritus excitent, & cor
ipsum erigant, opus est: atque etiam melan-
cholici homines alijs tristiores esse solent, quod
ipsorum sanguis eo succo atro infectus ad cor,
& partes alias offusus contractionem earum
quandam efficiat: quam sequutus animus con-
trahitur propter communem illius, & corporis
consensum, quem alij Sympathiam appellant.
Ad tristitiam affectiones alix eadem ex causa
natæ, sed ob finem diversum, referuntur: ut
mœror, sollicitudo, invidia, misericordia. Mœ-
ror est perturbatio præ dolore vocem eripiens.
Sollicitudo, ægritudo præmens. Invidia, tristi-
tia de bonis alienis. Misericordia, tristitia de
malis alienis. Omnis denique tristitia, cum à
frigida qualitate nascatur, nimirum è melan-
cholia, in animalibus frigidis, siccisque est fre-
quens, in calidis verò, & humectis non item.
Vnde sanguineæ temperationis, aut biliosæ ani-
malia minùs capiunt tristitiæ, quàm melanco-
licæ, ac pituitosæ. Hæc igitur hætenus de ap-
petitorix facultatis affectionibus. Sed jam de
irascibili hoc loco ut dicamus, æquum est. Ira-
scibilis est animæ facultas ad bonum, malumve
ipsa

ipsâ re sequendum incitans. Nam appetitoria motus excitat, quodammodò, atque in se affectuum multorum habet radices: irascibilis verò, quæ virilior, & acrior est, illos confirmat, promovet, & in actionem deducit: quoniam in corde, in quo ipsa est, spiritus vitales, atque animales enati motum universo corpori afferunt. Etenim ijs usa phantasia nervos motorios impellit, hisque corpus universum, ut postea docbimus. Irascibilis porrò quinque sunt affectuum formæ: spes, desperatio, timor, audacia: ira, quæ omnes eodem ordine, quo superiores, explicandæ sunt. Spes est, animæ perturbatio ex opinione boni eventuri: oblata enim boni aliquâ occasione, quod sibi utile putet esse imaginatio, ad illud continuo exoptandum erigitur: cujus expectatio spes dicitur, & cum voluptate conjuncta est. Ipsa verò spes in corde sita spiritibus animalibus excitatur, & erigitur: ideoque ab audacia quadam, & cordis laxatione adjuvatur, quæ majorem expectatæ rei firmitatem efficiat. Quæ cum in timidis, ac frigidis hominibus esse nequeat, hi magis aut in expectatione vacillant, aut nullâ spe facile adducuntur. Nihilominus tamen utrisque dubitatio inest aliqua: illis quidem major, his minor: quæ spem facit imbecilem, eò quòd imaginatio inconstans est, ac varia: & quemadmodum in spem facile adducitur, ita ex ea facile deijcitur. Contraria

traria est spei desperatio, quæ ex opinione boni non assequendi nascitur. Hæc ejusdem rationis est, atque spei, nisi quod ex causis contrariis fit: quoniam spirituum fervore illo, qui cor erigebat ad spem, refrigerato, spes etiam imminui, ac tolli videtur. Quam ad rem imaginationis, uti antea dicebam, mutatio permultum facit: quæ ex opinione boni dejecta, deficit, & desperat. Sequitur timor: cujus causa, & ratio aperta est. Nam cum cor nimis constringitur ob frigiditatem, quæ fit vel ex opinione mali eventuri, aut præsentis, vel è natura corporeæ temperationis, ut in melancholicis, & pituitosis, quibus sanguis est frigidus: contractio quidem illa, timor, seu metus appellatur, id est, perturbatio ex opinione mali eventuri, quæ ex contractione cordis oritur. Ergo timoris eadem ferè causa, quæ tristitiæ, videtur esse, hoc est, affluxus quidam melancholiæ in cor: cujus spiritibus quasi retardatis, & cor ipsum contrahitur, & imaginatio mali aliquid, quod refugere conatur, timet. Hinc videmus in subito timore sanguinem omnem calidum, & spiritus ad cor retrahi ab omnibus ferè membris: quoniam ipsum caloris cum sit fons, eo destitutum undique sibi illum arcessit. Timoris autem varix sunt species: ut segnities, erubescencia, verecundia, terror. Quarum omnium origo, & causa una est, finis autem, mali opinio

nio diversa. Nam segnities, timor est actionis futurae. Erubescencia, timor de convitiis, aut turpitudinis expectatione. Verecundia timor, de turpitudine rei factae. Terror, metus ingens animum angens ob eventum malum. Sed jam de audacia. Timori contraria est audacia, id est, animi & confidentia quadam ex opinione boni poriundi. Quae, ut metus ex contractione cordis, ita ex dilatatione ejusdem proficiscitur: quoniam intendentibus sese cordis spiritibus, & quasi vires recipientibus, si opinio de boni eventuri, malique superandi facilitate adsit, quae moveat, atque incitet animal, commotio illa dicitur audacia. Quam quidem est fervore cordis majore, ut ex refrigeratione metum, fieri perspicuum est: cum eo in affectu constitutis hominibus cor maximè palpitare, atque aestuare videatur nimirum quia magna sanguinis vis eò confluit, & calor cordis exardescit. Ex quo fit, ut ii, qui irati pallescunt, fortiores rubescentibus sint, quoniam illis major sanguinis copia ex totis penè artubus ad cor confluit, unde is pallor exoritur: hi contra, cum tanta caloris vis eorum cordi non sit, quae sanguinem omnem attrahat, rubescunt dilatatione caloris per corporis membra. Quae dilatio minorem indicat vim. Tandem de ira disseramus: à qua nomen animi facultas sortita est. Ira, perturbatio est quadam ex cupiditate ulciscendi
pro-

perfecta: quæ tamen fervida cum sit, à quibusdam sanguinis fervor in corde ex evaporatione fellis facta definitur. Cum enim imaginatio ledi animal putat, cupiditate quadam repellens illud, quo leditur, adducta (sunt enim omnia sibi charissima, conservareque se cupiunt) mox fellis humorem sive bilem exeat, cujus conturbatione vapor felleus ad cor ascendens sanguinem inflamat, & spiritus: atque ex ea commotione ira nascitur. Quæ etiam pro natura corporis, & opinione offensionis modo major, modo minor existit: major quidem in calidis, & superbis animalibus: minor verò in moderatis, & temperatioribus. In omnibus tamen, si statum ipsorum priorem spectes, adeo conturbatus est iræ motus, ut quoniam cor magno ardore inflammatur, totum corpus contremiscat, actiones, & sensus ejusdem impediuntur, quia vapor idem cordis ad cerebrum ascendit, atque ipsum conturbat. Porro iræ sunt tres species, inter se pro indignationis forma diversæ: una, quæ fellea dicitur Aristoteli, quæ diuturnior est, & vehementior, propter maiorem corporeæ concretionis caliditatem: altera, quæ biliosa, quod initio ardens, & turbida sit, postea tamen mirigetur, inveterata doloris opinione: tertia furor, quæ ad vindictam tempus, & occasionem observat. Communiret autem iræ omni tristitia quædam adjuncta est

de offensione, quæ cupiditatem ulciscendi magis instigat. Atque hæc sanè de affectibus in universum docuisse, satis sit: plura enim addere longioris est tractionis, & eius, quæ integrum librum postularer, si absolute omnia essent explicanda. Id breviter ad extremum addidisse contenti sumus, affectus hos, quos supra retulimus, animantibus omnibus, quæcunque sensu, imaginationeque prædita sint, insitos esse: nisi quod in homine ratione sæpè cohibetur. Nam in leonibus, ursis, cæterisque brutis manifesta iræ, amoris, odij, cupiditatis, voluptatis, tristitiæ, cæterorumque affectuum indicia cernimus: ac ratio id ipsa confirmat, cum nullum esse irascibili, & appetitoria facultate animæ præditum animal possit, quin vires horum affectuum, commotionesque habeat. Porro in tota hac de affectibus disputatione nullum est inter Platonem, & Aristotelem, ut ego quidem arbitror, discrimen: nisi quod ille breviter in Timæo, aliisque locis causas illorum complexus est, hic latius in libris de Rhetorica ad Theodectem, in aliisque libris. Ab utroque verò minùs dissentit Christianorum doctrina, quod ad affectuum, causas, & rationem attinet.

DE MOTRICE FACULTATE

animi.

CAP. XIX.

Quarta animæ vis est ea, quæ motum animatis corporibus affert: quæ eadem ex vivendi, sentiendique oritur principio. Quatenus enim corpora vivunt, ac sentiunt, motu aliquo incitantur: non quatenus vita solum sunt prædita: quæ vel in stirpibus, ac metallis est, quæ nullo motu cidentur. Ideo motrix facultas, est animæ vis, quæ incitari, moverique è loco uno in alium possunt animalia. Hujus finis est, vitæ conservatio, & corporis salus, quam ut tueantur animalia, varijs motibus impelluntur, tum ad pastum, & latibula, tum ad fugam periculorum, tum ad alia generis ejusdem, sine quibus non modò vivere commodè, sed ne vivere quidem possint. Eademque ab una illa animæ vi toti corpori animalis diffusa proficiscitur, quemadmodum vegetandi, alendi, sentiendi, appetendique facultas. Sicut enim una anima varijs actionibus fungens, diversas habet partes, diversasque vires: ita singulæ inter se partes origine eadem sunt, sine tamen agendi, & subiecto discrepant. Ergo quatenus movendo corpori animalis anima se accommodat, motrix editur facultas. Instrumenta motionis hujus in

jus in homine perspicua sunt: in omnibus vero alijs animantibus non item, sed illorum proportionem quædam alia: ut in animantium inchoatorum genere. Sunt itaque motionis præcipua instrumenta nervi motorij: quibus anima usa tanquam habenis musculos, chordasque movet, his deinde membra singula, atque ita corpus universum. Ad hæc porro instrumenta impellenda anima spiritibus ijs utitur animalibus, ac vitalibus, quos sensuum etiam esse proxima instrumenta diximus: quoniam ij mediæ naturæ cum sint inter corpora, & incorporea, ab anima excitati nervos movent, & eodem modo reliquum corpus. Motionis hujusce originem cordi tribuit Aristoteles, quoniam & in eodem motricem collocat facultatem. Hoc ergo stabili, & firmo manente quasi centro, universum cieri corpus ab imaginatione appetitionis alicujus causâ inquit, quando universa primò moventia stare vult, uti cælum, ac reliqua omnia. At verò Galenus, qui omnium nervorum ortum in cerebro ponit, movendi quoque vim in eo si tam esse dicit, ita tamen ut ipsa à cordis spiritibus adjuvetur, quemadmodum & sentiendi facultas, & reliquæ vires animæ. De hoc movendi principio nihil aperte Plato effert, nisi quod in Timæo nervis eam tribuit facultatem his verbis. Nervorum, carnisque

genus effinxit, ut nervis quidem membrana reliqua vincientibus, intensis, remissisq; circa cardines ipsos, corpus universum ad flexionem, tensionemve promptum, & agile redderet. Sed in hoc Plato cum nervis movendi corporis vim inesse dicat, ad ipsius sententiam de nervorum ortu recurrendum est: ibi enim & movendi aliquod initium ab eo poni intelligitur. Quae quidem de re nos in animalium descriptione plura. Harum ego sententiarum verissimam esse Galeni arbitror, cum ex cerebro oriri nervos, non ex corde, ut Aristoteles putavit, videamus, cumq; movendi facultatem in eo loco poni necesse sit, à quo ducant nervi omnes originem. Et quidem, eodem Galeno auctore, cum omnis animae vis nervis ut instrumentis utatur, eorumq; motorij duri sint, sensorij verò molles, illi quidem è posteriore cerebri ventriculo, & spinæ medulla, hi ex anteriori enascentes: aut vim ipsam movendi in ea corporis parte constituere, aut nervos movendi vi privare necesse est: id quod ipse negat Aristoteles. His ita constitutis, videamus, quot sint motricis facultatis species in universum, quando communes motionis omnis animalium causas reddere volumus. Tres sunt animalium vires præcipuae, una, quæ animalis, altera, quæ naturalis, tertia, quæ vitalis nominatur. Animalem eam appello, quæ voluntate fit, & imaginatione in homini-

hominibus: in brutis verò, cupiditate, quæ voluntatis loco est, & imaginatione eadem. Naturalem verò, ac vitalem illas, quæ à natura ipsa animalibus insitæ sine voluntate, aut imaginatione, sponte tamen incitantur: cujus modi sunt cordis palpitatio, arteriarum micatio, quæ vel nolentibus nobis, à natura, vitæq; sunt. Animalis rursus vel impetu quodam, ac sensu cietur, vel habito prius delectu. Quæ impetu, ac sensu moventur, sunt ea, quæ imaginatione, & cupiditate incitantur: ut resperatio, ut progressio, ut alia demum, quæ nulla fiunt cum ratione. Quæ denique delectu habito, illa, quæ ratione, & consilio: ut voluntarij hominum motus. In hac ferè divisionem innumerabiles movendi formæ animalium propriæ cadunt. Nam volatilia, dum sese in sublime alis suspendunt, cupiditate, & imaginatione trahuntur: reptilia, dum repunt: natantia, dum natant: quadrupedia omnia dum incedunt: homines, dum ambulant imaginatione & voluntate utuntur. Sed videamus tandem, quomodo animalia moventur, perfecta præsertim ut homines, & quadrupedes: nam aliorum difficilis est, & obscura ratio, nisi ad illorum similitudinem loquamur. Communis movendi sese animalibus modus hic est. Principio aliquod extra positum objectum sese offert, quod aut verè bonum sit, vel adumbratum, aut malum. Hoc oblato,

appetitoria animæ facultas, continuò vel allicitur ad cupiendum, ac persequendum bonum, vel ad malum declinandum. Huic mox sese adjungit imaginatio, cogitatio, electio, & consilium: ut in hominibus, qui oblatam rem dijudicant, & perpendunt, sequendâ ne ea sit, aut fugiendâ. Factâ consideratione hac tanquam argumento, cupiditas cum imaginatione motricem facultatem statim instigat, ut commotis nervis, corpus eo moveat, quo velit, aut inde fugiat, à quo fuerit deterrita. Ergo causa movens extra ipsum animal, veluti objectum posita, est bonum, quod verò movetur, cupiditas, quatenus ab illo ipsa invitatur: quod item motionis querit rationem, & causam, imaginatio, sive mens in hominibus; quod denique corpus movet animalis, cupiditas ipsa ab imaginatione persuasa; conclusio totius ejus quasi deliberationis ab imaginatione habitæ cum appetitoria, est motio ipsa: forma deinde, ac modus, quo eadem cupiditas: utitur in movendo, est, ut nervi spirituum animalium vi intendantur, aut laxentur: qui musculos, ossa, totumque corpus impellant, uti Galenus existimat, aut uti Aristoteles, qui nervis vertebrae, & commissuras incitent. Instrumenta denique hujus commotionis sunt spiritus primum, deinde nervi, postea muscoli, & ossa, postremo corpus universum. His enim sese mutuo impellen-

pellentibus mirabili celeritate, animal incitatur vel ad incedendum, vel reptandum, vel volandum, vel natandum, vel serpendum, idque sursum, sinistrorsum, ante, pone, sursum, deorsum. Hæc enim motionis animalium intervalla sunt, & eadem inter se diversa, ac contraria: quoniam animal ipsum diversis est ex partibus, & qualitatibus contrariis concretum, singulaque motus sui naturalem impetum sequuntur. Quo fit, ut animal omne his omnibus motibus agatur: quod & in Timæo Plato, & Aristoteles referunt. Quæ cum ita sint universæ de animalium motione dictæ, æquum est, ut communem etiam aliquam singularum formarum movendi rationem reddamus, quando in tanta nature varietate nulla certa omnium esse ratio potest. Sumpto igitur ab homine initio doceamus, quemadmodum moveatur totus ipse, non ut singulæ illius particulæ: quod longum, & explicatum difficile est. In hominis motu eadem propemodum ratio est, quam antea in universum tradidimus: nisi quod quæ in alijs animantibus cupiditas nominatur, in illo dicitur voluntas propter rationis affinitatem: ideoque motus omnis humani corporis voluntarius est, exceptis ijs, qui naturales, vitalesque supra sunt à nobis appellari: ut palpitatio cordis, arteriarum miscatio, altricis facultatis agitatio. Nam cum moveri homo vult, liberè movetur, voluntate

tate imperante nervis, reliquisq; instrumentis; cum vero stare, quiescit, eadem sic statuerit. Nec obstat his, quod motus aliquos fieri sine ratione ulla videamus, quo minus iidem voluntarii sunt: satis enim est ipsum movendi principium liberum esse, ut voluntarius dicatur motus. Iam vero forma, qua corpus hominis incipit talis esse videtur. Nervi sese ob ipsam animalium affluam intendentes nullo quoque, atque ossa intendunt, sicque corpus universum ad motum instigant: sicut se laxantes corpus laxant etiam. Ex mutua vero, & frequenti intentione, ac laxatione motus omnis fit: ut cum caput agitur, collum flectitur, brachia, manus, ac digitus ad comprehendendum incitantur: ut femora, tibiae, pedes ad incedendum intenduntur, vel ad sedendum contrahuntur. Ipsa vero pedum motio ad rectos angulos fieri videtur: curvantibus sese eo modo cruribus, modoq; uno pede innitentibus, modo altero progredientibus vicissitudine continuata, inflexoq; genu uno nunc in partem anteriorem, nunc in posteriorem: nimirum quia crus alterum ad insilendum pedibus, & gressus firmandos intenditur, ac terra figitur, alterum ad progrediendum quasi in orbem actum circa fixum pedem flectitur. Qua quidem ex vicissitudine flectentium, & intendentium se crurum progressio fit, si paulatim fiat: cursus vero, si celeriter.

leritor. Hoc etiam modò bipeda animalia mo-
 verit, ut aves, dum terris gradiuntur (nam dum
 sese in aëre erigunt, agitatione id alarum fa-
 ciunt; sicuti pisces, dum natant, caudæ, & pin-
 narum instrumento) & quadrupedes dum in-
 cedunt, cognare possimus: nisi quòd ille ala-
 rum ope saepe adjuvantur, saltem aliquo facto: hæ-
 binis semper pedibus innituntur, ut binis gra-
 diuntur: id quod duobus pedibus homo facit.
 Et quanquam animalia, dum saltant, efferri
 sursum videantur, id tamen faciunt in se ipsis
 innitentia, primoque corpus flectentia, postea
 verò intensum quasi excutentia. Porro serpen-
 tia, & reptilia, quæ pedibus videntur carere, in-
 tensione quoque, & laxatione corporis reptant.
 parte enim una inniti, parte verò alterâ progredi
 videntur. Omnino autem sanguinea omnia,
 ut ait Aristoteles, animantia vel binos habent
 pedes, vel quatuor, eosque semper pares, excep-
 tis fortasse centipedibus, apti alijs, quorum
 obsecra ratio est. In movendo etiam corpore
 id proprium est omnium, quod unâ semper
 parte quiescunt, & innituntur, alterâ move-
 ntur, ut nullâ vicissitudine motus fiat. Atque
 in his quidem partes dextræ semper motum af-
 ferunt, sinistra verò moventur. Verùm hæc de
 re satis: quæ peculiare potius animalium hi-
 storias, quàm communem aliquam rationem
 requirit. De movendi hæc facultate nullum est

inter Platonem, & Aristotelem discrimen, præter id, quod supra obiter annotavimus. Quid verò idem Aristoteles à Galeno dissentiret, dictum est etiam. Plato deurni, paucis quibusdam exceptis, quæ in Timæo dixit obiter de motu, Aristoteles de hac re tractationem non æquavit: quæ eadem omnia fuisse, persequutus est in lib. de motu, & incessu animalium.

DE RESPIRATIONE, ET PUL- satili corporis facultate.

CAP. XX.

QUoniam motrix facultas ab anima, vitæque actio quædam proficiscitur, & ab eadem respiratio animalium veluti agitatio ad vitam necessaria æditur: de hac quoque videtur differendum in hoc loco. Cui etiam rei pulsantis illius facultatis, quæ cor palpitat, & arteriæ per corpus micant, vim addemus, utpote quæ sui generis eiusdem cum illa. Quæ in re, quia Platonis, & Aristotelis sententiæ conferendæ sunt, utranque prius subiiciemus, tum nostrum ea de re iudicium exponemus. Plato in Timæo fieri respirationem hoc modo arbitratur. Quoniam calor cordis vehemens, & acer est, data est animalibus respiratio, quæ illū refrigeret frequenti aëris inspiratione. Nam subeuntem aërem ex-

ternum

aerum per nares, atque os, arteriamque asperam pulmo excipit, & calefacit, temperatque, ut in cor influat purus, quod idem illa eget refrigeratione. ipse autem aer calefactus effluatione rursus emititur foras, objectumque aerem extrinsecus pelles calore suo, efficit, ut hic reflexus in exeuntis locum succedat, ne quid vacuum relinquant: quod summâ vi natura declinat. Ex hac ergo continua inspirati aeris extrinsecus, expirati que intrinsecus agitatione respirationem fieri existimat: cuius causam efficientem animæ tribuit: adjuvantem aëri externo, qui occursum exhalati spiritus è pectore inflectitur, ut inspiretur: materiam aëri ipsi, ex quo fit respiratio: finem denique, ut calor cordis refrigeretur: instrumenta esse asperam arteriam, & pulmones, quando inspiratus ad illam aer per nares, & os in eosdem pulmones immittitur: hi verò in cor illum quasi ventilabra infundunt. Sententia huic Platonis consentit Aristoteles in lib. de respiratione, eandemque omnino reddit respirationis causam, & formam: nisi quod rem accuratius persecutus, ut solet, Platonem videtur tacitus notare, quod nec finem respirationis, nec quæ animalia respirent, indicarit. Putat enim finem respirationis esse, cordis refrigerium: itemque non omnia animalia respirare, sed ea tantummodo, quæ sanguinem, & pulmones habeant: ideoque nec pisces,

nec

nec infecta respiratione uti. Contrà Plato respirare quidem ait pisces in Timæo, sed non tam commodè, aut apertè, quàm animalia reliqua pulmonem habentia. Quam sententiam Galenus, ac Plinius, Philosophique alij permulti sequuntur, & tuentur. Hoc Platonis, & Aristotelis discrimen. (si discrimen appellari debet) componi facile potest: cum Plato ipse in eodem Timæo pulmonem, ac respirationem refrigerandi cordis, causâ tributam esse animalibus dicat: cujus hæc sunt verba. Cum verò cernerent cor rerum terribilium oppositum trepidaturum, & ita sæpe flagratum, idque opus omne per ignem fore, huiusce ætus temperandi causâ pulmonum tegmen cordi adhibuere, molle imprimis & exanguo, deinde carnis extrinsecus fistulis spongiæ instar distinctum, ut spiritu quoque accepto, cordis ardore huiusmodi respiratione, refrigerationeque tepesciat. Hanc ipsam respirationis causam, cum ejus efficiendæ formam, & rationem exponit, deinceps affert apertius, ita ut ut nullum in hac parte illius ab Aristotele dissidium relinquatur. Sola ergo utriusque Philosophi dissensio in questione illa posita est, utrum pisces respiratione utantur; an non: quia Plato respirare ipsos ait, negat Aristoteles. His breviter dictis, Galeni nunc sententiam subjungamus: quæ quamvis eadem ferè cum superiori sit, paucis exceptis, proba-

probabilior est, & apertior. Is ergo in lib. de respirationis usu, & causis hanc sententiam habet, ut respiratio sit, actio quædam animæ ad vitam spiritu vitali tuendam. Nam cum tribus maximè rebus animalium vita teneatur, esculentis, poculentis, & spiritu: illis quidem duobus ad humorem, caloremque vitalem conservandum, hoc ad mitigandum, ne ardescat, & animal universum inflammetur: respiratio quidem hunc spiritum suppeditat, sicuti alimentum alitrix animæ facultas. Itaque usus respirationis potissimus est, ut calor naturalis animalium foveatur, ac mitigetur: ne si perpetuâ alimèti accessione idem exardescat, animal pereat, quemadmodum spiritu cohibito in ijs, qui strangulantur, cernimus. Huic accedunt duæ aliæ causæ, prima, quod expiratione fuliginosos, & crassos spiritus è pectore exhalamus, ut qui intra pectus relinquitur, purus sit, & extenuatus. Secunda, quod ex eo spiritu adducto in animalis corpus, alimentum spiritibus vitalibus, & animalibus accedit. Porro materia è qua respiratio fit, uti antea quoque diximus, externus hic aër est: quem ore, ac naribus adducimus, & quo tanquam alimento utimur. Quo intercluso, animal continuò perit. Causa efficiens respirationis in hominibus est voluntas, in brutis verò illa cupiditas, quæ huic respondet: quam utilitatis ratio ab anima habita excitat,

excitat, ut respirationem nunquam intermitat. Quod autem voluntas efficiens causa sit, dubium non est, cum in nobis sit eadem, vel ad spiritum cohibendum, vel non cohibendum; cumque multi, dum sibi mortem conciscere voluissent, spiritum cohibuere, sicque mortui sunt. Præterea cum respirationis tres sunt, uti diximus, usus, refrigerare animalis calorem, cuius sedes in corde est: halitus sordidos, & crassos e pectore exhalare: alimentum spiritale toti corpori præbere: tria quoque sunt eius officia, inspirare, expirare, & respirare. Quorum tamen hæc duo Aristoteles, ac Plato attulere, nimirum inspirationem, & respirationem tertiam verò expirationem Galenus. Ac inspiratio quidem fit, cum aer externus adducitur: quæ eadem refrigerando cordis calori, alimentoque suppeditando necessaria est. Expiratio autem, cum halitus fuliginosus e pulmonibus per arteriâ asperam, perque os, & nates efflatur. Respiratio, denique illa communis expirandi, inspirandique vicissitudo appellatur, quæ vitam animalis continet, ac tuetur. Atque etiam respiratio ipsa, quæ refrigerandi caloris causâ instituta est, à calido incitari quodammodo videtur: quatenus utilitati animantium anima consulens, quò major est eorum calor, eò respiratione utitur frequentiùs. Vnde animalia calidæ naturæ vehementiùs & celerius aliis respirant: itemque lassi, & ardore inflam-

inflammati homines, ac juvenes, & ij, qui cibo multo repleti sint, atque adeo omnes illi, quibus sanguis fervidus est, & calidus, (nam ut hic est caloris materies, ita etiam respirationis causa) majori utuntur respiratione. Iam respirationis ipsius præcipua instrumenta sunt, nares, os, aspera arteria, pulmones, septum transversum. Ex quibus alia spiritum excipiunt, ut nares, os: quædam devehunt, ut arteria: quædam movent, ut pulmones, ac septum transversum. Forma verò, quæ in respiratione servatur, hæc est. Anima spiritum externum per nares, ut cerebrum respiratione juvetur, perque os in asperam arteriam adducit. Hic in pulmones excipitur, dilatante sese pectore, atque illis, & septo transverso, ut commodè spiritus inspiretur. Qui, postquam inclusus est pulmonibus, caloreque extenuatus, & tepefactus ad cor transmittitur, ut ipsum refrigeretur, & ex ejus spiritu capiant arteriæ congruens alimentum. Dum hæc fiunt, ex eodem pulmone fœculenti, & crassi quidam vapores quasi excrementa efflantur, quorum emissio exspiratio nominatur. Atqui hoc modo respiratio fit in animalibus omnibus sanguinem, & pulmonem habentibus. Quoniam enim caloris materia est sanguis, & ut calor refrigeretur, instituta est respiratio, sequitur, ijs animalibus hanc esse concessam, quæ sanguine consistat,

stent, atque illis, quæ pulmodos habitant, quando sine his fieri nequit eadem respiratio. Hæc persuasus ratione Aristoteles pisces, & insecta respirare negavit contra Platonis sententiam in Timæo: quam postea Galenus, atque alij recentiores acerrime turati sunt. Est & aliud in hoc loco Platonis à Galeno dissidium, quod Plato, dum causam respirationis exponit, inspiratum aërem externam causam esse agitationis illius spiritus existimasse videtur, ut Galenus interpretatur: hic cōtra non aërem externum, sed voluntarium animæ motum, quo respirationis instrumenta adducant spiritum, putavit esse. Sed huic nos in commentarijs nostris in Timæum respondimus, Platonem nunquam fuisse tam ineptum, ut putarit, reflexum aërem externum causam esse motricem respirationis, cum ipse potius dicat effluentem vim e pectore aërem externum incitare, & inflectere, ut in ejus locum eo succedente, fiat inspiratio satis: ne multarum hinc quæstionum enumeratione obtruam lectores. Restat, ut de pulsatili corporis vi dicam. Inter reliquas vitales actiones animalium facultas est illa, quæ palpitare cor, & artérias micare facit. Quæ ipsa non ab appetitione aliqua, voluntatēve movetur, sed ab anima, vel sine aliqua animalis deliberatione. Ergo cum animalis vita in motione quadam perpetua sit, non in ea solam, quæ ab uno loco sit in alium, sed

sed in interna quadam alia, ac necessaria: hoc efficit pulsatrix ejus vis, quod animato corpori semper motum affert: quo sedato, mors sequitur continuè. Hujusce palpitacionis efficiens causa est calor cordis ab animo excitatus, quo illud se erigens, & agitans vitam universo corpori impertit. Ex quo etiam patet, in ijs, quibus frequenti palpitacione cor incitatur, ferre maxime calorem, vel ob corporis calidam naturam, vel ob repentinum aliquem motum, vel ob iram, vel ob alias denique causas, quæ cor perturbare, atque ejus motu calorem solent accendere. Porro materia ejus palpitacionis est spiritus, quo hausto, cor intenditur, & contrahitur. Ad respirationis quoque ejus formam perpetuo motu omnes simul arteriæ per corpus diffusæ micant, & pulsus ædunt. Et cum spiritus à corde per magnam arteriam ad omnes alias arterias unà cum sanguine tenuissimo effundatur, quemadmodum cor ipsum palpitat ob ejus spiritus animalis motum, ita quoque omnes arteriæ. Quas Medici propterea tangunt in ægrotis, quod inde cordis, atque aded totius animati corporis temperiem dignoscant. Atque ea de re hæc satis: ne Medicorum fines invadam. De tota hac respirationis ratione quid Aristoteles, & Plato censeant, abundè est supra, ut ego arbitror, explicatum: quid verò Christiana doceat religio, nimis anxie querere

non oportet, cum eadem hæc experimento, & rationi minime repugnet.

DE RATIONALI ANIMA

generatim.

CAP. XXI.

TAndem explicatis omnibus animarum partibus quæ communes animalium generi universo sunt, quæque in divisione nostra supra sunt positz, ad rationis vim, quæ hominis est propria, veniamus. In quo, ut ordinem institutum antea sequamur, imprimis quid sit rationalis anima dicatur: tum in quo differat, dissentiatque à partibus superioribus: & num connexa sit illis ipsa: ac si connexa, quemadmodum cohareat: postremò partes, & vires ejusdem enumerabimus. Rationalis igitur anima (communis autem animæ omnis definitio, quàm supra posuimus, huic accommodetur) est essentia incorporea vitam, sensum perfectum, & intelligendi vim animato corpori præbens. Eadem enim in hominibus sola cum sit, atque una, sicuti antea probavimus, quod in eodem animali plures esse una animæ nequeant, tamen eisdem viribus prædita est, quibus reliquæ aliorum animalium, ut altrice, sensitiva, motrice, appetitoria facultate: quibus & rationem habet, quod præstantius est, adjunctam. Quo fit, ut homo
unus

mus quidquid animalia universa habent, continetur: nimirum facultatem altricem, quā cum stirpibus convenit, ut Plato inquit: sensitivam, motricem, appetitoriam, quas cum brutis habet communes, rationem denique, cujus est solus particeps. Quapropter in definitione superiori anima rationalis à nobis sic est definita, quod ijs partibus constet. Nec ideo, quod tot viribus illa prædita sit, multiplex est, uti diximus, sed una & simplex: ne si multiplex dicatur, in eodem subjecto formas una plures esse sequatur: quod posito axiomati repugnat. Quoniam etiam unam esse, eandemque hominis animam, censemus, eamque viribus præditam diversis, videndum est, in quo illa ab his differat, quomodoque cum iisdem coherere possit. Rationalis quidem anima per se spiritus est quidam, sive intellectus essentia ab omni corporis contagione diversa, ut Plato, Aristoteles, ac religionis Christianæ dogma testatur. Quæ corpori infusa à Deo vires quasdam cum illo communes sortitur: ut altricem, sensitivam, motricem, appetitoriam. Has ipsa ita consequitur, ut earum radicem, & originem in se contineat, effectus verò, & actiones simul cum corpore. Quod ipsum ex dissolutione animi à corpore intelligitur: quoniam influente in ipsum anima, ut in fœtu, hæ omnes, quas retuli, facultates continuò exoriuntur: eadem verò

effluente, ut in morte, pereunt. Idem ex contemplationis & intelligentiæ vi agnoscitur, quia contemplantibus nobis, & quasi à corpore nos sejungentibus, reliquæ facultates à ratione diversæ suspenduntur, aut saltem imbecilliores redduntur: ut alerix, sentiens, motrix, appetitoria: quæ nisi ad vitam tuendam, secus non moventur. Quibus ex rebus intelligitur, vires has à nobis supra relatas ab anima ipsa rationali tanquam à fonte proficisci, quatenus eadem corpori annexa est. Habet alias à corpore diversas omnino actiones eadem anima, ex quibus agnosceas, diversæ naturæ illam esse: ut intelligendi, ratiocinandi, contemplandi quæ vim, quæ propria est animæ à corpore separatæ: Nam cum ratiocinamur, cogitamus, contemplamus, id nullo corporis adjumento facimus, sed animi solâ facultate naturali. Et quanquam Aristoteles nihil in intelligentia esse dicat, quod sensu non sit prius perceptum, id tamen ita intelligendum est, ut notionem nostram in rerum sensu prius perceptarum contemplatione versari dicat, non in eorum, quæ comprehensa non sint: quæ per se intelligi, nisi collatione sensuum factâ, non possunt, exceptis naturalibus animi notionibus, de quibus postea suo loco. Ergo rationalis animæ facultas, quæ sola inest hominibus, & cuius esse particeps eorum anima dicitur, à cæteris
faculta

facultatibus, est planè diversa. Nec enim ipsa sensus est aliquis exterior, cum à corpore aliena sit, sensusque ij omnes corpori sint communes: proindeque illa brutis est denegata. Nec etiam est imaginatio, aut sensus communis, aut memoria, cum ratiocinari, intelligere, contemplari, ceteraque rationis officia diversa omnino ab imaginatione: quæ res solum utrunque æstimat, aut à communi sensu, qui aliorum sensuum imagines comprehendit, aut à memoria, quæ formas perceptorum continet: exequi nequeant. Ex quo sequitur, cum aliæ his animi viribus plures non sint, & ab his ratio diversa existat, eandem propriam hominis esse, & diversæ ab reliquis essentia. Nam & si alijs animantibus vires hæc insitæ sint, atque homini etiam: illis quidem rationis insunt expertes, huic verò participes: & idcirco tota huiusce anima ab illorum anima diversæ esse essentia videtur, quando actionum diversarum diversæ sunt causæ per axioma 14. Hujus præterea animi sedes Platoni esse in cerebro dicitur, quoniam ab hoc omnes non modò sentiendi, sed movendi, intelligendi, memorandique vires nasci videntur: Aristoteli verò per totum corpus animatum, quod ubique uti ratione videamur: id quod Themistius sic interpretatur. Contra ex Sacrarum literarum sententia hominis animam in corde sitam esse

pater, ut his ex locis: Matth. 6. ubi thesaurus tuus, ibi & cor tuum. Et alias: de corde exeunt cogitationes. Ac Paulus 1. Cor. 2. nec in cor hominis ascendit, quæ præparavit Deus: & in alijs locis infinitis. Quando ergo essentia diversæ brutorum animas, atque hominum inter se esse perspicuum est ex utraque; actionibus, viribus, facultatibus planè diversis: proximum est, ut originem, durationem, essentiamque humani animi, quæ intelligi per se nequaquam potest, quantum fieri possit, exponamus; postea enim ejusdem enumerabuntur vires.

DE ORIGINE, ESSENTIA, duratione, partibus humani animi.

C A P. XXII.

QUanquam supra humanum animum unum intelligibilis, & incorporeæ essentia & à Deo genitum initio mundi dixerimus, dum de animi unitate, origine, ac numero generatim disputaremus: tamen eadem ut in hunc locum breviter repetantur, instituta nunc disputationis exigit necessitas. Igitur animam hominis æternam non esse, ut Plato existimavit, atque Aristoteles indicare visus est, de intellectu agente loquens: de quo nos postea differemus: sed genitam à Deo initio mundi, eamque ad imaginem

ginem ejusdem, quatenus incorporea, immortalisque existat: itemque corpori sic annexam esse, ut communes cum eo quasdam vires habens, aliasque peculiare, separari tamen ab eodem possit, constitutum jam sit tum ex superiori disputatione, tum ex hac ipsa. Instituentibus enim nobis ad religionis Christianæ normam omnia examinare, commodissima ratio est, ut è sacrorum scriptorum sententia illa doceantur. Itaque quoniam humanam animam esse unam, antea probavimus, eandemque à Deo in primo homine ad ejusdem imaginem creatam, crearique adhuc in singulis foetibus, idque sacræ litteræ aperte indicent: hoc à nobis in præsentia tanquam exploratum habeatur, quod ne probatione quidem egeat. Doceamus tamen, quæ sit illius duratio, æternane, an caduca, an immortalis. Quæ in re, quid Plato, & quid Aristoteles de immortalitate animorum retulerint, referendum est, ut & eorum duorum sententias noscamus, uti hæcenus instituimus: quando ad humani animi originem, & essentiam explicandam generatim antequam ejus partes enumerem, quæstionem hanc explicari oportet. Plato in Phædone, Phædro, ac libris de rep. multisque alijs in locis animi immortalitatem non hominis solum, sed aliorum etiam animalium probare nititur his ferè rationibus, quas hæc breviter

colligam: quamvis eas in nostris commentariis
 in Phædonem persequi latius simus. Prin-
 cipio animam omnem ante corpora conditam
 idque ab æterno, Platonem putavisse intelligen-
 dum est, ut illius immortalitatem teneatur.
 Cum enim per axioma 21. lib. 2. quidquid prin-
 cipium effectiois suæ habet, habiturum sit
 etiam finem necessario, animam quidem ini-
 tio omni caruisse, Plato existimavit, ut ejus
 etiam finem, & exitum tolletet, sicque ipsius
 tueretur immortalitatem. Quod vero illa prin-
 cipio effectiois suæ careret, in Memone uberi-
 rius Socrates docet, aut nostrum discere, in-
 quit, recordationem esse quandam prioris vitæ,
 quam anima in alijs corporibus habuerit.
 Nec enim ille unquam putavit, notiones has
 animi nostri, ac facilitatem ad omnia ediscen-
 da, & intelligenda, iudiciumque boni ac veri
 nobis inelle potuisse, nisi prius illa mentibus
 inhæssent, quam eadem essent corporibus im-
 mersa. Hoc statim in Phædre, ac libris de rep.
 & Phædone, ceterisque locis sub Socratis per-
 sona immortalem esse animum continetur. At-
 que in Phædre quidem sic argumentatur. Quid-
 quid à seipso movetur, principium est motus
 nis, & omne verò principium æternum est,
 quando origine caret, anima à se ipsa movetur,
 ergo immortalis est, & æterna. Hæc ratione
 fieri Plato vult animam expertem esse mortis,

quo-

quoniam in se motus principium: quod ab ejus
essentia minimè se jungitur: habeat, quod-
que origine careat, quando in se ipsa ha-
beat motionis initium. Cùm autem moveri
à se is dicit animam, minimè illi tribuit mo-
tum aliquem localem, ita ut eadem sese in
orbem torqueat, aut ratione aliâ moveat
(quemadmodum Aristoteles interpretatur, qui
hanc Platonis sententiam reprehendens,
movere quidem animam inquit corpus, ip-
sam tamen immotam remanere, sed quod
perpetua in actione versetur, ut vegetandi,
movendi, sentiendi, intelligendi: quæ actio
Platonis motus, Aristoteli *ἐκ τῆς ψυχῆς* dicitur
quod in ejusdem vocis interpretatione Cicé-
ro videtur significasse. Hanc de animi im-
mortalitate rationem idem Cicero in Tuscu-
lensis, & Plinius acerrimè tuentur. Addit
huic aliam idem Plato lib. 10. de rep. quæ
ferè est hujusmodi. Bonum omne alia potius
conservat, quàm perimit, contra malum per-
imit, nec servat: atqui nullum inest animæ
malum, quod corrumpere ipsam possit, er-
go immortalis est eadem, utpote quæ careat
corruptionis occasione. Nam idem nihil
aut illi adjunctum est, aut advenit aliun-
dem. Adjunctum certè non est, quia ipsa ma-
teria caret, quæ malum est, & mutatio-
ni obnoxia: nec ei etiam advenit extrin-

secus, cum nec à rebus corporeis pati quicquam possit, quibus est ipsa superior, nec ab incorporeis, quibus cum est similis, sequitur ergo immortalē esse illam, utpote omnis corruptionis expertem. Hanc quoq; & huiusmodi alias rationes arget Plotinus in lib. de immortalitate animorum, quas hoc loco referre longum est. Porro in Phaedone Socrates quatuor potissimum rationibus eandem immortalitatem tuctur: primò, quod omnia, quae fiant, cum ex contrarijs fiant, ipsa se mutuo semper consequantur contraria, mortemq; idcirco vitam sequi, & vicissim retrò, utpote inter se contraria. Sic enim fieri putat, ut in eadem animae in corpora commēent diversa morientium, & nascentium animalium. Secundo, quoniam notiones animi à corpore oriri non potuisse putat, nec ab ipso etiam animo, si recens natus esset, sed ab antecedenti aliqua vita, immortalē esse cum concludit, cum initio semper caruerit, proindeque sit sine cariturus. Addidit his tertiam huiusmodi. Nihil sibi ipsi contrarium est, esse verò animam mortalem ejus vitae repugnat: eadem enim vitam animali praeber: igitur est anima immortalis: si quidem ea vita cum sit. mortem nullo modo potest admittere. Postremò sic argumentatur: corpus omne dissolubile est, utpote concretum ex alijs, contra incorporeum, & simplex omne dissolvi

dissolvi nequit: atqui anima certè incorporea est, ergo dissolvi non potest. Hæ sunt igitur Platonis, ni fallor, potissimæ rationes, quibus animi tuetur immortalitatem. At Aristoteles, qui vafer, & lubricus hac in re fuit, adeò ut mortalemne, an immortalem animum faciat, addubites, hæc ea de re sententiam in locis sparsim diversis habuit. Mentem, & intelligentiam agentem, ut ille vocat libr. 3. de animo, & 2. de generatione animalium, divinam esse inquit, & immortalem, Quod ipsum huiusmodi concludit ratione. Si quid animus humanus à corpore diversum habet, id est immortale: atqui intellectus agens extrinsecus advenire videtur, ergo idem est immortalis. Sententiam hanc Alexander Aphrodiseus lib. 2. de anima, & Themistius attripiunt, ut immortalitatem animi ex Aristotelis opinione confirmet: quam ille callide admodum obscuravit, & textit, nisi ex diversis ejus locis, ac verbis eam demum, quam ante posui, rationem concinnare volumus. In hac duorum philosophorum sententia, nullum est apertum discrimen, nisi quòd Plato apertè immortalitatem animi tueri conatur, Aristoteles, & si eam indicavit, obscurè tamen fecisse id videtur. Plutarchus verò, atque alij multi magni viri in eo illos congruere testantur, quòd mentem, atque adeò animi rationalem partem immortalem fecisse ipsi videan-

videantur : sensum verò , atque eam omnem animi vim cum corpore communem , mortalem. Hac ipsa de re cum Philosophis illis nobiscum , id est , cum Christianis id convenit , quod omnes immortales hominum animos esse pariter contendimus : discrimen verò est maximum , quod nec ante corpora exstitisse illos , ut Plato censet , admittimus , nec partem unam mortalem , alteram immortalem existere ; sed eos potius ortum habere aliquem , nihilominus tamen immortalis esse , ut & ratione , & apertis sacrorum scriptorum patet testimonijs. Nam si à corpore habet animus aliquid diversum , ut certè habet intelligentiam , ratiocinationem , aliasque huiusmodi vires , immortalis est profectò , utpote omnis corporea concretionis expertus. Propterea si divinorum capax est idem , ut est , divinaque semper , & æterna consecratur , ea quidem assequetur aliquando : neque enim temeraria est , aut supervacanea ejus cupiditas : proinde que immortalis erit , ut quod optavit , tandem assequatur. Quin etiam si virtus , que naturalis non est , sed natura quodammodo repugnans , quatenus labore acquiritur magno , præmiū expetit aliquod , illud que in hac vita assequi non possumus propter innumerales labores , sed in futura alia præstantiori , relinquitur sanè , immortalem esse animum , quando is post dissolutionem à corpore sejungitur.

tur. Postremo si exempli æterni, quod Plato inquit, imago est æterna, & humanus animus ad imaginem, ac similitudinem Dei factus dicitur sacris in literis, idem etiam immortalis existet, uti Deus ipse: tamen si non propriè, aut per se, sed quatenus ab æterno, illo exemplari est factus. Possunt & rationes aliæ permultæ ad immortalitatem animi tuendam adduci, quas brevitatis causâ prætermitto: præsertim cum tam apertis divinorum scriptorum oraculis res eadem confirmetur: ut apud Esaiam. *Vivent mortui tui, interfecti mei resurgent.* Et apud Daniele. *Et multi de his, qui dormiunt in terræ pulvere, vigilabunt, alij in vitam æternam, alij in opprobrium, ut videant semper.* Et apud Matthæum: corpus occidere possunt, animam autem non possunt. Sed quid pluribus utor? plena sunt sacra scripta multorum testimoniorum, quibus apertè animæ immortalitas asseritur. Hactenus de essentia, origine, immortalitateque humani animi dictum sit: nunc ad ejus partitionem accedamus. Quemadmodum sensus interior in imaginationem, communem sensum, ac memoriam dividebatur: sic anima rationalis, præter illas omnes facultates communes omnibus animalibus, dividitur in mentem sive intellectum aut intelligentiam, quam Aristoteles ὁ νους vocat, Plato λόγος, & ἄλγε-
σιν, in memoriam, & voluntatem. Quorum quidem

quidem in trium facultatum connexione Augustinus similitudinem Dei homines habere inquit, quod divinæ trinitatis imago in ternario illo animalium virium numero expressa esse quodammodò videatur. Et profectò res ita se habet, ut una sit, eademque anima rationalis non modo tribus his prædita facultatibus, sed omnibus etiam superioribus, uti Deus unus est, & trinus. quanquam magnum est, & inefabile utriusque rei discrimen. Harum ergo trium facultatum primum obtinet locum intelligentia, secundum voluntas, tertium memoria: de qua quoniam supra est disputatum unà cum reliquis facultatibus, tantum in hoc loco de illis duabus differimus, initio ab intelligentia sumpto.

DE INTELLECTV, SIVE MENTE, & ejus partibus.

CAP. XXIII.

MENS est animi rationalis facultas, quæ incorporea, corporeaque communia, & singula intelligit, ratiocinatur, contemplatur, dijudicat. Quæ quoniam ab imaginatione, memoria, sensibus, cæterisque animæ viribus fieri non possunt, ex alia quadam facultate, quam vñ Græci sive λόγον, & διανοίαν, nos mentem, & intelligentiam, sive intellectum nomina-

nominamus, proficiscuntur. Nam sensus qui-
 dem singularia tantum, & corporea percipi-
 unt, eaque disiuncta, & incompressa. Præterea
 nullus sensus in id, quod capit, reflectitur, sive
 sensus, se hoc, vel illud cœpisse nescit. At in-
 telligentia & communia capit, & singularia,
 ut homines omnes, ac Socratem: & corpo-
 rea, & incorporea, ut stirpem, animal, lapi-
 dem, genios, animos, Deum: & in se ipsum
 reflexus intelligere se, aut scire quicquam in-
 telligit: & his aliud insuper majus habet, quod
 notitijs quibusdam rerum omnium, quas Plato
 ideas, cæteri *ἐννοίας* vocant, Latini notiones, seu
 notitias, præditus est, quibus omnia quasi luce
 illustratus percipit. Porro intellectus origo, sive
 sedes, quam *ἡγεμονικὸν* nominant, in ipsa ratio-
 nalis animi sede est, quæ ut capite dictum est
 esse supra ex Platonis sententia, ita nunc intel-
 ligentia ibidem esse dicenda est. Huius præterea
 objectum non est præfinitum aliquid, veluti
 color aspectus, vox auditus, sapor gustus, sed
 quidquid in rerum natura est, quod τὸ ὄν Græ-
 ci, nos ens appellamus. Itaque ut ens latissime
 ad omnia, tam incorporea, & cœlestia, quam
 ad corporea, & mundana patet, sic intelle-
 ctus per eadem diffusus, quidquid est, compre-
 hendit, licet alia alijs melius. Ratio autem, ac
 modus, quo mens omnia percipiat huiusmo-
 di videtur esse. Primo res singulas extra nos
 positas

positas sensibus comprehensas communis sensus excipit, & conjungit, imaginatio componit, ac discernit; memoria amplectitur, intelligentia dijudicat, & discernit: ex his communia quadam alia elicit, quæ communes formæ Latinis, Platoni autem ideæ nominantur. Ex mutua ergo horum communium cum singulis collatione, & comparatione res inter se discernuntur: ut similia à dissimilibus, bona à malis, vera à falsis, essentia ab accidentibus: aut convertuntur rursus, ut similia cum similibus. Huic dijudicandi virtuti præstò adest ratiocinatrix facultas, quæ communibus illis rerum notitijs animo nostro insculptis adjuncta considerat cuncta diligentius, causas, & effectus inquirat, alia ex alijs deducit, & annectit, per omnia denique diligentissimâ inductione progreditur, ita ut si velit rectè intentæ esse suo muneri, nec erret, nec decipiat: ut solet tamen, si minùs diligens fuerit. Hæc est ratio communis intelligendi, percipiendique singula: ex qua opinioniones, cognitiones, scientiæ, perceptionesque rerum omnium nascuntur. Quibus ex rebus intelligitur, varia esse, multipliciaque mentis officia: quæ postea suo loco enumerabimus, si prius partes ejusdem comprehenderimus, ut officia rectius singularum, & ratio intelligendi noscatur. Mentis igitur humanæ Aristoteli duæ partes esse dicuntur, (nam Plato nullam ejusmodi

modi fecit divisionem, sed mentem unam esse, ac diversis præditam viribus dixit: Aristoteles vero primus pro actionum varietate illam distinxit) una, quæ intellectus agens, altera, quæ intellectus patiens, sive possibilis nominatur. Harum partium utriusque diversa ille officia, & actiones describit quas sigillatim ut explicemus, de intellectu agente dicendum imprimis est. Intellectus agens Aristoteli dicitur animi rationalis facultas, quæ res oblatas discernimus, & consideramus, quæque omnia vel intelligimus, vel cogitamus. Nam cum humanus animus sæpe in rerum multarum inquisitione, iudicioque, & distinctione versetur: quatenus quidem agere id dicitur, agens intellectus appellatur, quasi vim suam in rerum imagines exercens. Et ut objecta corpora intueri oculis non possumus, nisi externâ lucē aeris adjuvemur: ita menti humanæ agens intellectus quasi lux quædam naturalis inest, quæ omnia noscit, discernit, dijudicatque. Vnde Aristoteles, cum in anima rationali hanc vim efficacissimam intelligendi, & discernendi omnia esse videret, intellectum agentem primus, ut Alexander Aphrōdiseus testatur, attulit, quoniam ab imaginatione videbat non posse hanc vim intelligendi ad ipsum intellectum proficisci, qui nullo esse certo in loco collocatus, uti imaginatio, videtur: quando corporeum nihil percipit, quapro-

pter in parte aliqua corporis tanquam in proprio sensorio existat. Ergo si à sensibus hæc vis cognoscendi, & intelligendi omnia proficisci non potest, cum iidem potiùs ab objectis perpetiantur, nec ab imaginatione, aut facultate alia quavis, quæ præscriptum habeat sensorium: relinquitur, esse aliam vim quandam veluti lucem quæ non modò omnia cognoscat, & intelligat. Sed lucem etiam, & vim reliquis facultatibus afferat: quam intellectum agentem ab agendi vi in imagines rerum appellant. His ferè, atque alijs huiusmodi rationibus intellectum agentem inducit Aristoteles: eumque in anima, tanquam splendorem quandam divinum, immortalem, ac extrinsecus advenientem ponit. Quem ipsum Peripatetici quidam Deum, alij verò unum, & eundem in omnibus hominibus esse putavere: quorum errorem Themistius eleganter infirmat, ne opus sit, à nobis deinde hic refutari. Intellectus porro agentis officia esse ab Aristotele dicuntur: efficere, ut res à materia separata, & intelligibiles actu intelligantur, id est, verè, ut sunt, percipiantur: tum cum semper, & sine aliquo discursu intelligere, utpotè qui merus actus existat, quatenus mens assiduo labore agitur. Ab hoc ergo intellectu verè hominem rationis dici participem, in id ipsum nihil aliud esse, quàm agentem intellectum existimat: quoniam hæc vis
tam

tam agilis, & perspicax soli ei ex animantium
 omnium genere data animam verè rationalem
 efficiat: à qua etiam ratiocinandi, intelligendi,
 dignoscendique facultas, & actio nascitur. Hæc
 igitur est Aristotelis de agente intellectu sen-
 tentia paucis comprehensa. At Plato quan-
 quam humani animi partem esse quandam im-
 mortalem dicat in Timæo, alteram mortalem;
 atque illam quidem à Deo summo natam, hanc
 à Diis junioribus, quatenus, alligata corpori sen-
 sibilem hanc vim animæ procreet, quæ cum cor-
 pore mori videatur, idque nos sæpe in his dixe-
 rimus: tamen divisionem ejusmodi intellectus
 nullam, si rectè memini, fecit, sed eam pri-
 mus, ut ait Aphroditeus, induxit Aristoteles.
 Themistius verò è Platonis sententia intelle-
 ctum agentem statueret, quod per eam ani-
 mi partem divinam, & intellectilem, atque
 immortalem Plato intellectum agentem signi-
 ficare videatur. Quod quidem ut Aristotelis
 sententiæ non repugnat, ita etiam minime con-
 gruit. Quocirca relinquamus hanc Aristoteli
 de agente intellectu inventionem, quam for-
 te Plato si non attingit, saltem inscriptis suis
 nusquam ostendit: & Themistij sententiam
 prætermittamus. Restat altera intelligentiæ
 pars, quæ possibilis appellatur. Hæc ita defini-
 tur. Intellectus possibilis, sive patiens, est il-
 la mentis facultas, in quam imagines ab agente

intellectu dijudicata recipiuntur, tanquam in
materiam: Nam cum in eadem hominis men-
te aliud agendi sive intelligendi per se omnia
vi præditum, aliud intellectas res percipiendi
videamus, agentem, & patientem intellectum
ponimus: illum quatenus agimus, sive intelli-
gimus: hunc quatenus intellecta recipimus.
Quod autem potestate sit aliquis intellectus,
qui rerum in se formas ab agente impressas co-
cipiat, hanc probat Aristoteles, quod ut in sen-
sibus aliud agit, aliud patitur, neque pati om-
nia, aut agere possunt, ita in intellectu aliud
agere necesse est, aliud vero pati. Id ex rerum
natura facilius intelligitur: quoniam si intel-
lectus omnium intelligibilium capax est, nec
ea in se actu continet, sed potestate, quatenus
diversa capere potest: certe illud ipsum, in
quo inest recipiendi potestas, intellectus pa-
tiens appellabitur. Hunc ergo intellectum po-
tentiae ab agente differe inquit Aristoteles, quod
hic tanquam efficiens causa, & splendor animi
sit: ille, ut materia, & res illustrata: quodque
ille nihil intelligere, aut percipere possit, ni-
si ab hoc informetur: postremo quod alter,
veluti communis sensus exterioribus sensibus
viro tribuit sentiendi, ita tribuat alteri vim re-
cipiendi formas a seipso intellectas. Quo-
circa utrinque inter se distinctum esse inquit,
ac diversum, non modo dignitate, sed etiam

tempore. Nam agentem intellectum patient ait esse prestantiorem, patientem vero prior rem tempore, id est illo prius homini tributum quatenus humanus intellectus initio nihil est aliud, quam potestas quaedam nuda, & tabula rasa per similes, in quam postea per doctrinam, & institutionem variaz rerum forme imprimantur: quatenusque actu semper prior est potestas. Nec id ab re Aristoteles existimavit, cum idem nullas rerum notitias animis nostris ingenitas esse, sed acquiri assidua intelligentia, putet ex qua habitus quidam intelligendi comparetur, qui ipsi intellectus habitus dicitur, & cum intellectu potentiae confertur; quoniam ille ab actione agentis in patientem efficiatur ex intellectu potestate. Eundem porro patientem intellectum immortalem quoque existere, ac impatibilem, & extrinsecus advenientem, sicuti agentem, existimat, idque illi ascribit manifestè Themistius. Et quanquam patientem agente priorem dicat esse, intelligendum quidem ita est, ut una, & eadem intelligentia homini adveniat extrinsecus, quæ lucem quandam, & splendorem habeat naturalem, quo omnia dijudicet, & cognoscat: eadem tamen minime exercitata sit, ne ullas habeat rerum formas. Itaque quatenus menti lux illa inest efficax in rerum imagines, intellectus agens dicitur: quatenus

sensus, verò eadem propter animalis novita-
 tem, & imperitiam, quod tamen formas ali-
 quas potest percipere, ac paulatim percipit,
 dicitur patiens, sive potentia: quatenus deni-
 que potentia ista paulatim completur, formis
 adeptis intellectus habitu nominatur. Atqui
 hæc est tota Aristotelis de agente, ac patiente
 intellectu sententia, quam ita oportet intelli-
 gere, ut ille humanam mentem ab otu ho-
 minis nihil aliud habuisse dicat, quam lucem,
 & efficaciam quandam ad res intelligendas,
 eam tamē nudam, ac in vacuum rebus intellectis,
 quas habitu postea assequitur. Addunt his alij
 divisiones alias intellectus, quæ omnes ab illius
 officijs, & actionibus petuntur. Nam intel-
 lectum aut practicum, aut speculativum esse
 dicunt: practicum quidem eum, qui res agen-
 das, fugiendasve intelligat: speculativum, qui
 res noscendas, aut ignorandas. Et cum duæ
 sint humanæ menti rerum notiones in sculp-
 tæ, altera boni, alteraque veri: è quarum illa
 iudicium virtutis, ac vitiorum, ex hac veri, ac
 falsi nascitur: eam sanè facultatem, quæ quid
 bonum, quidve malum sit, intelligimus, in-
 tellectum practicum vocant, quod ad actio-
 nes humanas ejus officium pertineat: illam
 autem, quæ quid verum, & quid falsum sit,
 speculativum, quod in rerum cognitione ver-
 setur. Atque ex his sanè duabus intelligentiæ
 viribus

viribus tota nascitur philosophia. Nam ab intellectu practico moralis oritur, quæ in vitæ actionibus est posita: ab speculativo naturæ philosophia, atque adeò vis omnis noscendi, atque sciendi. Verùm hæ duæ intelligentiæ partes non verè sejunctæ, sed ratione quâdam, putandæ sunt: quandoquidem uno, & eodem intellectu & res agendas, & verum, aut falsum intelligimus, sicuti sensibus varia rerum objecta suscipimus. Iam alij intellectum partiuntur in eum, qui actu, & illum, qui habitu sit. Intellectus actu nihil est aliud, quàm ipsa mentis vis intelligendi: quæ omnibus inest æquo, sive alicui intelligentiæ sint intenti, sive nullæ. Intellectus habitu est is, qui ex usu, institutione, doctrinaque paritur, qualis est ea facultas, & agilitas doctorum, ac peritorum, quam adepti sunt contemplatione, aut experimento. Atque ex illo habitus intellectu quinque habitus oriri censent, duos speculativos, quorum finis est scire, alterum nimirum noscendi rerum initia, quibus ut veris mēs acquiescit: ut omnem ignem esse calidum: alterum cognoscendi cōclusiones ex initijs illis deductas: duos etiam alteros practicos, quorum finis sit actio, unum videlicet agendi, qui sit prudentia: alterum fabricandi, & efficiendi, qui ars: quintum deniq; illis communem, continentemque non modò usum, & experimentum rerum, sed

etiam doctrinam, qui sapientia dicatur. His aliam addunt. divisionem pro rerum intellectarum forma: ut intellectus vel sit simplex, vel compositus. Intellectum simplicem eum vocant, qui res simplices intelligat, ut quid sit homo, quid essentia, quid accidens, compositum verò illum, qui compositas, ut hominem esse rationis participem, equum, ac bruta omnia illius expertia. Postremo intellectum eundem alij in universalem, ac singularem & in concretum, & abstractum dividunt. Universale nominant illum, qui res intelligit universas: ut homines omnes esse animalia: singularem eum, qui singulas: ut Socratem hominem existere: concretum etiam illum, qui res concretas, ut sunt, cognoscit: ut ipsum animal corpore, animaque compositum: abstractum eum, qui res à se invicem disiungit: ut simplicia intelligat, ut accidentia à substantia, formas à materia sejungat. Alias quoque his addunt divisiones, quas persequi accurate, laboriosum est, & inutile: cum earum pleraque otiosæ sint. Si enim totidem essent intellectus formæ ponendæ, quot sunt rerum intellectarum, nullus esset partium finis, ac modus. Sed tota quidem isthæ divisionum multiplicitas ex ea Aristotelis opinione nata est, quod putat intellectum quodammodo esse res omnes intellectas: quoniam ut suapte natura ille nudus est formis rerum omnium,

omnium, & quasi tabula quædam rasa, ita ex intelligentia rerum perceptarum tandem confirmatur & perficitur: siquidem ejus naturalis potentia, & facilitas intelligendi rerum intellectarum præsentia completur, & verus fit intellectus. Sed hæc quidem Aristotelis sententia quàm sit absurda in sequentibus explicabitur. Hactenus ergo quæcunque dicta sunt, ex Aristotelis opinione sunt dicta, non ex Platonis sententia, qui, uti antè dixi nullam ejusmodi fecit intellectus distinctionem. Christiana quoque disciplina multò eam minùs facit, quæ unam solam, & eandem esse censet hominis animam, ac mentem, sive spiritum: à quo multæ actiones, & vires diversæ profisciscantur.

DE INTELLECTVS DOTIBVS, actionibus, & officijs.

CAP. XXIV.

Omissis igitur longis disputationibus, quæ circa hanc rem occurrunt, ne lectorem molestâ, & obscurâ prolixitate obruam, officia demum, ac doctores, actionesque humanæ mentis describam. Primum id ex præcedentibus constar, mentem esse animæ rationalis partem præcipuam, à qua & ipsa anima, & homo nomen sortitur rationalis, quæque omnes animantes longè superet. Hæc simul cum tota

anima, non uti pars ejus diversa, quemadmodum Aristoteles, & Plato sentire videntur, sed ut facultas quædam ipsius propria à Deo est infusa corporibus, sicut Christiana docet religio. Nam si anima est essentia quædam, uti antea ostendimus, & intellectum esse illius vim quædam, & potestatem constat, certè unà cum anima idem natus existet; imò ab ea minimè diversus, aut alienus erit, nisi quod actio illius est essentio. Quod autem intellectus facultas sit solum animæ, ac non ipsa animæ essentia, manifestè docent visa, & omnia, quæ intelliguntur: quæ vel corporea, vel cum vestigijs corporæ substantiæ duntaxat intelliguntur. Contra fieret, si intellectus purus esset anima, cum per se omnia incorporea, ut sunt, intelligere, sine corporearum formarum vestigio facile posset: id quod facere potest, siquidem nec seipsum intellectus, nec genios, nec Deum capere, nisi eodem modo, quo materiam, id est, secretionem formarum corporearum potest. Quæ cum ita sint, nec intelligibilis essentiæ per se est mens, ut Plato arbitratur; antequam in corporea descendat, posteaque contagionem illam corporis assequitur: nec in animam aliundè provenit tanquam lux quædam divina, ut censet Aristoteles: sed facultas est animi rationalis, vivacior quidem, & purior cæteris omnibus, sine quibus tamen per se nihil intelligere, aut capere valens:

valens: quandoquidem omnia, quæ mens comprehendit, aut à sensibus percepta sunt, aut collatione quâdam cum illis factâ, comprehenduntur. Adhæc tamen adjungenda sunt illi dotes quædam naturales, quibus omnia facile comprehendit, non modò artes, quatum in nobis nata sunt semina, & scintillæ, sed reliqua omnia, quæcunque sciri ab homine possunt. Dotes has *νεκρας & νοίας* Græci, nostri communes notiones: sive notitias appellant, quales sunt sententiæ quædam omnibus animis à natura ingenitæ, itemq; promptitudo, & facilitas percipiendi quascunque res oblatas. Has ipsas dotes & Plato, & Aristoteles, & alij ferè omnes Philosophi agnoscunt, ac tradunt, sed ratione plane diverta. Nam Plato in Menone, atque in alijs locis, cum animas ante corpora dicat extitisse, has mentis notiones ex priori illa vita adeptas esse inquit, non tunc, cum nati sumus, unà exortas. At Aristoteles in libris Analyticorum posteriorum nec ante corporis hujus vitam ingenitas fuisse nobis illas permittit, nec unà cum corporibus, sed paulatim institutione, & doctrinâ comparari. Itaq; promptitudinem assentiendi veris in animo ponit, evidentiam verò, & actum assentiendi in ipsa rerum oblata perspicuitate. Harum sententiarum nulla vera est, si divinis scriptis adhæreamus: neque enim illæ notitiæ ante corporum animationem

tionem mentibus insitæ fuere, quod Plato arbitrat: nec institutione, aut doctrinâ comparantur, quod Aristoteles: sed unâ cum animis sunt: à Deo simul genitæ. Hoc docet Paulus perspicuè ad Romanos scribens, cum gentes sine lege dicit peccare, quatenus legem illam, naturæ cunctorum mentibus insculptam, violant, quæ illis lex esse debuit firmissima. Quin Stoici, ac Cicero, Philosophique alij permulti ostendunt, notiones omnes nobiscum esse natas, non usu incorporatas: quandoquidem eas in pueris, imperitis, hominibusque usu omni rerum carentibus intuemur. Verùm hac quidem de re neminem tam ineptum judico, qui dubitare possit. Ex omnibus autem his notiis rerum duæ sunt præcipuæ: quibus ut fontibus universam Philosophiam oriri supra retulimus. Una est, quâ bonum, malumque discernimus, natura duce, altera, quæ verum, ac falsum. Hæc actuum omnium, quæ circa contemplationem, inquisitionemque veri versantur, illa virtutum, ac vitiorum, & actionum omnium radix est. In quàm sanè divisio illa intellectus, quàm faciunt nonnulli: ut ejus pars una conscientia, altera synderesis, existat: incidere mihi videretur. Nam utraque res intellectui propter notiones ipsas inest, ac synderesis, & conscientia in ea mentis notitia, quâ verum, aut falsum discernimus collocatur, non pars aliqua ejusdem
mentis

mentis est. Ac synderesin quidem recentes theologi vocant communem quandam mentis notitiam, quæ bonum, aut malum discernit generatim, quæque legi Dei acquiescit: conscientiam verò minus communem, quæ utrunq; etiam discernat, sed malum præsertim. Itaque cum quid sit bonum, aut quid rectè agendum præscribit mens hominis, illud nominant Synderesin, cum verò quid malè sit actum, eadem exprobrat, conscientiam. Sed hanc profecto distinctionem nec Paulus ea de re loquens fecit, nec Latini admittunt, qui conscientiam in utranque partem vel bonam, vel malam capiunt. Sunt & aliæ humanæ mentis dotes à superioribus non admodum discrepantes: quæ quoniam actiones habet diversas, diversæ quoque illius facultates appellari possunt. Cujus generis sunt ingenium, judicium, agilitas, & perspicacitas ad omnia ediscenda. Hæc omnibus hominibus eadem non sunt, nec æqualia non ob animæ vim, vel majorem, vel minorem: quæ eadem est semper, quod ad ipsius essentiam: sed propter corporis temperationem diversam, quam illa sequitur. Omnino autem calida, & humecta corporum temperatio ad ingenium, celeritatem, perspicacitatemq; discendi, & intelligendi conducit: quoniam illa propter agendi vim, hæc propter tenuitatem, ac recipiendi in se quidvis facilitatem ingenium, & agili-

& agilitatem mentis exacuunt. Contra usu venit siccis, & frigidis hominibus, quorum illi propter ariditatem hebetes, ac rudes sunt, hi propter gravitatē stupidi. Accedunt & aliæ per-
spicacis intelligentiæ causæ, quæ longiorem
postulant explicationem: ut institutio, educatio,
victus, natale solum, aëris temperies, exercita-
tio, aliaque id genus innumerabilia, tum pecu-
liaria cujusque hominis studia, & ingenia, quæ
vel ad hæc, vel ad alia magis nata sunt eadem
ob causas: quas tamen astrologi suis adscribunt
syderibus, nos Dei auctoris providentiæ, & con-
silio. Accedamus jam ad actiones intellectus
exponendas. Humana mens præterquam quod
perpetua sciendi auditate tenetur, quod mirabili
celeritate, sagacitateque omnia intelligit, & in-
vestigat, quod seipsam intelligit, quasi motu
quodam reflexo, qui Platoni rotundus, & pro-
prius esse mentis in Timæo dicitur, quodque
divinā quādam vi, ac similitudine auctoris Dei
cuncta persequitur, & penetrat; tamen in in-
telligendo, quod ejus est proprium munus, vel
simplicia noscit, vel composita: simplicia ea
nomino, quæ rem unam tantummodo signifi-
cant, & unum sunt: ut homo, essentia, virtus,
Deus, & alia quæcunque in categorias inci-
dunt. Composita illa, quæ multa & significant;
& complectuntur: ut hominem esse rationis
participem, substantiam rerum ab accidentibus
diver-

diversam esse, aliaque generis ejusdem, quæ inductione: ratiocinationeque animi cognoscuntur. In harum ergo rerum genere duplici magnam vim habet mens hominis, unaque ferè intelligendi ratione utitur in ijs. Nam è singularibus rebus communia quædam eliciens, & utrarumque comparatione facta, tam singula, & simplicia, quàm communia & composita cognoscit. Intelligit quidem mens eum, quem oculi viderint, hominem esse, hunc leonem, illam stirpem, cernitque singulorum naturas, causas, vires, differentias, propria, accidentia. Noscit etiam, quid rectè, quid malè, quid consentaneè, quid ineptè dictum, factumve fuerit. In ijs verò noscendis diversâ utitur ratione. Nam quatenus singula per se considerat, simplici utitur intelligentiâ, quatenus communia, & concreta, sive composita ex illis, composita. Quæ ex re nascitur illa, quæ solis hominibus data est, ratiocinandi vis, quâ antecedentia cum sequentibus conferimus, conjectamur, prævidemus, similia cum similibus comparamus, dissimilia discernimus, consultamus, deliberamus, judicamus, examinamus, loquimur, reliqua demum agimus, quæ sunt rationis propria. Hinc etiam proficiscuntur dicendi artes, quas Græci λογικαί, id est, rationales nominant: ut Grammatica, quando sermonis puritatem consideramus: Dialectica, quando veritatē, & probabilitatem, Rhetor-

Rhetorica, quando elegantiam, & ornatum:
Ex eodem item fonte Mathematicæ artes ori-
untur: ut Geometria, Arithmetica, Perspectiva,
ceteraque alia, quæ contemplatione mentis
usæ ratiocinatione, ac demonstratione perfici-
untur: Hinc Physices, ac totius demum Phi-
losophiæ disciplina habet ortum, quatenus illa
mentis indagatio, & ratiocinatio ad investigan-
das, noscendasque rerum causas, effectus, prin-
cipia, accidentia, naturas, ceteraque alia hujus-
modi sese applicat. Vim istam mentis tam pro-
videntem, & sagacem varij effectus consequun-
tur, quibus in omni vita utimur tanquam ne-
cessarijs: ut cognitio, opinio, persuasio, scien-
tia, fides, sapientia. Quæ omnia veluti quos-
dam per gradus ab intellectu aduntur, com-
muniæque sunt singulis fere vitæ actionibus, &
utibus, prout ab eodem intellectu vel ad actio-
nem, vel ad contemplationem referuntur.
Nam cognitio certe prima fit à sensibus, imagi-
nationeque, & intellectu, quoquomodo re ali-
qua percepta, cum sine delectu, & examinatio-
ne aliquid comprehenditur (sumitur autem à
me cognitio in hoc loco, non pro quacunque
cognitione, sed pro illa, quæ fit ab animo pri-
mum sine alia diligentiori rei examinatione.)
Hujus generis sunt omnia fere visa, quæ nobis
sese primo offerunt, quæque notitia quâdam
incerta, & vaga comparantur, quæ vel cum
brutis

brutis etiam communia nobis sunt. At cum eadem cognitio diligentius examinata ab imaginatione, & intelligentia animo inhaeret, tamen ut dubitatio restet aliqua, quæ notitiam efficiat imbecilliolem, opinio appellatur: quæ firmior quidem est cognitione, imbecillior tamen scientiâ. Vnde à Themistio eadem definitur assensio quædam cum ratione, quoniam aliquid ab imaginatione, aliquid ab intellectu habet: ab illa quidem assensum, ab hoc firmitatem, ac persuasionem. Hanc ob causam Plato imaginationem nihil aliud esse quàm sensus, & opinionis complexionem, quandam putat: Itaque nihil aliud esse opinari, quàm hoc sentire, atque ita esse opinari. Sed huic Platonis sententiæ & Themistius subtiliter refragatur, & nostra de imaginatione sententia supra explicata. Cum opinione persuasio, & assensus maxime conjuncta sunt, illa, quæ sæpe falsis ex causis suscepta ab imaginatione, & intellectu est: hic, qui ab imaginatione. Ita fit, ut eadem quasi certis in animi sedibus collocari posse videantur: cognitio nimirum in sensu communi, & imaginatione: assensio in eadem imaginatione: opinio media inter imaginationem, & intellectum. Longè ab his diversa est scientia, & sapientia, ac fides, quæ solo sunt in intellectu: cum tamen à cognitione, opinione, assensu, ac persuasionem fiant plerunque. Nam cum

id, quod opinione quâdam infirmâ notum erat, acuratiùs mens perspexit & examinavit inducendo, conferendo, ac pensitando: si eidem ira inhaereat, ut nulla restet dubitatio, quæ notitiam rei infirmare, & labefactare possit, scientia paritur: cujus id est proprium, quod nullam habet dubitationem, aut infirmitatem. Quod si verò eadem scientia humanæ menti penitus infideat, & quasi habitum inducat, ne quidquam ad sui perfectam notitiam desit, sapientia nominator: quæ rerum intelligibilium, atque æternarum ab Aristotele, ac Platone esse dicitur, quæque sola in intelligentia collocatur. His adjungenda est fides illa, quam habent Christiani, quæ propter sui stabilitatem quasi scientia quædam appellari potest. A qua diversa est illa vulgaris persuasio, & crudelitas de re aliqua, quæ infirma cum sit, opinioni respondet. Hactenus de intelligentiæ dotibus, officiis, actionibus, & effectibus generatim sit dictum: nunc ad voluntatem, & ejus explanationem properemus: quæ secunda est humanæ mentis pars, omiſſâ memoriâ, & recordatione, de quibus supra disseruimus. Hac in re nullum est Platonis ab Aristotele discrimen, præter illud, quod obiter supra indicavimus, multoque minùs à nostra religione, quæ quod rationi congruit, & experimento, non rejicit.

DE VOLUNTATE.

CAP. XXV.

Quoniam de voluntate hominis in hoc loco dicendum est, ut ordine tractatio hæc progrediatur, animadvertendum est, voluntatem hanc à nobis capi pro ipsa facultate naturali, quâ volumus, non pro re, quam volumus, aut pro volitione ipsa, ut sic loquar. Aliud enim est mentis facultas, de qua hanc agere instituimus, aliud illius actio, & effectus. Voluntas ergo in homine, est rationalis animi appetitus, quo liberè quidquid in nobis est, volumus. Hæc, uti antea retulimus, appetitioni sensitivæ animalium reliquorum respondet. Nam quod in ijs est appetitus movendi, agendive quicquam, in homine voluntas nominatur: quoniam in hoc vel appetitio rationi minimè vacat: cum si tota ejus anima rationalis est, & ipsius quoque actiones ratione non carent, quemadmodum Aristoteles tertio Ethicorum libro testatur. Eadem præterea libera est ad agendum quidquid vult, vel ad non agendum, ut Plato, Aristoteles, ac ceteri Philosophi asserunt: quoniam in nobis, hoc velle, aut nolle facere, aut omittere positum sit, vel actionem etiam intermittere. Eiusdem objectum est, quidquid ab homine fieri potest, non quidquid ille velit, aut

M m 2 cupiat.

cupiat. multa enim expotere possit, quæ humanam superent naturam: ut divinitatem, pernecitatem corporis ad volandum, aliaque generis ejusdem. Et quando eorum, quæ agimus, alia liberè omninò fiunt, alia secum afferunt vim aliquam: illa quidem solutæ, ac liberæ voluntatis sunt propria, ut velle hostem fugere, patriam tueri, amicis consulere, aliaque hujusmodi, quæ solâ voluntatis inclinatione expectuntur: hæc verò sunt voluntatis ejusdem aut sese cohibentis, aut inferioribus animæ facultatibus imperantis, aut ab alia vi externa cohibetæ: ut pericula aggredi, mortem pro patriam subire, simulare aliquid, quod nolimus, aliaque sexcenta, quæ sunt voluntate non omninò libera. Quapropter voluntatis liberæ indicia sunt, laudem, aut vituperationem sequi, delectum actionum habere non posse. Omninò autem voluntarium omne à principio agendi libero dicitur, non ab eventu, qui fortuitus plerunque est. Incidunt in hanc rem permulta, quæ partim voluntaria sunt, partim coacta de quibus satis in libro de moribus disputavimus: quæ mixta ex utroque genere sunt. Quæ quidem quoniam ad vitæ actiones pertinent, à Physicis aliena sunt, ideoque hoc in loco prætermittenda. Voluntati adjuncta est electio, quam *προαίρεσις* Græci vocant. cujus vis est posita in discernendis, dignoscen-
disque

disque ijs, quæ à voluntate expetuntur. Nam voluntas quidem est finis expeditio : electio verò consultatio de ijs, quæ ad finem pertineant. Et ideo intellectui electio videtur adjungenda, ut media inter illum, & voluntatem. Atque etiam voluntas per se quidem aded libera, & soluta est, ut nulli aut rationi, aut appetitui subjecta sit, præterquam Deo : modò enim imaginationem, modò rationis iudicium sequitur : tamen si imaginationem amplectitur, in vitia, & affectiones multas incidat, necesse est : si verò rationem, minimè. Quoniam imaginatio cum corporis naturam sequatur, impetus, & affectus excitat varios, ad quos invitat voluntatem. Ratio autem recta cum iudicio cuncta dignoscat, & consideret : bona semper consilia, & monita proponit, ad quæ voluntatem ipsam allicit, ut rectè agat, & à malo fugiat. Ex hac voluntatis libera propensione in utramque partem, & imaginationis ad malum proclivitate, mentisque ad bonum repugnantia illa rationis cum appetitu nascitur : in qua virtus animi cernitur, aut vitium. Huc etiam pertinet consilium, quod nascitur ex consultatione. Nam cum intellectus de ijs, quæ fieri debeant, consultat, & delectum habet, id demum quod, consultatione habitâ, apud se elegerit, quodque agendum voluntati præscripserit, consilium appellatur. Quod ipsum

quia ab imaginatione dari potest: temerarium tamen, sicuti certum à mente: malum esse, vel bonum potest. Atque hæc sanè de voluntate breviter hoc loco; ne plura, quæ à disputatione hac aliena sunt, adducamus. In his Plato, & Aristoteles, Philosophique cæteri exceptis Stoicis: ferè consentiunt: quid verò ab ijs nostra religio dissentiat, deinceps ostendemus.

DE LIBERO ARBITRIO.

CAP. XXVI.

Magna sese nobis hoc loco, difficilisq; offert questio de libero arbitrio nō solum à Philosophis omnib. olim agitata, sed à Theologis etiā nostris hoc tempore. Qua de re ut breviter, & quid illi senserint, & quid sentire nos oporteat, exponam, quid sit arbitriū liberum, & in qua animi parte positum videamus, Philosophorumque illorum sententias subijciamus. Quid liberum arbitrium, quod Græci *δουλεύσιον* quasi aliquid sui juris appellant, est, *libera quedam voluntatis facultas ad actiones humanas.* Nam eadem illæ omnes actiones, quæ in voluntate nostra libera sunt, libero etiā arbitrio subijciuntur: & quidquid à voluntate libera fit, à libero fit etiā arbitrio. Quò fit, ut illa voluntatis agendi libertas liberum dicatur arbitrium: quasi facultas quædam illius propria.

Et

Et quidem ut voluntas est menti adjuncta, ita liberum arbitrium, & ut illa imaginationem sequi, aut rationis consilium potest, sic etiam istud. Dubium est tamen quatenus, aut quomodo liberum idem arbitrium existat, cum tot sint animi perturbationes, ac vitia, quæ conturbare, atque infirmare illud videantur. Stoici quidem omnia ut fato subijcerent, voluntatis etiam libertatem sustulere. Contrà ceteri Philosophi, ut Plato, & Aristoteles omnino esse liberum arbitrium voluere: quod ex causarum divisione ostendebant. Quoniam enim, ut nos in primo libro docuimus, alia naturâ fiunt, alia necessitate, alia providentiâ, alia arte, alia fortunâ, alia voluntate, nullæque his plures efficientes causæ sint, certè quando ea, quæ ab homine fiunt nullo ex eorum causarum genere sunt, sed voluntate solum, libera esse omnia concludunt. Addunt his argumenta alia de legum observatione, de agendi libertate, de electione, consultatione, consilio, periculorum fuga, aggressione, alijsque permultis, quæ nostræ voluntatis confirmant libertatem. Quæ omnia accuratè Aristoteles lib. 3. Ethicorum complexus est. Eadem ferè Plato diversis in locis tractat, nisi quod in Timæo, ac libris de legibus homines non sponte malos fieri inquit propter repugnantiam illam rationis cum appetitu corporeo, quam voluntas sæpe sequi-

tur ab affectibus quasi cohibita, sed huic nos opinionioni alio loco plura respondimus, nec opus est, eadem ut inculcentur. Reliquum est ergo, ut doceam, quid de libertate arbitrij Christiana censeat doctrina. Duæ sunt in hac parte opiniones diversæ, una Pelagianorum, altera recentiorum hæreticorum. Illi à nobis omnia fieri posse, quæcunque in humanas actiones, cadant asserbant: ut virtutes assequi, vitia fugere, Deo placere, aut obsequi. Hi rursus nihil per nos, nisi malum ipsos agere posse contendunt, itaque in rebus mali, aut civilibus agendi tantummodò libertatem in utranque partem nobis concedunt; in ijs verò, quæ ad Dei obsequium pertineant, planè nullam, sed omnia Dei præsidio, & beneficio referunt accepta. Ex hisce duabus sententijs nulla vera est, ut à multis magnis viris, qui eam rem accuratè tractarunt, est doctè disputatum. Nam si omnia nostris viribus adimamus, Dei etiam tollitur erga nos beneficium, & merita de humano genere per Christi mortem redempto. Si etiam nihil nobis tribuamus, frustra Deum præcepisse tam multa dicemus, injusteque nos ab eo puniri, cum ob delicta punimur. Quocirca nos mediam sententiam amplexi in omni bona voluntate, atque opere divinam agnoscimus gratiam: Deus enim est, is, qui Paulo auctore, in nobis velle, ac perficere operatur

pro bona ipsius voluntate : sic autem in nobis bonum omne incipit, ac perficit, ut nequaquam liberum tollatur arbitrium. Cujus rei copiosiore[m] explicationem Theologis omittimus. Veruntamen hac de re satis, prout loci huius ratio postulat. Complexus sum in his quinque libris perspicuè, & breviter, ut ego quidem arbitror, universam naturæ Philosophiam, quæ in rerum naturalium initijs, causis, accidentibus, mundi natura, partibus, communi earum mixtione, mixtorum generibus, ac formis, & in anima rerum omnium, ac in cæteris alijs versatur. Plura si quis requirat, diligentem huic rei Philosophorum antiquorum lectionem adhibeat, qua & quæ hîc legerit confirmet, & alia his plura cognoscat : nos enim hîc tantummodo rerum causas communes tradere, non singula, instituimus.

B I N I S.

Lib. i

fol. i

Cap. i. de philosophia.	
2. de physica, eiusq; fine et subiecto.	5.
3. de ordine horum librorum, deq; natura et re naturali.	10.
4. de rerum initio.	18.
5. Explicatio principiorum et primo de materia.	23.
6. de secundo rerum initio.	27.
7. de tertio rerum initio.	35.
8. propositorum principiorum examinatio.	41.
9. de causis.	44.
10. de initiorum accidentibus ac primo de motu.	54.
11. de infinito, et vacuo.	62.
12. de tempore et eternitate.	70.
13. de his principiorum.	78.

Finis libri primi.

Lib. 2.

Cap. 1. De mundo.	85.
2. De mundi essentia.	91.
3. De orbis divisione, ac de callo generatione.	100.
4. De cæli circulis ac stellis.	108.
5. De elementari regione.	119.
6. De igne, aëre, aqua, terra.	128.
7. De elementorum natura.	137.
8. De communibus et mixtionibus.	145.
9. De qualitatibus omnibus ele- mentorum, ac datis vi, et co- pula.	153.
10. De mixtionis ratione et ass.	160.

Lib. 3.

Cap. 1. De communibus meteorum cau- sis, primoque de ignitis.	175.
2. De fulminibus, fulguribus, ful- guribus, tonitribus, comets.	184.
3. De his que in aëre continentur.	192.
4. De aëreorum meteorum genera.	203.
5. De aquæorum meteorum genera.	212.
6. De metallorum, ac cælestium fol- liculorum causis.	228.

Libro 4.

- Cap. 1. De communibus defectibus corporum
divisione, ac de stirpibus xxi. 242.
2. De animalium divisione, ac natura
communibus, et formis. 250
3. De humani corporis ^{natura et} partibus
et signis. 260
4. De generatione hominis, et motibus
partibus ac membris exterioribus, castis:
etque omnibus ad corpus pertinentibus.
286.
5. De quadrupedibus animalibus. 306.
6. De genere serpentium ac re-
ptilium. 315.
7. De avium genere. 318.
8. De insectis, atque omnibus exsan-
guineis animalibus. 326.
9. De piscibus et zoophytis. 334.

Libro 5.

- Cap. 1. De animi essentia opiniones pla-
tonis Aristotelis, Galeni. 344.
2. De sitatione sententiarum de ani-
matione. 352.

Cap 3 De anime unitate, ac numero, et
origine, itumq3 in corpore con-
servatione. 358.

4. De anime divisione, ac partibus. 370.

5. De vegetativa anima et eius
partibus. 374.

6. De vita, et morte, inventa et
soluta. 390.

7. De sensitiva facultate, et eius
divisione. 398.

8. De tactus sensu. 407.

9. De gustu. 410.

10. De olfactu. 418.

11. De auditu. 425.

12. De aspectu. 432.

13. De sensuum quinque collatione. 440.

14. De interius sensibus, ac primo,
de communis sensu, et imaginatione. 445.

15. De memoria, et recordatione. 452.

16. De somno, vigilia, insomniis, di-
natione ex somno. 462.

17. De appetitiva anime facul-
tate. 474.

18. De affectibus, dorminq3 ortu, ac
formis, et cunctis. 480.
19. De motrice facultate animi. 498.
20. De respiratione, et pulsibili
corporis facultate. 506.
21. De rationali animâ generatim. 514.